

UTL AT DOWNSVIEW



D RANGE BAY SHLF POS ITEM C
39 11 01 03 03 014 6

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

BP
161
J479

al-Jisr, Husayn ibn Muhammad
el-Inayat ur-rabbaniye

590

12/119

العنايات الربانية لمحافظة العقائد الاسلامية

« نام کتاب والا نصابك فهرستی »

صحيفة

۰۲ خطبة مترجم واصل کتاب

۰۵ مقدمه درت بختی شامل بحث اول علم جلیل توحیدك تعریف
نمره وفضیلتی وهر مكلفه تعلمك فرضیتی

۰۶ بحث ثانی ایمان و اسلامك حقیقتی

۰۸ بحث ثالث شرع شریف أحمدینك ایمانه منافی وایمانی مبطل
كوردیكی شیر بیاننده

۰۹ بحث رابع وجوب : استحاله . جوازك شرحی

۱۲ (باب اول) جناب حقه ایمان واهل سنت وجماعتك صفات عالی
إلهیده وارد نصوص شرعیه ایله اعتقاد ائمه لرینك بیانی بوبابده
التي فصل واردر

۱۲ فصل اول جناب حقه ایمانك تعریفی

۱۳ فصل ثانی ذات أقدم الوهیت ایچون واجب وحق الوهیتنده

۱ اضدادی مستحیل اون اوج عدد صفت کمالیه كه بونلره تفصیلا

ایمان واجبدر یقینی مفید ادله سیله برابر بیانی

۱۳ صفت اول وجود

۱۵ صفت ثانی قدم

- ١٨ » ثالث بقا
- ١٨ » رابع مخالفت للحوادث
- ١٩ » خامس قيام بنفسه تعالى
- ٢٠ » سادس وحدانيت
- ٢٠ باري تعالى حضر تلمرينك ذات وصفات إلهيه سنده تركيب اولمديغنه دليل
- ٢٠ ذات وصفات إلهيده كنديسنه مماثل اولمديغنه دليل
- ٢١ إلهينك وجود ندن عالمده بر شيئك بولنمه مسنك لزومي.
- ٢٣ تعدد الهك استحالة سنه دليل
- ٢٣ جناب حقك افعالدين بر فعلده مشاركي اولمديغنه دليل
- ٢٤ ايجاد ايله تفرد إلهي دليلي
- ٢٥ حركات اختياريه دنيلان حوادئك خلقتميله تفرد إلهي يه دليل
- ٢٥ عبديك تفاصيل فعلنه عامنك بطلانته دليل
- ٢٥ أفعال عبادك خالقي انحق جناب حق اولديغنه نصوص شرعية ربانيه تواترا وارد اولمه سنك بياني
- ٢٥ أهل ايمان ايچون باب عقايدده نصوص شرعية اعتماد واجب اولديغي
- ٢٦ افعال اختياريه ده عبديك كسبي موجود اولمه سنك امامنا الاعظم قدسنا الله بسره الانخم أفندمرك فقه اكبرنده كي

نص ایله تاییدی

۲۷ صفت سابع اراده بونک واجب وضدی کراهنک مستحیل
اوله سنه دلیل

۲۸ صفت ثامن « قدرة دلیل »

۲۹ « تاسع » « علم دلیل »

۳۱ صفت عاشر « سمع دلیل »

۳۲ « حادی عشر » « بصر دلیل »

۳۲ « ثانی عشر » « کلام دلیل »

۳۳ جناب ذات أجل واعلا ایچون سمع • بصر • کلام • صفت جلیلترینک

وجوبی دلیلنک توضیحی و اضدادنک استحاله سی مبسوطا بیانی

۳۵ صفت ثالث عشر « حیاة دلیل »

۳۶ فصل ثالث ذکر سابق صفات عالی الهی اشیا به تعلق

ایدن و ایتمیان قسملری و تعلقنک معناسی

۳۹ فصل رابع أسماء الهینک توقیفی اولدیغنی بیان ایله برابر

جناب حق ایچون ثبوتی افاده ایدن امور ایله شرع شریف

مطهرک اتیان ایتدیکی جمیع صفات و اسماء الهی به اعتقاد

ایتمه مزک وجوبی بیاننده

۴۲ فصل خامس تشبیه و حوادثه مماثلتی ایرهام ایدن شیردن

جناب حقہ نسبتی نصوص شریعتہ وارد متشابہات و بونلر
حقنہ اہل سنت والجماعتک کیفیت اعتقاد لری ولدی
الحاجۃ طریق تاویلی بیانندہ

۴۷ فصل سادس حق اقدس الہیدہ جائز اوصاف و اہل بدعک
اہل سنتہ مخالفت ایتدکاری مسائل بیانندہ

۵۴ (باب ثانی) رسل نجام انبیای عظام ملئکہ کرام کتب مقدسہ
یوم آخرت و متابعی اولان امورہ ایمان بیاتندہ در بویابندہ
بش فصل واردر

۵۳ فصل اول رسل نجام انبیای عظام علیہم السلام حضرانہ
ایمان ایتدک بیاتندہ رسل نجام حضراتی حقلرندہ کی
اعتقاد اہل سنت والجماعت بیاتندہ

۵۷ تلخیص

۵۹ اسامی شریفہ پیغمبرانی جامع ابیات مؤلف

۵۹ فصل ثانی پیغمبران کزین افندیلمزک ایادی مقدسہ

لرندہ مولای متعالک اظہاریلہ ذات معالی سہاتیلرینی تأیید
ایتدیکی معجزات سنہیک نیک شرحی و طریق وقوعی و بو

معجزہ سنہیک لرایلہ اقامہ حجت بیانی

تعریف معجزہ و اسباب معجزات سنہیک ۶۶

- ۶۸ قرآن کریمه کی موسیٰ علیہ السلام معجزه سی
- ۶۸ انفلاق بحر معجزه سنیه سی
- ۷۰ حجر دن صویک نبغانی معجزه سنیه سی
- ۷۴ رفع طور معجزه سامیه سی
- ۷۵ قوم فرعون اوزرینه جراد . قمل . ضفادع . دم ارسالی
بنی اسرائیل اوزرینه صحرای تپیده من وسلوی معجزات
سنیه لری
- ۷۶ صالح علیہ السلام ید مقدس اوزره صخره دن ناقه نک
خروجی معجزه سنیه سی
- ۷۷ سیدنا و ابو ملتنا المقدسه حضرت ابراهیم علیہ السلام
محاجه ایتدیکی ملک کافرك الفاقیلدینی نار عظیم ایله وجود
پرسود جناب ابراهیم علیہ السلام عدم احتراقی معجزه
سنیه سی
- ۸۱ عیسیٰ علیہ السلام ید مقدس لرنده اذن الہی شفاء ابرص .
اکمه . احیاء موتی . معجزه سنیه لری
- ۸۲ نزول مائده معجزه سنیه سی
- ۸۳ شیاطین ریاحک حضرت سلیمان علیہ السلامه مسخر
وحضرت داود علیہ السلام مبارک الارنده دمیرک موم

- کي يوشاق اولسى معجزه کبر الرى
 ٨٤ فصل ثالث واصل سرقاب قوسين اوادنى : سلطان هردو
 سرير اصطفيا نبينا سيدنا حضرت محمد مصطفى عليه وعلى
 آله اصفى التحايا افندمرك معجزات سنیه رسالتنا هيلرى
 وصدق دعواي ساميلرينه برهان اولان بعض طرق بيله
 معجزه قرآنيه نك وعظمت معجزات سنیه يه دال دلائل
 راستخه اقامه سنك زياده اسهاب وتبيان ايله بياني
 ١٠١ مفخر عالم صلى الله عليه وسلم افندمرك حضرتلرينك طلب
 رسالتنا انخميلرى ايله قمر ك ايكى پارچه اولسى معجزه
 کبراسى وجواز نك دلبلى
 ١٠٤ معجزات سنیه حضرت مصطفىويه دن مدة من الوقت
 شمسك وقوف وبعد المغيب ردى كذلك بو خارقه نك انبياء
 بنى اسرائيلدن يوشع بن نون عليه السلام ايجونده منصه جلوه
 كمر ظهور اولسى وجوازى
 ١٠٨ اصابع سامى حضرت پيغمبرى صلى الله عليه وسامدن آبك
 نبعان ايمه سيله چوق كيمسه لرك صويه قائمه سى وطعام قليلى
 بالتكثير جم غفيرى طيورمه سى معجزه کبراسى وجوازى
 ١٠٩ معجزات سنیه جناب احمديدن يدين اسعدين رسالتنا

هیلریله مجرد لمس و یادعا بیور مسیله امراض عضال اصحابك
شفا بولسی و صحابه کزیندن برذاتك برکوزی میدان حربده
حقیقده یغنده انی محله اعاده بیوروب اولکی حالتدن دها
احسن اوله رق صحابی مذکورك کوزینك عودت ائمه سی
و مجرد دعای عالی ا کر میلریله موتی احیاء معجزه کبرالری
و بونلرک جوازی

معجزات سامی نخر دو جهانندن طفل رضیع ، و حیوان اعجم . ۱۱۰
و حبرك نطقه ، کله لری معجزه سامینك و قرآن کریم
سبحانیده بومعجزه سنیه نك حضرت سلیمان علیه السلامه
هدهدك تکلم ائمه سی صورتیه نظیری وارد اولدینی و جوازی
معجزات سامی سید الکوینندن میدان حربده کفار ۱۱۳
خا کسارك یوزلرینه بر اوج طبراق ائمه سیله اعینه کفارك
کلیسنه او طوپراقدن اصابت ائمه سی معجزه کبراسنك
و جوازنك بیانی

معجزات سنیه نخر المرسلیندن ولو یوز لرجه سنه صکره اولان ۱۱۳
مغیبانی اخبار بیورمه سی و بونلردن برنبده سنك سرد
وائیانی و استانبولاك فتحی بوجه دن اولدیغك بیانی
شریعت غرای محمدینك حاله نظر اولئمه سی و شریعت ۱۲۱

- مطہرہ سی صدق رسالت دولترینہ دلیل واضح اولدیغنیکی بیانی
 ۱۲۲ زبده شریعت مطہرہ نک و اوامرو نواہینک تلخیصی
- ۱۲۳ صلات ؛ صوم ، زکات ؛ حج ؛ نک بعض أسرارى اخلاق شریعت
 بیضا و بعض اوامرو نواہینک أسرارى
- ۱۲۷ مفخر عالم صلى الله عليه وسلم امی اولمسیله برابر بویله بر
 شریعت کتیرمه سی صدق رسالت محمد یلرینہ اکبر دلیل
 اولدیغنیکی بیانی
- ۱۲۹ نور مجسم عالم علیه صلوات الله المکرم افندمن حضر تلرینک
 امی اولمسیله برابر بو شریعت غرایى کتیرمه سی اوزرینہ
 بعض مشرکینک ایراد ایتدیکی شبهه لرك ردی بیاننده
- ۱۳۱ ذات عالی صفات پیغمبر یلرینک و اخلاق و شمائل نبویلرینده
 کی جمال صورت ؛ وفور عقل ؛ وجوامع الکلمه ؛ نائیلت ؛
 حلم ؛ عضو ، صبر ؛ جود ، سخاء ، سماحت ؛ شجاعت ؛ حیاء ؛
 واعتدال اعضا ؛ و معامله بالحسنی . و دها بونلر مثلی مکارم
 لاتحصی دن احوال سنیه سید المرسلین بیاتنده
- ۱۴۸ سردقتر کائنات ، علیه اکمل التحیات افندمن حضر تلرینک
 جماعت جاهلین اراسنده یتیم اوله رق برورده اولمہ سی ایله
 برابر او محاسن جلیله یه اختصاص نبویلری و بومکارم علیه

ایله ذات سامی رسالتنا هیلری زینتیاب اولمه سی طرف
 اقدس الهمیدن محض بر عنایت سبحانی اوله رق منصب رفیع
 رسالته اقامت بیورلدینی و بویله بر صفات و اخلاق فاضلی
 احراز ایدن ذات خجسته صفات کذب و احتیال و انسانلری
 الدائمق صفاتنه ملابس اولیه جنی

۱۴۹ امت مرحومه احمدیه سنک چوق شرلردن محض خیره
 قلب ایتمه سی صدق عالی محمد یلرینه دال معجزات
 سامیلری اولدینی

۱۵۰ دین مبین محمد یلرینک جهاد ایله قائم اولمه سی شبهه سنک
 ردی و دین مبینده بویله بر حالک اولدینی و جهادک مشروعی
 دعوای جلیل جناب احمدینک نبوتی و ذات سامی رسالتنا
 هیلرینه چوق ذواتک تبعتمدن صکره اولدینی و امر جهادک
 کفر اوزرینه اصرار ایله موغظه پذیر اولمیان اشخاص حقنده
 مشروع اولدیغنک بیانی

۱۵۴ ذات سامی نبوتنا بیلرینک محبت و تعظیم اهل بیت احمدیلری
 و اتباع عالی شرعیلری و شریعت غراسنک حاملرینه محبت
 و تعظیم اولانده سی نسب شریف محمدیلری و اسماء اولاد کر
 امیلرینی بیامک محض سید العالمین افندمز حضرتلرینه

محبت اولدیغی

۱۵۵ سہالار انبیا علیہ اکمل التحایا افندمز حضرت تیرینک ابورین
اسعدین رسالتینا ہیلرینک نجاتنی اعتقاد ایتک ذات سامی
دولتیرینہ قارشو بر حسن ادب اولدیغنک بیانی
۱۵۶ اجماعک منعقد اولدیغی امور عدیدہ بیانی

۱۵۸ ذات عالی رسالتینا ہیلری کافہ ناسہ مبعوث اولمہ سی شرع
شریف احمدیلری آخر زمانہ قدر نسخ اولمامسی پیغمبران
کزینک افضلیتی ایلہ برابر ذات عالی صفات محمدیلرینک افضل
مخلوقات الہی اولمہ سی ونبوتک غیر مکتسب اولمہ سی اجماع
مذکور جملہ سندن اولدیغی

۱۵۹ ارہاص . کرامت : معونہ ، استدراج ، خذلان : منقسم
اولان خوارق عاداتک وحکمیتلری وحق ولی دہ کلام

۱۶۲ فصل رابع ملائکہ عظامہ ومن عند اللہ پیغمبران کرام
علیہم صلوات اللہ اجمعین حضراتہ انزال اولنان کتب جلیلہ یہ
قضا وقدر سبحانی یہ ایمان

۱۶۳ ملائکہ کرامک عصمتلری . ہاروت ماروت قصہ لری حقندہ
کلام . حفظہ کرام ، کتبہ نخام . ملک الموت علیہ السلامہ ایمان

- ۱۶۹ رسل نغام حضراتنه من عند الله منزل کتب مقدسه یه
ایمان وکلام اقدس الهینک ایکی معنی اوزرینه اطلاق وکلام
الهینک حادث ویا مخلوق اولمسیله حکم اولنمقدن منع
قضا و قدره ایمان حقنده کلام ۱۷۰
- ۱۷۳ فصل خامس یوم آخرته و مشقالاتنه بعثه وانندن اولکی
احوال موت و قبره وانلره تابع اموره ایمان و وارد شه بهه
لرک ردی بو مقامده وارد بعض شبهه لرک توضیحا اندفاعی
روح حقنده کلام . شان روحده وارد شبهه لرک دفعی ۱۷۹
- بعث حقنده کلام وانندن شبهه یی دفع نوعا بسیط اوله رق بیانی ۱۸۳
- یوم قیامة ده اعضاء بشرینک و روی زمینک شهادتی اوزرینه
کلام دفع شبهه ۱۸۶
- متن جهنم اوزرینه مدود صراط حقنده کلام و شان صراطده
شبهه لرک دفعی ۱۸۷
- یوم قیامة دن اول شمسک مغربدن طلوعی حقنده کلام
دفع شبهه ۱۸۸
- یوم قیامة دن اول یا جوجک مأجوج خروجی حقنده کلام
و موجودیتلری حقنده کبی شبهه لری دفع ۱۸۸
- آخر زمانده سیدنا عیسی علیه السلامک نزولی حقنده کلام ۱۹۱

دفع شبهه

۱۹۲ خاتمه باب بعد الموت بعثتک حصولنده عقولک اذعان قلوبک

اطمئنان ایتدیکی جمله أدله اقناعیه بیاننده بونده نوع بسط وار

۱۹۳ شو مقامدن معلوم اولور که منکر معادک مذهبی برشردر که

دیگر شراکا مماثل اوله مز بوراده بعض بسط وار

۲۰۰ (باب ثالث) اعتقاد ده اعتماد اولنان نصوص شرعیده وارد

شبهه لرك ردی یاخود نصوص مذکورہ بینیلہ ظاهراً منافی

دلیل عقلی قاطع ایله ثابت امور ایله توفیق بوده درت

فصل در

۲۰۰ بو مقامده اوج مقدمه احتیاج وار برنجی مقدمه احکامده

معتقد نصوص شرعی بیاننده واحادیث شریفه دن متواتر

مشهور آحاد بیاننده

۲۰۲ ایکنجی مقدمه شرعاً اعتقاد واجب اولان تقيضي محتمل

اولمیان دلیل عقلی قاطعک دال اولدیغی امور دریاخود

رسول الله صلی الله علیه وسلمدن ثبوتی دلیل قطعی شرعینک

دال اولدیغی امور در ثبوتی قطعی اولان شئیده رسول

معصوم ک غیر یی تقلید واجب اولدیغی کی ظواهر نصوصه

مخالف فنونک مدعاسنه دلیل قطعی ثابت اوله ینجه رسول

معصومك غير سني لا سيما بعض أرباب فنونی تقلید جائز
اولمدیغی

۲۰۶ اوجنیجی مقدمه شریعت محمدیه وشوایع سائرہ دن مقصد
خالق معرفۃ اللہ ارشاد ایدن اموری بیاندر اما کائناتک
مباحث ونوامیسنه تعریضی شریعت غرای محمدیه وشرایع
سائرہ نک مقاصدن دکلدر

۲۰۷ فصل اول سماویات ارضیات حقنہ وارد نصوص شرعی
اوزرینہ مورود شبه لری ردوبونلر ایله ظواہر نصوصہ
مناقض دلیل عقلی قطعی ایله ثابت اموریننی توفیق بونلر
حقنہ وارد نصوص واقوال علمای شریعتک اجمالی

۲۱۱ نصوص شرعیہ مذکورہ مناقض فلاسفہ متأخرین مذہبنی
اجمال وبونی اعتقاد ایدلمہ سنک کی حکم ک بیانی

۲۱۴ دلیل عقلی قائم اولمزدن اول وصرہ اقوال فلاسفہ بی اعتقاد
حقنہ کی حکم ک بیانی

۲۱۳ فلاسفہ نک فضاده کوا بک قیامیلہ حکماری وسماہدہ مرکوز
دکلدر دیمہ لریله ظواہر نصوص شرعی توفیق

۲۱۳ فلاسفہ نک زرقہ یعنی کوکلاکدن بزہ کورینان لون جودر
دیملریله نص شرعی بینندہ توفیق

۲۱۴ فلاسفہ نك كرويت ارضه حكملريله نص شرعى پيئنده توفيق

۲۱۵ فلاسفہ نك شمس حول ارضه سير ايتمز قوللريله نص

شرعى پيئنده توفيق

۲۱۸ فلاسفہ نك سموات . عرش . كرسى . قلم . لوح . جنت

جهنم ك وجود لرینی انكار لری و بوانكارده انلري رد

۲۱۹ فلاسفہ نك ارضينك يدى عدد اوله سنى انكار لری انلری

رد ويا توفيق

۲۲۰ قصه ذو القرنينده شمسك عين حشته ده غروبنى كور مسندن

طولاي وارد خبر فرقانينك توفيق

۲۲۲ فصل ثانى شؤن ملائكه و جنده وارد انصوصدن شبهه لری رد

۲۲۳ ملائكه كرامى عدم رؤيتمزدن و حضرات ملائكه نك تشككه

اقتدار لرندن شبهه يي رد

۲۲۴ ملائكه كرام اجسام لطيفه اوله لريله برابر اعمال عظيمه يي

ايشله ملرندن شبهه يي رد

۲۲۵ جدا قيصه بر زمانده مسافات شاسعه يي قطع ايتمه لرندن

شبهه يي رد

۲۲۷ بيان سابقدن سيدنا و سيد العالمين سلطان ملائك سياه عليه

صلوات الاله افندمن حضرت تلرينك معراج شريفلى حقهده

- وارد شبهه نك ردیفی استنباط
 ۲۲۹ عرش بلقیسك مجلس سلیمان علیه السلامه بلاد یتندن کتیرلمه سی
 دفع شبهه
 ۲۳۰ فصل ثالث مطر وامثالی کی امور جویه ده وارد نصوص
 شرعینك بعضیسنندن شبهه بی رد
 ۲۳۲ رعد برق صاعقه نك حقیقتنده وارد نصوص شرعیدن نوعا
 مبسوط اوله رق شبهه بی رد
 ۲۳۵ جناب حقك زینت سماء دنیا قیامه سی انلری شیاطینی طرد
 ایچون رجوم قیله رق شیاطیندن سمایی انلرایله حفظه ایتمه
 سندن وارد اولان اخباره طاری شبهه بی رد
 ۲۳۷ عیسی علیه السلامدن ارض نور اوزرنده تورده صخره
 صخره ده حوت اوزرنده دیبه روایت اولنان خبردن
 شبهه بی رد
 ۲۳۷ فصل رابع نصوص شرعیهدن متفرق صورتده اولان شبهه
 لرك ردی
 ۲۳۸ ابونا حضرت آدم وامنا حضرت حوی و حضرت عیسی
 علیهم السلام خلقت انسانیده کی نظام بشرینك استیفایی
 اولمقسزین خلق اولنمه لرندن وارد شبهه نك ردی

۲۳۹ اصحاب کھفک مغارہ دروتندہ ۳۰۹ سنہ طور مہ لرینک

شبهہ سنی رد

۲۴۰ نوع بسط ایله خارجہ حادث امورہ رؤیای منامیہ نک

دلالتی شبهہ سنک ردی

۲۴۱ حقیقت سحر و آثاری ایضاح واسہاب ایله شبهہ لک ردی

۲۴۵ اجسامک سقم واضرارندہ عینک تأثیری خبری حقندہ

وارد شبهہ بی رد

۲۴۶ عیاذ باللہ «طاعون» طعن چندندر خبری حقندہ کی شبهہ بی رد

۲۴۷ آفت و مرضہ مبتلا اولنلر صحیح و سالم لک یانہ کتیر لمہ سون

حدیث شریفی ایله مجنومدن اسد دن فرارک کی فرارایت

«ولاعدوی» حدیث شریف لرینک ییننی توفیق و دفع شبهہ ۰۰

زلزلہ ارضہ مسلط برملکک عروق ارضی تحریکیلہ حادث

اولور حدیث شریفی حقندہ کی شبهہ بی رد

۲۵۰ اجسام متقدمینک کبر و عمر لرینک طویل اولہ لرینی مبین

حدیث شریف اوزرینہ وارد شبهہ بی رد

۲۵۴ خاتمہ امر اسلام و مسلمین ایله قائم ثغور اسلامی محافظ بر

خلیفہ نک وجوب نصبی بیاتندہ در نسل اللہ حسن الخاتمہ آمین

كتاب

el-ḥāyāt ar-rabbāniye

العنايات الربانية

﴿ في ترجمة ﴾

كتاب الحصون لمحافظة العقائد الاسلامية

أز اثر بروسه علمای کرامندن صاروخانی تیمورجوی کمال الدین
زاده محمد نور الله أفندی حفظه الله ونفع بعلمه آمین

﴿ طبعة اولی سنة ۱۳۲۷ هجرية ﴾

على نفقة

﴿ جناب المؤلف و محمد أمين الخانجي الكتبي وشركاه ﴾

مراحتی مؤلف و ناشرینه محفوظادر

(مطبعة السعادة بجوار محافظة مصر)

بِسْمِ اللَّهِ الرَّحْمَنِ الرَّحِيمِ

BP
161
J479

﴿ افاده مرام ﴾

شبهه سزدرکه اکتساب سعادت دارین محض دریگتای کرانهای
انسانی الایش و مزخرفات دنیویه دن بالتطهیر علم جلیل توحیده
توسل ایله ترین ذات وصفات ایتک فریضه سیله حصول یافته اولور
أعصار أخیره فلاسفه متقدمین مسالکینه مخالف فلسفه جدیده
أربابی زمانزدن أول معروف اولیان أصول ریاضیه وطبیعیه یه
اعتماداً السنه طغی نصوص شرع قویقه قارشو کشاده وبوسیله أصول
دین میبخزی معرفتده تمکن یاب کمال اوله میان ساده دلان آدمیانک
ایمانلرینی اسانسدن قلع ایده جک شبهه لر آماده ایلدیلر

بوابده أسلاف علماء اثرینه تبعیت ایدن بقیة العلماء المتأخرین علامه
زمان نعمان دوران صاحب الفضیلة والکمال ذوالمآثر الجلیلة والاجلال
السید حسین افندی ابن محمد الجسر الطرابلسی نفعا الله بعلمه
العالی حضر تلی او نقط مهمه نازکه بی نظر دوربین بصر اهمیتله
بیش تأمل ودقت فاضلانه سنه وضع ایده رک منکرین ضلالت قرینک
طرف معاندینلرندن نصوص شرعیه مزه قارشو ایراد ایتد کیری

اشکالات و شبهاتك رفع و ازاله سنی کافی و عقائد اساسیہ اسلامیہ
مزى حافل « کتاب الحصون » نامیلہ بر تألیف متین عالم اسلامہ
ہدیہ بیور مشر رضی اللہ عنہ

فقط لسان عرب اوزرہ تدوین اولند یغندن لسان مذکورہ آشنا
اولیان اخوان دین میبغزہ ناچیزانہ بر خدمت اولمق اوزرہ مستغنیاً
بحول اللہ تعالیٰ لسان عذب البیان عثمانیہ کتاب مذکورى ما لا
ترجہ ایتدم

بوابده واقع اولان قصوری دامن عفو ایله ستر بیورمه لری
بالجمله اخوانمزدن رجایدرم

جناب مؤلف عصر حاضرہ مطابق عقائد اسلامیہ فی مدافع بر
کتابك لزومنی کوستروب او سیاقده اصل مترجمك تألیف اولندیغنی
اوزون اوزادیہ سرد و بیانندن صکره « کتاب الحصونی » بر مقدمه
اوج باب و هر باب اوج فصلی مشتمل مهمات اصول دینیہ دن حاجت
مس ایدن مسائل جلیله فی حاوی دین مبین محمدی صلی اللہ علیہ وسلمده
وجوب خلافت جلیله فی وعامه مسالمنک مقام خلافتہ اولان حقوق
إطاعت و انقیادیہ سنی مبین بر خاتمه فی محتویدر دیه بسمله کش
مبادرت اولیور

مترجم فقیر ده بو ترجمه فی « العنايات الربانية فی ترجمه الحصون
لحفاظة العقائد الاسلامیة » نامنی بالتوسیم اصل کتابك مقدمه سندن

ترجمه به بدء ومباشرت ایتدم کتاب مستطاب مذکورک ترجمه می
 شوزمان سعد اقتران مشروطیته باخصوص ایلک مشروطی بادشاه
 عالی جاهمز سلطان (محمد رشاد) خان خامس حضرتلرینک ایلک
 سنه جلوسیه هما یونلرینه شرف تصادفی مترجم ایچون ایروجه موجب
 میناها تدر . وبالله التوفیق

فی ۲۹ جمادی الاولی سنه ۱۳۲۷ هـ ۵ حیران سنه ۳۲۵

صارو خانی تیمورجوی

کمال الدین زاده

محمد نور الله



* مقدمه *

دربحثی مشتمل در

(بحث اول) علم توحیدك تعریف ثمره و فضیلتی و هر مكلف
 او زینیه تعلمك فرضیتی بیاننده در علم توحید ادله یقینیه
 ایله عقاید دینیه بی اثباتدن باحث بر علمدر . علم توحیدك ثمره سی
 براهین قطعیه ایله صفات الهیه و صفات پیغمبرانی ییلوب سعادت
 ابدیه یه نائل او لمقدر بو علم جلیل ذات اقدس الهی یه و ذوات
 پیغمبران کزینیه متعلق اولدیغندن اساس و افضل علوم دیندر
 زیرا شرف علوم شرف معلوم ایله در . علم توحیدی ابو البشر
 حضرت صلی الله آدم علیه السلامدن نبینا حضرت محمد مصطفی علیه
 أصنی التحایا افندمزه قدر کذران ایدن پیغمبران کزین علیهم صلوات
 الله أجمعین حضراتك كافه سی جانب فیض جالب الیهیدن اتیان بیور .
 مشر در . اهل سنت و جماعتك مقتدا بهلری شیخ ابو منصور ماتریدی
 و شیخ ابو الحسن الاشعری رضی الله عنهما ^(۱) حضراتی علم جلیل

(۱) امام ماتریدی نك اسم شریفلری محمد بن محمد بن محمود
 الماتریدی در كه امام الهدی و السنه در . سمرقند ده او چیوز او توز
 اوج سال هجرتنده عازم رزمكاه بقا او لمشدر . . ابو الحسن الاشعری

توحید ده کتب جلیله تصنیف و کلام مخالفین ردایتکده أدله و براهین اقامه ایدن ذوات معالی سمانک اشهری اولدقلرندن علم جلیل مذکورک واضعی امامین مشار الیهما حضراتی اولدیفی شایع اولدی • بو علم شریفک تعلیمی ولو أدله اجمالیه ایله اولسون ذکوروانلث هر مکلفه فرضدر اما أدله تفصیلیه سنی بیلمک فرض کفایه درأمت ناجیه احمدیه دن بعضیلری آشنا اولسه باقیلرندن ساقط اولور جزما معتقد اولان شکی ترددی قبول ایتیمان عقاید دینیه سنده غیره تقلید ایدن کیسه نک ایمانی صحیحدر لکن قادر اولوبده أدله یه نظر ایتیمکی ترک ایدن کنهکار اولور اکر عذیم الاقتدار ایسه آثم اولمز اشهر مباحثی اساس دین ومنبع یقین اولان توحید جلیل الهیدن بحث اولندیغی ایچون علم شریف مذکورہ (علم توحید) نامی ویرلمشدر

(بحث ثانی) حقیقه ایمان واسلام بیاتنده در جناب حقک عبادینه تکلیف وانک جزاسنی جنتنه دخول وجهنندن نجاته مدار قیلدیغی ایمان سیدنا وسید العالمین ذات رسالتناه حضرت محمد معالی اکتناه علیه

صحابه کزیدن ابو موسی الاشعری حضر تلمرینک نسل عالینسندندر ائیکیوز القمش سالنده تولد و اویچوز او توز بش سنه سنده مرتحل دار آخرت اولمشدر رضی الله تعالی عنهما ونفعنا الله بعلومهما آمین

صلوات الاله افندمز حضرتلرينك جانب جليل الهميدن اتيان بيوردينى
شيلرى تصديق ضروريدر يعنى نخر دوجهان عليه صلوات الرحمن
افندمز حضرتلرينك طرف اقدس سبحانيدن كتيرديكى شرايع
واحكامده صادق اولد يعنى جزماً اعتقاد وباذعان القلب يقيناً بواحكام
الهيه يي اتيان بيورد يعنى بيلمكدر بونلرايسه جناب حقه • ملئكه
كزيته • كتب منزله يه • پيغمبران فخامه • يوم آخرته • قضاوقدر
سبحانى يه • صلاة • صيام • زكاة • حج ك فرضيته • ظلماً بي
كناه اولان كيمسه نك اتلافى • زنا • لواطه ودهابونك امثالي شيلرك
حرمتيه ايمان كبي شيلردر • • اسلام ما جاء به النبي يه ظاهراً وباطناً
خضوع وانقياد وبالضروره كلديكنى بيلمكدر • ايمان واسلام يكدىكرندن
• نفك اولمز هر مؤمن مسلم وهر مسلم مؤمندر زيرا پيغمبر على رهبر
مز عليه الصلاة والسلام افندمز حضرتلرينى مصدق اولان ذاتك او
ايتيان بيوردينى شريعت غراى محمديسنه خاضع وبويله اولان بر
ذا تكده نبي مشار اليه صلى الله عليه وسلم افندمز حضرتلرينى مصدق
اولسى لازمدر • يكدىكريله عقد مصاهرت وخلفلرنده نماز قيلمق
بعد الوفات مقابر مسلمينده دفن اولنمق كبي احكام دينيه يي اجرا
ايچون كلمه شهادتى يعنى أشهد ان لا اله الا الله وأشهد ان محمداً رسول الله
كلمه طيبه سنى سويله مك شرطدر • دلسلك كبي بر عذر دن ناشى
كلمه شهادتى سويله يه ميان وياخود قليبيله ايمان ايتديكى عقينده وفات

ایتمسبه یا خود قلباً بعد الایمان کلمه شهادتی ایمانه قادر اوله میان کیمسه
 لر عند الیهیده مؤمن و آخرتده ناجیدر لر فقط بعد العرض عناداً کلمه
 شهادتی تکلمدن امتناع ایدن کیمسه العیاذ بالله کافر در و حصول
 یافته اولان تصدیق قلبیسنه اعتبار یوقدر زیرا بویه بر امتناعی شرع
 شریف مطهر ایمانه منافی قیله رق صاحبک کفریله حکم ایتشد
 (بحث ثالث) شرع شریف احمدینک ایمانه منافی والعیاذ بالله ایمانی
 مبطل اعتبار ایتدیکی شیر بیاتنده در • شرع شریف اُحمدی صلی الله
 علیه وسلم ایمانه منافی أمور دن نهی و تحذیر و هر نقدر قلباً مصدق
 و ما جاء به الرسول منقادایسه ده أمور مذکوره بی ارتکاب ایدن
 کیمسه نک کفریله حکم ایتشد • • ایمانه منافی أمور بالاخیار
 صفحه سجود قرآن عظیم حدیث شریف شریعت مطهره رسل خاتم
 اسم سبحانی صفات الهی اوامر و نواهی یزدانی کبی دین مبین
 محمدینک تعظیم قیلدینی محترماته استهزا صلات حج کبی فرائض دینییه
 حقارت و بونلره شتم سب یا خود کلمه کفرایله تلفظ و بونلر اُمثالی
 شیردر که بونلر ایمانه منافی اولوب مرتکبینک کفر و خذلانه حکم
 اولمشدر • کذلک بر انسان رسول کبریا علیه اُکمل التحایا افندمن
 حضرتلرندن یقیناً ورودی ثابت اولان نصوص شرعیهدن بریسنی یعنی
 آیات قرآنیه و احادیث متواتره بی تکذیکه کذب او زینیه
 توافق و تجمع لرینی عقل تجویز ایمان بر جوق جماعت مسلمینک شارع

اعظم عليه صلوات الله الا نغم افند من حضرت نرندن نقل ايتدكلى
 احاديث شريفه دن بريسنى تكذيب يا خود شرعا حرمى قطعياً
 ثابت وحكمت قباحتى ظاهر اولان برشئ استحلل يعنى نفس
 معصومى قتل وزنا وامثالي كى شيلرى استحلل ايتسه مستحل
 مذکور تصديق ايمانى وانقياد اسلامى يى اخلال ايتش وبونلرى ابطال
 ايدن شئ اتيان ايتش اولديغندن انك اوزرينه شرعاً كفرى ايله
 حكم او لنور والعايد بالله تعالى كفر ايدن هر بر كيمسه اوزرينه تجديده
 يمان واسلامه مبادرت وار تكاب ايتديكى خباثتدن توبه ايتك لازمدر
 عكسى حالنده دنيا ده قتل مستحق عقبا ده ايسه جهنمه مخلد اولور
 نعوذ بالله وبه نعتصم

(بحث رابع) احكام عقليه ثلاثه . يعنى وجوب . استحاله . جواز بيانده
 در جناب حقه ايمان ذات اقدس الوهيتى ايجوت واجب وحق سامى
 ربوبيتده جائز ومستحيل اولان امورى معرفتدر رسل نغام ملكه
 عظام كى ايمان ايدلسى واجب اولان سائر مؤمن بهه ده ايمان بويله
 در . احكام عقليه كنديلرينه منحصر وبوند بشقه بر حكمتى حائر
 اوله ميان وجوب واستحاله وجواز عقليتك معنا لرينى بيانه بسمله
 كش ابتدار اوله لم . وجوب عقلى . بر شيئك انتفاي قبول ايقال
 سيدر واجب عقلى انتفاي قبول ايتميانه دير لر وجود واجب «واحد
 نصف اثنين» كييكه بونلر واجب عقليدر انتفاء وعدمى قبول ايتمزلر

لکن واحدك نصف اثنين اولسی واجب عقلی بدیهیدر دلیلہ محتاج
 دکلدر • وجود واجب واجب عقلی نظریدر دلیلہ محتاجدر استحالہ
 ثبوتی قبول ایتما مکدر • محال • مستحیل عقلی • ثبوتی قبول ایتیانہ
 دیرلر ثلاثہ نك نصف عشرہ اولسی • وشریک باری نك وجودی
 کییکہ بونلر محال و مستحیل عقلیدرلر • اولکی مستحیل عقلی بدیهیدر
 دلیلہ محتاج دکلدر ایکنجی مستحیل عقلی نظریدر دلیلہ محتاجدر
 جواز ثبوت و انتفائی قبول ایتیمکدر • جائز عقلی ثبوت و انتفائی قبول
 ایدنہ دیرلر • زیدك سفرہ کتسی و حجرک باقدرت سامیہ ربانیہ
 ذہبہ قلب اولسی کی اولکی جائز عقلی بدیهیدر دلیلہ محتاج دکل
 بوکا جائز عادیدہ دیرلر کہ وقوعی عادہ حصول یافته اولوب عقول
 استغراب ایتیز ایکنجی جائز عقلی غیر بدیهیدر ثبوت جوازی دلیلہ
 محتاجدر بوکا جائز غیر عادی ده دیرلر کہ عادہ وقوعی نادر اولور
 ویاھیچ وقوعہ کلز بونك ایچون بادی امرده انی عقول استغراب ایدر
 لکن بادلیل بوندن بحث اولنورسه وجدانی جائز الوقوعدر وقوعی
 مستحیل دکلدر • عصانك ارڈرہایہ انقلابی • بحرك انفلاقی •
 وجود آدمی بی آشك عدم احراقی • حیوان اعجمینك نطقی کی
 بونلرک وقوعی هر نقدر نادر ایسه ده دلیل ایله عند البحث بولنملری
 جائز الوقوعدر امور مذکورہ واجب تعالیٰ حضر تلرینك تحت تصرف
 قدرۃ الہیسنده داخلدر عادتدن قطع نظر ایتدی کمزده بو کی امور

خلقت انسانیدن اغرب دکلدر زیر انسان اولاً طور اراق بعده نباته
 بالانقلاب غذا • دم • نطفه • علقه • مضغه • مره • ثامنه ده • سمیع بصیر
 اوله رق حیوان ناطق اولیور صکره ده عالم محقق حکیم مدقق اولیور
 بو خلق انسانی عادت مقدسه الهیه اولماسه عند العقل اغرب غرائبدن
 معدود اولورایدی مطر روی زمینه نازل اولیور انکله درلو اشجار
 طعم و خواص و رایحه لری متنوع و نیکارنک اثمار ساحه آرای حصول
 اولیور بونلر عادة الله اولماسه اعجب عجایبندن معدود اولورایدی
 افاجق برقیغاجم حدیدک حجره چار پالمسندن ظهور ایدیور بر شهر
 عظیمی دروننده کی اشیا و اها ایسی ایله برابر بلع ایدرک کل ایدیور
 عادت علیه ربانیه اولماسه بو تصدیقندن ابعده برشی اولورایدی بعض
 اجزا نك تفاعلندن حصوله کلان بر قوه غیر مرئی بیوک جسملری
 تحریک و جرایدیور و بونک واسطه سیله ابعاد چار اقطار جهانده
 و اعماق ابجار و اسعه ده افکار بشریه نقل اولنیور که بوده قوه
 کهربائی دنیلان سیال الکتریقیه در دها بونلره مماثل حوادث
 کائنات و شؤونات عالمدن بر طاقم امور که بینزده تکرر وقوعندن
 بشقه عقول بشریمزه غرابتلی دائماً نمایان اولیور ایشته عادی و غیر
 عادی امور بیننده فرق بریسنده عادتک حصولی دیگر نده عدم حصولیدر
 والا دلیل عقلمی به نظر ایتدی کمزده هرا یکی قسمی وقوعی جائز
 و اکوانی ابتداع و اختراع و درون کائناتده حیر تبخش افکار اولان

أسرار صمدانیسی ایداع بیوران موجد عالم تبارک و تقدس حضرت تلرینک
 تحت تصرف قدره ربانینسندہ داخل بولدق • بوده بیلغیلیدرکه
 پیغمبران کزین صلوات الله علیهم أجمعین افندیلر من حضرتلر ایدی
 مقدسه لرندہ او واحد ذو الجلالک اظهار ایتدیکی جائزات غیر
 عادی جانب فیاض اقدسدن خبر ویردکلی امورده صادق اولد
 قلرینه شاهد برر معجزه سنیه درکه ان شاء الله تعالی مباحث آتیه ده
 شرح و بیان قیلنه جقدر

باب اول

جناب حقہ ایمان و صفات جلیل الہیدہ وارد اولان نصوص
 شرعیہ ایلہ اهل سنتک اعتقادی بیاتندہ درکہ الی فصلی محتویدر
 (فصل اول) جناب حقہ ایمانک تعریفی بیاتندہ در •

مولای متعال حضرت تلرینہ ایمان اتیمہ نک معناسی صفات اللہ دن او مولای
 مقدسمر ایچون واجب و جائز و مستحیل اولانی بیلہ رک جزماً —
 اعتقاد اتمکدر بر عبد مؤمن او واجب الوجود حضرت تلرینک شان
 عالی الوهیتنه لایق هر صفات کمالیه کندی ذات پاک احدیتی ایچون
 واجب و هر نقصان صفتلر ذات اقدس الوهیتنه مستحیل و هر ممکنک
 فعل و ترکی حق الوهیتندہ جائز اولد یغنی جزماً بالاجمال اعتقاد
 اتمکدر لکن مرتبه سامی الوهیتک مداری و شان عالی ربوبیتک عظمتی
 وجود لرینہ وابسته اولان اون اوج عدد صفات کمالیه نک ذات اقدس

احدیت ایچون وجوبنه و بو صفات جلیله نك اضدادی حق أحق
 الوهیتندہ مستحیل اولدیغنه بروجہ تفصیل اعتقاد ایتك هر مؤمنه
 فرضدر •• أون اوج صفت جلیله و اضدادی بروجہ آتی بیان اولنه جقدر
 وجود • ضدی • عدم • قدم • ضدی • حدوث • بقاء • ضدی
 فناء • مخالفت للحوادث • ضدی • مماثلت للحوادث • بنفسه قیام
 الہی • ضدی بغیرہ قیام الہی • وحدانیت • ضدی عدم و وحدانیت
 ارادہ • ضدی • کراہیت • قدرہ • ضدی بحز • علم • ضدی جہل
 سمع • ضدی صمم • بصر • ضدی • عمی • کلام • ضدی • بکم •
 حیات • ضدی • موت در • بو اعتقاد تفصیلینک کمالی یقینی افادہ
 ایدن براہینک اتیانیلہ در • باعون و عنایت ربانی بواون اوج صفات
 جلیله نك وجوبی و اضداد نك حق أحق الوهیتندہ استحاله سی یقینی
 افادہ ایدن ادلہ مقنعہ سیلہ شرح و بیان قیلنه جقدر

(فصل ثانی) تفصیلا ایمان واجب اولان أون اوج عدد صفات کمالیہ

و اضدادینک ادلہ یقینیہ سیلہ برابر شرح و بیانی حقندہ ر •

وجوہ ذات باری ایچون واجب ضدی عدم مستحیلدر • دلیلی •
 محتویاتیلہ مشاہدہ اولنان شو عالم حادثدر هر حادث ایچون بر محدث
 لازمدر او یلہ ایسہ بو عالم ایچون بر محدث البتہ لازمدر • اما عالمک حادث
 اولدیغنه دلیل • صور حیوانیہ نباتیہ معدنیہ دن و مادہ و جوهر عالمک خالی
 اولدیغنی بونلرک غیر بر طاقم صورتلر دن حادث اولان اعراضہ

عالمك ملازم اولسی حدوتنه دلالت ایدر که ملازم حادث اولان هر شیء
حادث اولور


توضیحی • اعراض زائل اوله رق دیگر لرینی خلف براقه لری
دلیلہ حادث لرلر قدیم زائل اولمز زیرا قدیم بالذاته قدیم و یا شیء آخر
قدیم وجودینی استلزام ایدر معنا سنه لغیره قدیم ذات قدیم و یا
مستلزمی قائم اولدینی مدتیجه بونک عقلا زوالی جائز دکدر بنابرین
اعراض مذکورہ نك حدوتی ثابت اولدقده بزیرزکه اساس ماده
وجوهر عالم یا قدیمًا موجود واعراضدن خالی اولور بوايسه محالدر
زیرا بوملازمت اعراضدن خالی وکدر چونکه عالمک حرکت سکون
وجمع صوردن خلوی تصور اولنه مز یا خود اصل عالم حادث اولمقله
اعراضده حادث اولدی شو حالده عالم حادث اعراضده حاندر بناء
عليه کافه محتویا تیلہ حدوت عالم ثابت اولدیکه مطلوبده بودر اماهر
حادث ایچون بر محدثک لازم اولمسنک دلیلی بلا محدث بر حادث
بولنسه ترجیح بلا مرجح لازم کلیر بوايسه مستحیلات بدیهیه دندر •
ترجیح بلا مرجحک توضیحی ایکی کفه سی ثقلنده متساوی بر میزانک
کفتینی متوازن و یا خود مثلا صول کفه سی لسبب أرضه زیاده مائل
ایکن کفه راجحه نك قوه حیوانیه و یا مصادمه هوائیه و یا دیگر
برشیثک درون کفه یه سقوطی و یا موجب ترجیح برشیء اولمقسزین
بلا مرجح راجح کلمسنى عقل انسانى تصدیق ایتز اکر بونی تصدیق ایدن

بورلنوسه طبیعی حقان معدود در مثال مذکور مزله حسی و عقلی
 جمیع حقایق مصوره بیننه هیچ بر فرق یوقدر الحاصل ترجیح بلا
 مرجح مستحیلدر استحاله سی ظاهر در بلا محدث وجود حادث
 مستحیل اولدینی دلیل مذکور ایله ثابت اولدی عدم آباد ظلمتدن
 نور تابنده وجوده او حادثی اخراج ایده جک بر محدث مقدسدن
 البته لازمدر شو حالده بو عالم حادثدر انک بر محدثی لازمدر دییه
 ایتدی کمز دعوی ثبوت بولدی محدث مذکورک موجود اولسی لازمدر
 زیرا معدوم اولان دیکرینی ایجاد ایتکه صلاحیتدار اوله مز بنابرین
 أدله مسروده مزله شو عالم کون و فسادی ایجاد واحداث ایدن بر ذات
 والاسمات اقدسک وجوب وجودی ثابت اولدی واستحاله عدمی
 بداهتده قالدیکه مبحتمزدن مطلوبیده بودر اولی الالباب معالی نصاب
 حضراتی او موجد عالم تقدست ذاته السامی حضرتلرینه إله عالم
 تسمیه ایتدیلر او خدای بی انبازک شرایع مقدس ربانسی اسم جلال
 اخدیت نام قدسی عنوانیله وارد اولمشدر الله تبارک و تعالی حضرتلری
 ایشته بودر جل جلاله و عم نواله ولا إله غیره

« صفت ثانی » صفت سامی قدم ذات باری ایچون قدم واجب ضدی
 حدوث مستحیلدر • دلیلی حق سبحانه و تعالی حادث اولسه بر محدثه محتاج
 اولور انک محدثیده حادث فرض اولنمسیله محدث آخره محتاج اولور
 وهکذا بویله یا تسلسل و یادور لازم کلیر دور و تسلسل ایسه محالدر

بونلرك بريسنه مؤدى اولان حدوث الهيده محال در حدوثى محال
 اولانك قديم اولسى واجبر مطلوبده بودر « اما دور » يعنى ايكي
 شيئن بريسك وجودى آخرك وجودينه توقف ايتك بونلرك هر
 بررينك وجود سيبدن اول بولملى لازم كليركه بوده وجود ذاتدن
 اول برشيك بولمى مستلزم اولور بوايسه ظاهر البطلا ندر اكر
 موجوديت عالمك توقف ايتديكى بارى تعالى نك وجودى عالم
 اوزرينه توقف ايدر ديرايسه ك عالمك موجوديته ساحه آراى حصول
 اولمى سبب اولان مولاي متعال حضر تلىنك موجوديتدن
 اول عالمك موجوديتى لازم كليركه وجود ذات اقدسندن اول عالمك
 بولمى مستلزم اولور بونك بطلا نى بديهيدير . اما تسلسل جانب ازلده
 امور ما لا نهايه نك ترتيبى و تعاقبى ديمك عقل بونك استحاله سييه
 حكم ايتشدر زيرا محالى مستلزمدر مستلزم محال اولان محالدر علماء
 كرام محاليت تسلسل حقنده ادله عديده ذكر و بيان بيور مشرايسه
 ده بزور اده فهمى آسان اولان دليلى ذكر و اتیان ايله لم شبهه
 يوقدر كه عقل انسانى بين الحاصر ين محصور بر شيئك متناهى اولد
 يعنى قطعياً حكم ايدر بر شيئك هم بين الحاصر ين محصور همده
 غير متناهى اولسى محالدر تسلسل عقلا جائز اولسه شكل مثلك
 ساقينى صورتده بر نقطه دن خارج الى غير النهايه ذاهب خطينك
 جزء لرى ازل جانبنده غير متناهى يكديكرنى متعاقب امور مرتبه

منزلہ سندہ اولوب ارالرنده کی مسافاتی خطوط ممتدہ اعتبار وفرض
اتیمہ من جائز اولور ایدیکہ خطوط مذکورہ تباعدایتدکجه شو



خطینک عدم نہایتیلہ حکم ایدرسهك بوندن ارالرنده کی خطوط
اعتبار ایتدیکمز مسافاتک نہایت بولمامسی واوخطوطدندہ غیر متناهی
برخطہ منتهی اولسی لازم کلیر کہ اودہ حاصرین یعنی خطین بینندہ
محصوردر • حالبوکہ بین الحاصرین محصورا ولان مقدارک متناهی
وغیر متناهی اولہ رق اجتماعی محال اولدیغنک ذکر ی مقدما تسطیر
اولنمش ایدی بوکا مؤدی اولان یعنی کندیلرنده تسلسل فرض
یتدیکمز خطینک عدم تناهیسیدہ محال اولور • بعد ذا • موجود
عالم الہ ذو الجلال حضر تلرینک شیء آخر دن حادث اولسی قطعیا
جائز اولمز والا اگر وجودا لہ وجود عالمہ متوقفدر دیر ايسهك
دور لازم کلیر واکر وجود الہی شیء آخرک وجودینہ شیء آخردہ
دیگر برشئیک وجودینہ • وهکذا الی غیر النہایہ متوقفدر دیر ايسهك
تسلسل لازم کلیر • بونلرک محالیتی ايسهك آنفا بیان اولنمشدر بونلرہ
مؤدی اولان یعنی الہک غیر اوزرینہ متوقف و حادث اولسی محالدر
حدوثی محال اولان ذاتک قدیم اولسی واجب اولور زیرا حدوث
وقدم اراسندہ واسطہ یوقدر مطلوب اولاندہ قدم عالی الہینک
وجودی وحدوثک محالیتیدر • قدم عالی الہینک ثبوتی وحدوثک

استحاله می تقرر ایتدکد نصکره بز دیرز که قدم عالی سبحانی لذاته
 در لغیره دکلدر • یعنی امر دیگر وجود اقدس الوهیتی اقتضا ایتماشدر
 زیرا قدیم لغیره دنیلر سه کلامزی او غیره انتقال ایتدیره رک دیرز که
 او غیرک قدیمی لذاته میدر یوقسه لغیره میدر وهکذا الی غیر النهایه
 متسلسلا کیدر بوندن تسلسل لازم کلیر بوده محالدر • بنا برین الله ذوالجلال
 حضر تلی قدم عالی الوهیتده دیگر بر شیئه مستندد کلدر دیمکدن غیری
 بر کلام قائم دیکه مطلوبده بودر

(صفت ثالثه) صفت جلیله بقاء ذات اقدس الهی ایچون بقاء
 واجب ضدی فناء وزوال محالدر •• دلیلی وقتا که جناب حق ایچون
 قدم ذاتینک وجوبی وحدوثک محالیتی ثابت اولدی ومادامکه فیاض
 مطلق حضر تلی لذاته قدیم در ذات اقدسک قیومیتی وجود الهیسی
 مستلزمدر فناء وزوالی قبول ایتک جائز دکلدر شود لیلمز ایله جناب
 حق ایچون بقاء واجب ضدی فناء مستحیل اولدینی ثابتدر وهو
 المطلوب

(صفت رابعه) صفت سامی مخالفت للحوادث ذات أجل وأعلا
 حضر تلی ایچون مخالفت للحوادث واجب ضدی مماثلت ومشابهت
 محالدر • یعنی باری تعالی وتققدس حضر تلینک شو موجودات حادثیه
 کنیدیلرینه لازم غیر منفک طبایع نفسانیه لری خواصندن بر
 خاصه ده یاخود کرک جمیع انواعنده وکرک بعضنده بولونسون خاصه

مذ کوره بی قبول ایتک طبیعت نفسیه لرندن اولان خاصه لرده
 مشابهنی محالدر خواص مذ کوره جوهریت ایغنی فعلا وهما فرضا
 تقسیمی قبول ایتماک ۲ جسمیت تقسیمی قبول ایتماک ۳ عرضیت ایله
 قائم بر معنی ۴ تحیز مکان طوتمق ۵ ترکب یعنی مرکب و مجتمع اولمق
 ۶ تجزؤ جزؤ اولمق ۷ غیر یدن تولد ۸ غیر بی تولید ۹ اتصال بر
 شینه بتشمک ۱۰ انفصال بر شیئدن ایرلمق ۱۱ حیوانیت ۱۲ نباتیت
 ۱۳ معدنیت ۱۴ بر حیزدن دیکر حیزه انتقال ۱۵ ضحک ۱۶ تعجب
 کبی انفعالات نفسانیه ودها بونلره بکزر شیردرده مولای متعال
 حضر تلی خواص مذ کوره ده موجودات حادثه یه مشابه اولسه
 موجودات حادثه کبی اولور زیرا بر خاصه ده بر شیئ دیکرینه مشابه
 اولسه شیئ مذ کور شبهه سز دیکری کبی اولور اله متعال موجودات
 حادثه کبی اولسه انلره حدوث و فنا جائز اولدینی کبی ذات اقدس
 الهیسنه ده جائز اولسی لازم کلیر زیرا مثلینک بر یسنه جائز اولان
 دیکرینه ده جائز اولور ذاتا قدم و بقاء الهینک وجوبنه و حدوث
 و فنا سبحانینک محالیتنه دلیل اقامه اولندی ایدی شو دلیل ایله
 موجودات حادثه یه مشابهنی الهی جائز اولیوب حوادثه مخالفی
 واجب مماثلتی مستحیل اولدینی ثابت اولدی وهو المطلوب

(صفت خامسه) صفت سامی قیام بنفسه تعالی • ذات باری

ایچون بنفسه قیام واجب ضدی بغیره قیام یعنی طوره جق مکانه

ويا حلول ايده جك محله ويا بر مخصصك تخصيصنه ويا بر موجودك
 ايجادنه احتياج معناسنه قيام بغيره محالدر •• دليلي مخالفت للحوادث
 دليلنده ثابت اولديكه جناب حق جوهر و جسم دكلدر طوره جق
 مكانه احتياجي يوقدر زيرا مكانه احتياج جواهر و اجسام
 خواصندندر

أوراده ينه ثابت اولديكه جناب حق عرض دكلدر طوره جق
 محله احتياجي يوقدر ألوان، طعوم و بونلره مماثل شيلرك احتياجي كي •
 ينه ثابت اولديكه فياض اقدس حضر تلري قديمدر تخصيص مخصصه
 ايجاد موجوده محتاج دكلدر • بناء على ذلك بنفسه قيام الهى واجب
 بغيره قيام ربانى مستحيلدر وهو المطلوب

(صفت سادسه) جناب حق ايچون وحدانيت يعنى ذات تده
 صفاتده ؛ أفعالنده بر اولمق واجب ضدى عدم وحدانيت يعنى ذات
 صفاتده مركب اولمق ويا ذات و صفاتده مماثلي بولمق ويا بر فعلي
 خلقده مشاركي بولمق كي طريقلر ايله جناب حقك واحد اولماسى
 محالدر

دليلي جناب حق مركب اولسه حوادثك مقتضيات ذاتيه لرندن اولان
 خواصدن بر خاصه ده حوادثه مشابه اولور او خاصه تركيدر
 مخالفت للحوادث دليلنده ذكرى سبقت ايتدى شو حالده جناب
 حقك انلر كي حاشا حادث اولسى لازم كلير حالبوكه قدم الهينك

و جوبنه و حدوث سبحانینک استحاله سنه ده دلیل سبقت ایتدی ایدی
 ذات و صفات الهیسنده کندیسنه ممائل اولمدیغنه دلیل بودرکه اکر
 ذات اقدسندنه ممائل بولنسه جناب باری جل وعلایه واجب اولان
 او ممائل ایچوندنه واجب، و مستحیل اولان او ممائل ایچوندنه مستحیل.
 اولور یا خود صفات واجبه قدیمه سنده ممائل بولنسه باخصوص هر
 بر ممکن او زرینه اولان قدرت تامه ده ممائلی بولنسه نتکم مولای
 متعال ایچون قدره تامه نك اثباتی کله جکدر ایشه او ذاتنه
 و یا صفات واجبه قدیمه ده ممائل اولان شی إله اولور حالبوکه وجودده
 جناب حق ایله برابر بر إله ده اولسه شو عالم بولنمز ایدی نتکم
 جناب حق فیاض مطلق (لو كان فیهما آلهة إلا الله لفسدتا) یعنی
 سموات و أرضك خلقتنه قائم اولور الله تعالی دن بشقه آلهه اولسه
 جناب حقده انلر له برلك اولسه سموات و أرض فساد پذیر اولوره
 بولنمز لر « دلیل مذکورك شرح و بیانی شویله درکه »

صانع و إله عالم ایکی اولسون دها زیاده اولسون تعدد ایتسه ایدی
 عالم دن برشیء موجود اولمز ایدی لکن شو عالم دن بر شیء
 بولنماسی باطلدر زیر عالم موجود و مشاهه ایله ثابتدر عالم دن بر شیء عدم
 موجودیتنه مؤدی اولان شیءکه تعدد إله در باطل اولور تعدد باطل
 اولدیه وحدانیت ثابت اولدیکه مطلوبده بودر . أما إلهینک
 وجودندن عالم دن بر شیء بولنماسنک لزومی زیر ابو الهلر شو عالمک

ایجادى اوزرينه يا اتفاق ايدر لر يا اختلاف . اكر اتفاق ايدر لر سه
 عالمى ايجاد ايتلىرى جائز اولمز زيرا بو صورتده يابونلردن هر برلرينك
 ايجاديله عالم ايچون مستقل برر وجود حاصل اولور شو حالده عالمك
 ايكي وجودى لازم كليز حالبوكه عالمك وجود واحندن بشقه
 يوقدر يا خود بونلك ايجاديله عالم ايچون يالكز بر وجود حاصل
 اولور بو صورتده الهيندن هر برلرى عالمى بالانفراد ايجاد ايتيوب
 آخرك مشاركتيله ايجاد ايتىسى لازم كليز شو حالده الهلر مركب قيلنوب
 اله واحد قيلنديلر كه ايجاد او واحده نسبت اولونيور على الاستقلال
 بريسنه نسبت اولونيور زيرا بريسى موجودك جزئيدر مستقل موجود
 دكلدر اله عالم ايسه كمال قدرت كنديسنه لازم كلد يكندن مستقل
 موجود اولمليدر غير مستقل عاجز ومعينه محتاج اولور . ينه دينلر سه
 كه اله حقيقه ائيندن مركب مجموعدر جوابنده بز ديرز كه تركيب
 اله اوزرينه محالدر زيرا جناب حقك حوادثك خواص نفسيه سندن
 اولان صفاتده حوادثه مخالفق واجيدر تركيب ايسه بو صفتلر دندر
 عالمى الهيندن بريسى ايجاد ايدوبده صكره ديكرى ايجاد ايتسيده جائز
 دكلدر زيرا بو حاصلى تحصيلدر بوده محالدر ظاهر اولانده بودر كذلك
 عالمك بعضيسنى الهينك بريسى ديكر بعضيسنى ده اوبر الهك ايجاد ايتىسى
 جائز دكلدر زيرا بو تقدير جه عجزلرى لازم كليز زيرا وقتا كه بريسنك
 قدرتى بعضه تعلق ايتدى ديكر الهك بعض عالمه اوله جق قدرتنك

تعلقى طريقى سدايتدى بوايسه هر برشى اوزرينه تمام قدرته منافي
 هر عجز در إله اوزرينه عجز ايسه محالدر نتم تمام قدرت الهيه نك
 وجوبنك بياني كله جكدرد. اكر الهيندن بريسي عالمك ايجادى ديكرى
 اعدامنى مراد ايتك طريقيله اختلاف ايتسه لر بو صورتده ايكيسنك
 بردن اراده لرينك نفوذى جائز اولمز زيرا بونك اوزرينه اجتماع
 تقيضين يعنى آن واحدده عالمك وجود وعدمى لازم كليركه بوده
 محالدر. كذاك بريسنك ارادهسى نفوذ ايدوبده ديكرينك نفوذ ايتماسى
 جائز دكلدر ارادهسى نفوذ ايتميانك عجزى لازم كلديكندن ايچون
 حالبوكه ديكريده اوبريسى كبي در يينلرنده مماثلت منعقد اولديغندن
 بعضكره ده آخرك دوننده ديكرينك ارادهسى نفوذ ايتديكى وقتده
 وادهسى نفوذ ايدن اله در ديكرى عاجز اولديغندن اله دكلدر دنيلرا
 شو حالده وحدانيت دليلى تمام اولمش اولور

تعدد الهك استحالهسى اوزرينه دليل آخر. وقتاكه حوادث
 ايچون بر محدثدن البته لازمدر دليلى ايله عالم ايچون بر الهك وجودى
 واجب اولديسه اله آخرده بولنديغى وقتده يا الهيندن هر بررلى عالمى
 ايجادده كافى اولما مقدر شو صورتده بونلك بريسيده اله اوله ماز
 زيرا اله كافى مستقل اوله جقدر يا خود بونلردن بريسي كافى اولور
 ايكنجيسى ضايع اولور حاجت يوقدر اله ايسه بويله اولمز.
 واما واجب الوجود حضر تلرينك افعالدن بر فعلده مشاركى اولديغنه

دلیل حوادث شو مکنوناته یا حدوث حیوانی و نباتی و معدنیدریا خود
حرکات حیوانیه نك غیریدر کوا کبریا حك حرکاتی کبی یا خود حیوانانك
حرکات غیر اختیار یسیدر حیوانانك نشو و نما بولسی و مثلاً حمی سبیلله
حاصل اولان حرکت انتعاشی کبی بدیهیدر که شوأشیانك ایجاد و احداثده
مخلوقاتدن هیچ بر یسنك مدخلی یوقدر انجق مولای متعال خلق و ایجاد
سیور مشلدر بوده هر بر عاقلک مجزومیدر که انسانی اولدینی صورت ایله
توینی و یا خود خلقدن بر یسی تصویر ایتماشدر مصور انجق جناب
حقدر بوندن صوکره دنیلور که بو مذکور انك جمیع ایجاد ایله
تفرد الهی اوزرینه دلیل جناب حقك ذات و صفاتده بمثل اولدینی
اوزرینه اولان دلیلك نظیریدر زیرا الهینك هر بر لرینك ایجاد
حقنده بزیرز که بالفرض ایکی موجد اولسه یا هر شیئی ایجاد ده
اتفاق ایدر لر یا اختلاف قریباً تقدم ایتدیکنه کوره بودلیل اتمام اولنور
ایمدی ثابت اولدیکه شوأشیانك خالق انجق جناب حقدر بشقه دکلدر
أما قیام زید مشی عمرو کبی عباددن صادر حرکات اختیاریه دنیلان
حوادثك خلقت و ایجاد ایله متفرد اولان ینه جناب باری تعالی
و تقدس در بونك اوزرینه دلیل عبد فعل اختیار یسنك موجد و خالق
اولش اولسه تفصیل افعاله عالم اولور ایدی لکن تفصیلنه علمی
باطلدر عبدك ده موجد اولسی باطل اولور او ایله ایسه بقیه کائناتی
ایجاد ایدن و ایجادنده مشارکی اولمیان مولای متعالی تبارك و تقدس

حضرتلری افعال عبدك موجد و محدث در عبدك تفصیل فعلنه علمك
 یطلائی اوزرینه دلیل نائم اولان بر کیمسه دن مقادیر و کیفیاتك تفاصیلنه
 شعوری اولیه رق بر طاقم افعال اختیاریه حاصل اولیور بر کاتب
 اجزا و أعضادن اناهی ایچون اولان شیئه شعوری اولمقسزین اناملنی
 تحریك ایله حروف و کلماتی تصویر ایدر او اجزا و أعضا. عظام یعنی
 کیمکله. غضاریف یومشاق کر تلك کیمکله. أعصاب سکیر لر. عضلات
 سکیرلی اتلر. رباطات کیمک باشلرنده کیمکلی بر برینه ربط ایدن سکیرلردن
 ینه او کاتبك او صورتلر و نقشلری حصوله کتیرن بو اجزا و أعضانك
 حرکات و أوضاعنك تفاصیلنه شعوری یوقدر بو معلومات الله
 ایدلده نصکره خفی اولیه که افعال عبادك خالق انجی ذات أجل
 مطلق حضرتلری در دییه نصوص شرعیه ربانیه تواتر آوارد اولمشدر
 قال الله تعالی فی کتابه العزیز (والله خلقکم وما تعملون) وقال تعالی
 (هل من خالق غیر الله) برنجی قول شریفك مال منینی جناب
 حق ای انسانلر سزی واعمال سکزی خلق و ایجاد بیور مشدر •
 ایکنجیسنك مال شریفی الله تبارك و تعالیدن بشقه بر خالق وارمیدر
 استفهام انکاری یعنی یوقدر دیمکدر

دین مبین احمدی صلی الله علیه وسلم ده ثابت شو نصوص شرعی
 اوزرینه اعتماد ایتک عقیده لری بانبده اهل ایمان ایچون واجبدرو عقیده
 لرینك دلیلنی اخذ ده شویله جریان ایدر که افعال عبادك خالق

انجق الله تعالى حضرت تریدر لکن نواب وعقابک مناطی وعبدہ فعلک
نسبتک صحتی کندیسنه وابسته اولان افعال اختیاریہ عبد ایجون
کسب واردر ۰۰ امام اعظم ابو حنیفہ قدسنا الله بسرہ الانخم افندمن
حضرت تری فقہ اکبر نام معالی اتسامنی حائز اولان کتاب مستطاب
عالیترندہ شویله جه نص بیور مشدر که حرکت وسکوندن جمیع
أفعال عباد حقیقة قوللرک کسیدر جناب حق ایسه افعالک خالقیدر
انتهی ۰۰ ائمہ کرام فحامت اتسامدن جناب امام اعظم یسر الله لناشفاعته نک
کلام عالی مجتهدانه سنی تفسیر بیوران بر ذات معالی نصاب شویولده
خامه ران بسط و بیان اوله رق بیوریور که حضرت امام هام بو نصیله
مراد ایدر که اصل فعل قدرة علیه ربانیه در طاعت یا خود معصیت
اولمسیله فعلک اتصافی قدرة عبد ایله در — بیان آخر ایله — عبد
اراده سنی فعله توجیه وقدرتی تعلیق ایدر عبد دن خصوص مذکور
مسببات جانبندہ وقوع یافته اولان بقیه اسباب کی فعلک طاعت و یا
معصیتله اتصافنه سبب اولور ایشته طرف عیددن ظهور ایدن انجق
کسیدر مولای متعال تبارک وتقّس حضرت تری عبد اراده سنی
صرف ایتدیکنده قدرة فاطرة الہیسیله فعل مذکور ایجاد ایدر که
ایشته خلق بودر افراط وتفریط بیننده متوسط اولان مذهب حقه
انجق شو بیان کرده من اولان مذهب جلیدر ایمدی یز جمیع افعالده
عبد ایجون مدخل یوقدر دیمه یز کذلک عبادک أفعال اختیار یستد

جناب حق مدخلی یوقدر ده دیمه یز بلکه مولای متعال تبارک
و تقدس حضرتلری أفعال عبادك خالقیدر قوللرایسه کاسیدر لر کسبلری
اوزرینه ده مثاب و یامعاقب اولور لر دییه اعتقاد ایلر و بویله جه سویله رز
و بالله التوفیق

(صفت سابعه صفت علیه اراده)

جناب حق ایچون اراده واجبدر اراده ذات عالی الهی ایله قائم
قدیم بر صفتدر که حق جل و علا حضرتلرینک اوزرینه جائز اولان
شیرک بعضیسنه هر بر جائز بو صفت جلیله ایله تخصص کسب ایدر
بو صفتک ضدی اولان کراهیت جناب حق اوزرینه مستحیلدر . . . بونک
دلیلی شوعالم بذاته حادث اولیوب حدوثی انجق جناب حقدن اولدینی
ثابت اولدی بو تقدیر جه بز دیرز که جناب حقدن عالمک حدوثی
یا اراده واختیار اولقسزین علیت و ضرورت طریقیله اولور یا خود
اراده واختیار طریقیله اولور یعنی عالمک وارلغنی اراده واختیار بیوروب
انی ایجاد ایتدیکی وقتیده تعیین ایدن کنندی ذات اقدس الهیسی اولق
طریقیله اولور اختیار اولقسزین علیت و ضرورت طریقیله جناب
حقدن عالمک حدوثی جائز دکلدر جائز اولمش اولسه جناب حق قدیمدر
عالمکده قدیم اولمش لازم کلیر زیرا بو تقدیر جه عالم جناب حق
ایچون معلول اولور حالبوکه معلول علتیه تابع اولوب تأخر ایتماشی
واجب اولور عالمک حدوثی ایسه محققاً ثابت اولدیکه یوق ایکن

واراولدی ایمدی جناب حقدن عالمك حدوثی علیت ضرورت طریقہ
اولمادی شو حالده عالم اراده الهی واختیار سبحانی وایجاد ایتدیکی
وقتی تخصیصه حادث اولدی بو دلیل ایله ثابت اولدیکه جناب حق
اله عالم در • مرید مختار در ذات اقدس فیاضانه سینه اراده واجب
و ذات یاک قدوسیانه سی اوزرینه صفت مذکورك ضدی اولان
کراهیت مستحیلدر • وهو المطلوب •

(صفة نامنه صفت عالی قدرت)

جناب حق ایچون قدرت واجبدر قدرت ذات باک صمدیت ایله
قائم قدیم برصفتدرکه حادثات بوصفت جلیل ایله موجود ومعدوم
أولور بوصفت سامی نك ضدی اولان عجز ذات باری حقنده محالدر • •
دلیل جناب فاطر مطلق جل شأنه نك شو عالمی وعظمت وغرایتلی
عقلری حیرتده براقان و بحار عجایبنده فهومی مستغرق قیلان یوز-
یکلرجه صنفلی مشغل حیوانی نباتی معدنی عالمرندن عظمت
غرابت صاحبلی اولان برطاقم انواع عالمری یوقدن واریدوب
ایجاد بیور مسیدر • ایمدی شویله برعظمت جلال و غرابت ایله
بوعالمی ایجاد ایدن ذات أجل مطلق حضرتلرنیک عاجز و مسلوب
القدره اولسنی عقل سلیم تصدیق ایتمز و بونك مستحیل اولد یغیده
بدیهیدر شو دلیلمز ایله ثابت اولدیکه الله تعالی حضرتلی شو عالمك
الهی درکه انی اوعظمنیله کتم عدمدن فسحتسرای وجوده اخراج

بیور مشدر ایمدی بویله بر ذات کریم سبحانی ایجون قدرت واجب
وضدی اولان عجز مستحیدر وهو المطلوب

(صفت تاسعة صفت سامی علم)

مولای متعال حضر تری ایجون صفت جلیل علم واجبدر صفت
سامی علم ذات باری جل شأنه ایله قائم قدیم بر صفتدر که بونکله واجبات
جائزات مستحیلات جمیع اشیا جناب حقّه منصفدر بونلردن
هر بر یسنی علی ماهو علیه بیلیر بوصفتک ضدی اولان جهل جناب
حقک اوزرینه مستحیدر . . دلیل الله تعالی حضر ترینک شو صنعنک
اینجه لکنده و محکمکنده عقل وفهملری حیرتده براقان شیرایله
نهایت اتقان و غایت احکام ایله برابر عجایب و غراییدن حاوی اولدینی
اشیا ایله ایجاد واحداث بیور مسیدر بوا یسه بر انسان کندیسنه اقرب
اولان شیئه نظرایله آشکاره اولور که اوده تدبیر باهر و اذهانه حیر-
تبخش اولان اتقان و احکام اولور زینه مشتمل ذات انسانیدر کوا بکک
عجایب و نظامنده و حیوان و نبات و معدن عالملرنده و بونلرک انواع
و موافقات و اختلافاتندن محتوی اولدینی شیئلرده دهابونلرک غیر
عجب عجایب اولان شیئلرده تأمل و تفکر اولندیغنده دههاز یاده میدان
وضوحه جلوه زیب فتوح اولور . ایمدی عقل سلیم نزدنده عوالم و کائناتی
شواتقان و احکام و دقیق صنع و عجیب وضع ایله ایجاد ایدن ذات خالق
جل و علانک جاهل غیر عالم اولسی محالدر شودلیل ایله ثبوت

بولديکه مولای متعال اله علندر اونی شواتقان واحکام ايله ايجاد يور-
 مشدرکه ذات الهیسی ایجون علم واجب ضدی اولان جهل مستحیلدر
 مطلوب اولانده بودر جناب حق ایجون قدرت وعلم صفت جلیلار-
 ینک وجوبی دلیلنک توضیحی مبسوط اوله رق شویله درکه بر کیمسه
 متقن محکم آلات عدیده هندسیه اوزرینه محتوی کندیسيله وقت
 بیلنیر ساعتلردن بر ساعته نظرایتسه حتی اوساعته اوقاتک ثانیه لرینی
 یيله ضبط ایدوب غرضیده ایفاییتسه اوساعته ناظر اولان کیمسه نک
 عند نده شک وشبهه یوقدرکه اونی ایشلیان پیاپ بر صانع واردر
 و بوصانک اوساعتی یا نغمه واتقان واحکامنه کافی قدرت وعلمی واردر که
 اوساعتدن مقصود اولان غرضی ایفاییتسون و بر کیمسه اوساعت
 کندی کندینه تصادف طریقيله حصوله کلوب صانک صنعی واتقانی
 اولمقسزین تگون ایتدیکنی یا خود بوساعتی صانع اولان صنعتکار عاجز
 ایکی اللری ایکی ایا قلری کسک فنون هندسه وصایعه جاهل بلکه
 فکری خامل هر بر علمی جاهل ومع هذا شواتقان واحکام ايله
 اوساعتی یا پمش اولدیغنی تصدیق ایدرسه ایمدی مصدق مذکور ارضی
 ايله سما بیننی تفریق ایده میان حمقادن و اولونور کذلک شو عالمه
 کوا کبنک عجایبی حیوان و نبات و معدنک غرائبندن حاوی اولدیغنی
 مواد ايله برابر عطف نظر ایتدی کمزده که جلد لرحه کتاب و صحیفه
 لری بونلره منسوب اولان علملر طولدر مشدر عظمت و غرابتلرندن

مشمول اولان هر بر شیء احاطه دن قاصر ز تنکم شو عوالم حقنده
 کلامی متکفل فنونه منسوب کتابری اوزرینه اطلاع دن معلوم
 اولور قبلر مزك غایت اطمینانی ایله برابر قطعياً جزم ایدرز که شو
 عالم ایچون جمیع مشقلا تیله ایجاد شوانقان واحکام ایله ابراز ایدن
 انواعی تنويع اَصنافی تصنیف اشخاصی تمیز ایدن بر صانع اقدس دن
 البته لازمدر ایشه بوصانع اتم قدرت ایله قادر اُکمل علم ایله عالمدر
 بو ذات باری اوزرینه عجز وجهل مستحیلدر بر کیمسه بوصنع عجیب
 عظیمک کندی کند یسنه تصادف و اتفاقه حملا حدوئنه قائل اولور سه
 و باهر بر ادراک و معرفت دن جاهل و عاجز اولان شیء آخره نسبت
 ایدر سه شک و شبهه یو قدر که بو کیمسه اُحمق حمقادر و هر نقدر
 تمویهات و اهیه و خرافات ساقطه ایله تستر ایدر سه ده اُجهل جهلا دندر
 زیرا فطره عقل سلیم آنک دعوائی باطلنی تصدیق دن ابا ایدر ایمدی
 بز محمدیلر اله قادر علیم حضر ت لرینه شو عالمک صنعک نسبت دن اعتقاد
 ایتدی کمز معتقدات ایله جزم ایدرز وظالمینک سوز لر ندن جناب حق
 زیاده سیله تنزیه و تقدیس ایلرز .

(صفت عاشره صفت جلیل سمع)

جناب حق ایچون سمع صفی واجبدر صفت سمع صماخ و اذن
 ایله اولیوب ذات حق ایله قائم قدیم بر صفتدر که بونکله مسموعات
 الهی منکشف اولور .

دلیلی • صمم یعنی صاغر اولق نقصدر عالمی مکملا ایجاد و بعض
 أنواع عالمه سمعی عطا ایدن و سمعی انلرک اوزرینه نعم الهیسنک اکبری
 تیلان اله عالم تعالی و تقدس حضرتلرینک اوزرینه نقص محالدر جناب
 حقه صمم محال اولدیه سمع واجب اولدیکه مطلوبده بودر

(صفت حادیه عشره صفت سامی بصر)

جناب حق ایچون صفت سامی بصر واجبدر بو صفت عالی ذات
 باری تعالی ایله قائم و قدیمدر • مقله و حقه ایله دکدر مبصرات الهی
 جناب احدیت بو صفتله منکشف اولور جناب حق اوزرینه بونک
 ضدی اولان عمی مستحیلدر

دلیلی عمی نقصدر شو عالمی مکملا ایجاد و بعض أنواعی نعمت
 بصر ایله تزین بیوران ذات سامی الهی اوزرینه نقص محالدر مادامکه
 جناب فیاض ازلی یه عمی محالدر ایمدی ذات قیوم احدیسنه صفت
 سامی بصر واجبدر • وهو المطلوب

(صفت ثانیه عشره صفت عالی کلام)

ذات باری جل شأنه ایچون صفت سامی کلام واجبدر ذات اقدس
 الهی ایله قائم قدیم بر صفتدر حرف ایله صوت ایله دکدر واجبات
 مستحیلات جائز ایدن اولان واوله جق و بولنه جق و بولنه جق شیلر
 اوزرینه دلالت ایدر بو صفت جلیل ایله عباد الهیسندن بریسنه
 افهامی مراد بیوردیغی شیء تفهیم بیورر • بوصفتک ضدی اولان بکم

جناب حق اوزرينه مستحيلدر .

دليلي بكم يعنى دلستر لك تقصير عالميني نعمت ايجاد ايله منعم وبعض
أنواعنى نطق وكلام ايله مكمل قيلان جناب بارى جل وعلا اوزرينه
نقص محالدر دلستر لك جناب حق اوزرينه محال اولديسه كلام ذات
أقدس فياضانه سى ايچون واجب اولدى وهو المطلوب

جناب ذات اجل وأعلا ايچون سمع ؛ بصر ؛ كلام صفت جايللرينك
وجوبى دليلنك توضيحي واضدادنك استحاله سى مبسوطا بيانى شويله در
كه جناب حق ايچون وجوبنك اثباتى واضدادنك استحاله سى
تقدم ايدن طقوز صفت عاليكه وجود ؛ قدم ؛ بقاء ؛ مخالفت للحوادث
، قيام بنفسه ، وحدانيت ؛ ارادت ، قدرت ؛ علم در هر نقدر مدار
ألوهيت بوصفات على اوزرينه اولوب بونلر ايله متصف بر ذات أقدس
الهيئك وجودى شو عالمك موجوديتنى توجيه ده كفايت وعقل سلمى
اقناع ايدرسه ده لكن شو خلاق جهان حضرتلرينك شان على
ألوهيت وبديع مصنوعاتنده وهر بر شيئك كمالى وقوام وصلاحنى
اعطايور مغله كمال اتقان واحكامدن مشتق اولدينى شيده تأمل
ايتديك كزده مصنوعات الهيسى شو كمالده اولان بر ذات قيوم احدينك
ناقص اولسى مستحيلدر زيرا جميع تصوراتمзде ناقص كاملى يا خود
كامل اكمل ايجاد وابتداع ايتك شويله طورسون كندى مثلى ايجاد
ايدن بر شى بوله ميورزشو انسانه باق كه اعلم حيوانات اولمغله برابر

صناعتده انلردن قدر تلیدر هر نه که تصنیع وابتداع او تصنیع مذکور
او انسانك كندی مثلنی ویا کنندندن ا کملنی یا بقی شویله طورسون حائز
اولدینی کماله بیله قریب اولمز بر حیوان ویا انسان یا بمقدن قطع نظر بر نباتی
یا بغمه قدرتی اولمز بلکه جسدندن بر تویی دوشسه اولدینی کی اونی
اعاده یه قادر اولمز اما یدانسانیده نبات و حیوانك ظهورندن جریان
ایتدیکی کوریلان شیر جناب حقل نبات و حیوانك تولیدینه اسباب
عادیه قیلدینی اموره مباشرتله در که بر انسان تخمی یره اگر حرارته
عرض ایدر صوایله سقی ایدر اورادن نبات بتر حالبو که او اوتك نصل
بتدیکنی لون، طعم، رائحه و بونلرك غیری خواص سارهی نصل حصوله
کلدیکنی او انسان بیلمز کذلک بر قوشك یمرطه سنی حرارته وضع
ایله اندن قوش تولد ایدر لکن اوقوش نصل تگون ایتدی سمع
وبصری نصل شق لحم ودم وسائر اعضایی نصل تصویر اولندی بونی
بیلمز ایشه بونلرده بیان ظاهر واردر که او انسان نبات و حیوانی
تصنیع ایتما مشدر انحق اسبابندن کیفیت نشأتلرینی بیلما مکه برابر
انلرك وجوده کلمسه تسبب ایتدی اله عالم جل وعلا حضرتلری اینه
انلرك صنعیه مفرددر متقدم جمیع بیاناتمز اوزرینه جزم ایدر زکه
عدمندن عالمی ایجاد و محیر افهام اولان انواعه تنويع و بعضی سنی سمع
وبصر و کلام ایله تکمیل ایدن حضرت الله ذوالجلال ایچون دلیل
عقلی ایله نزد مزده ثابت و کندی ذات یاک صمدانیسه لایق هر بر

صفات کمالیده مرتبه کمال اولمق واجبدر بویله اولماسه صانع عالم
 تبارک و تقدس مصنوعاتک مادونی اولور بوايسه تصدیق عقلینک
 خلافیدر . ایمدی بز اعتقاد ایدرز که جناب حق سمیع در بصیر در
 متکلمدر بلکه شان معالی نشان الوهیتنه لایق هر بر صفات کمال
 ایله متصفدر و جناب حق اوزرینه صمم ؛ عمی ؛ بکم مستحیلدرسمعی
 ابداع بصری اناره لسانی کلام ایله اطلاق بیوران ایسه کندی ذات
 معالی سمات ربا نیسیدر کذلک حق عالی الوهیتنده مصنوعاتنده هر بر
 کمالی ایجاد محقق ایکن صفت کمالیه ده ناقص اولمق محالدر بوراسی منوال
 مذکور اوزره یلغیلیدر بز معاشر مسلمین ایچون بصر سمع کلام
 صفات جلیلترینک ذات اقدس الهی ایچون ثبوتنی اعتقادده (وهو السميع
 البصير) (و کلم الله موسى تکلیما) قول شریف سبحانی سی کی دلیل
 سمعی اوزرینه اکتفا ایتکده واجبدر که بو دلیل ایله خطه تقلیددن
 چیقمش اولورز تنکم تقریر اولندی

(صفت نالته عشر صفت سامی حیات)

جناب حق ایچون صفت سامی حیات واجبدر بو ذات اقدس
 الهی ایله قائم قدیم صفتدر که جناب حق قدرت . اراده ؛ علم کی
 صفات جلیل ایله اتصافی عقلا تصحیح ایدر بوصفتک ضدی اولان
 موت فیاض مطلق حقنده محالدر . . دلیلی جناب حق میت اولمش اولسه
 قدرت اراده علم کی صفتلر له اتصافی واجب اولسی اوزرینه دلیل

قائم اولان صفات ايله اتصافی صحیح اولمزایدی لکن بوصفات سامی
ایله اتصافنک وجوبی اوزرینه دلیل قائم اولدی شو جناب حق
میت اولسی محالدر جناب حق اوزرینه موت محال اولدیه ذات اقدس
الهیسنه حیات واجب اولدی وهو المطلوب

(فصل ثالث)

ذکری سبقت ایدن صفات عالی الهینک اشیا به تعلق ایدن
و تعلق ایتیمان قسملری و تعلقنک معناسی بیاتنده در
معلوم اوله که جناب حق ایجون وجوبی و اضدادنک استحاله
سی اوزرینه أدله اقامه سی تقدم ایدن أون اوج صفات عالی الهیدن
بدیسی بر شئیة تعلق ایتزا نلرده وجود؛ قدم. بقاء، مخالفت للحوادث. قیام
بنفسه. وحدانیت. حیات. صفات سامیلیدر بوصفتلرک بر شئیة تعلق
ایتماسنک معناسی بوصفات عالی ایله اشیانک تخصیصی و ایجاد و کشفی
وصفات آتی کبی اشیا اوزرینه دلالتی اولمز بوصفات سامیدن التیسی
اشیا به تعلق ایدر که انلرده اراده قدرت سمع بصر علم کلام صفتلریدر.
اما اراده ایله قدرت یالکز جائزاته تعلق ایدر واجبات و مستحیلاته
تعلق ایتزا اراده صفت سامیسی تعلق تخصیص ایله جائزه تعلق ایدر
بوصفت اقدس ایله ازله جائزی ذات صمدانیسی اوزرینه جائز اولان
بعض شء ایله تخصیص ایدر. مثلاً جناب حق ازله زیدی بولنمق
ویا بولما مق ایله تخصیص ایدر وزید بولندیغنده شویله بر صفت اوزرینه

أولور • فلان زمانده ، فلان مكانده ، يردن فلان جهنده بولنور ديه .
 تخصيص ايدر وهلم جراً وشو تخصيص ايله أوجائزك اراده الهينك
 تخصيص أوزرينه أولسى واجب خلافه أولسى محالدر زيرا اراده
 سامى الهينك خلافه أولسه بارى تعالى حضرت تلى كاره مقهور أولسى
 لازم كليز ملكنده اراده بيور مدينى شى حصوله كليز بوايسه برحالتدر كه
 حصوله مخلوق مملوك راضى أولمز ملك الملوك أولان خالق جل وعلا
 حضرت تلىنك راضى أوله جفى هيچ تخطرايدر ميسك طبيعيدر كه راضى
 أولمز • • صفت سامى قدرت جائزه تعلق ايدر ازله اراده سبحانينك
 تعلقنه مطابق أولمق أوزره جائزك ايجاد واعدامنه تعلق تأثير ايله
 تعلق ايدر • مثلا اراده ربانى ازله شويله بر زمان شويله بر مكانده
 زيدك بر صفت أوزرينه ايجادينه تعلق ايتديكنده اراده ربانينك ايجاد
 زيده تعلق زمانى كلد يكنده قدرت فاطره سبحانى زيدى ايجاده تعلق
 ايدر اراده عليه ربانىسيه تخصيص ايتديكى مكانده صفت مذكور أوزرينه
 قدرت سامى ربانىسيه زيدى ايجاد ايدر كذلك اراده الهى وجه
 مخصوص أوزرينه عمروك اعدامنه تعلق ايتديكى وقنده قدرة الله
 أونك اعدامنه تعلق ايدر تخلف ايتكسزين اراده ازلىنك تعلقنه
 مطابق أوله رق قدرت سبحانىسيه عمروى اعدام ايدر والا اراده
 الهيك تخلفى لازم كليز بوايسه محالدر نتمق قريبا تقدم ايتدى ذات الهى •
 صفات سبحانى • وجرمك حيزه ملازمتى • كى واجباته • شريك

باری • و تقیضین بیننده جمع که آن واحده زیدک موجود و معدوم •
اولسی کی مستحیلاته ایجاد و اعدا ما اراده و قدرتدن برینک تعلق
ایتماسی واجب حتما حاصل اولوب وجود دن عدمه خروجی ممکن
اولدیفندن اراده الهی و قدرت سبحانی بوکا ایجاد تعلق ایتمز زیر حاصلی
تحصیلدر بوده محالدر اعدا ماده تعلق ایتمز زیر اعدمی و وجوددن خروجی
محالدر. اما مستحیله عدم تعلق مستحیل حتما معدوم اولوب وجودی قبول
ایتمدیکندن اراده الهی و قدرت ربانی اعدا ما بوکا تعلق ایتمز زیر حاصلی
تحصیلدر بوده محالدر وجودی و عدمدن خروجی مستحیل اولدیفندن
ایجاداً ده تعلق ایتمز • بو تقریر اوزرینه بر سائل سؤال ایتسه دیسه که
جناب حق فلان واجبک اعدامی و شریک باری کی فلان مستحیلک
ایجادی اوزرینه قادر اولور می اده مقارن جواب بودر که. برهان قدره
اللهک اعدا ما و ایجاداً واجبات و مستحیلاته تعلق ایتمدیکنه دلالات
ایتمشدر • ای سائل سنده ذکر ایتد یکک ایسه واجبات و مستحیلاتدن در
قدره الله بونلره تعلق ایتمز جناب حق بونلر اوزرینه قادر اولمز دیسه.
مه یز زیر بوسوز جانب اقدس الهیده سوء ادبدر جناب حقه حاشا
عجز ایهام ایدر تعالی و تقدس • • اما سمع و بصر باری تعالی و تقدس حضر-
تترینک سمع و بصر صفت جلیلری واجب اولسون جائز اولسون
جمع موجوداته کافه مخلوقاته تعلق انکشاف ایله تعلق ایدر لر معدوماته
مستحیل اولسون و جائز اولسون تعلق ایتمز لر جناب فیاض اقدس

مخلوقات الهیستند هر بر مسموع و مرئی کور و با ایشدییکی کی ذات کریم
 ربانیستی صفت عالی الهیستی کور و کلام اقدسنی ایشیدر لیلۀ ظلماده
 ذره بی کورر صخره صما اوزرنده یورومسنی ایشیدر زیر اسمع
 و بصر سبحانی ادرا کلری شروط و اسباب عادی اوزرینه متوقف
 بر طاقم حادث ناقص مخلوقاتک سمع و بصر لری کی دکلدره • و اما علم الهی
 و کلام ربانی واجباته مستحیلاته موجود و معدوم جائزاته تعلق ایدر لر
 علم الله بونلره تعلق انکشاف ایله تعلق ایدر جناب حق علم الهیسیله
 واجبی واجب بیلیر ذات و صفات مقدس کی مستحیلي مستحیل بیلیر
 شریک باری کی جائزی جائز بیلیر موجود اولسون معدوم اولسون
 • بولونسون بولو نمسون علی ما هو علیه بیلیر علم سبحانیستند
 کلی جزئی ارضه سماده هیچ برشی خارج اولمز عدد رمالی قطرات
 امطاری اوراق اشجاری ذرات کائناتی بیلیر • خلاصه معلومات الهی به
 نهایت یوقدر اما کلام ربانی واجبات • مستحیلات • جائزاته تعلق
 دلالتله تعلق ایدر ایمی کلام سبحانی حرف و صوت ایله دکلدره واجب
 و مستحیل موجود و معدوم هر جائزه اولدقلری حال اوزرینه دلالت
 ایدر • رسل نغام ملئکه عظام عباد مکرمینده افهامنی مراد بیوردینی
 ذواته بونلردن هر بررینی کلام الهیسیله افهام ایدر

(فصل رابع)

اسماء الهینک توقینی اولدیغنی بیان ایله برابر فیاض اقدسی ایچون

ثبوتی افاده ایدن اورایله شرع شریف مطهرک کتیردیکی جمیع صفات
 واسماء الهی به اعتقاد ایتمامزک وجوبی بیاتنده در ۱۰۰ وقتا که بز معاصر
 مسلمین عندنده سیدمز معین و ناصر مز استنادگاه حقیقه مز صاحب
 شفاعتزر حضرة محمد مصطفی صلی الله علیه وسلم افندمزک مبارک
 اللرنده ظهور یافته اولان خارق عادت برطاقم معجزات سامیلری
 دایلی ایله جناب منعم حقیقی فیاض اقدسک رسول مبعجلی نبی
 مفخمی اولدینی ثابت اولدی اویله بر معجزات عالیکه ایلدی مقدسه
 پیغمبریده ظهوری دعوائی مقدس رسالتی جانب جلیل احدیتدن
 تصدیقدر رسول کبریاعلیه ا کمل التحایا افندمز حضر تلرینک رسول الله
 اولدینی ثبوت یولدینی ایچون اخباراتنک جمیعنی تصدیق واجب وذات
 پیغمبریلرینه کذب مستحیلدر تنکم باب ثانیده بونلرک برهانی ان شاء الله
 کله جکدر بز صفات الهی مثبت نصوص شریعت محمدیسنده شرف مورود
 جمیع موادده ذات عالی رسالتی تصدیق ایتمک صحیح و واجبدر قرآن
 کریم الهی وحید شریف پیغمبری ده ذکرى متقدم صفاتله جناب
 حقک موصوفیتی افاده ایدن دلیل عقلی ایله صفات مذکورک ذات
 احدیت ایچون اثباتی و اضدادنک استحاله سی ایله برابر آیات واحادیث وارد
 اولمشدر که الوهیتک مداری و شان ربوبیتک عظمتی بوصفات اوزرینه در
 جناب حقک عادل حکیم صمد هادی خالق رزاق قیوم ودها بونلره
 مماثل برطاقم صفات کمال ایله موصوفیتی مفید نصوص شرعیده وارد

أولشدر ایمدی نصوص شرعی احمد یده جناب حق ایون وارد
 اولان صفات عالیدن اوصافک جمیعنه ایمان واجب اولور زیر ابونلرک
 مخبری شارع اعظم حضرت رسول انعم افند مز صادقدر من عند
 الله تعالی مرسل اولدیغنه ادله قائم اولمسیله صدق عالی محمدیلری صلی
 الله تعالی علیه وسلم مجزومدر ۰۰ بوحقیقتک بیاتدن صکره معلوم اوله
 که صفات الهینک اثباتیله نصوص شریعت وارد اولدینی کبی نفس
 کریم الهیسنی تسمیه ایتدیکی اسماء سبحانیسنی اثباتله ده وارد اولمشدر
 کندی ذات پاک صمدانیسنه خاص اولان لفظ جلیل الله بونلردندر
 نینا نخر دوجهان حضرت محمد مصطفی علیه اصفی التحایا افند مزک
 ارسال عاليسندن اول قوم نجیب عربک لغتی جناب حق اوزرینه بواسم
 جلیلی اطلاق ایتدیکی کبی شریعت مطهره ده اطلاق ایتمشدر . جناب
 حق بواسم اعظم ایله تسمیه تسمیه شرعیدر که نص شریعت اوزرینه
 بوکا اعتماد ایدرز سائر اسماء الهیده بویله در بونلر ایله تسمیه شرعیدر
 شرع شریف مطهرک کتیر مدیکی اسم ایله جناب حق جل وعلایی
 تسمیه جائز دکلدر . ایشته علماء کرام انارالله براهینهم حضراتک اسماء
 جلیل سبحانی توقینی دردیله لرینک معناسی بودر یعنی هر براسمی
 جناب حق اوزرینه اطلاق شرع شریف احمدینک توقینی ایله در
 توقیف شرع اولمقسزین براسمی جناب حق اوزرینه اطلاق جائز اولمز

(فصل خامس)

تشبيه وحوادثه مماثلتي ايهام ايدن شيلردن جناب حقه نسبتی نصوص
شریعتده وارد اولان متشابهات و بونلر حقتنده اهل سنت و جماعتك
كیفیت اعتقادلری ولدی الحاجة طریق تأویلی بیاتنده در

شریعت غرای محمدی صلی الله علیه وسلمده جناب فیاض
أقدسك صفات کمال ایلله موصوفیتی مفید نصوص وارد اولدینی کبی
فقط بونلردن بعضیسنك نبوتی اوزرینه دلائل عقلی قائم بعضیسنك
أوزرینه قائم دکلدر لکن بوموصوفیتی معجزات سامیات
ایله صدقی مبرهن رسول مفخم علیه صلوات الله الا کرم افندمن
حضرتلری خبر و یروب نبوتندن عقلی منع ایدن بر مانعه اولمديغندن
بوکا ایمان و تصدیق ایتشزدر جناب حقتك عباد الهیسندن توبه بی قبول
مطبیعی مذاب عاصی معذب ایتسی کبی كذلك نصوص شریعت غراده
ظواهری حوادثه مماثلت و مشابهتی ایهام ایدن بر طاقم صفتلرك جناب
حقه نسبتی وارد اولمشدرله أونصوصه متشابهات تسمیه اولمشدر حالبوکه
دلیل عقلی مولای متعال حضرتلربنك حوادثه مخالفتی واجب مماثلتی
مستحیل اولسنه قائم اولدی كذلك دایل تقلیده بونکله وارد اولدی
قال الله تعالی (لیس کمله شیء وهو السميع البصير) ایمدی بز معاشر
مسلمین أونصوص متشابهانده شویله اعتقاد ایدرز که متشابهات
ایچون جناب حقه لایق وذات احدیتنك حوادثه مماثلتی استلزامدن

خالی بر طاقم معانی صحیحہ وارد رکہ مماثلتی مستلزم ظواہر نصوص
 مذکورہ دن متبادر اولان معانی دکلدر ایشته او معانی صحیحہ نک
 حقیقت علمی علام الغیوب اولان مولای متعالہ تفویض ایدر و بو
 اعتقاد ایله حوادثہ مماثلتدن جناب حق تزیہ و اونصوصدن مراد
 بیوردینی شیء بیلیمکی ذات پاک صمدانیسه تفویض ایلرز • سلف صالحین
 رضوان اللہ تعالیٰ علیہم اجمعین افندیلر مر حضراتک اعتقاد لریده
 بویله ایدی لکن فرق مبتدعہ دن بعضری وقتا کہ فرجه یاب ظهور
 اولدی او نصوص متشابهاتک ظواہری ایله تمسک و حوادثہ مماثلت
 الہی بی مستلزم معانی متبادرہ بی اعتقاد ایدر اولدیلر بغض ضعف
 دین اربابنک اعتقاد لرینہ او فرقه ضلالک بدعتلری سریاتندن
 قور قولدی بنابرین کتب تفاسیر شریفہ و شروح احادیث منیفہ دہ
 ذکر اولندی اوزرہ علماء متأخرین روح اللہ ارواحہم حضراتی
 اونصوص متشابهاتی أدلہ عقلیہ یه موافق مناسب تأویلاتلہ تأویل
 ایتدیلر • مشار الیہم حضراتی مذہب مبتدعینی رد و یا عقیدہ ضعفانی
 تشبیہ تصدیر لرنده او تأویلاتی بیانده کانه دیور لر کہہ مادام اونصوص
 متشابهاتی لغت عرب قواعدی اوزرینہ جاری أدلہ عقلیہ یه موافق
 مناسب معانی صحیحہ یه محتملدر او معانی اوزرینہ احتمال یولندن حمل ایله
 جناب حق ایچون مخالفت للحوادثک وجوبی و مماثلت ربانینک استحاله
 سی اوزرینہ أدلہ دالہ بینیلہ نصوص مذکورہ بیننده توفیق حاصل

أولور والعیاذ بالله تعالی انسانی ایمان دن اخراج ایده جک شیء اعتقاد
 ایتمکدن سالم أولورز بوبابده هرایکی طریق أحسنک بیانی شویله درکه
 قرآن کریمده • الرحمن علی العرش استوی • و یقی وجه ربك • ید
 الله فوق یدیهم • والسموات مطویات بیمینه • وجاء ربك دهابونلرك
 غیرى آیات عظام شرف ورود ایتمشدرکه جمله سی متشابهات قرآنیه
 دندر کذلک حدیث شریف سعادت ردیف پیغمبری صلی الله علیه
 وسلم ده رأیت ربی فی أحسن صورة • ان الجبار یضع قدمه فی
 النار • یزل ربکم الی سماء الدنیا دهابونلرك غیرى برچوق احادیث
 منیفه منقبه یرای عالم شهود اولمشدر سلف صالحین رضوان الله
 علیهم اجمعین حضراتک کتمش اولد قلری طریق اسم بودرکه
 نصوص متشابهاتیده حواده مخالفت الهینک وجوبنه أدله عقلی و نقلی
 یه موافق صحیح غیر متبادر معانی واردد بز او معنا لره ایمان ایدر
 وحقیقتنی یلمکی علم الله تفویض ایلر ایشته بومقدار تفصیلات صحت
 ایمانده کافیدر • ایدى عرشى أوزرینه استواء الهی جناب فیاض مطلقه
 لایق صفات سنیه دن برصفتدر جسمیت وجهتی مستلزم استواء حادث
 کبی دکلدر سماء دنیا یه نزول الهی ذات صمدانیه یه لایق برصفتدر
 برحیزدن دیکرینه انتقالی مستلزم نزول حادث کبی دکلدر مجیء ده
 بویله در الله تعالی حضرتلرینک یدی یمینی قدمی واردد لکن بزم
 اعضا مز کبی دکل بلکه ذات عالی ألوهیتنه لایق برصفت أوزرینه در

تجزی و مقداری مستلزم اولمز جناب حق نصوص مذکوره دن مراد
ابتدیکی معاینک حقیقتنه کنیدی اعلامدر هر بر نص متشابهده سوز
بویله در نصوص مذکوره نك ظواهرینه تمسکا حوادثه مماثلت الهی بی
ادعا ایدن بر مبتدعك مذهب باطلنی رده تصدی یا خودضعیف الدین
اولان کسانك عقیده لرینی تثبیت مراد ابتدی کمزده علی طریق التأویل
دیرزکه نصوص مذکوره حوادثه مماثلت الهی بی مستلزم اولیان معانی
غیر متبادری محتملدر معانی مذکوره اوزرینه نصوص متشابهاتی حمل
ایله مماثلندن تنزیه سبحانی یه دلالت ایدن أدله عقلیه و نقلیه یه موافقت
بولمش و بو توفیق مزله العیاذ بالله کفره مؤدی اولان اعتقادده خطاً
ایتمکدن قور تلمش اولورزه . بیان تأویل شویله در که عرش اوزرینه
استوان مراد انجق استیلاء و قهر اولسی محتملدر تنکم شاعر عربی
(قد استوی بشر علی العراق) دیمشدر که استوی استولی دیمک ر قول
کریم ربانیده استیلادن مراد سبحانی ایسه الله أعلم شو عالمدن هرشی
اوزرینه نفوذ حکم عالی ربانی و عظمت جلال سبحانینک بیانیدر . سماء
دنیا یه نزول اقدس الهیدن مراد عباد الهیسی اوزرینه اقبال سبحانی
اولسی محتملدر لغت عربیده نزول اقبال معناسنه ورودی محققدر
معنای حدیث شریف شودر که واجب الوجود مفیض الخیر والوجود
حضر تری اوحینده عباد الهیسی اوزرینه اقبال و توجه بیورر ایدی
اقبالدن سماء دنیا یه نزول ایله تعبیر اولنمشدر محیی ایله مراد كذلك

اقبال اولسی محتملدر یا خود و جاء ربك دن مراد حذف مضاف قاعده
 سنه ابتداء و جاء امر ربك . و سلطانه . دیمکدر . وجه ایله مراد ذات
 اولسی ده محتملدره وجه اطلاق اولور بونکله ذات مراد اولور
 یدویمین ایله قدرت بالقه صمدانی اولسی محتملدر بوتأویلاتک جمیعته
 استعمال لغت عربیدن شواهد واردر که قرآن کریم و حدیث نبوی
 اوسیاق اوزرینه شرف ورود ایشدر و هکذا متشابهاتدن شرف ورود
 قدر نصوص واریسه کافه سنده تأویل جاری اولور متشابهاتدن
 بر نص یوقدر الا علماء کرام انار الله براهینهم حضراتی قانون لغت
 عربی اوزرینه أدله عقلیه به موافق انلره مناسب بر تأویل بولمشلدر .
 سعیری مشکور و جناب حق کندیلرندن راضی اولسون بوتأویلاتی
 یانه کافل کتب مدونه ده خصوص اوله رق تألیف یور مشلدر
 ایمدی شرف ورود ایدن اوصوص متشابهاتک کافه سنه ایمان حواده
 مماثلت سبحانی فی غیر مستلزم جناب اقدس الوهیتته لایق معانی
 صحیحه لری اولدیغنی اعتقاد و بوندن مراد اولان حقیقت معرفتی علم
 الله تفویض ایتک هر مکلف اوزرینه لازمدر . مذهب مبتدعی دفعه
 و باتأویله اهل اولمدیغندن وسوسه قلبیسی رفعده تأویله احتیاج مس
 ایدر سه علماء عظامه بالمراجعه مراد ایتدیکی تأویلی کلاملی کندیسنی
 کفره و یابدعته ادخال ایده جک خطاده وقوعندن حذرا تأویله
 هل اولما سیه نصوص متشابهاتی یالکزجه تأویل ایتما می یعنی هر

حالده علمایه تأویل ایتدرملیدر نسال الله تعالی الحفظ والسلامه خفی اولمیه
 که شوفصل خامسده بیان کرده مزاو لان نصوص متشابهات آیات
 عظام سبحانی واحادیث ثابتہ رسول ربانیدر صلی الله تعالی علیہ وسلم
 واما بعض اهل اخبارك رسول مجتبی علیہ اکمل التحایا اقدمز حضر تلمینه
 نسبت ایدوبده نقل عدول ایله ذات هایون ر التپناه انخمیلرندن شرف
 ورود ایتدیکی ثبوت بولیمان اخباری واومثللیری تأویلنه احتیاج
 شویله طورسون ورودینی تصدیق بیله اوزریمزه واجب دکلر والله
 سبحانه وتعالی اعلم

(فصل سادس)

حق اقدس الهیده جائز اولان اوصاف سامیه واهل بدعك بز
 اهل سنت وجماعته مخالفت ایتدکلی مسائل بیاتنده دره حق اقدس
 سبحانیده هر جائزك فعل وترکی جائز اولور او جائز نقدر عظیم نقدر
 صنعی دقیق اولسه جناب حق انك صنعنه قادر دره نصوص شرع شریفدن
 بونك دلیلی (والله علی کل شیء قدیر) قول کریم الهیسیدر عقلا دلیلی
 جناب حق تام القدره کامل العالمدر هر بر جائز ده وجود وعدمه
 قابلدر ایمدی مولای متعال او جائزك ایجاد واعدا منه قادر اولور
 هر جائزی نقدر عظیم نقدر صنعی دقیق اولسه ده فعل
 وترك الهینك جوازینی توضیح ایدن شیء عظامم مصنوعات سبحانی
 وغریب مبتدعات ربانیدن شو عالمده مشاهده ایتدی کمز مواددر که

ذات اقدس الهی بونلرده قدرت عالی ربانیسیله ایجاد و اعدا ماتصرف
ایتمشدر اوت عادت اقدس الهی خوارق عاداتی یعنی عادتک جاری
اولمدینی امور عظیمی ایجاد ییور ما مغله جریان ایتمشدر یالکر
پیغمبران کزین علیهم صلوات الله اجمعین حضراتک ایادی مقدسه -
لرنده معجزه و دعوی جلیل رسالتلرینی تصدیق اوله رق یا خود
اولیاء عظامنک ایادی مفخمه لرنده کرامت یا خود بعض عباد الهینک
یدلرنده معونت یا استدراج یا خذلان اوله رق خارق عاده بی ایجاد
بیورر ایسه نادرا وقوعه کلیر تفصیلا بیانی کله جکدر حق اقدس
الهیده خیر و شری خلق بیور مق جائز در طرف عالی الهیدن وقوع
یافته اولان خلق مذکور ایسه قبیح اولمز بعض اهل بدعت قبیح
أولور دیمش ایسه ده اعتبار یوقدر زیرا جناب حق فاعل مختار در
ملك الهینده کیف ما یشاء تصرف ایدر و حسنی هر نقدر بزه مخفی
أولور ایسه ده بعض دفعه برشیء حد ذاتنده حسن أولور بزاوئی
شمر عد ایتمشدر حالبوکه شر بزه نسبة شر اولور بوسیدن شرمذ کوری
کسب و اندن نهیه مخالفت ایله مؤاخذه أولنورز ده فعل مذکورک
بزدن صدوری قبیح اولور أما جناب حقه نسبة فلان شیء خیردر
فلان شیء شر در دنیلمز زیرا جناب ذات احدیت برشیء ایله منتفع
و متضرر اولمز و ایضا کائناتده چوق دفعه لر شرح صوله کلیرا کر خلق
الهی و اراده ربانینز اولسه ملك الهیده چوغی خلق و اراده الله ایله

اولامش اولور بو حالده منصب الوهیت اوزرینه عجز و قهر لازم کلیر
تعالی الله عن ذلك علواً کبیرا

جناب حق اوزرینه عباد الیهسنگ حقنده صالح و اصلحک غیرینی
ایشامک جائز در و انلر حقنده صالح و اصلحی ایشامک جناب حق
اوزرینه واجب دکلدر

بو بابده بعض اهل بدعت معتزله مخالفت ایدوب اصلح علی الله
واجبدر دیدیلر خذلهم الله اکر اصلح علی الله واجب اوله ایدی
دنیا ده فقر . آخرتک عذاب الیم ایله مغذب اولان کافری جناب حق
خلق ایتمز ایدی زیرا او کافر ایچون اصلح اولان صغیرایکن انی خلق
ایتممکدر اکر خلق ایدرسه اصلح اولان صغیر ایکن انی اماته و یا حد
بلوغندن اول عقلانی سلب ایتملی ایدی لکن جناب حق اونی خلق
بیوروب حقنده اصلح اولانی ایشامدی ظاهر اولدیکه مولای متعال
حضر تدرینه عباد الیهسنه اصلح و صالح اولانی یا بمق واجب دکلدر
بلکه جناب حق فاعل مختار در اکر بزه ثواب و یررایسه فضل
الیهسیله و یرر تعذیب ایدرسه عدل ربانیسیله ایدر ثواب و عذابک
وجودنده طاعت و معصیتک تأثیری یوقدر لکن وقتا که نصوص
شریعت محمدی صلی الله علیه و سلمده مطیعنه ثواب ایله و وعد الیهی
عاصی عقاب ایله و عید ربانی وارد اولدی شرعا وعد و عیدی تخلف
ایتمامسی واجب اولدی زیرا تخلف ایتسه خبر الیهده کذب و خلف

لازم کلیر بوده محالدر لکن مطیعیندن بری حقیقه ثواب ایله وعد
تخلف ایتمامک واجبدر زیرا نقصدر نقص ایسه جناب حقّه محالدر
اماعقاب ایله وعیددن مولای متعالک بعض عبادینک ذنوبنی مغفرت
ایتمی اوزرینه دلالت ایلیان دلائل ایله کناهلری مغفور مؤمنلر
خارجدرلر

اما کفار خاکسار حقارنده وعید الهی تخلف ایتمز زیرا نار
جهمیده مطلقا محالیتلرینه دال ادله شرعی وارد اولمشدر . اما کناهلری
عفو اولنمیان مؤمنلر حقیقه خبر ربانیده خلف لازم کلسون ایچون
ولوبریسنی تعذیب ایله اولسون نفوذ وعید الهی لازمدر

ابصار ایله رؤیت کریم الهی

عقلا جائز در زیرا ذات اقدس سبحانی موجوددر هر موجودیده
رؤیت صحیحدر اولیه ایسه حق سبحانه و تعالی حضرتلرینی رؤیت
صحیح اولور لکن دنیا ده نخر دو جهان محمد مصطفی علیه اصفی التحایا
افندمن حضرتلرنندن بشقه کیمسه یه رؤیه الله واقع اولمامشدر آخرتده
ایسه نص قرآن واحادیث منیفه واجماع صحابه اولدیغندن اهل سنت
وجامعتک اتفاقله مؤمنینه رؤیه الله شرعا واجبدر فقط بلا کیف ولا
انحصار یعنی جناب حق رائی یه مقابله ، جهت . تجز کبی کیفیات
حوادثدن بر کیفیتله تکلف ایتمدن رؤیت اولنور زیرارؤیت بر قوه
ادراکیه در جناب حق او قوتی مخلوقنده خلق ایدر عقلا مرئی مقابله

سنده و جناب حقك جهت و حزن ده و بونلر مثللی شیرده اولمسی مشروط
 دكلدر مقابله . جهة . حيز و أمثالی شروط عادى قيلغشلردر بونلر سز
 رؤيتى خلق ايتكم جناب حقه جائز در و جناب حقه حدود و نهايات
 مستحيل اولديغندن ذات كريمى احاطه ايدر جه سنه عندالرائى انحصار
 سبحانى اولقسزين رؤيت واقع اولور . رؤية اقدس الهينك مؤمنينه
 وجوبيله (لا تدركه الابصار) قول شريف فرقائيسى بيننده مخالفت يوقدر
 زیرا ادراك ابصارك معناسى حدود و نهايات ايله مرئيتك متحيز اولمسی
 حيثيتيله على وجه الاحاطه رؤيتدر بوشكل رؤيت جناب حقه محال
 اولديغندن بوقولى كيمسه تفوه ايتمز بعض مبتدعين معتزله كتب
 مطولاتده مردوديتى بيان قيلنان واهى شبهه لره تمسكا جواز رؤيت
 الهيده اهل سنته مخالفت ايتديلر . • جناب حقه مخلوقات الهيسنه پيغمبران
 كزين عليهم صلوات الله اجمعين حضراتنى ارسال جائز اولوب واجب
 و مستحيل دكلدر بلكه ذات اقدس ربانيسندن بر لطف مخصوص و محض
 فضل و كرم رحمانيسيله احسان و رحمتدر . زیرا مشار اليهم افنديلر من
 حضراتنى ارسالده لا تحصى بر چوق مصالح و حكم وارد در از جمله وجود
 اقدس الهى علم و قدرت ربانى مثللى بي مستقلا معرفتده عقله معاونت •
 معاد جسمانى حساب مثللى عقلك استقلالى اولمديغى امورده حكم بى نهايه
 استفاده ايتكم • مواقعه اهتداء عقل اولهين بعضا كوزل بعضا چيركن
 اولان افعالك حالى بيان . اغذيه و ادويه نك منفعت و مضر تلرينى

بیانکه بونلری بیلک انجق اُدوار واطوار دنسکرده حاصل اولور مع
 مافیه تجربه لرده خطر دن سالم اوله مز علمیات و عملیاتده مختلف
 استعداد لری مقتضای نفوس بشری تکمیل و احتیاجات و ضروریات دن
 اولان صنایع خفیه یی بونلره تعلیم اشخاصه راجع اخلاق فاضله
 منازل و مدنیه ساکن جماعته عائد سیاسیات کامله حسنه ترغیب
 سیئاتی تحذیر ایچون ثواب مطیع و عقاب عاصینک تفصیلی اخبار
 و بونلر مثالی حکم و فوائده بی شمار در ۰۰ بعد ذا خفی اولیه که حضرت
 أبو البشر آدم صلی الله افندمز زماندن پیغمبر عالی شانمز رسول اخمزمز
 محمد مصطفی صلی الله وسلم علیه وعلیهم اجمعین افندمز زمان سعادتته
 قدر پیغمبران کزین علیهم صلوات الله اجمعین حضراتک ارسالی
 حاصل اولدیغنه اعتقاد ایتک بزم اوزریمزه واجبدان شاء الله باب نانیده
 مشار الیههم حضراته ایمانک تفصیل کیفیتی بیان اولنه جقدر
 و بالله التوفیق

(باب ثانی)

رسل نجام انبیاء عظام ملئکه کرام کتب مقدسه یوم آخرت
 و بونلره تابع اولان اموره ایمان بیاتنده در بو بابده بش فصل واردر

رسل نحمد انبیاء عظام علیهم الصلاة والسلام حضرتانہ ایمان
 ایتک یاتندہ در۔۔ رسول مذکر حر اولان بر انسان مقدس در کہ جناب
 حق ذات رسالتہ شرع شریفی ایلہ وحی و خلقتہ تبلیغ ایلہ امر بیور۔
 مشر در اگر تبلیغ ایلہ امر اولمزسه یا لکزنی تسمیہ اولنور۔۔ ارسال
 رسل جائز علی الحق اولوب فوائد کثیرہ ایلہ عباد الہیسنہ تفضلا
 احسان الہی وانعام ربانی جملہ سندن ایدیکی مقدمایان قیامش ایدی
 رسل نحمد حضرتانہ ایمان حضرت مولای متعالتک مشار الیہم
 حضرتانی مبشر مندر اولہ رق ارسال و خارق عاده معجزات سنہ ایلہ
 تأیید ایتدیکنہ وذات معالی ساتلری ایچون واجب و مستحیل و حق
 أحق عالیرندہ جائز اولان امورہ ایمان ایتکدر۔۔ پیغمبران کزین
 صلوات اللہ علیہم اجمعین حضرتانی ایچون امانت ، صدق ، فطانت ،
 عصمت اوامر الہیہ بی تبلیغ واجبدر بوصفات علیہ نک ضدی اولان
 خیانت ؛ کذب ؛ غفلت ؛ عدم عصمت ۔ کتمان مستحیلدر مراتب
 علیہ مقدسہ لرندہ نقصہ مؤدی اولیمان سائر اعراض بشریہ حق
 عالیرندہ جائز در بو مذکوراته کمال ایمان دلیلہ مقارن اولہ رق
 حصولہ کلیر بیانی شویله در کہ رسل نحمد صلوات اللہ علیہم اجمعین
 حضرتانہ امانت یعنی عصمت واجبدر ۔ معنای عصمت ظواہر مقدسہ
 پیغمبرانہ لری و بواطن مقدسہ نبوتانہ لری معصیتہ ملا بستدن محفوظ

اولقدر ضد امانت اولان خیانت مشار الیهم حضراتی اوزرینه محالدر
 ایمدی انبیای کزین حضراتی ظاهر ا زنا . شرب خمر . کذب و امشالی
 منہیات ظاہره دن باطنا حسد . کبر . ریا و امشالی منہیات باطنه
 دن محفوظدر لر . مشار الیهم حضراتندن معصیتک وقوعی
 ایهام ایدن نصوص شرعیہ کتب تفاسیر شریفه و شروح
 احادیث منیفه دهمذکور تاویلات حسنه ایله مؤولدر رسل عظام
 حضراتک حق احق عالیرنک نصوص مذکورہ دن بر نص ایله
 اشتباه ایدن مکلف اوزرینه نص مذکورک تاویلنی اکلامق و اعتقادی
 اهل سنت و جماعتک اعتقادینه مطابق اولمق ایچون علماء کرامه
 مراجعت ایتک لازمدر . . رسل نغام علیهم صلوات الله اجمعین حضراتی
 ایچون امانت واجب خیانت مستحیل اولمسی اوزرینه دلیل ا کر پیغمبران
 کزین علیهم صلوات الله اجمعین حضراتی فعل معصیتی ارتکابله خیانت
 ایتسه لر بز او معصیتله مأمور اولور ایدک زیرا جناب حق احوال
 واقوال و افعال پیغمبرانہ لرنده اتباع ایله بزه امر بیور مشر در حالبوکه
 فیاض مطلق حضر تلری معصیتله امر ایتمز . . پیغمبران کزین حضراتنه
 اوامر حق تبلیغده صدق واجب کذب محال اولمسی اوزینه دلیل
 انبیای عظام تبلیغده حاشا کذبی اختیار ایتسه لر جناب حق انلری
 معجزات باهرات یعنی ذوات اقدس لرینی تأییداً ایادی مبارکه لرنده
 اجرا ایتدیکی خوارق عادات ایله تصدیق ایتدیکی ایچون خبر الیهده

كذب لازم كليز زيرا معجزات جناب واحد قيومك عېدم تبليغ
ايتديكي هر شيدده صادق قدر قول كريم الهيى منزله سنده در تصديق
كاذب ايسه كذبدر كذبده جناب حقه محالدر اويله ايسه پيغمبران
كزينك طرف اقدس الهيى تبليغ ايتدكلري اوامر ونواهينك كافه
سنده كذبي اختيار ايمه لري محالدر كذبلى محال اولديسه صادق
اولملى واجب اولدى وهو المطلوب .. اما حضرات مشار اليهم افنديلر مزه
مطلقاً صدقك وجوبى كذبك استحاله سى اوزرينه دليل انلر كاذب اولسه
لر امانت وعصمتك وجوبه مخالف اوله رق خيانتى ارتكابلرى حاشا
جائز اولور ايدى حالبوكه حق احق مشار اليهمده امانت واجب خيانت
مستحيل اولملى اوزرينه دليل تقدم ايتدى .. پيغمبران عظام صلوات الله
عليهم اجمعين حضراتى ايچون فطانت يعنى تفطن تيقظ واجب ضدى
اولان غفلت عدم يقظة مستحيلدر بووجوب واستحاله اوزرينه دليل
حضرات پيغمبران عليهم صلوات الديان افنديلر مز فطين اوليوبده غافل
اولسه لرا خصام خصم اوزرينه اقامة حجتته وحق ايله اقناع ايچون
انلر ايله مجادله به قدر تلرى اولمز ايدى بو ايسه خلقى حقه هدايته
ارسال قيلند قلى منصب جليل نبوته مخالفدر بوسيله فطانت پيغمبران
واجب غفلت مستحيلدر وهو المطلوب

اوامر يزدانيه بي خلقه تبليغ پيغمبران كزين حضراتنه واجب
ضدى كتمانك مستحيل اولديغنه دليل مشار اليهم حضراتى تبليغ ايله

أمر اولند قلرندن برشيء كتم ايتسه لرايدى بز كتمان علم ايله مأمور اولور
ايدك زيرا جناب حق بزه پيغمبران كزين حضراته اقتدا ايله أمر
بيور مشدر بزم كتمان علم ايله مأمور يتمز باطلدر شو حالده پيغمبران
كزين افنديلر مز حضراتك تبليغي ايله مأمور اولدقلى شيلردن
بريسى كتم ايمه لرى باطل اولور بنا برين انلر ايچون تبليغ واجب
كتمان مستحيلدر وهو المطلوب

وأما رسل نхам حضراتى نك حق اقدس لرنده جائز أولان أمور
أكل • شرب • وحلالدن وطء نساء • ومنصب جليل رسالته
خلل ويرميان وكنديلى ايله اجتماعدن خلقه نفرتى موجب أولميان
امراض كبي وقوع يافته أولان سائر أعراض بشريه در • دليلي منصب
عالى رسالته خلل ويرميان أو اعراضى مشاهده ايتكدرد اما جنون
اغماء طويل ، جذام ، برص • عمى كبي نفرة خلقى موجب ومنصب
جليل نبوتى محل امراض حق هايون رسالتانه لرنده ممتنعدر

انبياء كزيندن حضرت شعيب عليه الصلاة والسلامك أعمى
أولديفى ثابت دكلدر حضرت ايوب عليه السلامك ابتلاسى
ايسه تحت الجلد بر المـدن عبارت اولوب موجب تنفير دكل ايدى
قصة عاليسنده تنفيرى موجب شهر تشعار اولان حكايات باطلدر
أما تبليغ ايتدكلرى اخبارده سهوايتمك حضرات پيغمبرانه ممتنعدر
(الجنة اعدت للمتقين) خبر شريفى كبي قام زيد ذهب عمرو مثلى اخبار

غير بلاغيه دده سهو ممتنعدر زیرا سهو مذکور بعض ضعيف الاعتقاد اولانله عموم اخبارده شبهه ايراث ايدر يوايسه منصب جليل رسالته منافي اولور اما صلاتده يا كلمق کي افعال غير بلاغيه ده سهوايتک حق عالي هما يولاننده ممتنع دکدر بوافعال غير بلاغيه نک حکمت وقوعی ايسه ناس عبادتلاننده سهو حدوثنده نصل ايشليه جکلريني کورملريدر که دلالت فعليه دلالت قوليه دن اوضحدر اما قولي فعلی بلاغيانده نسيان ممتنعدر

قوليه الجنة للمتقين. فعليه صلاة ضحی کي ايمدی بومتللی يي ناسی ذات هايون رسالتما بانه لرينه اقتدا ايتسون ايچون يايغله امر اولندقلاننده اولکيني قول ايکنجي يي فعل ايله تبليغدن اول بونلردن برشي نسيان حضرات پيغميرانه جائز اولمز اما بعد التبليغ نسيان من طرف الله جائز در. حکمتينده ذات اقدس الهي بيلير. اما طرف شيطانيدن نسيان انلراوزرينه مستحيلدر زیرا خيث مرقومک پيغميران عظامه يولي يوقدر. حضرت أبو البشر آدم صفي الله على نبينا وعليه سلام الله افندمزه ابليسک وسوسه سی ايسه تمثيل ظاهري ايله در ممتنع اولان بواطن مقدسه پيغميران عليهم صلوات الرحمن ايله ابليس ضلالت انيسک لعب خيثانه سيدر

(تلخيص) والحاصل منصب جليل رسالتی اخلاص و تقصه مؤدی اوليان وسائر آحاد ناسه جائز اولان ظواهر مقدسه پيغميرانه جائز اولور اما

بواطن علیه نبوتناهیاری هر بر شائسته نقص و سفیدن منزّه محفوظ
و پروردگار اقدس لرینه متعلقدر بونک خلافتی ایهام ایدن شیرمؤولدر
تاویلنی ا کلامق ارزوایدن علماء اعلام انار الله براهینهم حضراتنه
مراجعت ایلسون

أرباب دانشه خفی اولمیه که حق احق رسل نغامده وجوب استحاله
جواز دن ذکر اولنانک جمیع انبیاء کرام حضراتی حق اقدس لرنده
ده اعتقاد ایتمار لازمدر زیرا بودوات معالی سمانه جناب باری جل
جلاله بر شرع شریف ایله وحی بیورمش ایسه ده خلقه تبلیغ ایله
امرا ایتمامشدر زیر اذوات نبوتما بانه لرندن اول تشریف عالم ناسوت ایدن
رسل نغام حضراتنک شرایعندن ناسی استفقاده کندیلرینه چوق دفعه
مراجعت ایدر لرو کندیلرینک احترام کورملری وناسک مشار الیه
حضراتنه وحی اولنان اوامر ایله عمل ایتملری ایچون خلقه نبی مکرم
اولدقلرینی تبلیغ ایله مأموردر لر جمیع انبیاء کرام و رسل نغام حضراتنه
من عند الله نبی و رسول اولدقلرینه و حتی عالیلرنده واجب مستحیل
جائز اولان شیرله اجمالا ایمان هر مکلفه واجبدر اولی اولان عدد
همایونلرنده اختلاف روایتدن ناشی عدد مخصوص ایله تعیین ایتمکدر
قال الله تعالی (منهم من قصصنا علیک ومنهم من لم نقصص علیک)
لکن کلام قدیم ربانیده اسامی شریفه لری مذکور اولان رسل نغام
علیهم صلوات الله اجمعین حضراتنه تفصیلا ایمان ایتمک واجب ارلور

شواہیات آئیدہ اسمی شریفہ لرینی بز جمع ایتدک

أسماء رسل الله في القرآن خمس وعشرون نخذ بياني

هم آدم ادریس نوح هود یونس الیاس الیسع داود

اسحاق ابراهیم لوط موسی ذوالکفل یحیی زکریا عیسی

شعیب ثم صالح ایوب هرون ثم یوسف یعقوب

ثم سلیمان واسماعیل محمد ختمهم الجلیل

أبیات مذکورہ نک مالی معلومدر

(فصل ثانی)

پیغمبران کزین علیهم صلوات الله أجمعین افندیلرمز حضراتنک ایادی

مقدسہ عالیارندہ مولای متعال حضر تلرینک اظهار بیورمسیلہ ذوات

معالی ساتیلرینی تأیید ایتدیکی معجزات سنیه نک شرحی وطریق

وقوعی وبو معجزه سنیه لرایلہ حجت اقامہ سنک بیانی حقندہ در

معلومدرکہ جائز عقلی ثبوت وانتقای قبول ایدندر وهر جائز نقدر

عظیم نقدر صنعی دقیق اولسه ده قدرت علیه ربانینک تحت تصرفندہ

داخلدر شومکوناتک خالق لم یزلی فاطر مطلق ذات اقدس الہی اولدینی

ثابت اولدقد نصکرہ شومصنوعاتندہ مشاہدہ ایتدیکنز عظمت دقت

وحکمتک بعض تفصیل وتوضیخنہ اشارہ ایدہ لم

اولا عالم کوا کہ عطف نظر ایدہ عظمت وغرا بتلرینی عجیب ترتیب

وانتظاملرینی کورہ لم عالم جویاتہ هوا، ریاچ، بروق، رعود، سحاب، امطار

و کائنات جو یہ محوی اولان اشیایہ باقہ لم بونلرک حقیقتنی شرح و بیانہ
 علم ہیئت و جویاتہ منسوب فنون کتابلری متکفل در زمینہ و مشتمل
 اولدینی جبالہ وادیلرہ مغارہ لرہ دوزاووہ لرہ بحار انہارینابیع معادن
 و لازل و تغیرات عظیمہ یہ باقہ لم عالم معادنہ و مشتمل اولدینی ألوان
 طعوم خواص منافعندہ کی انواع مختلفہ سنہ عطف نظر دقت ایدہ لم
 عالم نباتہ و بوندہ کی اشجار و ازهارک ألوان طعوم اشکال اقدار
 خواص منافی متنوع اثمارک اختلافنہ غرائب توالد و نمواقامتہ و احوال
 سائرہ سنہ باقہ لم کہ بونلرہ متعلق علم افراد بالتالیف اولہ رق اعظم
 علوم دن عد اید لمشدر

عالم حیوانہ و حاوی اولدینی صغر و کبر قوۃ ضعف ذکاء بلاد تباين
 اشکال و هیأت و اصنافندہ وقوع یافته اولان اختلافندہ عظام و غرایبنہ
 و عالم حیواندہ کی عجیب ترکیب و غریب تألیفہ و اعضاسندہ کی احکام
 صنع و اتقان وضعه حتی ہر براءضا و وظیفہ سنی ایفا ایتدیکنہ عطف
 نکاہ دقت ایدہ لم ذات انسانیزہ و جسد انسانیزک مشتملاتی اولان صنع
 غریب و ترکیب بدیعہ نظر ایتدیکمزده بزی حیرت الیر و دہشت
 استیلا ایدر تشریح انسانی مبین کتابلرہ اعضا و وظائفند و ابینہ و تراکیب
 انسانینک غرائب و انتظامات و دقیق صنعندن بیانانته اطلاع پیدا ایتمکدہ
 اولی الابصار اولان ذواتہ عبرت واردر انساندہ اک اغرب حواس خمسہ
 دنیلان سمع و بصر، ذوق، شمع، لمس، حاسہ لریدر بونلرک اغربی حاسہ

بصردر که محتوی اولدینی طبقات عینی و اشکال و صفات و انتظام و احکامی
 نوامیس کونیه اوزرینه وضع ایله صنع باهری حتی کیفیتنده افکاری
 حیرتده براغان وظیفه ابصاری ایفا ایتمی غرابت بخش اولی النهیدر
 تالله العظیم شو عوا لم مذ کوره اوزرینه تکلم و حقائق و احوالی شرح
 ایتکه متکفل اولان علوم نقدر توفیق ربانی کندیسنه یاور اولان
 ذوات معالی نعاتک قلوب صافیلرنده ایمانی زیاده لندیرن و عظیم قدرت
 و کمال علم و حکمتله صانع عالم تبارک و تقدس حضرتلرینی مشاهده
 ایتدیران عوا لم مذ کوره نک عجائب و غرائب اطلاعدن بر چوق منافع
 بیشمار سرد و اتیان ایتش ایسه ده لکن عوا لم مذ کوره نک
 منظوی اولدینی عجائب و دقائق حکم و اسراری دریای بینهایه در که انی
 نه عقول ادراک ایدرنه روایات و نقول احاطه سنه یتیشور کائنات
 اراده الهیسی و قدرت سامی ریانیسی و تدبیر خالقیمی و حکمت بالغه
 صمدانیسی ایله منصبه جلوه پیرای بروز اولان مولای متعال تبارک
 و تقدس حضرتلرینی هر بر نقا یصدن تنزیه و انواع تسبیح ایلر زشو
 موجوداتک حدوتی و بونلر ایون بر صاعدن البته لازم اولدینغی
 که افلاک و زمینک ریسی و پرردکار لم یزلیسیدر.. بعد التأمل قطعاً
 معلومنز در که هر برجائز عقلی مهم اولسون عظیم اولسون جسم غریب
 عجیب اولسون مجموعی شو قادر علیم حکیم اولان الله ذو الجلال
 حضرتلرینک تحت تصرف قدرت الهیسنده داخلدر لکن جناب

حق جل و علا تکوین کائنات و تصویر عالمه أسباب و قوانین وضع
بیورمشدر حوادثی احداثده ظهور أسباب و قوانین ایله عادت علیه
الهیة جریان ایدر مثلاً حدوث نباتی تراب ماء حرارت واسطه سیله
حدوث حیوانی ذکرده انقی یه مادهٔ اصلیه بی انتقال تکوینندن
هر برر لری اوزرینه زمان مخصوصک مروریله برابر جوف انقی ده وسائط
شتی ایله حیوانی تمیه واسطه سیله خلق و ایجاد بیورر لکن ادلهٔ عقلیه
ده بحث و نظری تدقیق و عظیم قدرت صمدانیه بی و کمال علم ربانیه
بی ملاحظه و عجائب صنع سبحانیه بی تدبیر ایتدی کمزده بز معاشر
اهل سنت و جماعته ظاهر و هوید اولور که جناب حقک وضع
بیوردینی او حمیع اسباب و قوانین که احداث حوادثده عادت
الهیة انجق او أسباب و قوانینک ظورنده جریان ایدر دکل الا
أسباب و قوانین عادیه در یعنی عادت الهیة ظهور أسباب و قوانین
عندنده احداث حوادث ایله جریان ایدر یوخسه أسباب و قوانین
مذکورہ نک تأثیری ایله دکلدر حوادثک تکون و حدوثه مخصص
اولان زمانده کنلاک عادیدر جناب حق ایسه حوادثی او اسباب
و قوانین اولمقسزین و تکون حوادثه ظرف اولان زمان اولمقسزین
احداث ایتدیکه قادر در بو حقیقت تراب ماء حرارتده الوان طعوم رائحه
و شکل خاص ایله متنوع انواع نباتاتی تصور ایتکی ادتی برداعی ظهور
ایتدیکنی و بو عناصرده او تصرف عجیب و غریب ایله انواع نباتاتده

تصرف اهل اوله جق علم و قدرت و ارادة اولديغنى تأمل تفكر ايدن حقيقت اند يشان زمانه ظاهر و اشكار اولور. و ايضاً دقائق صنع و غرائب وضع اوزرينه مشتمل بعض انواع نباتى جداً از بر زمانده و اودقائق بولنميو بده او غرائبى محتوى اولميان نوع آخريده بسيط تكوين ايله چوق براوزون زمانده حادث اولديغى بولوب كور يورز ايشته بوجانب فيض جالب حضرة الله دن بر تنبيه در كه زمان تكوين كنديسى اوزرينه توقف لازم ايله متوقف بر شرط عقلى دكل تكوين كنديسى اوزرينه تكوينه ظرف بيله قيلنماشدر لكن زمان من غير احتياج طرف اقدس الهيدن جارى بر عادتدر اكر زمانه احتياج اولسه صنعتده اغرب اولان شىء غرابته ما دون بولان شيدن اطول بر زمانده حصول يافته اولور ايدى. ••••• بوتقير رمزله كائناتى احداث بيوران خالق جل و علا حضر تلرينك تكون حوادث ايچون وضع بيوردنيغى اوشروط و اسباب و ازمنه اولمقسزين كائناتى احداثه قادر اولديغى ظاهر اولدى ايمدى مولاي متعال تبارك و تقدس حضر تلرينك او اسباب اولمقسزين بر نباتى لحظة واحده ده كوز آچوب يومنجه و يادها از بر زمانده ايجاد و احداث بيورمى جائز در كذاك بر حيوانى ايجاد و يا جمادى نبات و يا حيوانه قلب ايتمه قادر در و بولردن اعظم خوارق عاداتى احداثه لمحء واحده ده قادر در لكن احداث مذكور مطرد اوليوب بلكه رسل نڅامندن بر رسولنك يد سعادتنده دعواى

رسالتی مصدق معجزه سنیہ اولمق اوزره خوارقی جریان ایتدیر
نتکم حضرت موسی صلوات الله علی نبینا وعلیه التحیة افندمزک
عصای سعادتی ار درهایه منقلب صکره زمان یسیرده ینه عصایه اعاده
قیلغشدر وهکذا انفلاق بحر ؛ انشقاق قر ، کلام عجموات ؛ عرش
بلقیسک کوز اچوب یو منجه کتیرلسی مثللی کندیلرینی مصدق ایدی
نبوتنا هیلرنده ظهور ایدن منقول معجزات سنیہ پیغمبرانک کافه سی
بوسیاقدہ موجهدر بوندن صکره قبلرینی غفلت پرده سی استیلا ایدن
بعض کسان کوررسنکه کثره مشاهده لرندن مصنوعات الهیه نک
عظمت وغرابتی ذات غفلت سماتیلرندن مستور قالب نادر الوقوع بر
شیئک حدوثندن تعجب ایدرلرکه او ارباب غفلتک حواسی عندنده
شیء مذکورک ظهورنده عادة علیه ربانی جریان ایتماشدر بعضاً ده
او حادث جدید عظمت ودقت صنعتده مألوف اولدقلری وجریان
عادتله حصوله کلان شیئک مادوتده اولور بوايسه او ارباب غفلتک
نادر الوقوع اولان شیء مشاهده اوزرینه اعتیادلری اولدیغندن منبعثدر
حتی اوشیئک وقوعی اخبار ایدن ذاتی هر تقدیر عندلرنده ثقه ده اولسه
چوق دفعه لراشد تکذیب ایله تکذیب ایدرلر مثلاً ارباب غفلتی
کوررسنکه انلر ترابک نباته صکره غذا صکره نطفه یه رحم اتی یه
انتقالندن صکره ده علقه به صکره ات پارچه سنه انقلابی صکره
حیوان تصویر اولنوب سمیع بصیر شام ذائق لامس اولدیغنی صکره

بطن اتی دن چیقوب عقلی وقواسی ضعیف اولدیغنی صکره قوی •
 صلب . لیب . حاذق • عالم • مدقق اولوب انا انا دیدیکنی وجسد اناسینک
 برقبضه تر ابدن عبارت اولوب ینه اولسکی حالنه عودت ایده جکنی
 بیلیر بونکله برابر شو جریان ابدن جمیع تحولات و اطوار دن تعجب
 ایتمزلرده بر مخبر فلان رجل صالحک یدیلہ برص مرضنه مبتلی اولان
 فلان مریضه جناب حق شفا احسان بیور مشدر مجرد صالح مذکورک
 لمسیله دعا سیله شفایاب اولمشدر دیسه بونی محال عد ایدر لر و خبر
 مذکور ی خرافات اقوال دن صایر لر هر نقدر مخبر عند لر نده اصدق
 رجال دن ایسه ده • حالبوکه وجه مذکور اوزرینه او ابرصک شفا یاب
 اولسی او اطوار عجیب ایله مکون اولان تکوین انسانیدن اعظم اولمیوب
 بلکه عظمتده چوق مادوندر شوقدرکه اولسکیسی جریان عادتله در
 ایکنجیسی بویله دکل لکن مادامکه هر ایکیسنیده ایجاد ایدن قادر
 علیم فاعل مختار اولان الله ذو الجلال حضرتلریدر برنجیسی اذعان
 ایکنجیسی انکاره داعی اولان نه در اوتا کر دعوی • او رجل صالح
 ابرصک شفا سی کندی قدرتیله ایجاد ایتمشدر صورتنده اولورسه
 انکارک وجهی واردر زیرا شفای احدائه صالح مذکورک قدرتک
 صلاحیتی یوقدر لکن دعوی واجب تعالی حضرتلری رجل صالحک
 النده بر کرامت اولمق اوزره ابرصه شفا احسان بیور مشدر صورتنده در
 شو حالده مادامکه مخبر مذکور صادق و موثوقدر بو خبری انکاره

وجه یوقدر او تأثیری هر برشی اوزرینه قدره فاطره ربانیسی آشکار
اولان مولای متعاله نسبت ایتک جائزدر بوتقریراتک کافه سنه علمک
محیط اولدقده امر مذکورک جائزاندن اولدیغنی اذعان ایدرسک معلوم
اوله که جناب حق جل وعلی وقتا که انسانلره پیغمبران کزینی ارسال
بیوردی دعوای جلیل رسالتلرنده صادق اولملرینه دلیل اولسون
ایچون معجزات سنیه ایله تأیید بیورمشلردر • معجزه • طرف اقدس
ذیشرف الیهیدن رسالت دعوای جلیلی ادعا ایدن ذوات معالی سماتک
ایادی مقدسه لرنده ظاهر خارق عاده برامردر ایمدی مبعوث اولان
رسول مبجل امتی ذات معالی نعات پیغمبرانه سنی تصدیق ایتکه
و طرف اشرف الیهیدن تبلیغ ایتدیکی شرع شریفه امثاله دعوت
ایتدیکنده البته صدق مدعاسی اوزرینه بر دلیل ایسته یوب انشقاق
قر و صخره دن ناقه خروجی و امثالی خارق عاده شیر طلب ایتلری
لازم اولمغله حق سبحانه و تعالی حضرتلری اؤرسول مفتحک ید
سعادتلرنده خرق عادت ایدر و امتک طلب ایتدکلرینی ایجاد بیورمغله
پیغمبر مشارالیه حضرتلرینک دعوای نبوتنده صدق ظاهر اولور
و قومی اکا و طرف ذیشرف الوهیتدن کلان شریعته ایمان ایدرلر زیرا
او قومک بومعجزه سببیله ایمانه کللری تقدیرنده استدلالده شویله
دیملری لازم کلیر که شو خارق عاده امرک وجوده ابرازینه انحق قادر
مطلق اولان مولای متعال حضرتلری مقتدردر او ادعای رسالت

ایدن ذات شریف صادق اولماسه جناب حق او معجزه یی انک ید
 مقدسی اوزرنده ابراز بیورمزایدی ایمدی امر عجیب مذ کوری ابراز
 الہی . او ذات معالی صفاتی طرف اقدس ذیشرف سبحانیسندن تصدیقدر
 بلا ریب ولا شک «معجزه» او رسول محترمک وقومنک حقنده جناب
 حقک بنم عبد خالصم طرف اقدس الوہیتدن تبلیغ ایتدیکینک
 جمیعندہ صادقدر . دیمہ سی منزله سندہ اولور «تمثیل» بر کیسه حضور
 حکمداریدہ حکمدار ایله رعیتہ اراسندہ سفیر اولدیغنی وذات کریم
 حکمداریدن تبلیغ ایتدیکي شیردہ تصدیق ایتلرینی ادعا ایتسه رعایا
 دعوائی مذ کورده سفیری حکمدارک تصدیق ایتدیکنه دالہ برهان
 طلب ایتسه لر سفیردہ بودعوادہ بنی حکمدارعالی تبارک تصدیق ایتسنہ
 علامت شمدی حکمدار والاشانمز تحت عالیبخت ہما یونندن قالقاریدی
 خطوہ یوروروفعل مذ کوری عادتک خلافي اوج دفعہ اجرا ایدر دیر
 حکمدار ذیشان بوکلامی مجرداستماع بیورمغلہ کرسی اجلاندن بالقیام
 سفیرمذ کورک دیدیکی کبی پیارسہ شک یوقدرکہ حاضر اولان جماعت
 سفیرک صادق اولدیغنی جزما بیلرلر وحکمدار عالی تبارک کیفیت
 مذ کورہ ایله قیامنی سفیری تصدیق عدایدرلر وحکمدارلرندن ہر نہ کہ
 تبلیغ ایدرسہ اکا اعتماد ایدرلر . . ایشته بو تمثیل نبوت ورسالتدر
 بونک خلافتی تفوہ ایدن احمقدر یاخور قیود عناد وخسران ایله
 مربوطدر کلامز بواریہ رسیدہ اولدیغندہ دیرزکہ رسل کرام علیہم

الصلاة أفنديلر من حضرتك اياى مقدسه لرنده جناب حقك
 اظهار بيوردنى معجزات سنیه بك چوقدر او معجزات سامياتدن
 اشهار بولان و قرآن مجيد سبحانهيد و يا احاديث نبويده ذكر اولنا
 - نلردن بيان وقانون عقل سليم اوزره معجزات سنیه مذكوره نك
 توجيه حصولنى شرح ايله لم تا كه اهل ضلال اولان منكرين خبيثينك
 باطل شبهه لرى بوتوجيه و جيهمزله مندفع و اهل حق و جماعت
 ايمانك يقينى مزداد اولسون قرآن كريم الهيده مذكور بعض پيغمبران
 كزينك أشهر معجزات سنیه لرى اوزرينه تكلم ايتدكد نصكره نينا
 حضرة محمد مصطفى صلى الله عليه و س - لم أفندمك معجزات علوى
 رسالتآبانه لرينى اى روجه بر فصلده طريقه مخصوصه اوزرينه تمهيداً شرح
 و بيان ايده جكر

قرآن كريمده مذكور معجزات سنیه حضرات پيغمبراندى برينى
 سيدنا موسى عليه الصلاة والسلام افندمك معجزه سنیه سيدر . .
 حضرت موسى عليه صلواة الله الاوفى عصاى سعادتى قلزم دكزينه
 اون ايكي اورديفنده دكر ياريلوب صوي چكادى بنى اسرائيل
 اورادن بالمرور فرعون عليه مايستحقندن خلاص اولديلر صكره
 فرعون حضرت موسى وقومنه لا حق اولمق مراد ايتديكنده دكر
 فرعون و قبطيان اوزرينه منطبق اولمسيه جناب حق انلرى
 هلاك ايلمشدر

معلوم اوله که شو ذکر اولنان معجزه سنيه نك خبری کنديسته
 واصل اولان کيمسه اکر العیاذ بالله وجود إله عالمی منکر ايسه او منکر
 حقنده صواب اولان وجود ذات کریم سبحانی وصفات جلیل إلهی
 اثباتی اوزرينه انك ایچون دلائل اقامه اولنوب بعده معجزاتك حالی
 اکابیان اولنملي اکر وجود خالق اقدس تعالی شانہ حضر تیرینه مؤمن
 ايسه نه زمان عظمت قدرت إلهیسی تصور و عظام اعمالنی تأمل ایتسه،
 انفلاق بحرک انجق تحت تصرف قدرة إلهیده داخل جائزات جملة
 سندن بر جائز عقلي اولدیغینیده پیش نظر انصاف و تأملنه الملی زیرا
 عقل معجزه مذکورہ نك ثبوت و انتفای قبول ایتسیله حکم ایدر
 و ثبوتندنده محال لازم کلمز و تصدیقنی منع ایدن بر مانعده یوقدر
 انفلاق بحرک جوازنی ایضاح ایدن مواد دندرکه ماء بقیه أجسام
 کبی انقسامی و تماسکی قابلدر نتم بروددن تجمیدنده و تماسکی مشاهده
 اولنور صفوق کونلرده بیوک نهر لرک تجمید ایدوب اوزر لرندن
 حیواناتك مرور ایتسی کبی هر نقدر آب بحر قلزم ك بنی اسرائیلک
 مروری زماننده اوسرعت ايله انفلاق و تماسك ایتسی بعده صوسریعاً
 سیلانه رجوع ایدوبده فرعون و قومنی غرق ایتسی قدرة تامه یه محتاج
 امور عظیمة ايسه ده جناب حق سبحانه و تعالی تام القدر تدر ذات
 اقدس إلهیسی بوکبی شیلر عاجز براقز ایمدی وقتا که بز معاشر
 مسلمینه تحت تصرف قدرة سبحانیده داخل جائزات عقلیه دن بولنان

معجزه سینه مذ کوره بی براهین عدیده ایله نزد مؤمنانه مرده صدق
عالی رسالتنا هیلری ثابت اولان سیدمز شفیع مبعوض نبی محترم
حضرت محمد مصطفی علیه صلوة الله الاوفی افندمز لسان عذب البیان
سامیلری اوزره منزل من عند الله قرآن کریم الہی خبر ویردیه
مشکسر شبهه سز بز اکا ایمان و تصدیق ایتدک منصف اولان بر ذات
یو معجزه بی تأمل ایتدیکنده محالاتدن عدایده مز زیر ا جناب حق
رسول مبعوضی تأیید عباد مؤمنینی حفظ اعداء کافرینی اهلک ایچون
معجزه مذ کوره بی احداثه قادر در

ینه قرآن کریمده مذ کور معجزات سینه دن بریسیده سید ناموسی
علیه السلام افندمزک عصای سعادتیه حجره ضرب ایتدیکنده حجر
مذ کورک اون ایکی یرندن امر الہی ایله آب لذیذ نبعان ایتسیدر
بعضیلر حضرت موسی یه مخصوص بر طاش ایدی بعضیلریده لا علی
التعین بر طاش ایدی دیور لر بوراده ده ینه دنیلر که شو معجزه
سینه نک خبری کندینه واصل اولان کیمسه اکر وجود خالق جل
وعلی بی منکر ایسه شخص مزبور حقنه صواب اولانی بز ذکر
ایتدک اکر وجود خالق جل وعلا بی و تمام قدرة و عظیم اعمالی مؤمن
ایسه شو معجزه سینه بی تصدیق ایچون حجر دن ایکی طریق ایله
نبعان مائک جائز اولسنی تصور ایتسی کافیدر طریق اول جناب حق
نبی اسرائیله کفایت ایده جک بر مقدار صوبی عدمدن خلق و ابراز

بیورر صکره انلرک مشاهده سنده زمان ضرب موسی علیه السلامه
 سیل ظهور آبی حجر دن قیلار طریق ثانی • هوایی مایه تحویل ایدر
 و مشاهده ده سیل بروزی نینه حجر دن قیلار • هوائک مایه مائک
 هوایه تحویلی کیمیا کرانک تحت تصرف قدر تلرنده داخل امور جائزه
 دن اولدیغنی فن کیمیایه آشنا اولنریلیر فن مذکورده هوایی سائلاتدن
 یر سائله تحویله قدر تیاب اولیور لر • کیمیا کرانی وانلرک جمیع
 عمالی خلق بیوران فاطر مطلق حضرتلرینک قدره علیه ربانیسی
 شبهه یوقدر که ده اکلدر • وقتا که بز معاشر مسلمینه او معجزه
 سنیه بی مخبر صادق افندمز حضرتلری خبر ویردی قادر مطلق جل
 جلاله حضرتلرینک تحت تصرف الیه سنده داخل جائز اتدن اولدیغینیده
 کوردک مولای متعال حضرتلرینک موسی علیه السلامه معجزه
 اوله رق امر مذکور ایجاد و صحرای تپه ده صویه احتیاج کوستردیکی
 بنی اسرائیل قوللرینک حیاتی بوسبیلله ابقا ایتدیکنه ایمان و تصدیق
 ایتدک

قرآن کریمه مذکور معجزات سنیه دن برسییده انقلاب عصای
 موسی علیه السلامدر اجمالا معجزه مذکورده نک بیانی • حضرت موسی
 برادر والا کهرلری جناب هرون علیهما السلام ایله فرعون علیه
 مایستحق ایمانه دعوت ایتدکلرنده فرعون علیه مایستحق اوایکی
 پیغمبر ذیشانی حاشا سحر بازظنیله برطاقم ساحر طویلا یوب مشار

اليهما حضراتي كويا مبارزه به دعوت ايلدى سحر بازات مقابله
 پيغمبرانده آداب رهعايت ايدى رك ياموسى ايلك دفعه بزى اجراى
 صنعت ايدى لم يوخسه سزى دين مكالمه ايتديلر حضرت موسى عليه
 الصلاة والسلام مقابله ايلك دفعه سز اجرا ايدك بيورديلر . سحره
 فرعون صنعتلرني اجرايه مسارعت ايتديلر موجود لرى يمش بيك
 ايدى ژيوه ايله مصنع ايب ودكنكاردن عبارت آلات سحره لرى
 اعين ناسده بيلان وازدهار كى شيلر تخيل ايتدرديلر ساحه مبارزه
 كويا بيلانلر ايله طولدى حضرت موسى عليه السلام يد مؤيد
 رسالنتا هيلرنده بولنان عصاى سعادتى يره براقويرديلر اوانده اومبارك
 عصاراژ درهاى كبره بالانقلاب بيلان تخيل اولنان كافه اشياى بلع
 يدوب محوايتدى ميدانده هيچ برشى براقيدى حضرت موسى اومقلب
 ارذرهاني باشى طرفندن يد سعادتنه النجه ينه عصايه تبدل ايتدى
 بومعجزه كبراني مشاهده ايدن سحر بازان جمله دائره منجيه ايمانه داخل
 اولديلر فرعون واتباعى وادى عتو و طغيانده قالب ايمانه كلان ذوات
 معالي سماتى صلب و اعدام ايله مرتبه قصواى شهادتى احراز ايتدردى
 رضوان الله تعالي عليهم اجمعين ؛ بومعجزه سنه حنقنده دنيلر كه
 بومعجزه عظيمه يى استماع ايدن كيمسه اكر خالق جل و على حضرتلرينه
 وعظيم قدرة الهيسنه مؤمن دكسه بونك حنقنده صواب اولانى مقدا
 ذكر ايتدك اكر مؤمن ايسه شو بمعجزه كبرانك وقوعى تجويز

ایچون شونی تصور گفایت ایدر که عوالم نبات و حیوانیدن نقدر
 عظیم جسم مصنوعات ربانی و ارایسه کلیسی قدره فاطره زبانی و تکوین
 عالی الهی ایله حادثدر ماده لرینی بصورتدن صوره آخره تحویل
 نباتی ترابه ترابی نباته تقلیب ایدر شو عالم کونده حدوث و ظروف
 کائناته قیلدینی أسباب و ازمئه هسی عایددر او خلاق عوالم
 حضر تلی اعمال مذکوری او أسباب و ازمان اولمقسزین ایجاد
 مقتدر در اعدام اجسامه و یا ابصار کو رمز درجه ده اجسامی هباء
 منشور اوله رق تفریق قادر در

ایمدی بز معاشر امت محمدیه یه وقتا که خبر صادق علیه اُکمل
 التحیات و اوفر التسلیات اُفندمز حضر تلی سید ناموسی علیه السلامه
 معجزه مذکوره نک حصولی خبر و یردیه قدره عالی الهینک بو
 ودها بوندن بیوک جائزاته تعلقنه اعتقاد و ایمان ایلرودیرز که جناب
 حق جل و علانک جسم نباتی اولان بر عصایی ارثرهای کبیره تقلیب
 و بعض اجسام ارضیه ضمیمه انی بیوتمی و سحره نک ایب و دکنکرینی
 بلع ایتدکد نصکره اولجه اولدینی مقدار یله عصای معجزه نمایه اعاده
 قیامسی و تعظیم ثعبانده زیاده ایتدیکی اجسامی و یوتدینی ایب و دکنکرک
 - اجسامی افنا ایتمی یا خود اجسام مذکوره بی جمله تفریق و کورلیه جک
 درجه هباء منشور قیامسی خلاصه بونلرک کافه سنی جناب حق
 بلا أسباب و ازمئه عادیه ایجاد بیورر زیرا حضرت سبحان او ایجاد

واحداثه قادر در شو حاله خرق عاده رسول الهی جناب موسی
 علیه السلام صدقه دال بر معجزه سنیله اولمش اولور
 قرآن کریم خبر ویردیکی معجزات سنیله دن بر معجزه کبراده ترفع
 طور معجزه سامیسیدر . باری تعالی و تقدس حضر تلی بنی اسرائیلدن
 نبی محترمی جناب موسی علیه السلامه متابعت و کلام الهیسی اولان تورات
 شریفک احکام منیفیله عمل ایتکه عهد و پیمان المش ایدی بنی اسرائیل
 بوتکالیف شاقه یه تحمل ایده میزدیملریله حق سبحانه و تعالی حضر تلی
 جبل طور سینایی یرندن قلع و بر آدم قامتی قدر اوزرلرینه تنزیل
 ایتدی و اوکلرینه آتش و ارقه لرینه دریایی کتیر روب طور دردی
 یوسبیله فراره میدان بوله مدقلرندن مجبور اطاعت و جبل طوره
 نظرایله بریوز لری اوزره سجده ایتدیلر نهایت اوزرلرندن عقوبت
 مذکوره رفع اولدی . بومعجزه کبرانک جواز وقوعنی وجود اقدس
 الهی یه ایمان و اعمال عجیب سبحانیده تأمل ایدن کیمسه تسلیم ایلر .
 زیرا جناب حق جل و علا جدا عظیم بر چوق اجرایی رفع ایدوب
 . فراغ . یعنی بوشلقده اقامت ایتدیرر اکر متأخرین اهل هیئت
 مذهبی اوزرینه اجرام مذبوره فراغده ناموس جاذیتله قائمدر دنیلرسه
 بزجوابنده دیرزکه ناموس مذکوری ایجا دیوران حق سبحانه
 و تعالی رفع طور ایچون انک نظیری بر ناموس احداث ایتکه
 قادرا . در مع هذا بیانات مقدمه دن منظمدر که شومکونانده جناب

حقك وضع بيوردینی أسباب هب عاید در ذات اقدس سبحانیسی بلا
وجود اسباب کائناتی ایجاده قادر در

قرآن حکیم الهی بی تصدیق ایدن بز معاشر مؤمنینه وجود اقدس الهیسنه
و کمال قدره ربانیسنه ایمان آیتدیکمز اولسبحانك تحت تصرف قادرانه
سندده داخل اولان جازات عقلیه جمله سندن اولدیغی نمایان اولان شو
معجزه سنیه بی مخبر صادق علیه الصلاة والسلام افندمز خبر ویرمش
اولسبله موسی علیه السلامه معجزه و میثاقی قبول ایده سی یه قدر بنی
اسرائیلی ترهیب اوله رق . قدره علیه الهی ابله معجزه مذکورده نك
حصولنه ایمان و تصدیق ایلرز

موسی علیه السلامك معجزات سنیه لرندن بر قاچیده قوم فرعون
اوزرینه : جراد ؛ قیل ؛ ضفادع ؛ دم . ارسالی و بنی اسرائیله صحرای
تهیده ؛ من وسلوی ؛ انزالیدر « تفاصیلنه » اطلاع مراد ایدن تفاسیر
شریفه مراجعت ایلیه امور مذکورده نك وقوعنه . انلردن أعظم أفعاله
قادر جناب قیوم سبحانه ایمان ایدن ذات ایمان ایلر

(توضیح جوازی) مکونانده الی الآن مشاهد درکه قورت . فاره .
چکرکه . وغیری حیوانات مؤذیه بر قومك مزروعاته ارسال اولنورده
دیگرینه ارسال اولنمز ، وبعض اقلیمك صوبی بوزیله رق شربی
مورث مرض اولدینی ده مشاهد اتدندر

سینندن بعد البحث ظاهر اولورکه ماء مذکور ده مکبرات یعنی

بر جسمی بیوک کوستان آلات ایله ادراك و رؤیت اولور درجه
 سنده غایه اوافق حیوانات ظاهر اولور احتمالکه دم بوقیلنددر ینسه
 مشاهد درکه مطر مقابلنده عادتاً واقع اولیان اشیا بعضاً وقوعه کلیر
 بوندن بحث ایدنلر انلرک وقوعی ریاخ مکان آخردن نقل و دیکرلرینک
 اوزرینه انزال ایتک طریقله تعلیل ایدیورلر، مادامکه فی ایامنا هذا
 نظیری مشاهد کافه اشیا عقلاً جائزات دندر. جناب مولای متعالمک
 حضرت موسی علیه السلامک ید مقدسده معجزه واعداسی قوم
 قبطی ترهیب و صحرای تیهده قوت لایموته محتاج ایتدیکی بنی اسرائیلی
 بالتزریق من وسلوی ایله انلره فضل و احسان و کرم بی نهاییه بی
 ابراز ایتسنه مانع نه در؛ ایمدی بز معاشر مسالمین؛ صادق محترمزر رسول
 مفخممز علیه اُکمل التحیه افندمز حضر تلرینک خبر و یردیکی کبی
 دست معالی پیوست جناب موسی علیه صلوات الاوفی ده ذات کریم
 نبوتما بیلرینه جائزات مذکورہ نک معجزه اوله رق حصولنه ایمان ایدرز
 صالح علیه الصلاة والسلامک دست سعادتلری اوزره قومنک

طلبلرنده صخره دن ناقه نک خروجی معجزه سنیه سیده

قرآن کریمک ذکر ایتدیکی معجزات سامیاندندر، تفصیلی کتب تفاسیر
 ده، بو خبری استماع ایدن و وجود اقدس سبحانی مصدق اولان مرد
 عاقله عجایب صنع الہی بی تصور و اول فیاض اقدسک ترابی حیوانه قلب
 و موادی صور مختلفه یه تحویلہ قادر اولدیغنی تفکر ایتکلمه معجزه سامی

مذکورک جوازنی تصدیق کفایت ایدر زیرا حق سبحانه و تعالی
 حضرتلرینک : صورة ناقه ده او صخره نک نفس ماده سی باطنندن بر
 قطعه تصویر و ناقه صورتنده حیوانیتہ قلب و حی و حساس قیلہ رق نبی
 مشار الیہ حضرتلرینہ معجزہ اولق اوزره صخرہ یی یاروب تصویر اولنان
 حیوانی اخراج ایتسنہ هیچ بر مانع یوقدر زیرا تکوین حیوانانده
 کی اسباب و ازمنہ عادیدر ذات اقدس الہی بونلر سز ایجاد حیوانانہ
 قادر در صخرہ لر دروننده دود مثللی بر چوق حیوانات بولنور کہ
 پوفندن بحث ایدنلر حیوانات مذکورہ نک درون صخرہ ده فصل
 خلق اولندقلرینی بیلزلر حیوانات مذکورہ نک اطرافنده یاش
 دیوار لر اوزرنده ظاہر یور شمش اوت مثالی اینجه نباتات بولور لر
 نباتات مذکورہ ہرنہ زمان ینمکلہ تو کنسہ دیکر لری بتر بوایسہ
 بالمشاہدہ ثقاۃ طرفندن نقل اولمشدر ؛ مادامکہ ؛ بو مثللی حیوانانده
 بو خصوص جائز اولیور ناقہ مثللی حیوانانده ده خصوص مذکور
 جائز در زیرا فرق یالاکز صغر و کبر ده در بوایسہ ما دون الصغیر
 کبر ده استحالہ یی مستلزم دکلدرایمدی بز معاشر مؤمنین او معجزہ
 سنیہ نک حصولی اعتقاد ایدر زیرا تحت تصرف قدرۃ سبحانیدہ
 داخل جائز اتدندر حالو کہ بو معجزہ سنیہ یی مخبر صادق خبر
 و بز مشدر حقدر بلا ریب صدقدر بلا شک

سیدنا و ابو ملتنا المقدسہ حضرت ابراہیم علیہ الصلاۃ والسلام

افدمزك محاجه ايتديكى ملك كافرك ذات كريم ابراهيم لرني القاقيلديغى
 نار عظيم ايله وجود بر سور عاليرنك عدم احتراقى معجزه ساميسى
 ده قرآن حكم بيان الهمزك خبر وير ديكي معجزات سنيه دندر
 وجود اقدس سبحانه مؤمن و نارك طبيعت و كنديسنده مودوع
 بر قوتله ياقيوب بلكه احراقى خلقتك الهى ايله اولديغى معتقد اولان
 ذات آتشك ياقامسى هر نقدر خلاف عادت ايسه ده تحت تصرف
 الهيده داخل جائزات دن اولديغى بيلير شو معجزه سنيه نك وقوعى
 تجويز دن صنع ايدن بر مانع يوقدره وجود فرد اقدس سبحانى نعوذ بالله
 انكار و آتشك طبيعتيله احراق ايتديكى اعتقاد ايدن كسان نى اذعان
 حقلرنده صواب اولان بودركه اولاو منكرلره وجود فرد قيوم
 احديته و هر جائز اوزرينه اولان قدرة فاطره سبحانى يه دلالت ايدن
 ادله سردوبيان و آتش بطبعه محرق اوليوب بلكه قابل احتراق بر
 ماده مس اولندقدده جناب حقتك احراقى خلق بيورمسيه اولديغى
 ايضاح ايتملى. زيرا آتشك حقيقت ذاتيه سنده احتراق اجسامى اقتضا
 ايدن موجب يوقدره چونكه موجب احراق آتش كنديسنده كى نور
 يعنى حرارت محرقه نك مولدى در دنيليرسه بز ديرزكه شو نور
 جباحب كه نباتات اوزرنده كيجه اين بولنان بر حيوان صغير در
 بو حيوانك موخرنده پارلاق بر ضيا واردر اوضيانك منبعث اولديغى
 ماده حيوانى فسفورى بر ماده دركه حرارت و احراقى يوقدر فن

کیمیا دن اکلا شلایغنه کوره مواد فسفوریه نك چوغی بویه در
 اکر آتشد کی موجب احراق متأخرین کیمیا کران زعمی اوزره
 اتحاد عناصر در آتش اوسیلله تکون ایدر دنیلر سه بز دیرز که بوبابده
 بز معاشر محمدین بیان کافی طلب ایدرز فن کیمیا دن اکلا شلایغنه
 کوره عناصر و اجسام کیمویه پیننده حصوله کلان جمیع اتحاداتک دوننده
 نه ایچون شو اتحاد احراقی موجب اولیور ۱۰ اکر موجب احراق جزء
 هوا اولان اکسجینیک اجزاء فرده سیله برابر بر جسمک اجزاء
 فرده سنک حرکت مخصوصه سیدر دنیلر سه متأخرین کیمیا
 - کران دیدیکی کبی بز جوابا دیرز که بوبابده توضیح شافی طلب
 ایدرز اوکیمیا کرانک سوزلری اوزرینه اجسام متحده نك اجزاسی
 اراسنده متحصل جمیع حرکات دوننده شو حرکت نه ایچون احراقی
 موجب اولیور صولری طوکدیره جک درجه بروده مفرطه
 نشأت ایدن حرکت اجزای جسمیه نه ایچون احراقی موجب
 اولیور و حرکه اولی حرارت و احراقه ثانی برودت و تجمده نه
 ایچون خاص اولیور بوااعتراض ایله ظاهر اولر که خصمک لأدری
 دیمسندن بشقه بر چاره سی یوقدر مکر که بواوردن هر بر لری
 نشئت ایتدیکی شیء تخصیص قیلمشدر وشو حاله بر مخصصدن
 لازمدر دیه بزده او خصمزه دیرز که ایشته بز معاشر مؤمنین او
 مخصی حق سبحانه حضر تلری یلرز مراد ایتدیکی ایستدیکنه تخصیص

باید در احراق نار انجق خلق و ایجاد الهی سی ابله در آتشده احراق
 و غیر یسیه تأثیری اقتضا ایدن شی یو قدر بلکه نار تحت تصرف
 سبحانیده مسخر در دیلر سه آتشدن احراق و اعدامی دیلر سه برودت
 و سلامتی نشأت ایتدیرر اوت مکونانده جریان ایتدر دیکی عاده علیه
 سبحانیدی آتشی خلق و ایجاد الهیسی ابله محرق قیلمسیدر خرق عاده
 اراده بیورد یغینده آتشد احراقی خلق بیور مرزشو حالده ذات
 صمدانیدی منع و حیر ایده جک بر مانعده بولمز محققا بر خارق عاده یه
 جناب حق اشارت بیور مشلدر که قرآن مجیدنده بزم اوزریمزه
 تلاوت ایتدیکی قول کریم الهیسنده ناره خطابا «یا نار کونی بردا
 و سلاماً علی ابراهیم» بیور مشلدر رسیدنا ابراهیم علیه السلام آفندمز
 بو نص شریفدر معجزه اولدیغنی ذات کریم الصفات الهی اخبار بیور
 مشلدر ایشه بو اخبار الهی جناب حقه نارد حرارت و احراقی
 خلق بیور میوب بلکه ضد حرارت اولان برودتی خلق ایتسیه
 برودت مهلهک اولیه رق انی سلام و امان قیلمسندن عبارتدر بز
 معاشر مؤمنین شو معجزه سنیه بی سلطان انبیایا نبینا حضرة محمد
 مصطفی علیه ازکی التحایا آفندمز وقتا که خبر ویر دیسه حصولنه ایمان
 و تصدیق ایلدک زیرا بو معجزه کبرای تصدیقندن منع ایدن بر مانع
 یو قدر زمین و افلاک خالق اقدس اولان الله ذوالجلال حضر تترینک
 تحت تصرف الهیسنده داخل جائزاج جمله سندن

قرآن کریم سبحانیده مذکور معجزات سامیدن بریسیده «عیسی»
 علیه السلام اُفندم زک یدعالیسی اوزرنده اذن سامی سبحانی ایله شفاء
 اُبرص • واکمه • و احیاء موتی • معجزه سنیه لریدر إله عالم تعالی
 و تقدس حضر تلیرنه ایمانی اولان ترابی حیوانات • متنوعه یه تحویل
 مثالی عجایب اعمالی سبحانی بی تصور ایلیان مؤمن موحد حضرت عیسی
 علیه السلامه معجزه اوله رق قدرة فاطره سبحانی ایله احیاء موتی
 • شفاء مرضی • ابراء اُکمه • ی ممتنع کورمز • زیرا بونلر جائزات
 عقلیه دندر نظر عقیده بومعجزه سنیه لرترا بدن حیوانی خلق بیوروب
 سمیع و بصیر اوله رق بوجهانه ابراز اید لمسندن اُسهدر شو قدركه
 کافه اُمور نزد قدرة سبحانیده سیاندر • زیرا حق اُحق إلهیده
 فلان شیء سهدر فلان شیء اُسهدر دنیاهز بلکه جمله سی تحت تصرف
 سبحانیده بر سویه ده در بومثالی اُمور ک حدوتنده اُسابب قیلنن و سائط
 و حدودی ایچون ظرف قیلنن اُزمنه هب عادیدر مولای متعال تبارک
 و تقدس حضر تلی او اسباب و اُزمنه اولمقسزین امور مذکور ی
 ایجاد و خرق عادته قادر در وقتاکه بز معاشر موحدین شو معجزه
 علیه نک سیدنا عیسی علیه السلامک ید مقدسند حصونی مخبر صادق
 سلطان ملائک سپاه علیه صلوات الاله افندمز حضر تلی خبر
 ویر مشدر بز اُکا ایمان و تصدیق ایلدک کلام قدیم إلهی و فرقان مبین
 سبحانینک ایتدیکی معجزات سنیه لردن بریسیده سیدنا عیسی علیه

السلامك هيئت طيرده طيندن بر تصوير ياپوب اكا نفخ بيور مسيله
اذن عالي الهيله بر طير اولسي معجزه ساميسيدر كه بو قوشه لسانزده
يراصه تعبير اولنيور

حق سبحانه و تعالى حضرت تلرينك دنياده موجود كافه حيواناتي
ترا بدن متنوع صورتده خلق بيورديغني و براي تكون وضع ايتديكي
كافه اسباب و ازمانك امر عادي اولديغني و بلا اسباب و ازمينه كائناتي
ايجادده قادر اولديغني مادام اعتقاد ايد يورز خلق عالي سبحاني ايله دست
سعادت عيسي عليه السلامده او معجزه خارقه نك تجويز نندن بزي منع
ايدن بر مانع يوقدر تنكم جناب عيسي عليه السلام حين تصويرده
« باذن الله » بيور مشلردر بو معجزه سامي يي مخبر صادقز عليه اكل
التحيه افندمز حضرت تلري خبر ويرديكي ايچون اورسول كريمك
دعواسني مؤيد معجزه سنيه اوله رق حصونه ايمان و تصديق ايلدك
قرآن كريم الهينك خبر ويرديكي معجزات جليله دن بريسيده ينه
حضرت عيسي عليه السلامك يد اقدسارنده ظهور يافته اولان اصحاب
كريم عيسويلري حواريون رضی الله تعالى عنهم حضرتانك اكل
ايتلري ايچون جانب سمان مائده سنيه سبحانينك نزولي معجزه
كبراسيدر بو معجزه سنيه بر امر جائزدر هر هانكي بر جسم اولورسه
اولسون جهة سمان نزولي تصديقدن منع ايدر بر مانع يوقدر تنكم
امطارك و علمای رصدك خبر وير دكلري بعض اجسام اخري نك

نزولی مشاهده او لنیور مادامکه بز معاشر مسالمن خلقت جمیع
 أجسام اُر زرنه قدره سامی الہی بی اعتقاد ایدیورز بنا برین حق
 سبحانه و تعالیٰ حضرت تلیٰ خرق عادتہ وسیدنا عیسیٰ علیہ السلام
 واصحابی حوارین او زرنه دعویٰ جلیل رسالتی تأیید و معجزہ
 سنیه اولہ رق برمائده سنیه خلق و انزالنہ قادر در بزایسه بومعجزہ
 سامی بی مخبر صادق صلی اللہ علیہ وسلم افند مز خبر و یردیکی ایچون
 وقوعنه ایمان ایتدک ؛

کلام قدیم الہی و فرقان مجید سبحانیدہ مذکور معجزات سنیه دن
 بریسیدہ شیاطین و ریاحک حضرت سلیمان علیہ صلوات الرحمن افند مز
 «مسخر» و حضرت داود علیہ صلوات الرب الودود افند مزہ «ده»
 حدیدک موم کی یومشاق و ملائم اولسی معجزہ کبر الیردیر بونلرک کافہ
 سی محالیتیلہ عقل حکم ایتدیکی إله قادر متعال حضرت تلرینک زیر تصرف
 سبحانیدہ داخل جائزات عقلیہ دندر شیاطین تسخیری قابل خالق
 اقدس حضرت تلرینک زیر فرمان الہیسنده مقهور عبیداللہ جملہ سندندر
 ریاحک - ا کوانده تسیر و تصرفلری ایسه قدره علیہ سبحانی ایله در
 حدید یومشامسی قابل بر معدن ندر هر تقدیر یومشامسنده
 حرارت سمیلہ عادت اقدس الہی جریان ایتش ایسه ده سبب عایدیر
 بلا سبب انک یومشامسنہ جناب حق قادر درہ ایمدی مولای متعال
 حضرت تلرینک شوخوارقی او ایکی نبی محترمک یدمقدسلر نده معجزہ سنیه

ودعواى جليل رسالتلرینی تأیید اوله رق ایجاد و اظهارینه هیچ بر مانع
یوقدوالله عظیم الشانک قدره سامی ربانینسی وجواز حادثاتی و صدق
قرآن مجیدی تصدیق ایلان بز معاشر اهل ایمان بومعجزات سنیه نك
حصوله شکسر شبهه سزا ایمان و تصدیق ایلدك أعجب عجائب أغرب
غرائبی مشتمل اعمال جلیل الهیه به نسبتله معجزات سنیه مذکوره دن
برینسی عقل سلیم استبعاد ایتمز والله الهادی الی سواء السبیل * رسل
نظام . علیهم الصلاة والسلام افندیلمزك مشهور اولان بقیه معجزات
سنیه لرینیده سیدنا ورسولنا المکرم سلطان هر دوسریر اصطفای
حضرت محمد مصطفی علیه ازکی التحایا افندیلمزك معجزات سنیه
رسالتنا هیلرینه مناسبتلری اولدیغنده فصل آتیده انشاء الله المستعان
سردواتیان ایده لم

(فصل ثالث)

واصل سرقاب قوسین اؤأدنی سلطان هر دوسریر اصطفای
نیننا سیدنا حضرت محمد مصطفی علیه وعلی آله اصفی التحایا افندیلمزك
معجزات سنیه رسالتنا هیلری و صدق دعواى سامیلرینه برهان اولان
بعض طرق بیاتنده در

سلطان ولاشان انبیا سیدنا محمد مصطفی علیه ازکی التحایا افندیلمز
حضرت تلرینك جانب جلیل احدیتدن کتیردیکی قرآن کریم ربانی اعظم
معجزات سامیلرندندر بو قرآن حکیم انقضاء دنیا به قدر باقی بر

معجزه کبری در سائر معجزات سنیه بویه دکلدروز را آنلر زمانلرنده منقضی اولمشلردر ایمدی شو معجزه عظیمی وخارقه جسمی خاص وعام اکلار ولدی الافهام شبهه عارض اولمز درجه ده شرح و بیان ایلیم ارباب دانشه خفی دکلدر که حکمت بالغه الهیه پیغمبران کزین حضراتی مرسل الیه اولان قوملرینک فائق وبارع اولدقلری امور قبیلندن معجزات سنیه ایلیم مؤید اولملرینی اقتضا ایتشدرد تا که رسول مبجللرینه خطاباً ای مدعی رسالت ذات والاصفا تکک اتیان ایتدیکی خارق عاده نک جنسی بز بیلمیوروز - احتمالکه حقیقه بر امر معتاد اولوب ایجاد خوارقده بیامدیکمز بر طریق بیلورسکزد دیاملری ایچون حجتلری منقطع اوله مثلاً سیدنا موسی علیه السلامی جناب حق ارسال ایتدیکی زمانده فرعونک قومی قبطیننده فن سحر شائع وانده مهارت تامه لری وارنوع بشره معرفتی صنعی ممکن وطوق بشردن خارج اولان انواع اموری بیسلرلرایدی وقتاکه - امر فرعون ایلیم سحره ایب ودکنسکلرینه سحری بالاجرا مهاجم حیات شکلنی الدردیلر اوآنده سیدنا جناب موسی علیه السلام اذن جلیل الهی - ایلیم عصای معجزنماسنی زمینه براقدیلر جناب حق عصای مذکوری بیوک برآرڈرهای مخوفه تقلیب ایتدی او عظیم آرڈرهای مهاجم کورنیان ساحه مبارزه ده کی بالجمله بیلا نلری بلع ایتدی بعد البلع حضرت موسی او آرڈرهای مخوفی ید بیضای رسالتناهیملری ایلیم اخذ بیوردی

در عقب کالاول عصایه تبدل ابتدی اوساعنده توفیقِ الهی یاوریتیلہ
 ساحرانِ جملة جناب حقہ سجده بر زمین ایمان اولہ رق رسالت
 جناب موسیٰ علیہ السلامہ ایمان وفرعونک خرما دارنده انلری صلب
 وتعذیب ایتمنہ صبر ایتدیلر ذوات مشار الیہمک ایمان ایتلمرنہ سبب
 بودر کہ انلر فن سحری وطوق بشر ده داخل وخارج اولان اموری
 بیلدکلرندن او خارقه نک یعنی عصانک اُر درهای کبیره بالانقلاب
 صورت حیات اوزره مسحور اویب ودکن کلری یوتمنی صکره اولکی
 کبی عصایه عودتی وانلرک عدم آباد محوه کتلمری نوع سحر دن
 اولیوب بو درجه یه وصول طوق بشر دن خارج اولدیغنه تیقر
 ایتدیلر ده او معجزه کبرانک انحق قدره فاطره الهی ایلہ حصول یافته
 خوارق عادتدن اولدیغنه وجناب حقک حضرت موسیٰ علیہ السلامہ
 دعوای جلیل رسالتی مؤید معجزه اولہ رق امر خارق مذکور
 ایجاد ایتدیکنه ایمان ایتدیلر فن سحر ده معرفت اهلی اولیان کیسه
 یه ده سحره نک تصدیقی سببیلہ سیدنا موسیٰ علیہ السلامک صدقنه
 استدلال ممکن اولور شویله که او سحره آباء وأجداد لرنیک دینلریله
 متمسک وسلطنت واهی فرعون ایلہ متمعز زوا کا مخالفته هلاک اولملرندن
 قورقلرنده هیچ شک وشبهه یوقدر لکن فن سحرده کی درایتلری
 وطوق بشر ده داخل اولان واولیان امورک مقدارینه معرفتلی
 مسلم اولمغله حضرت موسیٰ کلیم الله علی نبینا وعلیه صلوات الاله ♦

آفندمڻك ید مقدسندہ ظاہر اولان او خارقہ کبرانك نوع سحر دڻ
 اولدیغنی واکا وصلت طوق بشر ده داخل اولدیغنی بیامیه لرایدی
 حضرت موسیٰ علیہ السلامه ایمان وکندی آباء واجدادلرینك دینلرینی
 ترك و عزت فرعون دڻ اجتتاب ایتمزلر وخرماد اللرینه صلب وأنواع
 عذاب ایله معذب اولیوب فرعونه آی فرعون سن ایسته دیکیمی
 یاب حکمك یالکز حیات دنیا ده جاریدر آخرتده جاری اوله مز
 دیمزلرایدی مع هذا ذوات مشار الیهك حضرت موسیٰ علیہ السلامه
 ایمان ایتملری دعوائی رسالت سامیلرینك صدقنه و اوخارقہ عظیمك
 مولای متعال حضرتلرینك ید عالی موسیٰ علیہ السلامده اظهار بیوردیغنی
 بر معجزه اولدیغنه أعظم دلیلدر. وأما فرعون کبی کنیدیلرنده جناب
 حقك خیر اراده بیور مدیغنی کسان بی اذعان بو استدلالدن ضالانده
 قالیر وطریق شبهه یه تابع اولور لر نتکم فرعون سحره یه خطابا
 اکلا دم سزه سحری تعلیم ایدن اُك بیوکیکز موسیٰ اولدیغنی شمدی
 تیقن ایتدم دیمشدر فرعونك بو شبهه سی باطلدر زیرا خفی دکلدر که
 حضرت موسیٰ علیہ السلام قبط قومنه خدمت ایدن بی اسرائیلدندر
 قوم سحره ایسه أصحاب ملک و ساطنت اولان قبطیان دندر بناء لیه
 حضرت موسیٰ علیہ السلام اتباع ایله سحره نك فرعونه مخالفلرینی
 اقتضا ایدن بر مقتضی یوقدر ولو که فرعونك دیدیکی کبی رضا
 حضرت موسیٰ علیہ السلام سحره یه سحری تعلیم ایتش اولسون بونلرک

یعنی شهداء مشار الیهم حضراتنک خیری شری بالتمیز عاقل اولد قلمری
 حالده مجرد حضرت موسی علیه السلامدن تعاملرینه بناء بعد العز
 ذلتی قبول و حیاته بدل صلب و قتل اولنغی بالاختیار حضرت موسی
 علیه السلامه ایمانی اقدام ایتلمرینی عقل تصدیق ایدرمی او معجزه
 سامینک نوع سحر دن اولدیغنه ومع هذا دعوا ی رسالت موسی علیه
 السلامک صدقنه دلالت ایدن بر معجزه کبری اولدیغنه هر نقدر
 مشار الیهم عز دنیا و حیات فانیه دن بالمفارقة اکا بدل عز آخرت
 و حیات ابدیه یه مواصلت ایتدیلر سده اعتقاد جازملری اولماسه ایدی
 او مرتبه اصرار ده بولمز لر و قبول ایتدکلرینی قبول ایتمز لر ایدی
 بیانات مذکورده دن منقهم اولدیکه فرعونک شبهه واهیسی بیت
 عنک بوتدن او هندر شبهه یی ایراد و اتیانی ایسه یا تکبراً و عناداً و یا
 جهلاً و شقاء در کذلک وقتا که الله ذو الجلال حضرتلری سیدنا عیسی
 روح الله علی نبینا و علیه سلام الله افند مزی بعث بیوردیلر میان بنی اسرائیلده
 فن طب شائع ایدی معجزات سنیه عیسی علیه السلامدن اکثر یسنی
 اعمال اهل طب قیلمندن قیامق حکمت سامی الیهیدن اولمغله یدین
 مکرمین جناب عیسی ده ابرصلری ائمه لر ی ابراء امواتی احیا
 بیورمشدر فن طبده معرفه اهل اولانلر تصدیق رسالت عیسی علیه
 السلامده امر صبه محتاج اولمز لر بلکه نزدلرنده ذکر ی آتی
 مقالاتی سویله ملری واضحاتی اموردندر سویله که بز یعنی طبیون فن

طبی و بوفنده انسانك احراز ایدہ جکی واحراز ایدہ میدجکی
 در جاتك مقدارینی بیلیورزاوت حذاق اطبانك طاقتلرنده ابرصہ
 شفا حصولہ کلمہ جکی داخلدر اما زمان مخصوصك مروریلہ برابر
 معالجہ مخصوصہ ایلہ داخلدر یوقسہ مجرد لمس ویا دعا ایلہ شفاپذیر
 اولسی طوق اطبادہ داخل دکلددر جوہر بصری اخلال ایتیمان عارضی
 امراض عینی شفایاب ایتہکہ اطبانك اقتدار فیلری وارد لرکن عذیم
 البصر اولان کوز سز لرہ شفا طاقت اطبادن خارجدر اطبانك احیاء
 موتی یہ قدر تلری اولمدینی ایسہ آشکاردر شو حالہ عیسی علیہ السلامك
 طاقت بشرده داخل اولیان خوارق اتیانی فن طبہ اطلاعدن ظاہر
 اولدیغنه کورہ صدق دعوی رسالتیناہیلرینہ دلیل اولور زیرا او خوارق
 انحق ہر برشیہ قدرتی اولان مولای متعال حضر تلرینك ایجادربا نیسیلہ
 منصبہ بیرای شہود اولہ رق دعوی جلیل رسالتنی مؤید معجزہ اولمق
 ایچون ید اقدس عیسی علیہ السلامدہ اجراء اولمشدر . انتہی مقالہ
 الطبین ، اما فن طبہ آشنا اولیانلر طبقی حضرت موسی علیہ السلامہ
 فن سحری بیامیوبدہ سحرہ نك مشاہدہ ایتلریلہ بالاستدلال امان
 ایتدکاری کی اوطبانك تصدیقیلہ عیسی علیہ السلامك صدقہ
 استدلال ایتہ لیدر لر بعدذا معلوم اولہ کہ یقینی مفید تواتر ایلہ بزہ
 نقل اولمشدر یعنی عددلری صاییلہ میان وکذب اوزرینہ اتفاقلرینی
 عقل محال کوران مثلاً آدمیانك جمیعاً وود مکہ مکرمہ پی اخبار اوزرینہ

اجتماع لرینک کاذب اولسنی عقل محال کوردیکی کبی مع هذا بر چوق
 کیسه لرده اولده دلارای مقدسی کور مامش لدر جماهیر کثیره متفقه
 دیگر جماهیر کثیره دن انلرده دیگر لرندن وهلم جرا انلرده سیدنا
 و ناصرنا و شفیع ذنوبنا رسولنا المعظم و نبینا المفتح محمد بن عبد الله بن
 عبد المطلب صلی الله علیه و علی آله و صحبه وسلم افندمن حضرت لرینی
 مشاهده و رأی العین رؤیت جمال تابناک احمدی ایله تشرف ایدن لرندن
 بزه یعنی معاشر اهل ایمانه خبر ویرمشلر احوال سنیه جناب پیغمبری
 صلی الله علیه و سلمی و مده حیا رسالتینا هیلرنده عصرنده بولنان امم
 ایله جریان ایدن وقوعات نبوی صلی الله علیه و سلم حتی جمله اتیان
 ایتدیکل شرع شریفی اتباع رسالتینا هیلرنده بیکلر جه ذوات تصدیق
 ایتدکلرینی یکزبان اوله رق اطرافیلر بر تفصیل بیان ایتمشلر در

« ملخصا بیانی » عمر سعادت جناب مصطفی علیه و علی آله اصفی
 التحیادن قرق سنه کندران ایتدیکنده ذاتا صدق و امانتله معروف
 اولدیفندن ذات سامی جناب رسالتینا هی بی « محمد الامین » صلی الله
 علیه و سلم دیه قوم نجیب عرب بنیلرنده یاد و تذکار ایدر لر ایدی
 اوزمان سعد اقترانده ایسه ذات معالی نعات پیغمبری صلی الله علیه و سلم
 قراءت ؛ کتابت تعلم ؛ معارف امم و شرائع اقدمین و قوانین ممالک
 جمله سنی اکتسابه اهلیت و تعلم ممکن اولور درجه ده بویکی صنعتک
 اهلی ایلر ده اجتماع ایتماش و اوفلردن بر یسنه اعتبار ایتدیکنه بر کیسه

مطلع اولماش كذلك مدة مذكوره ظرفنده صناعت فصاحت وبلاغته
 ذات سامی نبویلری طرف ذیشرفنده ممارسه جریان ایتماش اشعار
 خطب ورسائل عربی یه نه قولاً نه روایه اهمیت ویرماش
 وصنایع مذکوره ده ملکه بی تقویه ودرجه قصوای بلوغه
 اهلیت پیدا ایتدیران محاوره فصحاء ومغالبه بلغایه مولع وحریص
 اولماش ایکن قدرت وقوتک قلی ناصر ومعینک فقدانی
 وآباء کرامندن بریسنده سلطنت سبقت ایتیوب اوسلطنتک زوالیه
 ریاست ناسی بالتخیلانی استرداد مراد ایتسی ظنی اولمامغله برابر
 عرب وعجمدن جماهیر عالم بیننده قیام ایده رک ادعا بیوردیلرکه
 واجب تعالی وتقدس حضرتلری ذات عالی محمدیسی دنیا وآخرته
 آدمیزاده لرک نجاحنه متکفل اوله رق شرع شریف الهی بی تبلیغ
 ایچون کافه ناسه ارسال بیورمشلردر وبوشرع شریف انقضاء مدة
 دنیایه قدر ارسال بیورلدینی زمانه مناسبدر أعصار ماضیه ده
 مناسب احکام ایله عصر سعادت نبوت پناهیلرندن اول ارسال
 قیلنن رسل خدام حضراتنک اکثر احکام شرایعنی ناسخدر
 ذات عالی سمات پیغمبریلری انسانیاکی کافه آباء واجداد لرندن وارث
 ویامزینات شیطانیه اولان مضرامور ومطالح عادات قبیحه واخلاق
 سیئه دن نهی بیورمشلردر اوعاده مستکرها نک الک قبیحی ایسه اوئان
 نیران. احجاره واشجاره تعبددر انلره توحید الهی وذات اجل واقدس

حضرت لرینک صفات کمال ایله متصف صفات نقصاندن منزّه و عبادت
 ذات الوهیتنه منحصر اولدیغنی اعتقاد ایتمه کله امر بیور مشار در کذلک
 انسانیه جانب جلیل احدیتدن انعام و احسان اولنان نعم نامنهای
 سبحانی سبحانینک شکرینی ادا ایتمه کله ده امر بیور مشار در وفی
 الحقیقه او شکر کندی منافع بشریه لرینه عائد در نتمکم صلات لرنده کی جناب
 حقّه اولان خضوع و انقیاد لرندن خالق أجل و اقدس لری ایله وصلت
 و نفوس بشریه لرینک تهذیبی نشأت ایلمشدر و امکانه مقدسه یی زیارت
 ایتلمی کییکه حین زیارتده غفران سیئاتی منفعتی جالب مضرتی دافع
 هر بر محسناتی حاوی اولمشدر . ایشته ذات خجسته صفات جناب محمدی
 علیه صلوات الاحدی افندمز حضرت لرندن بودعوای عظیمی او جاهیر
 کثیره استماع ایتدکارنده دعوای جلیل رسالتی قبولدن بالتفیر اشد
 عداوتله معادات . اهل و خلان ذات عالی محمدیلرینی ترک و پیر . برنا .
 بای . و کذا ؛ تکذیب ایدوب اودا اعدایه موافق اخصامه تحول ایتدی
 بعده مجادله ؛ و مخاصمه ده أخذ موقع ایله منهج مجادله یی طلب
 حجتّه قدر واردر دیلر هر بر لری صدق دعوای رسالته برهان طلب
 و ذات قدسی صفات پیغمبریلرینک محبتی اولان هر بر رشیده تعجیز تحمیل
 اندر اولدیلر . اولمظهر سر لولاک علیه صلوات رب الافلاک افندمز
 حضرت لری ایسه انلره نصب دلائل و اعطاء جواب ایلر لر ایدی . دعوای
 صدق اتمای محمدیلرینک اثباتنده استناد و معظم اعتماد بیور دیغنی حجبج

وأدله نك أعظمی كلام عربی جمله سندن (قرآن) نام جلیلی ایله
 قدسی عنوان اولایه بر کتاب کریمی انلره تالوت ایلیهرك
 او كتاب جلیل ایله من عند الله ذات عالی سمات پیغمبر یلرینك
 انسانلره ارسال اولندیغنی سرد واتیان اتمسیدر او كتاب الهی ایسه
 مفخر عالم صلی الله علیه وسلم افندمز حضرتلرینك كافه ناسه رسول
 الله اولدیغنی وذات اقدسی الهی جانب عزتدن تبلیغ بیورد قلرینك
 جمله سنده صادق اولدیغنی صراحتیه مشتقدلر او قرآن حکم بیان جناب
 حقك انسانیه بخش وعنايت بیوردیغنی شرع شریفی بیانه متكفلدر
 رسالتمآب انخم صلی الله علیه وسلم افندمز او قرآن کریمدن سوره
 تسمیه بیوردیغنی أقصر جمله ایله انسانلره تحدی ایتمشلد ریغنی فصاحت
 وبلاغته الك قیصه بر سوره • فرقانییه مساوی اولان بر کلامی
 ایتاندن فصحا وبلغای عربك عاجز قالمیله او كتاب حکیمك من
 عند الله منزل اولدیغنه استدلال بیور مشلدرد حالبوکه او زمان سعد
 اقترانده • قوم نجیب عرب میاننده أعظم علوم وأكرم مفاخرلری
 فصاحت وبلاغت اولان امرای چارشوی فصاحت وبلاغت موجود
 وجهت خطابت وشاعریته اکثریت انلرده ایدی واسالیب فصاحت
 وبلاغت اعلامنی حامل. اسرارنی محیط طوق بشرده اولان وأولیان
 مرتبه لرینی عالم کیمسه لرواریدی مع هذا خطیب معالایه علیین
 علیه صلواة الرب العالمین افندمز حضرتلری انلری دائماً یکدیگر لرینه

ظہیر اولسہ لریلہ قرآن مجیدک اقصر سورہ سنہ معارضہ دن قاصر
 وضعیف اولدقلربی ہر محافل وجامع عسکریدہ اعلائی صوت ایلہ
 شہیر و عادات و عباداتلرنده عقلارینی تسفیہ و محض سبب ضلالت
 ایلہ طابندقلری معبودات باطلہ لرینہ طعن ایدر ایدی علمای
 فصاحت و امرای بلاغت عرب عرباہ طریق معارضہ کندیلرینہ
 کشاد و حجتہ کتاب مذکور ابطال اولور و اہمہ سنی بالتذکرہ قرآن
 معجز بیان الہی بی مسبار تیمانلہ تسبیر و تدبر ناقد بصیر کی حق
 قرآن میندہ تأمل و تفکر ایتیکہ باشلادیلر ربک تعالی و تقدس
 حضر تلرینہ قسم ایدر مکہ انلر معارضہ یہ و ابطال حجتہ یول
 بولدیلر والی الآن و انقضاء زمانہ قدر بعد الآن فصحا و بلغا
 لرینک و فرقی و اک شدید اعدانک کثرتنی ایلہ برابر دہ بر طریق
 ابطال و معارضہ بولہ مز لر بز بونی علی رؤس الاشهاد سویلہ یورز
 حضرت قرآن آیات عیدیدہ ایلہ بونی ناطق اولوب ہر مجلسدہ آیات
 مذکورہ تلاوت اولنمقدہ در - لکن شو قرآن حکیمک - قوای
 بشریہ نک ادراک ایدہ میہ جکی بر مرتبہ فصاحت و بلاغتہ بالغ
 اولدینی انلرہ ظاہر در و بریسی مکابرہ و معارضہ ایتسہ کتیر دیکی غث
 بارد اولوب عند الصادق والوارد سخریہ اولہ جنی - باہر در ایدی
 انلرک نزدلرنده ولو اقصر سورہ ایلہ اولسون قرآن حکیمہ معارضہ دن
 عاجز قالدقلری تحقق ایتدی توفیق الہی رفیق اولان ذوات خجستہ

صفات كافه بشرک عجزینی بوايسه او کتاب جلیک منزل من عند الله
ایدیکنه دلیل اولدیغنی اقرار ایدوب سیدنا ونینا حضرت محمد مصطفی
علیه صلوات الاوفی افندمزک طرف اقدس الهمیدن مبعوث رسول
مبجل اولدیغنی تصدیق وعادات قبیحه و عبادات باطله لرینی ترک ایتدیلر
و شرع الله الازهره بالتمسک أنى اختیار ایتدیلر « بعدذا »

ملت عربی و یاملت اعجمیدن فصاحت و بلاغت اهلی اولمیا نلرایچون
افکار لرینی اقناع و دین شریف محمدیسنه تمسک اوزینه حمل ایتدیران
براهین ایله دعواى جلیل رسالتنده سلطان والاشان انبیا حضرت محمد
مصطفی صلی الله علیه وسلم افندمزک صدق عاليسنه قرآن کریمک معجزه
اولسیله استدلال شویله اولورکه نبی آخر الزمان خاتم الانبیاء علیه
اصفی التحایا افندمزکافه جهانیانک عادات و عباداتلرنده فرید و حید
اولدینی وهیج بروجله ناصر و معینی بولمندیغنی حالده دعواى رسالتله
قیام و کمال فصاحت و بلاغتله مشهود اولان فصحاى عرب و بلغای
قطانک ذات سامی رسالتینا هیلرینک ابراز و اتیان بیور دینی قرآن
کریمک أقصر سوره سنه معارضه دن عاجز اولدقلرینی ادعا ایتمشدر
قوم نجیب عربک عشیرت و بنی اخوانلری ایچون تعصبلری و آباء و اجداد
لرندن قالمه عادات و عبادات مألوفه لرینه تمسک لری ظاهر در نزدعالی
محمدی صلی الله علیه و سلمده ایسه ذات سامی انخمیلرینه تبعیته
واسطه اوله جق حطام دنیویه دن برشی اولمندیغنی کبی بطش صولت

محمد یسندن انلری اخافه ایده جک عصیت وقوت صاحیبده دکل ایدی
 زیرا دعوات جلیل رسالتک ابتدالرنده ذات نعامتسمات نبویسنه اقربا
 ونعلقاتی بلکه جمیع انام عداوت ایتشلر ایدی مع هذا شوراسی
 محققدرکه اوفصحا وبلغا قرآن کریمک أقصر سوره سنه معارضه دن
 عجزلرینی و او کتاب جلیل الہینک درجه فصاحت و بلاغتہ طاقت
 بشریہ واصل اوله میہ جغنی اقرار ومن عند الله رسول الله اولدیغنی
 تصدیق ایتدیلر

فن فصاحت و بلاغتہ کمال معرفتلیله برابر قرآن کریمه معارضه دن
 عاجز اولدقاری و او کتاب معظم ذیشانک اتیانی طوق بشرده
 اولدینی نزدلرنده تحقق ایتیه ایدی ذات سامی محمدی صلی الله علیه
 وسلمہ ایمان و عادات مألوفه و عبادات موردوئه لرینی ترک ایتمز لرایدی
 مع هذا ایمان ایتسکنده انلره بر نفع دنیوی و انتقام خوفی یوق ایدی
 معلومدرکه عاقللره اک مشکل ایش دارنیده نجاتی رجا ایتدیکی دین
 و مذهبده مفاقتیدرحتی بعضیلری عاداتک ردائتنی استشعار ایتسه ده
 مفارقت کوچ کلور او عاداته ملازمته کندی کندیسنه حکم ایدر
 بنابرین مرد عاقل تمسک ایتدیکی دینک غیر یسنده کی دینده نجاتی
 تیقن ایتینجه دین و مذهبدن ایرلمز و عاداتنیده باخصوص موروث
 و مألوف اولورسه سبب قوی و قاهر اولمینجه ترک ایتمز

اشته سلطان سریر رسالت علیه اکل التحیة افندمز حضرتلری

ایله او اقوام فصحا وبلغانك بر منوال سابق جریان ایدن حالری ذات
 ساحی نعامتسہات محمدیلرینك دعواى جلیل رسالتی تصدیق ایچون بزه
 بر دلیل کافیدر بوفرقة نك ایمانی فرقة منجیة اهل فصاحت و بلاغتہ
 تقلیداً اولیوب علی طریق الاستدلالدر اعاجم ہر نقدر لسان عربی
 بیامز لر ایسہ دہ بو طریق استدلال و امثالیلہ رسالت جناب پیغمبری
 صلی اللہ علیہ و سامہ ایمان ایتکہ مکلفدر لر معلوم اولہ کہ بیان کردہ مز
 اولان طریق حقیقت انیقك غیری دعواى جلیل رسالتندہ سیدنا
 و شفیعنا حضرت محمد صلی اللہ علیہ وسلم افندمزك صدق عالی نبوتنا
 — ہیلرینہ بر طریق استدلال دہاواردر بودہ بو وجہ ایلہ خارق عادہ
 بر معجزہ سنہ در اتیانی بنی بشرہ ممکن دکلد

(طریق مذکورک بیانی)

اہل خبرہ و اصحاب معارف و ارباب فنون و سیاسیات قرآن کریمدہ
 — کی نقد کلام و معرفت صفات فاضلہ فی تأمل و اسالیب حسنہ و محتویات
 جلیلہ سنی تدبر ایتدکارندہ انلرہ مستقیمانہ بر نکاہ حقیقتلہ تظاہر
 — ایدرکہ شو قرآن حکم بیان سبجانییدہ خواص فاضلہ و صفات کاملہ
 موجوددر ہیج بر مجموعہ کلامدہ بونلرک اجتماعی ہر نقدر واضعی تأنق
 نظر ایتسہ و واضعنك ماضی حاضر مستقبل شوءات و احوال ائمہ
 اطلاعی و جمیع فنون و آداب و حکمدہ کی احاطہ سی اوسع و اجمع
 اولسہ و عند العرب أسلوب معہود دن انفرادی ایلہ برابر عدم تناقض

و تضارب و حسن أسلوبیده تحری ایتسه عادتاً ممکن دکلدیر . مکر که قائل
 ذی کمالی هر بر شیئه و مراد بیوردینی کلامده جمعه قدره باهره سی
 اولان مولای متعال تبارک و تقدس حضر تلی اوله

قرآن کریمده کی خواص فاضله و صفات کامله نک ملخصاً بیانی
 کتاب جلیل مقدسمن قرآن حکیم بیانمز غیوب مستقبلدن خبر ویر مش
 طبقی اخبار کرده سی عالم شهودده نمایان اولمشدر . اتباع جلیل پیغمبری
 صلی الله علیه و سلمه آمین سالمین اوله رق مکّه مکرمه یه دخولی وعد
 ایتسی کییکه عینیله وقوع بولمشدر حاضرین و شاهدینک حکایه ایتسی
 کی قصص اولین و سیر متقدمیندن خبر ویر یور

اصحاب ضمائر اظهار ایتدن قول و فعل ایله ضمائر دن اخبار اید یور
 بوایسه کتب تفاسیر شریفه و احادیث منیفده بیان اولنان بعض حالات
 اتباع جلیل پیغمبری و بعض حادثات اعداء دین دن منفهم اولور بو .
 کتاب حقیقتنصاب الهمیز اخبار ، احکام ، مواظ ، امثال ، اخلاق .
 آداب ، ترغیب ، ترهیب . مدح اخیار ، ذم فجار . قبائح سجایا ، مواقع
 دنیادن . تحذیر ، تدبیر سیاسیات . مراعات اودّا . مدافعه اعدا .
 مجادله اخصام ، تبکیت ارازل ناس دن ، وجودباری . توحید سبیحانی .
 حشر . نشر . اوزرینه اقامت دلائل ، دفع شبه . ازاله ریب ، وصف
 دار نعیم ، و توصیف احوال سکنه جنت ، و دار جهیم ، و بیان احوال
 دوزخ . و عالم سموات ، و احوال عالم علوی ، کواکب . امطار ، سحاب .

بروق : رعود ، عجائبات . وصف زمین : جبال : سهول ، بحار ،
 ينابيع . انهار . ومشتلات زمیندن ، نباتات . حیوانات . معادن ،
 ازهار . اثمار . اطيوار . اشجار . ظلمات . انواردن -

هر بر فنده اتساع مجالی ایله برابر علوم اوائل و اواخر دن بر علمی
 بر اقامش اسالیب متنوعه و طرائق مبتدعه اوزرینه علوم و فنون مذ کوره
 - بی تصریح و یا اشارت ایامشدر که انده تناقض اولم دینی کی تضاربده
 حیولت ایتماشدر جمیع عیوبدن خالی حسن نظمیه هر اسلوبه مشابهندن
 خارجدر انتقال ایتدیککی بر مثالی اقتدا ایتدیککی بر امامی یوقدر قصائد
 عربیه خطب بدویه نوعندن دکلدر ومع ذلک عقولده مستحسن
 نفوسده مستلح ادواقده مستعذب . قلوبده محبوب اسماعه . مألوفدره
 هر هانکی زمان قرائت قرآنیه سی تکرار ایتسه حلاوتلی و هانکی آغز لردن
 استماع ایدلسه عالی وغالیدر دیمک . حضرت قرآن معجز بیانر حقتده
 صحیحدره ، عقل سلیم نزدنده صفات جلیل مذ کورک اتفاق و یا تصادفی
 اولسی صحیح اولم دینی کی فکر صحیحده بو اتفاق و تصادفی تصدیق ایتمز
 ایمی قرآن کریمک محتویاتی تأمل وتفکر ایلان او معیقین اهل نظره
 واجب وانصافلرینه لائق اولان شو کلام بدیعده مجتمع اوصفات جلیله دن
 بزه تظاهر وتحقق ایتدیککه او قرآن مبین انسانلر یکدیگر لرینه .
 معاونده اولسه لر قوای بشریلرینک عاجز اولدقلری بر کلام حقیقت
 اتسامدر نینا نخر دو جهان حضرت محمد مصطفی علیه اکل التحایانک

امی اولدیغی حالده او کتاب معالی نصابی اتیانی اکبر علماء واحذق
فلاسفه واعظم مؤرخین و اکبر سیاسینیک او کتابی کتیرملری عادتاً
محال ایکن او کتاب جلیک منزل من عند الله اولوب حضرت سیدنا
محمد مصطفی صلی الله علیه وسلم افندمزک دعوای جلیل رسالتی تصدیق
اوزرینه دلالت ایدن بر معجزه سنیه اولدیغنه دلیل و انهدر . کلام
حقیقت اتسامی ورد زبان ایده رک اعتراف حقیقت ایلمکدر

ارباب دانشه خفی دکلدر که بو طریق استدلال ايله اتباع عالی
جناب پیغمبری صلی الله علیه وسلمدن اکثر یسنی جناب حق دین
مبین اسلامه هدایت ایلمشدر الحاصل اعجاز و استدلال طریق قلمری هر
ایکیسیده فن فصاحت و بلاغی عارف و فضائل کلامی عالم ارباب فضل
و معرفته دائماً الی الآن و انقضاء لیالی و ایامه قدر بعد الآن سهل السلو کدر
بو ایکی فضیلت ارباب عالیدن اولیان ذوات ایچون فضیلتین
مذکورین سال کارینک او خارقه عاده معجزه سنیه یی بالتسلیم آباء
واجداد لرینک دین و عادت لرندن مفارقت و سیدنا و شفیعنا سلطان
واصل سراوادی حضرت محمد مصطفی صلی الله علیه وسلم افندمزک
دین عالسنه اتباع و هدایت اولملریله حصول پذیر در

بو بیانات شافیه ايله حضرت نبی مجتبی علیه اوفر التحایا افندمزه
اعطا اولنان قرآن کریمک الی آخر الزمان باقی بر معجزه سنیه اولدیغی
میدان علانیتده پدیدار اولدی سائر معجزات سامیه ايله پیغمبران کزین

عليهم صلوات الله اجمعين حضرتك عصر سعادتگرنده بالذات مشاهده
 ایدن و یا بعد الرسل اعصار ماضیده بولنان و کندیلرینه نقل صحیح
 ایله معجزات مذکوره نقل اولنان ذوات معالی سمات منتفع اولمشلر-
 ایسه ده لکن او معجزات ماضینک الی الآن وبعد الآن مشاهده سی
 باقی قالماش و بو خاصه جلیله یعنی کرور زمان اوزرینه بقاء مشاهده
 خاصه جلیلی یالکز قرآن معجز بیان حقیقهیمزه منحصر قالمشدر بو-
 ایسه مفخر عالم سیدنا محمد مصطفی علیه اصفی التحایا افندمز حضرتلرینه
 اکرام الاهی و ذات عالی سمات احمدیلرینه مخصوص بر نعمت ایدی
 سبحانیدر لکن هدایت ید اقدس الیهیده در ایسته دیکنی صراط
 مستقیمه هدایت ایدر اللهم أرنا الاشیاء کما هی . قرآن حکیم الاهی
 وحديث نبی ربانیده مذکور معجزات سنیه جناب احمدی صلی الله
 علیه و سلمدن بریسی انشقاق قر معجزه کبراسیدر قمرک ایکی پارچه
 اولسنی مشرکین مکه ذات خبیسته صفات پیغمبری صلی الله علیه
 وسلم افندمز حضرتلرندن طلبلرنده قمرک وجه مذکور ایله انشقاقنی
 درگاه معلانپناه احدیتدن او محبوب عالمین و رسول ثقاین افندمز تضرع
 و نیاز بیور مسیله قمر منشق اولوب انشقاقنی اهالی مکه نک اسلام
 و مشرک اکثریسی مشاهده ایتدیلر بلده مکر مه دن بعید و بولندقلری
 موقعک افقی او بلده مقدسه نک افقنه مساوی اولان مواقعدن مکه
 مشرفه یه ورود ایدن جماعت مسافرینده اوکیجه انشقاق قمری

کوردکلرینی اخبار ایتشلردرکافه اهای ارضک اوحادئه عظمی بی
 کور ماملری وقوعنه منافی دکلدر زیرا قر رؤیت اولندیغی آفاقک
 اختلافی سببیه آن واحد ده کافه ناسه ظاهر اولمز بلکه هر وقتده
 برافق اهایسنه ظاهر اوله رق غیریلرندن مخفی قالیر نتکم فن جلیل
 هیئتدن معلوم اولور بو معجزه سنیه بی استماع ایدن ووجود الیه
 قادره ایمان وانشقاق قری جائزات عقلیه دن اولدیغی تصور ایلان
 مردعاقل صحت نقلی بو قدر آشکارا یکن وقوعنی تصدیق دن امتناع ایتز
 انشقاق قر معجزه سنیه سنک توضیح جوازی • قر انقسام والتحامی
 قابل اجسام جمله سندن در عظیم عظیم جبللرک انشقاقی منفصل اولان
 جبالک التحامی اولدن وجودی اولمیان وادیلرک حدودی چوق
 کره لر ارض مزده ظهور ایدن مواد دندر بو حوادث ارضیه هر قدر
 زلازل صواعق امطار غزیره مثللی جناب حقک احداث ایتدیکی
 اسباب ایله مواد مذکوره نک ایجادینه عادت علیه ربانی جریان ایتمش
 ایسه ده اسباب مذکوره یالکز سبب عادی اولوب یوخسه جناب
 حق اسبابسز اوحوادثی ایجاده قادر در بو ایسه قدره سبحانه ینک کالندنده
 اکلاشیار او تصرفات ایله شو اجسام ارضیه یه تصرفه قدرتی اولان
 مولای متعال تبارک و تقدس حضرتلری انشقاق قر مثللی شیله
 تصرفه قادر در زیرا ارض ایله قر بیننده جسمیتده وانشقاق والتحامی
 قبولده فرق یوقدر لکن قر ارضدن بیو کدر کبر وصغرک قدره

سبحانی جانبنده انشقاق والتحامی قبول وعدم قبوله مدخلی یوقدر
بعد ذا انشقاق قر معجزه سنی ناقل اولان روایات صحیحه
قرک ایکی به انشقاقیه بر پارچه سی فوق الجبل دیکری مادون جبلده
اولدیفنی افاده ایدیور بونکله مراد قرک مرأی رأیده بر پارچه سی
فوق الجبل یعنی افقنده کورندیکی یوخسه نفس جبلده مرکوزادکل
نصف دیکریده مقابلنده کورندیکیدر یوخسه تحت الجبل معناسنه
دکل بز لردن بریسی منوال مذ کوراوزرینه فوق الجبل ویاخلف الجبل
ویاخلف البحر قری کوردم دیر حالبوکه قرانک کوردیکی یرده دکلدر
متکلمک مرادی ایسه کیفیت رؤیتدن تعبیردر شو حالده علمای هیئتک
قولنه ابتداء قر ارضمزدن جدا یوک بر جسمدر انک بر فرقه سنک جمال
ارضدن بر جبل صغیر اوزرینه وضعی وجبل مذ کورک انی استیعاب
ایتمسی دیکر فرقه سیده بالفعل تحت الجبل بولنسی ممکن دکلدر ذیله من
معجزه سامی مذ کورک کفیفیتی اوزرینه روایتک منصوصیتی احد
نصف قر دیکرندن تباعد ایتدیکر افاده ایتسون ایچوندر زیرا نصف
قر دیکرینه متقارب اولسه مشرکینه اشتباه عارض اولور ده انشقاق
قری کورماز غلط حسی وفی الواقع اصلی اولمیان تیخاندندر دیر لر
معلومدرکه قری ایکی قسمه تفریقده قادر اولان حق سبحانه و تعالی
حضر تلی او تباعد ایله نصفینی متباعد قیلنغه وبر برینه ضم ایتکه
قادر در غرایبندرکه بعض شروح مدونه ده قر دن بر بارچه نزد

معالي وفد پیغمبری به نازل و کم سعادت رسالتنا هیدن خارج
اولدینی ده محکیم سند قوی اولدیغندن بوروایت غریبه به
ایمان ایتک بزم اوزیریمزه واجب دکلدر تأویل وقانون عقل ایله
تطبیقنه ده حاجت یوقدر مع هذا اوبارچه افاق اولمسیله نزول
و کم سعادتدن خروجه قابل ایدی دنیلمله تطبیقیده ممکندر زیرا
نازل اولانک نصف قر اولدیغنه روایت مذکوره ده صراحت یوقدر
بوایه مستحیل دکلدر قدرة علیه ربانیه بوکا صاحبدر بز معاشر
مسلمینه وقتا که نقل صحیح ایله نبی مبجلمز رسول انخمز علیه الصلاة
والسلام افندمز حضر تلمینه معجزه اوله رق انشاق قر معجزه
سامیسی نقل اولندی تحت تصرف قدرة الهیده داخل جائزات عقلیه دن
ایدیکسده ظاهر در بلا شک ولا ریب بومعجزه کبرای محمدیه نک
وقوعنه ایمان و تصدیق ایلدک مدة من الوقت شمسک وقوفی و بعد
المغیب ریدیه معجزات سامی جناب احمدی صلی الله علیه و سلمندر
بومعجزه سنیه بعض احادیث پیغمبریده محققاً مرویدر یوشع بن نون
علیه السلام معیت علیه لرنده بنی اسرائیل اولدینی حالد جبار به ایله
مقاتله ایدر کن مغیبدن شمسک وقوفی روایت اولنمده در بوده جناب
یوشع علیه السلام ایچون بر معجزه در وقوف شمس وردی باینده کی
وارد اولان احادیث هر تقدیر آحاد طریقیه یله یعنی نقلی منکرینی
اکفار ایده جک درجه ده قطعی الثبوت متواتر دکلسه ده لکن

بومعجزه سنيه يه ايمان ايتك شان مسلمينه موافق و باب دينده زمره
 ناجيه اهل ايمانه اسلامدر بز معجزه سامی مذ کوره هر نقد در حد ذاتده
 جداً عظيم برايش ايسه ده ايمان و تصديق ايدر زيرا تصرف قدره
 ربانينك تحتده داخل جائزات عقليه دن در عظمت قدرت سبحانيه
 نسبتبه أمر مذ کور عظيم عد اولمز « توضيح » كرك سيرايدنی شمس
 اعتبار ايده لم كركسه هيئت جديده علماسنك ديديكی کي ارضك
 محوري اوزرنده دوران و وجهلریله شمس اوزرينه مرور ايتديکي
 اعتبار ايده لم أمرينك هرايکيسيمده صرف قدره إلهی ايله در شمس
 سيران ارضی قدره و سلطانيه مقهوراً دوران ايتديران اوزات قيوم
 حضرت سبحاندر اوايکي بيوك جسمك تحريکنه قادر اولان جناب
 ديان نهاردن بر ساعتده ايقافلرينه • يا خود وقتدن بر زمان عكس
 حرکت ايتلرينه صکره کما کان حرکتك اعاده سنده قادر در بونك
 اوزرينه بر محالده لازمکلمز « س » هيئت جديده نك ديديكی تسليم
 و دورايدن ارض فرض اولنديغی اوزره ارض حرکتدن قالسه
 و يا حرکتی منعکس اولسه ماء بحر حرکت استمراريه سنی اله رق کير
 و قالير يابس محله فيضان ايده رك اهااليسنی غرق ايدر دين سؤل
 اولنورسه جواب بودرکه ايقاف ارض و يا عكس حرکت ايتدرمه
 قادر اولان مولای متعال تبارك و تقدس حضرتلری ماء بحر دن حرکت
 استقراری سلبه و وقوف و عكس حرکتده ارضه انی تابع قيله رق

أرض یاسه فیضان ایتدرمامکه قادردر بعض ملحدینک بنی بشردن
 برایکی ذاتک یعنی محمد ویوشع علیهما الصلاة والسلام حضراتنک
 غرضلری ایچون هیئت جدیده اربابنک ناموس جاذیت دیدکلری
 کونده کی ناموس عظیم اوزرینه حرکتی مبنی اولان اوجسم کیری
 توقیف ایتک خالق جل وعلا حضرتلرینک حکمتدن اوله مز دیسه
 لرینه التفات اولنسون زیرا صنع مذکور جانب جلیل احدیتدن بنی
 بشردن مجرد بریسنک غرضی ایچون ذکلدر بوانحق بر حکمت بالغه
 صمدانیه ایچو ندرکه اوده خارق عاده بر معجزه سنیه نک اظهاریدر
 بیکلرجه بلکه میلیونلرجه خلقک اهتداسی و نفوس بشریه
 لرینی هلاک ایدن کفردن حیات ابدیه اکتساب ایتدیران ایمانه
 رجوعلری و او معجزه کبرانک ظهورندن اول ایمان ایدنلردن
 بیکلرجه ذوات معالی صفاتک ایمانله تثبیت و تمکینلری اندن منبعشدر
 بر جماعت دیگر جماعت نصکره بینلرنده بطریق التحدیث ذکر و نقل
 ایتلریله معجزه مذکوره نک ذکر ی باقی اولور و نقایله هدایتی مراد الہی
 اولان کیمسه منتفع اولور و عظمت قدرة ربانی و عجیب صنع صمدانی
 تصور اولور ایدى شو حکمت عظیمه عظمتده او خارقہ نک
 حصولنه موازی اولور بلکه تفوق ایدر و حصولی بو عظیم حکمت
 ایچون اولسی لا تقدیر ملحد مذکور ایسه صرف عظمت خارقہ مذکوره یه
 نظر ایتمشدر اگر انی قدرة الله عظمی ایله مقابله ایتسه ایدی

عظمت خارقه بی یاد و تذکاره جسیان برشی بوله مزایدی خارقه مذ کوره
 و بشردن بریسنک غرضی عنده اقدس الهیده هرایکیسی تحت تصرف
 و مشیت الهیمده اولمقده سیاندر عظمت جناب یزدان نزدنده خارقه
 - نك عظمتی برشی دکلدر هر نقدر نظر قاصرانه مزده بینلرنده عظیم
 فرق بولیورسه قده من جهة الجواز والامکان هرایکیسی نزد کریم
 سبحانده سیاندر اومعجزه سامینک ناقلی اولان بعض روایاتده رسول
 ذیشان علیه صلوات الرحمن ك وقوف ویااعاده شمس طلب بیوردینی
 افاده اولنمشدر دوران ارض ایله هیئت جدیده نك رأینی تسلیم فرض
 ایدلمسی اوزرینه حق رسول عارف سرما اوحی علیه ا کمل التحایا
 - ده صواب اولان شمسده کی طلبندن بدل وقوف ارضی ویا عکس حرکتی
 طلب ایتمکدر دنیامز زیرارای مذ کوری تسلیم فرضیه سی اوزره رسول
 ذیشان علیه صلوات الدیان ك حقیقت امری بیامسنه بر مانع یوقدر لکن
 معجزه مذ کوره نك شمسده حصولی طلب ایتمسی ظاهرینه واستعمالا
 بینلرنده مألوف ورایلرنده جاری اولانه بناء در و امر مذ کوری طلبدن
 مقصود رسول ذیشانی ده ینه جناب حق بیلیر طرف اشرف رسالتنا هی
 علیه صلواة الله دن طلب مذ کور بر غلطده اوله مزبزیله جه ارباب
 هیئت جدیدی کندی لغتلرینک ظاهر یسی اوزرینه استعمالده کلاملرینی
 جریان ایتدر دکلرینی شمسك وقوفی ارضك حرکتی اعتقاد ایتلریله
 برابر شمس طلوع ایتدی غروب ایتدی دیدکلرینی کوردک وایشتمک

ارض طلوع ایتدی ویاغروب ایتدی ویا ارض نورشمسك مقابله سنه
 واصل ویاآندن مفارقت ایتدی دیدکلرینی ایشتمك انلرك بویله
 دیملری ایسه استعمالده شیوعی حسیه مشاهده نك ظهوری اوزرینه در
 تقریرمزه آشنا اولوب تحریرمزله اوشبهه لر سندن مندفع اولدیه -
 سكامعلوم اولسونكه بزمعاشر مسامین بو معجزه سامی یه تحقیقاً •
 ایمان ایتشدر زیرا انك وقوعندن منع ایدن بر مانع یوقدر جناب
 حق خارقۀ مذکوری رسل کرام حضراتی تأییداً معجزه اوله رق
 ایجاد قادر در وانکله بیکلرجه آدمی زاده لری تثبیت ایدر احادیث
 شریفه ده بزه نقل اولان معجزات سامی سید المرسلیندن أصابع
 سعادتنه رسالت اکتناه علیه صلوات الاله دن ماء لذیذ نبغان ایدرك
 چوق کیمسه لر اندن دفع عطش ایتملری و طعام قلیلی تکثیر بیوروب
 جم غفیری اشباع ایتدیکی معجزات سامیه لریده ثبتکرده ثقاتدر
 اجسامك عدمدن خلق و ابرازینه وانلری بر صورتدن صورة آخره
 تقلیننه قدرۀ فاطره ربانی اولدیغنی اعتقاد ایدن مردعاقلی اوایکی
 معجزه سنیه یی تصدیقندن منع ایدن بر مانع یوقدر « توضیح »

ذات خجسته صفات پیغمبریدن انسانلرك صوینی طلبلرنده انی
 خلق و یا هوایی صویه قلب بیوروب حاضرینه أصابع سعادت پیغمبری
 میاتندن ماء مذکوری ابراز ایلله احتیاج محتاجینی جناب حقك ازاله
 ایتسنه بر مانع یوقدر هوایی صویه قلب تحت قدرۀ کیمیا کرانده داخلدر

مجلای عالمیه ده قریباً ورود ایتدیکه هوانک سائله قلبی کشف ایتشله
 شو حالده هوا و ماء و اهل کیمیانک خالق اولان پروردگار اقدس مزک
 قدر تیله اوکی حوادنک منصف جلوه پیرای بروز اوله جکنده شبهه کی وار
 کذلک جناب حقک حضور بر نور رسول اللهده بولنان ذواتی
 ذات کریم رسالتنا هینک ضیافت و یردیکی طعام قلیل جنسنندن بر
 طعام بالتخلیق مشاهده ایتدیرمیه رک طعام قلیلی تکثیر ایله جمع
 کثیری طیور مسنه بر مانع یوقدر بونلر کافه جائزات عقلیه دندر قدرة
 عالی سبحانی امور مذکوره نک ابرازینه صالحدر بو حادئه سنیه نک
 وقوعی نبیز صلی الله علیه وسلم افندمز حضر تلرینه معجزه اولمق
 اوزرینه بزه نقل اولندی بز معاشر مسالمینده ایمان و تصدیق ایلدک
 یدین سعادتین احمدیلری ایله امراض عضال اصحابنک اووخیم
 مرضلرینی مجرد لمس و یادعا بیور مسیله شفا پذیر اولدینی و اصحاب
 معالی نصاب پیغیریلرندن بر ذاتک بعد القلع عینی در بیور مسیله
 اولکی حالندن ده کوزل کورمکه باشلامسی و محض دعای سامی رسالتنا
 هیلری ایله میتک حیات بولمس معجزه سنیه لریده زیبایش افزای
 صحائف اهل ایمان اولمشدر خوارق مذکوره احادیث شریف نبوی
 ایله بزه نقل اولمشدر انلره بز ایمان و تصدیق ایتدک زیرا معجزات
 سنیه مذکوره قدرة علیه الهینک تحت تصرفنده داخل امور جائزه
 دندر که ذات اجل و اقدس حضر تلری ید سعادت رسول صمدانینسند

معجزه اوله رق انلری ایجاد بیورمشدر

« توضیح » شفاء أمراض هر نقدر أسباب و تمتد بر زمانده حصول یافته اولسیله عادت علیه سبحانه جاری اولمش ایسهده بر امر عادیدر اوامر عادی اولمقسزین خارق عاده اوله رق اوشفای ابرازده فیاض مطلق حضر تلی قادر در • عین مقلوعی ارجاعده عادت جریان ایتماش ایسه ده جائزات عقلیه دندر استحاله سیله عقل حکم ایتمز باطبادن چوقلرینی کوریرزکه بعد الانفصال جسم حیوانینک بعض أجزاء یتشدر لر عملیات واسطه سیله التیام پذیر اولور ردعین هر نقدر اطبانک کسب و قدر تلی تحتده دکلسه ده امر مذکور قدره کامله الهینک تحت تصرفنده داخلدر که اطبانک قدر تلی هیچ بوجهله قدره لم یزلی احدیته قیاس اولمز احیاء میت جائزات عقلیه دن در هر نقدر حقننده عادت جاری اولماش ایسهده جمادی حیوان قیلوب « حس » حرکت ادراک • اعطاسنه قادر اولان مولای متعال حضر تلی مفارقت حیاند نصرکه جسم حیوانی نک احیاسنه قادر در عظمت قدرت الهی عجایب اعمال سبحانی تصورایدن مرد عاقل ما دامکه فعل عالی الوهیه نسبت اولنیور خارقیه مذکور ه نک وقوعی تصدیقندن امتناع ایتمز طفل رضیعک حیوان اعجم شجر حبرک نطق و رسالت مقدسه محمدیه به شهادتلی معجزات سامی محمدی صلی الله علیه وسلم دندر معجزات سنیه مذکور ه احادیث شریفه ده بزه نقل اولمشدر . قرآن

حکم بیان سبحانیده بونک نظیری وارد در حیواناتدن هدهد غله
حضرت سلیمان علیه السلام ایله تکلم ایتشلردر خوارق مذکور ه
تحت قدرة الله ده داخل اولان جائزات عقلیه دندر شرح و بیانی
شو کونده کی اصوات و غیر یلری مثللی اجسام و اعراضدن هر برشی
خلق الہی ایله در بیوک انسانک تکلمی شبهه سز خلق الہی ایله در
نفس طبیعت حیوانیه ایسه صفت کلامی مستلزم دکلدر زیر طبیعت
آدمیه ایله حیوانات اعجمیه نک حیوانیتیده فرقلری یوقدر بلکه
اساس جسمیتیده جمادات ایله فرق یوقدر کذلک صوره آدمیه ده
صفت کلامی مستلزم دکلدر زیر انواع میمونلردن صورتده مشابہت
تامه انسانه مشابہ اولنلری بولنیور یالکزمیونلرک دریلری
توکلیدر ایشته بو نفس طبیعت و صوره آدمی بیوک انسانلره تخصیص
کلامی موجب بر فرق اوله مز میمون او قدر انسانه مشابہتی ایله برابر
تکلم ایدمه صفت کلامک انسانه انحصارینک وجوبنه بر دلیل یوقدر
بلکه مشابہتدن بعید تعلم کلامی قابل بعض حیوانات بولنیور
پا پاغان دنیلان قوش کی تقریر مزدن ظاهر اولدیکه انسانک صفت
تکلمه نائلیتی محض جناب فیاض قدرتک انسانی صفت مذکور ایله
مشرف بیور مسئله در سؤال اکر بیوک انسانده بزه مخفی بر شی وارکه
غیر یلرنده بولنمز صفت کلامی موجب اولان اودر قوه ناطقه دنیلان
وانسان ایچون فصل عدا و لنان احتمال او شی مخفی اوله یا خود مخ انسانیده

بر تکوین خاص موجود اوله دنياه نتمک متأخرين بويله ديمشلدرد
 جواب بودر که شو ايکيسنده موجب کلامی حصر مسلم دکلدرد زیرا
 عند مزده ثابتدر که شو موجب مثلثیلر سبب عایدرد جناب فیاض مطلق
 بغیر واسطه خلق کلامه قادر در انسان کیرده صفت کلامی خلق
 ایتکه قادر اولان مولای متعال حضر تتری طفل رضیع حیوان اعجم
 جماد کبی شیارده ده صفت کلامی خلق ایتکه قادر در هر نقدر خلق
 مذکور خلاف عادة ایسه ده جناب حق رسول الهیسنه معجزه
 اوله رق خلق مذکور ایله خرق عادت بیورر اوشیدن صدورینی
 وانك تکلمنی کوروب بیامدیکمزاوالفاظی خلق ایدر وحاضرون
 انی ایشیدر

ایمدی بز معاشر مسلمین معجزات سنیه مذکوره یه ایمان ایتدک
 زیرا بونلر اراضین وسمواتک ریسی مولای متعال حضر تتری نک
 تحت قدرة صمدانيسنده داخل جائز اتدندر

معجزات سامی جناب أحمدی صلی الله علیه وسلمدن بر معجزه
 عظماده قرآن مجیدده وقوعنه اشارت وارد اولان وحیدیت نبوی نک
 بیانکرده سی اولان وجوه کفارده یوم حربده علیه الصلاة والسلام
 افندمز حضر تترینک بر اوج طبراق رمی بیورر مسیله جمله کفارک کوز -
 لرینه تراب مذکور دن إصابت ایدوب جمعیت ضلالت آیتلری منهزم
 اولملری معجزه سامیسیدر بو خارقہ جازات عقلیه دندر زیرا تراب

مذکور دن جمیع کفارک کوزلرینه برشی وصولنه مانع یوقدر لکن
 شو درجه ایصال وهر کافرک کوزلرینه بویله جه توزیع ایتک هیچ
 بر انسانک قدرتمنده اوله مز لکن قدرة علیه ربانیه ده داخلدر . امر
 مذکورک فعلنه جناب فیاض مطلق . رسول مبجل حیب اکر می
 علیه الصلاة والسلام افندمز حضر تلرینه معجزه سنیه اولق اوزره
 قادردر اومولای متعالمز خالق لم یزلز حضر تلری شو خارقه ایله او
 حبیب مکرمنه امتنان بیوره رق (وما رمیت اذ رمیت ولکن الله رمی)
 قول کریم سبحانسیله اویغمبر ذیشانز صلوات الله وسلامه علیه
 افندمز حضر تلرینه قرآن کریمنده خطاب بیورمشلردر که ذات عالی
 صفات محمدیلرندن و أصحاب معالی نصاب احمدیلرندن خارقه مذکوره
 اعدای دین مبینی منع و طرد بیورمشلردر یعنی ، حبیب ذیشان مبجل
 میدان محاربه ده طوبراغی صورة ظاهره ده آتدیغکده حقیقه رمی
 ایدوب اعین کفار دن هر بر لرینه ترابی ایصال ایتدک زیرا بوسنک
 قدر تمکدن دکلدر لکن حقیقه ترابی رمی و محارب اعدای بدخواهک
 کوزلرینه تراب ذره لرینی ایصال ایدن حق سبحانه و تعالی حضر تلریدر .
 ایمی بز معاشر مؤمنین . خاتم الانبیا . عارف سرما اوجی علیه
 اصفی التحایا افندمز حضر تلرینه معجزه سنیه اوله رق شو خارقه جلیله
 - نك حصوله ایمان ایلرز مظهر سر لولاك علیه ا کمل التحیات سیدنا
 حضرت محمد صلی الله علیه وسلم افندمز مک معجزات سنیه رسالتپناهیلرندن

برسیده مغیباتی اخبار بیورملریدر اومغیباتک زمانده حاضر عیادت
 غائب اولسی ویا مستقبلده ولویوزلرجه سنه صکره اولسی برابر شو
 معجزه کبرا کثره حدوئنده تواتر معنوی حدینه بالقدر افراد حوادثی
 ایسه ساحلی اولمیان بر بحر عماندر اما قائد جیش المرسلین علیه صلوات
 الرب العالمین افندمز حضر تلرینک زمان سعادتنه دولترنده حاصل
 وعیان رسالتا بانه لرندن غائب اولان مغیباتی اخبار بیورمسی که حبش
 حکمداری نجاشی حضر تلرینک وفاتی وقریش قومنه نامه کتوران
 خاتونی اخبار بیورمسی کبی کتب اُحادیثده صحیفه لر طولوسی یک چوق
 بوقیلدن اخبارات نبویه واردر اطلاع مرادایدن ذوات کتب شریفه
 مذکوره یه بالمراجعة اُعجب عجائب اُحوال واموری مشاهده ایدر لر
 اما مغیبات مستقبله یی اخبار عالی پیغمبری صلی الله علیه وسلم
 بر چوق شیلردر امور مذکوره دن بعضیسی علیه الصلاة والسلام
 افندمز حضر تلرینک بو عالم شهودی مشرف قیلدقلری مدتجه بعضیسیده
 بالا پرواز عالم لاهوت اولدیغندن آزویا چوق بر زمان صکره ظهور یافته
 اولمشدر بعضیسی ایسه مستقبلده وقوعه کله جکی محققدر قرآن مجید
 و اُحادیث شریفده شرفورود اولان مغیبات مستقبله نوعندن بر آرز
 علی وجه الاختصار بلا انسکار حق ظاهر اولمق ایچون یادوتد کار
 ایدم • فنقول قرآن حکم بیان سبجانیده وارد اولمشدر که اصحاب
 کنزین پیغمبری مسجد حرامه آمینن سالمین اولدقلری حالده داخل

اوله جقلری بیان بیور لمشد مکه مکرمه شرفها الله تعالی الی یوم
القیامة دها بوآیت کریمه قرآنیه نک شرفنزولی ایامنده ایادی
مشرکینده اولوب حضرت رسالتپناه اعظم أفندمزه وأصحاب کزینته
محارب ایدیلر. سلطان ملائک سیاه علیه صلوات الاله أفند من
حضرتلری ایله أصحاب کزین حضرتانی مکه مکرمه شرفها الله تعالی
الی یوم القیامة یه داخل اولدیلر و بو دخولی محقق صورتده احسان
بیوردی. وینه بو قسمد ندر که ذات أجل وأعلا حضرتلری
فرقان مجیدنده استعیند بالله (الم غلبت الروم فی أدنی الارض وهم من
بعد غلبهم سیغلبون فی بضع سنین) دبییه اون سنه دن آبرزمانده
عسا کر رومیه نک ایران عسا کر ینه غالب کله جکنی اخبار بیور مشر
وطبقیسی عینیه ظهور ایتشدر قصه مذ کوره سیر نبویه وتاریخدن
معلوم اولور^(۱) قرآن حکیمده ایسه بالجمله أخبار غیبیه سرد واتیان
قیلنشدر که بیانی کتب تفاسیرده در وینه إخبارات غیبیه نوعندن

(۱) حدیبیه وقعه سندن سکنز اون سنه اول عسا کر ایرانیه نک
رو ملره غلبه سی واقع و بو حال أهل اسلامه فنا حالده تأثیر ایتش
ایدی زیرار و ملر أهل کتاب بولنق اعتباریله اسلامه پک یقین اهالی
فرس ایسه مشرک ایدیلر حتی ایرانیلر رو ملره غالب کلدیکی زماندر
شرک اعتباریله انلری کندیلرینه یقین بولان مشرکین قریش أهل

وَأَحَادِيثُ شَرِيفَةٍ دَه وَارِدِ اُولَانِ إِيخْبَارَاتِ بِيغْمَبَرِيكَه أُمَّةٌ مَخْرَجِينَ
حَضْرَاتِكَ سِرْفَرِازَلَرِي اِمَامِ بَخَارِي وَمُسْلِمٍ وَأَحْبَابِ سَنَنِ وَامَامِ أَعْظَمِ
أَبُو حَنِيفَةٍ وَأَحْمَدُ وَشَافِعِي وَمَالِكُ رِضْوَانِ اللَّهِ عَلَيْهِمُ أَجْمَعِينَ حَضْرَاتِي
كِي حِفَازِ أُمَّةٍ كَرَامِ رَوَايَتِ اِيْمَشَلَرْدَرِ

سَلْطَانِ مَلَائِكِ سِيَاهِ عَلَيْهِ صَلَوَاتُ اللَّهِ اِفْتَدَمَزِ حَضْرَتَلَرِي أَحْبَابِ
مَعَالِي نَصَابِ مُحَمَّدِيَلَرِي نَهْ اَعْدَالِي نَهْ غَالِبِ وَظَاهِرِ اُولَهْ جَفْنِي مَكَّةُ مَكْرَمَهٗ قُدْسِ
شَرِيفِ شَامِ • يَمَنِ • عِرَاقِ • بِلَادِي نِيكَ فَتْحِ اُولَهْ جَكْنِي مَمْلَاكِ اِسْلَامِيَهْ دَه
أَمْنِيَّتِكَ ظَهْوَرِي نِي حَقِّ بَرِ خَاتُونِكَ حَيَرَهْ بِلْدَه سَنَدَنِ مَكَّةُ مَكْرَمَهْ يَه
قُدْرِ جَنَابِ حَقْدَنِ بِشَقَهْ بَرِ كَيْسَهْ دَنْ خَوْفِي أَوَّلِيَهْ رَقِ مَسَافَرَتِ اِيْتَمَسْنِي
إِيخْبَارِ بِيوَرِ مَشَلَرْدَرِ فَلِلَّهِ اَلْحَمْدُ بُوْعَالِمِ نَاسُوْتِي تَزِينِ بِيوَرْدِي نِي زَمَانِ
قِيضِ نِشَانِ مُحَمَّدِيَلَرِنْدَهْ وَعَالِمِ بَالَايَهْ تَشْرِيفِ بِيوَرْدَقَلَرِنْدَهْ نَصْرَهْ دَه
اَوَاخِبَارَاتِ مَعَالِي آيَاتِ بِيغْمَبَرِيَلَرِي عَيْنِيْلَهْ ظَهْوَرِ اِيْتَمَشْدِرَامَهْ مَرْحُومَهْ
مُحَمَّدِيَهْ سَنَهْ جَنَابِ حَقِّكَ فَتْوَحَاتِ سَبْحَانِيَهْ سَنِّكَ جَلُوهْ بَرُوزِ

اِسْلَامِ اِيْلَهْ اسْتَهْزَاءِ اِيْتَمَشَلَرِ اِيْدِي اسْتَهْزَايِ قَرِيشِيْدَنِ فَوْقِ الْعَادَهْ
إِضْطِرَابَهْ كَرَفْتَارِ اُولَانِ أَهْلِ اِسْلَامِي تَبْشِيرًا جَنَابِ حَقِّ آيَتِ جَلِيلَهْ
مَدْكُورَهْ بِي اَنْزَالِ بِيوَرْدِ يَلَرْفِي الْوَاقِعِ حَدِيثِيَهْ وَقَعَهْ سَنَدَنِ طَقْوُزِ سَنَهْ
مَرْوَرِنْدَهْ رُوْمَلَرِ اِيْرَانَهْ غَالِبِ كَلْمَلَرِيَهْ أَهْلِ اِيْمَانِ أَهْلِ كِتَابِ بَرِ قَوْمِكَ
مَشْرُكَارَهْ غَلْبَهْ سَنَدَنِ طُولَانِي يَكْ زَبَادَهْ مَنُونِ اَوَلَمَشَلَرْدَرِ تَفْصِيلِ اَرْزَوَايْدَنِ
تَوَارِيخَهْ مَرَاجَعَهْ اِيْتَسُونِ

اولوب زهره دنیا کندیلرینه حاصل اوله جگنی کسری وقیصرک
 کنوزینی امت محمدیه سنک تقسیم ایده جکلرینی خبر ویرمش عینیله
 ظهور ایتشدیر . امت احمدیه لری بلاد کسری وقیصری فتح ایدوب
 خزانلرینی یینلرنده تقسیم ایتشلدیر برکیمسه نک صبا حدن اول حله ده
 بولوب أخشام باشقه اوزاق بریرده بولنه جگنی واولکلرینه بر صحن
 قونیلوب دیگر صحن قالدیر یله جگنی یعنی دنیا اوزرلرینه افاضه اولونوب
 ولندقلری ضیق معیشتد نصکره نعمت واحسان الهی یه نائل اوله
 - جکلرینی اخبار بیورمشلر و حقیقه بروجه اخبار جناب احمدی صلی
 الله علیه وسلم بولر ظهور ایتشدیر بر صحنک وضعی دیگرینک رفعی ایسه
 لغت ترکیه ده «قالدیر» تسمیه اولنان تناول طعامک کیفیتده تحقیق
 ایتشدیر جناب دانای سرائر کائنات علیه ا کمل التحیات افندمز
 حضر تلری صحابه کزیننه خزر روم طائفه سیله مقاتله ایده جکلرینی
 کسری وفارسک کیتمسیله بردها کسری وفارس اوله میه جگنی اخبار
 بیورمش وعینیله ظهور ایتشدیر . روی زمین ذات سعادتناه محمدیلرینه
 تجمع ایتدیر یلوب مشارق ومغارب کوسترلدیکنی وامت مرحومه سنک
 ملکی رؤیت بیوردینی محللرده قدر بالغ اوله جگنی اخبار بیورمش
 حقیقه امت نجییه محمدیه سنک ملکی مشارق ومغارب امتداد ایتش
 مشرقده اراضی هندیه اراسیله مغربده طنجه دکزیننه قدر تمتد
 اولوب جنوب وشمالده اوقدر امتداد ایتماشدر بیت المقدسک

فتخذ نصره طاعون ظهور ایدہ جکفی خبر ویر مشر و بعد الفتوح طاعون
عمواس حقیقہ ظهور ایتشدر اهل بیت محمدیلرینہ اولہ جق ظم
وعدوانی قتل ونفی لاسیا سیدنا حضرت حسین رضی اللہ عنہ
افندمزك « کوفہ » جوارندہ کر بلا موقعندہ مرتبہ قصوای شهادتی
احراز بیورہ جقلرینی خبر ویر مش وطبقیسی ظهور ایتشدر حسبنہ
اللہ ونعم الوکیل حضرت حسن رضی اللہ عنہ افندمز ایلہ ایکی عسا کر
اسلامیہ میاتی جناب حقک اصلاح ایدہ جکفی خبر ویر مش حقیقہ
معیت سامی حضرت حسندہ کی عسا کر اسلامیہ جناب معاویہ نک
معیتندہ کی عسا کر اسلامیہ بینندہ ذات سامی سبط نبوی رضی اللہ عنہ
افندمز سبیلہ صلح واقع اولمشدر اصحاب محمدیلریندن حضرت سراقہ یه
سراقہ کسری نک بلہ زکلرینی طاقندیغکده نصلاسک دیہ خطاب
بیور مشلرایدی بلاد فارسک فتخذندہ . امیر المؤمنین خلیفہ رسول رب
العالمین حضرت عمر رضی اللہ عنہ افندمز مذکور بیلہ زکلری کتیر دکارندہ
مشار الیہ جناب سراقہ یه طاقدیروب بوبیلہ زکلری کسری دن
سلب ایلہ سراقہ یه الباس بیوران جناب حقہ حمدو ثنا اولسون دیہ
مقام شکرانده ایستاده موقع تعظیم اولمشدر در تنکم امام سیوطی رحمہ
اللہ جامع صغیرندہ نقل ایتش و جمع الجوامعده امام بخارینک تاریخندن
وحاکمک مستدرکندن منوال مذکور اوزرینہ نقل وروایت ایلمشدر
بعض عامای نغام امام احمد دن مسند حسندہ نقلی ایتش و بشر غنودن

تصحیح ایتشدرکه علیہ الصلاة والسلام افندمز حضرتلری لتفتحن
القسطنطنیة ولنعم الامیر امیرها ولنعم الجيش ذلك الجيش بیور مشلردر
مولای متعال حضرتلری فتح بلدة قسطنطنیة بی أبو الفتح والمغازی
جنتکان فاتح سلطان محمد خان غازی حضرتلرینه هجرة سنیه احمدیه
علی صاحبها افضل التحیه نک سکز یوزاللی بدی سال عظاما لئمه ارزانی
وشایان بیور مشلردر او وقتدن الی الآن والی آخر الزمان دار الاسلام
ومقر خلیفه رسول رب انام وموئل خاص وعام اولمش واوله جقدر
حضرت نخر کائنات علیہ ا کمل التحیات افندمز حضر تلرینک فاتح
اسلامبول حضرت مولانا السلطان محمد غازی بل الله تراه برضوانه
واُسکنه فرادیس جنانه نک وموید ومنصور عسا کر نصر تمانثر
عثمانیه لری حقلمزنده شرفصدور ایدن شهادت عالی رسالتما بانه لری
کوزلدر واوبلده مقدسه نک فتحی متعاقب صدور عامه یه انشراح
ویره جک عطایا واحسانات ایلہ حضرت فاتحک اہالی یه لطف وعنایتنده
بولنمه سی نه جود وسماحتدر منوال مذکور اوزره استانبولک فتحی
نصل موجب مسرات اولمه سونکه سادات معالی آیاتمز پادشاهان آل
عثمان افندیلمز حضراتک اک کوزل اک بیوک مناقب شهنشاهانه لرندن
معدود در باخصوص شوزمان فیض نشان مشروطیتمزده ایلک
مشروطی پادشاه والاجاهمز سلطان محمد رشاد خان خامس افندمز
حضرتلری کی نکہبان مشروطیت وعدالت اولان بر خلیفه یه نائلیتقرله

استقبال و طنمیزك مأمونیتی از هر جهت سعادت تزی منتجدر معلوم اوله كه
امور مستقبله فی اخبار عالی پیغمبریده کی وارد اولان احادیث شریفه نك
چو غی بو عالم كونده وقایعك حدوئندن اول علمای اعلام حضراتنك
تألیف رنده تدوین اولمش صكره لری او وقایع مرویه برر برر جلوه كر
ظهور اولمشدر و او تألیفك تاریخ جمع و كتابت لری ایسه • هب معلوم
و مشهور در شو آفامد كور اولان فتح قسطنطنیه یعنی اسلامبولك فتحی
حدیث شریفی كه فتحندن یوز لرحه سنه اول زینت ساز عالم شهود اولان
حضرت امام احمد بن حنبل رضی الله عنه روایت ایلمشدر كذاك علمای
أعلامدن امام سیوطی قدس الله سره جمع الجوامعنده امام بخاری علیه
تجلیاة الله البارینك تاریخندن و جناب حاكمك مستدر كندن حدیث
شریف مند كوری نقل و روایت ایلمشدم و امام همام بخاری و حاكم ایسه
بلده دلا رای اسلامبولك فتحندن یوز لرحه سنه اول شر فرس عالم دنیا
ایدیلریو خسه العیاذ بالله تعالی اتباع رسول معظم و انصار شریعت
اولان او علمای اعلام حضراتی عندلرنده روایتی ثابت اولیان اخباری
كتابلرنده نقل ایتملری محالدر ممكن دكلدر حمیب اكرم صلی الله علیه
وسلم افندمز حضر تلرندن او احادیث شریفه نك روایت اولند یغنه
اعتماد لری اولیه ایدی مدی الدهور باقی اولان كتابلرنده اعدای
دین مبینك و فرتی بیلدك لری حالده او حدیث شریف لری ثبت و تحریر
ایتمز لرایدی معلومدر كه ذات رسالتسمات علیه افضل التحیات افندمز

حضرتلری عقلک ائک یوکسک طبقه سنده سدره نشین عز و علا در
نتکم اعدای بدخواه لریده بوکا شهادت ایدر لر من عند الله منصب
جلیل رسالتی ادعا ایدن و بیکلرجه انسانلر اوداعاسی اوزرینه کندیسنه
تابع اولان مرد عاقل محتشم قدس شام استانبول وامثالک فتحی کبی امور
مهمه نك وقوعه کلیه جکفی اعتقاد ایدر کن انلری اخباره نصل اقدام
ایدر و نفس نفیسی زمان مستقبلمده تکذیب و طعنه نصل عرض ایدر
حاشا ثم حاشا معاذ الله هیچ عاقل اولان ذات بویله اقدام ایدر می
منصف اولان ذات تأمل ایتسون بیلسونکجه غیبی اخبار پیغمبر اولسون
غیری اولسون طوق بشرده دکلدر . بر کیمسه بالذات علم غیبی ادعا
ایدر سه علمای کرام انک کفر یله حکم ایتشلر در انسانک غیبی اخباری
اعلام الہی و اخبار سبحانی ایله در که اورب مستعان ما کان وما یكون
«ی اولمش واوله جنی علمدر» بونده اشکال یوقدر ایمدی بز معاشر
مسلمین اعلام الہی ایله رسل نجام صلوٰۃ الله علیهم اجمعین حضراتندن
مغیباتی اخبار وقوع بولد یغنه ایمان ایلر ز خلاصه معجزات پیغمبری جمیعاً
بیان مراد ایتسه ک جلد لرجه کتابلره محتاج اولور ز یالکز عقوله
قناع تبخش اولان معجزات سنیه محمدیه یی ذکر ایله اکتفا ایتدک
فی الحقیقه عاقل اولان بر کیمسه نفس انفس شریعت مطهره یه و شامل
اولدینی حکم و اسرار و منافع دنیویه و آخرویه یه نظر ایتسه ذات خبیسته
صفات محمدیه یه و امیانه نشأت ابتدکی و یتیمانه تربیه اولدینی حالده

شمائل شریف محمدیلرینه و اخلاق منیف احمدیلرینه نکران اولسه فصاحت و بلاغت فطریه لرندن بشقه معارف و فنوندن عین و اثر اولیان بر قومک میاننده ظهورینه و کتیردیکی و خلقه تبلیغ بیوردیغی احکام و اوامری اکتسابه تأهیل ایده جک مقدری ارباب معارف و فنون ایله اجتماع محمدیلری وقوع بولدیغنه و کتیردیکی شریعه غرای محمدیلری اوجی نهایتی بولمز اوزون بر عمریا لکز عشر مقدرینی احاطه ایده جک بردکز اولدیغنی بیش نظر انصافنه السه جزم ایدر که او ذات ملائک سمات علیه افضل التّحیاتک و شریعت مطهره سنک حال سعادت مآلی خارق عاده برأمر در معجزه اولدیغنی عقل تسلیم ایدر جناب حق انکله دعوی رسالت محمدیسی تأیید ایله ذات صدق سمات احمدیلرینه اکرام و احسان بیور مشلدر لکن معجزه مذکورده بی نظر دقیق اهلی اذکیای بشردن بشقه برکیمسه فهم و ادراک ایتمز زیرا بونلرک غیریلری کلام حجرو شجر و انشقاق قمر مثالی حاسه سمع و بصر ایله کوریلان معجزات سنیه بی انحق فهم و ادراک ایدر لر . **فَلله الحمد** مولای متعال نبی اکرمی صلی الله علیه و سلم معجزات سنیه نک هرا یکی نوعیله ده تأیید بیور مشلدر که صحائف سالفه ده مشروحاً و موضوعاً بیان اولنمشدر شمدی برآزده شریعت غرامزک شان عظمت و حال حکمتی بیان ایده لمکه شوزمان معارف نشانمزده بعض خواهسکران سعادت دارین منتفع ولسون بزدریز که عاقل منصف بر ذات حقیقت شناس شریعت

بیضای احمدیه به حقایقه اطلاع اسرارینی علی قدر الطاقه احاطه مراد
 ایدرک اوضح طرائقه بالسلوک نظر دور بین بصرا یله باقسه کاوسط نهاده
 ظهور شمس کی ظاهر و آشکار اولور که شریعت غرامز هر خیر و منفعتله
 امر و هر شر و مضر تدن نهی ایدر بوا یسه کیجه و کوندز لر طور دقجه
 انسانلر ایچون انفعدر ایمدی ناظر کور ییور که شریعت احمدیه خلقه
 جناب حتی شان الوهیتنه لایق هر بر کمال ایله وصف و صفت قدسی
 و بویته نقص ایراث ایدن هر بر شیدن تنزیه ایتمکله حق اقدس سبحانیده
 عقاید صحیحه ایله اعتقاد اولنمی ایله امر ایدر کذلک هدایه انام اولان
 رسل نغام حضراتی حقلرنده ده معاصیدن معصوم و مصیب جلیل رسالته
 نقص ویران هر شیدن منزله اولدقلر یله اعتقاد ایدلمسینی انسانلره امر ایدیور
 حقیقت شریعتز منفعتی عبادۀ عائد بر طاقم عبادات ایله امر ایدیور
 انسانیه طهارتله امر ایدیور طهارت منافع نظافت و نشاط ابدانی
 اشتمالیه برابر ذنوب و آثامدن طهارت دیمک اولان توبه بی انسانه تذکار
 ایدیور عبادت صلات ایله امر ایدیور صلات جناب حقه تعظیما رکوع ؛
 سجود، خشوع، خضوعی اشتمالیه نفسک اک بیوک مهنیدر نمازده
 ذات أجل و أعلا حضر تدرینه توسل و حضور إلهیسنده ضراعت و ابتهال
 رحمت و مغفرت و اعانتۀ «عقایدن» استعاذه واردر بوسیدن نماز رب ایله
 عبد بیننده وصلت و عبدک مراقب و محافظی اولان ذات قیوم سبحانی
 یادوتد کاردر انسان اگر اشغال دنیا به انها کیله مولای ذوالجلال دن

غفلتده مستغرق اولسه نفسی آزار شیطان لعین خالق متعالنک ذکر
 اقدسنی اونو تديرر اباطیل معاصی و شهوات نفسی قولایلشدیرر لکن
 انسانک مولاسی حضورنده عظمت و جلال الهی یی مستحضر آکیجه
 و کوندزده بش دفعه و قوفی ارتکاب ایتدیکی جنایتندن توبه ایتکه التجا
 ایتدیرر و همتنی نیت ایتدیکی معاصیدن قطع ایتدیرر ایشته بوزمان فیضی
 نشانده (ان الصلاة تنهی عن الفحشاء والمنکر) قول کریم سبحانینسک
 مصداقی ظاهر اولور جمعه و پیرام و سائر اوقات خمسسه ده جماعتله نمازی
 قیامقده ده بین المسلمین الفت و معرفه یولانی تسهیل و امیر المؤمنین خلیفه
 رسول رب العالمین حضر تدرینه طاعت و انقیاد و مجتهدا دین مبینه یاردم
 و یکدیگرینه معاونت و بربرینه امر حقده ظهیر اولمق و اقلام کاتبینک
 قاصر اولدیغی بر چوق حکم مالا نهایه کبی محسنات جلیله واردر شریعت
 مطهره مز صوم ایله امر بیور یور صومده شهواتی منع ایله تهذیب نفس
 و احوال فقرا و مساکینی و انلرک طاعتقلری ألم جوعی انسانه تذکار
 واردر صیام اولماسه غنینک عمری چوق کره لر کچرده ألم جوعی بیلمز
 قلبنده فقرایه شفقتی بوله مز شریعت غرای محمدی زکات ایله امر ایدیور
 زکاتنده فقرا و ضعفایه حاجتدرینی سد ایله احسان و اکرام واردر و غنیلری
 بخل مذموم اخلاقندن تطهیر و تهذیب واردر عبادت حج ایله امر
 ایدیور حج امکنه مخصوصه یی زیارتدر که جناب حق لسان پیغمبری
 اوزره حج اولندیغنده امت محمدک توبه لرینک قبول و کناهلرینی

عفو و مغفرت ایده جگنی وعد بیور مشلردر حج شریفده اوأما کن
 مقدسه ده یکدیگرینه مألوف و مانوس اوله رق اجتماع مسامین واردر
 بواجتماع انلری بیاشوب کورشمکه دعوت ایدر حجدده اوبقاع مشرفده
 رسل نغام حضراتی و عباد صالحینک أحوال سنیه لرینی تذکار
 واردر مثلاً او مقامات مقدسه ده سیدنا آدم و حوی علیهما السلام
 حضراتک مولای مقدس لرینه ایتدکلری انابه نک قبوانی و سیدنا
 ابراهیم خلیل الرحمن افندمز له ولد أمجد لری حضرت اسماعیل علیهما
 السلام امتحانله معامله اولمکلرینی و حضرت قیوم واحده اطاعتلرینی
 و اوأخیار کرام حضراتک اعمالی و اودیار اقدس لردہ أعمال مذکوریه
 بمشابهتی یادوتذکار و واردر نفس انسانی اوأخیار صالحینک بقیه
 أعمال و عبادات و مولای اقدس لرینه اطاعتلرینی تذکاره میل ایدر
 و انلره اقتدایه مشتاق اولور و خالق متعال حضرت تلرینک مرضیسی اولان
 هر بر اخلاق حسنه ایله تخلق ایتمه کمال خواهش ایله سعی و اقدام
 ایلر حج شریفده جناب حقک بیت تسمیه ایتدیکی بیت مفخّم سبحانی
 زیارت واردر او خلاق قیوم مکاندن مستغنی ایکن کعبه الله العلیایه
 بیت تسمیه بیور مسی مصائب مضرات بالهجوم اضطراب و یردیکنده
 حکمدار لرینک سرایلرینه التجانی اعتبار ایدینان بنی بشرک أفکارلری
 ایچون برتنزل سبحانیدر حجاج کرام مصائب ذنوب غوائل
 معاصیدن مستجیر بلایای آنامدن خلاصی طالب لسان حضرت

سید الاکوان ایله انلره وعیدیوردینی کی غفرانلرینی راجی اوله رق
 اوییت مقخمه التجا ایدر لر بوسبیلله اویاک محملرده امور مأموره لرینی
 بالامتثال اجرا لرید نطولایی مغفرته نائلیتله نفوس بشریه لری مطمئن
 اولور ودها بونلر مثلی برطاقم حکم واسرار سببحانیکه ذکر ی
 شو مختصر کتابی طارالتیر زیاده اطلاع مراد ایدن مزید بیانی متکفل
 کتب شریعتیه مراجعت ییوره او شریعت مطهره مزهر عمل مستحسن
 - ایله أمر . بدن ، عقل . عرض . ماله . مضر اولان هر فعل قبیحدن نهی
 ایدیور حلم . صبر ، رضا ، رحمت ، شفقت . کی اخلاق حمیده ایله أمر
 کبر ، حسد ، بغض ، عدوات کی ذمائم اخلاقدن نهی ایدیور
 خلاصه شریعت مطهره نك أمر ایتدیکی بر فعل مستحسن نهی
 ایتدیکی بر فعل قبیح یوقدر بعض ضرری ظاهر منهیات ایچون برای
 تحذیر عقوبات وحدود تخصیص ایتشدیر مثلاً ظلماً قتل نفس کییکه
 چرکینلکنی بیانه حاجت یو قدر زنا کییکه اختلاط انسانی وفقدان
 تماسلی مقتضیدر شرب مسکرات کییکه عقلی ازاله وهر قبیحی ارتکابه
 انسانی تأهیل ایدر حاصلی بو تخصیص شرع شریفده پک بدیع حکمتلر پک
 بیوک سرلر واردر که کتب شریعتیه اطلاعدن معلوم اولور کذلک شرع
 ازهر محمدی معاملات انسانیه و سیاسیات بشریه دن بر باب ترک ایتیه رک
 اکابر بر قاعده وضع وبر اصول تشریع ایتشدیر که بین البشر أمر
 معاش انکله انتظام پذیر اولور وهر قوی وضعیف انکله حقنی

استیفا ایدر بیوع شرکت نکاح میراث معاہدات : اصولالربنی . ولایة
 أموره کیفیت اطاعتی کلی جزئی امت نجیہ نک صلاحنه یرایہ جق
 هر بر شیء بیان ایامشدر اصولا وفروعا کتب فقیہہ یہ اطلاعدن
 بویانات نمایان اولور شو شریعت غرایبی که اکبر علما ؛
 احذق اذ کیا و سیاسیات اموره ممارسہ پیدا ایدن أعظم سیاسین
 انی اتیاندن عاجز قالد قلری محقق و آشکار در نخر عالم پیغمبر
 والاشانز علیہ الصلاۃ والسلام أفندمز حضر تلری قرائت کتابت
 بیامدیکی ومدة حیات دنیویہ سنده هیچ بر کیسه دن تعلم ایتمدیکی .
 حالده أوجامع کافه أصول وحقائق أولان شریعت بیضانی کتیرمسی
 خارق عاده بر معجزه در و خالق حقہ ارشاد ایچون ذات معالی سمات
 محمد یسناک طرف أقدس الوهیتدن ارسال أولدیغنه و او شریعت
 مقدسه نک من عند الله أولدیغنه دلیلدر اما سلطان هر دوسریر
 اصطنی علیہ اَکمل التحایا أفندمز حضر تلرینک قرائت و کتابت
 بیامیوب أمی اولسی یوز بیکلر جه عدول ثقاتک سرد واتیان
 ایتدکلری تواتر صحیح ایله متواتر بر امر مشهور در قرآن حکم
 بیان الہیمزایسه آیات عدیده علیہ الصلاۃ والسلام أفندمز حضر تلرینک
 أمی اولدقلرینی تصریح ایتمشدر أوقرآن عظیم الشانمز زمان سعادتیناه
 أحمد یدن الی یومنا هذا علی رؤس الاشهاد تلاوت أولنمقده در
 وذات سامی محمد یلرینک أمی اولسنی قومندن بریسی انکار ایتمدیکی

کجی زمان سعادتدن صکره ده انکار ایدن بولما مشدر قال الله تعالی
 فی القرآن الکریم (وما کنت تتلو من قبله من کتاب ولا تحطه بيمينک
 اذا لارتاب المبطون) واما دانای سرائر مصنوعات علیه أوفر
 التسمیات أفندمک هیچ برانساندن تعلم ایتدیکی شویله تظاهر
 ایدرکه علیه الصلاة والسلام افندمز بلده مقدسه مکه شرفها الله الی
 يوم القيمة ده مشهور ومعروف اوله رق قوم کریمک اراسنده نشأت
 ایلمشدر زیرا ذات والاسمات پیغمبریلری صاحب خانه وذوا الحسب
 اولخله بلده مکرمه ده مشهور ومعروف اولماق غیر قابلدر قومی
 اراسنده ایسه براز کیمسه دن بشقه قرائت وکتابی بیلان بولنر اما
 کتابت وقرائنه آشنا اولدقدن صکره معارف موجوده ی محیطواو پیغمبر
 والاشان محترمک کتیر دیکی شوشریعت بیضا لری مثللی یی ترتیبه
 اهلیت پیدایتدیره جک حیثیتده قوانین ام وسیاسیات بشره مطلع
 اولان بر ذات نه قوم نجیب عرب میاننده ونه ده اقوام سائره میاننده
 موجود دکل ایدی زیرا بوکی ذیشان اولانلرک مکه مکرمه کجی بلده
 مقدسه ده وجودلری مخفی اوله مزین الخاص والعام مشهور اولور هر تقدیر
 اومتفن کنیدیسنی کیزله مک ایسته سه کیزلنسی متعسر در بهمه حال میدانه
 حیقار کذلک اوشریعت غرای علیه الصلاة والسلام افندمزک بوکی
 انسان مفروضدن تعلمی بر ویایکی محله اوله مز بلکه اعوام کثیره
 به وایام ولیالیده شخص مفروضک مجلسنه کیدوب کلکه محتاجدر

شوحالده اندن تعلم بیغمبرینک کافه اهل بلدة مقدسه به مخفی اولسی
خفی قالمسنی نقدر تخری واجتهادده ایتسه قطعاً عادة ممکن دکلدن
بعض مشرکین شوشبه مذ کوره کیلریله بالتمسک «محمد» صلی الله
علیه وسلم قرآنی فلان کیمسه دن تعلم ایدر دیه رک ارالرنده موجود
بولنان بر اعجمی رجلی ذکر ایدر لر ایدی «مشرکین» طبقات فصاحت
وبلاغتک اعلا سنده اولان قرآن کریمک تعلانی ادنی فصاحت ولسان
عربیده بولنان آز بر بلاغت صاحب اولمیان بر رجل اعجمی به نسبت
ایتدکلی حسبیله بطلانی بدیهی و آشکار اولان شودعوای واهیلری
ایله رسوای عالم اولمشدر در پرور دکار عوالم حضر تلی کتاب مجید
سبحانیننده مشرکینک شبهه لرینی رد ایدرک بیورپورلرکه استعین بالله
(لسان الذی یلحدون الیه اعجمی وهذا لسان عربی مبین) سوءال
احتمالکه حضرت محمد صلی الله علیه وسلم او شریعتی دعوای رسالتدن
اول تجاردن بر جماعتله مسافرة کتدیکی بعض بلاد شامیه ده ومکه
مکرمه نک خارجنده بولنان بر ذاتدن تعلم ایتدش اوله . جواب . ثابت
النقل وصحیح الروایة اولان او لصاحب سریر رسالت علیه اکل التحية
افندمن حضر تلرینک مکة مکرمه دن غیبوتیلله بلاد شامیه ده مسافرتی
بر قاج کوندر که ایکی آی ویا اوج آیه انحق بالغ اوله بیلر بوقدر جق بر
زمان ایتسه کلوب کتده به وذات سامی سامی نبوتینا هیلری ایله
مسافر تده بولنان تجارانک مصالحنی اتمامه انحق کافیدر شریعت غرای

محمد یسنده ظاهر اولان او معارفك تعلمی ایسه معلم نقدر بارع و ماهر
اولسه متعلمده نقدر زکی و مستعد اولسه ینه نیجه نیجه شهرور و اعوامه
ولیالی کثیر و آیامه محتاجدر هانسی عاقل تصدیق ایدر که علیه الصلاة
و السلام افندمن حضرتلری مکة مکرمه دن غیوبت ایتدیکی او آیام
قلیلده او قومه یازمه سی اولد یغی حالده او جمیع معارفی تعلم ایتش
اولسون مدة مذکوره ایسه متعلم نقدر کاتب قارئده اولسه ابواب شریعتك
بر یسنی تعلمه کافی اوله من حالبوکه سید الاولین و الاخرین علیه
صلوات رب العالمین افندمن حضرتلری ابتدای دعوی رسالتده
دفعه واحده ده او شریعت مقدسه یی انسانلره اظهار بیورماشدر
بلکه ابتدای دعوی رسالتناه انخمیلرندن دین مبین محمدیسی تمام
اوله سی یه قدر ازمنه متفرقه ده اظهار و تبلیغ بیوروب ذات سامی
رسالته اتباع ایدن ائم میاننده یکر می ایکی سنه ظرفنده منتشر
اولمشدر مقتضیات ، و حوادث ، و مصالح ، و مشاکل ، و خصما طرفندن
وارد اولان سوءالات و شبه ك دفعی ایجاب ایتدیکه هر شیئك مقابله
سندده مطابقیه علی وفق المرغوب احکام شریعی و جمیع مشتملاتی
شیئاً بعد شیء انسانیا نه ایراد و اتیان بیورمشلدر شو کیفیت سیره
عالی محمدیلرندن تماماً نقل صحیح متواترایله بالضرورة بزه معلوم اولمشدر
شو حالده حادثات مستقبله یی و ذات رسالتسمات احمدیلری و اتباع عالی
محمدیلری ایله خصملری بیننده اوله جق حوادثی ذات قدس سمات

پیغمبری به تعلیم ایتدیکنی خصمک ادعا کرده سی اولان او معاملی
رسالتپناه افندمز حضرتلرینه بیلدیران طانتدیران کیدر بومسئلهده
معلم موهومک بالذات اهایلی مکه دن ویاخارجدن ایدی دینناسی برابردر
دعوی رسالتدن اول ذات خجسته صفات پیغمبری به زمان
دعوتنده حادث اوله جق شوءات وحوادثه مناسب اولان جمیع موادی
تعلیم ایتمکه ذات قدسی سمات محمدیلری کندیسنه ایراد اولنه جق
سواءک جوابی وهربر شبهه نک دفعی وهربر حادثه نک حکمی
وهربر مشکک حافی بیامش وهر شیئک مناسبی ایراد ایتش وهر
شیئک وقتنده افکاره قناعت ویره رک باب اشکالی سد ایله جواب
ویرمشدر ، دنیرسه بز بیلورزکه اوحوادثک بعضیسنک واقع اوله
- جغی ویا وقوعی آخر زمانه تصادف ایده جکی هیچ بروقتنده هیچ
بر کیمسه نک خاطرینه کلامشدر مدّة دعوات رسالت احمدیلرنده
ظهور یافته حوادثه مطلع بر ذات بیلرکه مدّة مذکوره ظرفنده وقوع
بوله جق حوادثک جمیع بر کیمسه نک احاطه سی ولزومی اولان
شیء استحضاری عادة محالدر اگر بواحاطه واستحضارک زمان مذکوره
حصوانی حکم ایدن بولنورسه مکابردر

حالبوکه نخر دوجهان علیه صلوات الرحمن افندمز حضرتلری
اکثر احوال سنیه لرنده ذات سامی نبوتقاآبانه لرینه برسواء ویا بر
شبهه ایراد اولنور جماهیر اصحاب کریمیلری وسائر خصماسی اراستند

ملاء عامده همان او مجلسده سائله جواب ویرر اعطاء جواب اثناسنده
 حاضریندن بریسنه التفات ایدوبده اوندن لازمکلان جوابی متعلم
 اوله رق سؤال ایتدیکنی ویا اکامن جهة الخطاب مضطر قالدیغنی هیچ
 برکیمسه کور مامشدر بلکه مجیب : مدافع ، مفید . معلذات سامی
 رسالتناه انخمیلریدر نزد سعادت پیغمبر یلرنده تصرف ایدنلرایسه
 بر طاقم متعلم شا کرد وتلمیذلردر عجباً خصمک زعمکرده سی رسول
 ذیشانک . او معلم موهمی نره ده در وهانکی مکانه در بوزعم واهی
 مونه در دکل الاصرف بر افتراء بارددر ایمدی علی التحقیق أصحاب انصافه
 حق تظاهر وتبین ایتدیکه سیدنا . سلطان ملائک سپاه علیه صلواة
 الاله افندمز حضر تلرینک شو شریعت غرای اتیان عالیلری معجزات
 سامی انخمیلرندن بر معجزه عظیمه در بو شریعت بیضانی بنی بشردن
 بر یسندن تعلم ایتدیکنی ادعا ایتک صرف باطلدر بو دعوای واهی ایله
 حکم ایدن احوال سیرت پیغمبری وتاریخ حیات رسالتما بانه سفی
 یا جاهلدر ویا خود مکابر حق ومعانددر همان جناب هادی جل جلاله
 شریعت مطهره احمدیه ده موجب نجات آموزه بزی هدایت بیورسون
 آمین اما پادشاه انبیا علیه اصفی التحایا افندمز حضر تلرینک ذات
 معالی صفات احمدیلری وأخلاق وشائل سامی محمدیلرینی بیان معروضنده
 عدول وحفاظ کرام بزه نقل ایتش وکثرتی تواتردر جه سنه بالغ اولان
 اخبار صحیحجه روایتکرده ثقة اولمشدرکه سیدنا نحر المرسلین علیهم

صلوات الله أجمعين افندمز حضر تلیزیه حق سبحانه و تعالی محاسن
 خلقیه و خلقیه بی احسان بیورمش و کافه فضائل دینیہ و دنیویہ بی
 ذات سامی رسالتنا هیلرنده جمع ایتشدیر اما حسن صورت و خلقت
 انخملری حقنده نقل صحیح ثابت اولمشدرکه او احسن الکل علیہ
 صلوات رب السبل افندمز حضر تلیز آدیما نیک صوره احسنی خلقة
 اجملی ایدی محاسن و جمال باهردن ارنیلان تناسب اندام و اعتدال
 اعضا اوزرینه مطبوع بر روح الکل ایدی نتکم ذات ستوده صفات
 پیغمبرانه لرینی وصف ایدنلردن بعضیلری شویله جه مدیحه خوان
 اولمشدر ♦

و احسن منك لم ترقط عين و اجل منك لم تلد النساء
 خلقت مبراً من كل عيب كأنك قد خلقت كما تشاء
 یعنی یاسالطان الانبیاء و خلص اصفیاء علیک ا کمل التحایا جشم
 حقیقتینیم ذات خجسته صفات محمدیه کدن کوزل بر انسان قدس عنوان
 قطعیا کورمدی چار اقطار جهانده بولمان طائفه نساء ذات سامی
 رسالتنا هیکن کوزل بر اولاد یاک نژاد تولید ایتدی کافه عیوبدن
 مبراً اولدیغک حالده زینتساز عالم وجود اولدک کانه ذات قدسی سمات
 احمدیه کلک اروزوی کی خلق اولدک محاسن عالیہ رسالتنا به لرینی
 ابروجه بر اثر مؤلفمه بیان ایتشدیر مراد ایدن اثر مزبور عاجزانه می
 مطالعه ایلہ تشرف ایدر لر خطیب معلا پایہ علین علیہ صلوات رب

العالمین افندمز حضرت تلیزینی و اصفینک توصیف ایتد کیری نعوت
 و اوصاف عالیہ محمدیلرینک اُک جامعی اولمظہر سر لولاک علیہ صلوات
 رب الافلاک افندمز حضرت تلیزینی مشاہدہ ایدن بعض ذوات معالی
 صفاتک توصیفیدر کہ اول اُحسن ناس افندمز حضرت تلیزینی اوزاقدن
 رؤیت اولندیغندہ ناسک اُجل و احلاسی قریبدن مشاہدہ اولندیغندہ
 اُحسنى ایدی وجه منیر پیغمبریلری بدر کیجہ سی ماہتابک تالوئی کی
 منور و تابان ایدی بالبديہ رؤیت ایدن کیسہ ذات جمال سمات رسالتنا
 هیلرندن خوف ایدر بالمعارفہ الفت و انسیت ایدندہ ذات علوی سمات
 پیغمبریلرینہ محب اولور و اصف عالی محمدیلری ذات عالی نبوتنا
 - هیدن اول و صکرہ هیچ بر کیسہ پی او کریم الخصال بدیع الجمال
 افندمز حضرت تلیزینی کی کورما مشدر دیشدر . جناب فیاض اقدسک
 ذات سامی محمدی صلی اللہ علیہ وسلم حسن صورتله مخصص قیامسی
 حکم إلیہ جملة سندندر کہ خالق شرع اللہ الازھرہ دعوت ایچون
 اُوفیاض مطلق حضرت تلیزینی ذات رسالتناہ احمدی صلی اللہ علیہ وسلم
 بعث و ارسال بیور مشدر در حسن صورة انفس انسانینک الفت ایتدیکی
 اُعین آدمینک لذة الدینی برشی اولدیغندن حسن صورته مالک اولان
 ذات حقیقت آیاتہ آدمی زاده لر اقبال و توجه ایدر لرنتکم قبح صورة
 منفر و مشر در اما وفور عمل پیغمبری و ذکاء لب رسالتناہی حقندہ
 شرفورود صحاح اخبار و نقول آثار شویله جه شرفسطیر بیان

اولیور که اوسیهالار انبیا علیه ازکی التحایا افندمز حضرتلری ناسک
 اُک زیاده عاقل وز کیسی ایدی خلقتک امور ظاهری و باطنیاری و خاص
 و عام سیا ستلرنده کبی تدبیر عالی نبوتینا هیلرینه و بادیه نشین غلیظ
 الطبع انسانلری طاغ یرلرده ساکن خشین آدملری تألیفنه و اخلاقلرینی
 تهذیبنه بوسیله انلرک ادب. معرفت. سیرتلری تکامل ایتدینه بوندن
 بشقه سابقاً تعلم و مقدماً ممارسه سی اولمدینی حالد انلره تقریر ایتدیکی
 شرع قویمه افاضه بیوردینی علم جلیله نظرایدن کیسه بالبداهة عقل سامی
 محمدی صلی الله علیه و سلمک رجحانیتنده وفهم عالی احمدینک بارلاق و ضیا
 دار لغنده اصلاشک و شبهه ایتمز شور رجحانیت عقل احمدی و تابانیت فهم
 محمدی بی اکلامق تقریر دلیلله محتاج دکلدز زیرا عصر سعادت پیغمبریده
 بالمشاهده تحقق ایتمش بعده بین طوائف الامم تواتر بولمشدر اودانای
 سرائر ملکوت علیه صلوات رب الجبروت حضرتلرینه جوامع الکلم
 اعطا اولنمش بدائع الحکم تخصیص قیامنشدر جوامع کلم سامیلری
 و بدائع حکم عالیلرینی امت مرحومه محمدیه لرندن بعضیلری ابروجه
 تألیفله ثبت و تحریر ایلمشلردر که بروجه آتی مسرت بخشای صحائف
 کتاب اقیامنشدر قال رسول الله صلی الله علیه و سلم (۱) المسلمون تتکافأ
 دماؤهم ویسعی بذمتهم أدناهم و هم ید علی من سواهم ، ما آل شریفی
 جمله مسالمین سعادتکزینک دملمری سیاندر بریسنک استصحاب و ذمتیه
 اُک ادناسی روی زمینده سعی و جولان ایدرا و جماعت اسلامیه غیر یارینه ده

ناصر و قوتدر (۲) لاخیر فی صحبة من لا یری بك ماتری له : مال
 شریفی ؛ کندیس ایچون کوردیکک خیر ومنفعتی سنک ایچون
 کورمیان کیمسه نك مصاحبتمده خیر یوقدر (۳) ماهلك امرؤ عرف
 نفسه • نفسی بیلان کیمسه هلاك اولمدی (۴) المستشار مؤتمن وهو
 بالخیار حتی یتکلم ، استشاره اولنان ذات کندیسنه امنیت اولنمشدر
 وتکلم ایدنجه خیر ایله در (۵) رحم الله عبداً قال خيراً فغنى أوسکت
 فسلّم ؛ خیر سویله مسیله غانم سکوت ایتسیله سالم اولان عید صالحی
 جناب حق عفو و مرحمت بیورسون (۶) ان احبکم الیّ واقربکم منی
 مجلساً یوم القيمة أحسنکم اخلاقاً الموطوءن اکنافا الذین یألفون
 ویؤلفون • ای امت مرحومه مَ سزک بکا سوکیلی ویوم قیامتده
 مجلسه اُک یقین اولانیکنز ؛ کوزل اخلاقلی والفت وتالیف ایدن
 وموافق ومطابق اوله رق ارقد اشلق پیانیکزدر (۷) ذو الوجهین
 لا یكون عند الله وجهاً ، ایکی یوزلی اولان کیمسه عند الله حرمتلی
 اولمز (۸) اتق الله حیث کنت وأتبع السيئة الحسنة تمحها وخالق الناس
 بخلق حسن ؛ نه اولورسه ک اول الله دن قورق برکناهه بر ثواب
 تابع قیلکه او ثواب کناهی محو ایتسون وانسانلره کوزل خوی
 ایله معامله ایت : (۹) خیر الامور اوساطها ؛ ایشلرک خیر لیس اورتده
 اولانیدر (۱۰) أحبب حبيبك هونا ما عسى أن يكون بغيضك يوماً ما ؛
 دوستکه محبتی معتدلانه برحالد ابرازایت احتمال برکون دشمنک اولور ؛

(۱۱) السعید من وعظ بغیره : سعید اولان غیریدن عبرت الاندر دهابوکی جواهر کلام رسالتلری وجوامع کلم وبدائع حکم نبوتینا هیلریکه تماما بیاندن قلم قاصر در . اما حلم عالی پیامبرانه لری وعفو و صبر رسالتینا هیلری درجه علیاده علم افراز ارتقا ایدی ایشته بو اخلاق سنیه لرنندندرکه نفس نفیس پیغمبریلری ایچون اصلا انتقام سوداسنده بولئامش ویالکمز حرمت عالی الهی هتک اولنورسه اخذ انتقام ایلدیکی تصحیح کرده ثقاتدر وقتا که مشرکین ضلالت آیین ذات قدسی نعات محمدی صلی الله علیه و سلمه اشد اذی ایللاهذی وجفا ایتدیلر انلره بددعا ایدلمسی سویله نلدیکنده ؛ بن لعان اوله رق بعث اولنخدم یاربی قومه هدایت احسان بیور زیرا بونلر طرف اقدس الوهیتکدن مبعوث بالحق بر پیغمبر علوی رهبر اولدینغمی پیامیورلر . دین علویت سحیه احمدیلرینی ابراز بیور مشلردر اللهم صل علی محمد النبی الامی و علی آله وصحبه وسلم اوت قراء صحابه کرام محمد یلرندن بعض ذوات نغمی مغدور او ظلم شهید ایدن قبائل علیهنه دعا ایتیشلردر بوایه او مظلومین مؤمنینک قتل و اتلاف لرنده هتک اولنان حرمة الله اوزرینه ذات خجسته صفات پیغمبریدن بر غیرتدر وقتا که مولای متعال حضر تلری (لیس لك من الأمر شیء) قول کریم سبحانینی پیغمبر والاشانمز علیه الصلاة والسلام افندمز انزال بیوردیلر جانیلر علیهنه دعایی ترک ایله او خالق ذو الجلاله تفویضی امورا ایتدیلر چوق برانسانلرده

او لحیب رب العالمین علیه صلواة الله وسلامه افندمز حضرت تلیری
 غدر آ شهید ایتک امل باطلنده بولنور لرایکن دردست اولمشلرایکن
 طرف ذیشرف نبوتنا هیلرندن عفو نائل اولمشلردر اکثر اجلاف
 عرب ذات سامی رسلماآ بانه لرینه ابراز خشونت ایشلرایکن انلره
 ملاطفه بیورمشلردر ابتدای بعثت پیغمبریلرندن انتهایه قدر • حاشا
 اتلاف واهلاک پیغمبریلری حقنده او خبشای بدطینتان قریش تردد
 ایتامشلرایکن بوبابده حکم جلیل سبحانی لاحق اوله سی یه قدر شداید
 صبر و تحمل ابرازیله انلره عفو وصفح ایله معامله بیوررلرایدی حتی
 فتح مکه یوم مسعودنده قریش و صنادید مکه یه قارشو اقول
 کما قال اخی یوسف لا تشریب علیکم الیوم اذهبوا فانتم الطلقاء »
 بیورمشلردر خلاصه بوبابده آناریک چوقدر کلیسی کثرت حامیت
 پیغمبری وعلویت احمدیه دلالت ایدر اما جود وسخاء وسماحت
 مبجله رسالت رسالتنا هیلری شویله درکه اول قائد جیش المرسلین
 علیه صلواة رب العالمین افندمز حضرت تلیری شواخلاق کریم مذکورده
 بر بحر زاخر ایدی ثقاۃ کرامدن مرویدر که بر آدم ذات علوی مآب
 جناب پیغمبریدن صدقه و عطیه ایسته مش او سائله ایکی طاغ اراسنی
 طولدیران اغنام اعطا ایشلدر سائل مذکور قوم و قبیله سی نزدینسه
 عودت ایتدیکنده یاقوم مسلمان اولوک زیرا حضرة محمد صلی الله علیه
 وسلم بر عطیه احسان ایدیور که او عطیه یه نائل اولان ارتق فقر

وفاقه دن خوف و خشیت آتیز دییه خامه ران مقال اولمشدر چوق
 کیسه لره یوز عدد دوه احسان بیوردیغیده اولمشدر هوازن قبیله سنک
 الی بیک عدده رسیده اولان اسیرلرینی اعاده بیورمش مذکورلرایچون
 اعطا اولنان مال بیک کره بشیموز بیک غروش قیمتند اولدینی تیقنکرده
 ثقاتدر الحاصل بوبابده روایت اکثر من آن تحصى در اما شجاعت
 سنیه لری نجات و شهامت علیه لری بابتده ده درجه بالاترینی احراز
 بیور مشلدر اک مشکل صعب موقفلرده بولنمشلر چوق کره لرده
 او صعبناک موقفلردن بها دران دوران و شجعان زمان فرارایتدکلری
 اولور ذات شجاعت سمات پیغمبری ایسه اولدینی محلدن قیردامز موقع
 معرکه دن بعید اولمز موقع دشمنه اقبال و توجه ایلرایدی صهر
 سعادت جناب نبوی حضرت علی حیدر وفی رضی الله عنه و کرم
 وجهه بیور مشلدر که محاربه شد تلنیر و شجعانک کوزلری قیزدیغنده
 رسالتپناه اعظم افندمزی کندیمزه سد سدید اتخاذایدر ایدک بوسیه
 عدوی روسیاهه ذات شجاعتسمات نبوتدن بشقه یقین بر کیسه بولنمزیادی
 انتهی. اما حیا و محارمدن کوزیومسی اول سلطان اصفیا علیه ازکی
 التحایا افندمز حضر تلری انسانلرک حیا لسی اولوب عورات ناسدن
 چشم سعادتپناه اگر میلرینی پک زیاده یومارلرایدی حتی کرم نفس
 نفیس پیغمبریلری و حیا سعادتلرندن هیچ بر کیسه یه سومدیک
 برشی و جاها سویله مزایدی شو درجه که بریسنندن حسب البشریه

بر مستكره ايش ظهورنده فلان كيسه نك حضور عزنده حالى نصل
 اولور ديه تصریح بيور ميوب لکن شويله بيان وياشوسوزى سويله
 -يان اقوامك روز قيمه ده حالارى نصل اولورديه نهى ايدر فاعلى
 سويله مزايدي ذات اقدس نبوت مآبيلىرى فاحش متفحش
 صخاب في الاسواق دكل ايدى سيئه يه سيئه ايله مجازات اتيز ايدى
 اما حسن معاشرت على نبوت مآبيلىرى وآداب رسالتناهيلى و اصناف
 خلق ايله لطيفانه مصاحبتلى امر مشهور در وارد اولديكه او نخر
 المرسلين عليه صلواة رب العالمين افندمز حضرت تارينك صدر سعادتلىرى
 اوسع طبيعت سامى اكرمىلى الىن ومعاشره اكرم ايدى مسلمينى
 تأليف بيورر تنفير اتيز لرايدى هر قومك كريمه اكراموانى اوزرلىرى
 والى ايدر لرايدى اصحاب سعادتنصاب پيغمبريلىرى دايما تفقد
 تفحص ايدر وهر بر جليسنه نصيبى ويررايدى جليس سعادت انيسى
 -ايسه نزد عالي رسالتما بيده كننديسندن اكرم ظن اتيز ايدى جليسنك
 سوءالنه وحوايجنك ذكر اتميسنه صبرايدر حتى ايلك او كجه مجلسدن
 كيدن او جليس اولور ايدى بر حاجت طلب ايدنى حاجتى اسعاف
 ايله وياقول لين ايله كوندور ايدى بسط جميل وخلق كريملىرى
 آدميانه وسعت ويرمش وآنلك عادتاً آب مفعملرى اولمش ايدى نزد
 عاليسنده جمله سى حقوقده مساوى ايدى دايماً كوزل سوزلي و كوزل

خوبی ایدی (۱) اُفط غلیظ (۲) صخاب عیاب فحاش مداح دکل ایدی
 دعوت ایدنه اجابت ایدر هدیه قبول بیور ایدی هدیه بر یو دم
 صوده اولسه ا کا مکافات ویرر ایدی حضرت انس رضی الله عنه
 أرواح الكل صلی الله علیه وسلم افندمز حضر تدرینه اون سنه خدمت
 ایتدم أصلا ف دیدیکنی یاپدیغم برایشی نه ایچون یاپدک و یاپدیغم
 برایشی نه ایچون یاپدک دیدیکنی کور مردم دیمشدر أصحاب والانصاب
 رسالتما بیلرندن و یاأهل بیت نبوتنا هیلرندن یرسی چاغر دیغنده
 لیك ايله جواب ویرر ایدی أصحاب کرامنه مزاح ولطفه ایدر فقط
 انهای لطفه ده حتی سویلر انلر ايله مصاحبت مخالطت وصبیان ايله
 مداعبه ایلر وزانوی سعادتمده اوصیاری او توردر مدینه طاهره نك
 طهرها الله الى يوم القيامة اُك بعید محنده بولنان حر. کوله. جاریه
 .ومسکنیلر ك دعوتلرینه اجابت ایدر معذرت أصحابك عندرینی
 قبول ایدر بر کیمسه ید سعادتنی طوتدیغنده او کیمسه صالویر مینجه
 ذات سامی پیغبرانه لری انی صالویر مزایدی جلیس سعادت انیسنك
 یاتنده دیزلرینی اوزاتدینی کورلما مشدر ذات حقائق آیات نبویه لرینه
 ملاقی اولان کیمسه ابتدا سلام ویرر و أصحاب کرامی مصافحه ايله بدء

(۱) فظه. غلیظه. کریه الخلق اولان (۲) صخاب. قریاد

و فغان ایدن!

ایدر حضور اقدس محمد یرینه داخل اولانه اکر ایدر ثوب سعادت
 انك الله دوشر و سادۀ عالیترینی بالایشار ا کا ویردیکنی و ا کر داخل
 اولان ذات ابا ایدر سه جلوس ایلمسنى الحاح و ابرام ایلدیکی چوق دفعه
 مشاهد ارباب ایماندر اصحاب و الانصاب پیغمبر یلرینی ا کسویکی اسملری
 ایله نزده کریملرینه دعوت ایدر و نماز قیلا رکن یاتنه بر کیسه
 اوتور سه نمازینی مخفف صورتده ادا ایدوب کلان آدمک حاجتدن
 سوأل بیورر لر وانی بعد الاسعاف نمازه عودت بیورر لر ایدی حضرت
 انس رضی الله عنه دن روایت اولمشدر که اهالی محترمه مدینه نك
 خدمتکار لری او عین الشهود صلی الله علیه وسلم افندمز حضر تلی
 صلاة صبحی ادا ایتد کد نصر که بر طاقم چناق لر کتیز لر دست
 سعادت لری او چناق لر در و تنه طال دیر لر ایدیکه بونکله خدمه مذ کوره
 تبرک قصد ایدر لر ایدی چوق دفعه لرده صباح لری صووق اولور
 ایکن بیله انلری رد بیور میوب فعل مذ کوری اجرا ایلر ایدی صلی
 الله علیه وسلم و اما امت مرحومه احمدیه لرینه شفقت علیه لری
 مرحمت جلیله لری بر امر مشهور در که شواهدی لا تحصى در بکاء صبی یه پی
 بعض دفعه لر اشیر در مادر صبی یه ترحمأ نمازی مخففاً ادا بیورر لر ایدی
 ایسر اموری اختیار بیور ملری ده شفقت و مرحمت علویه رسالت پناهیلری نه
 دلالت ایدن مواد دندر جناب حق ذات علوی صفات محمد یلرینی
 جانب فقیرانه مزدن هر بر خیر ایله مکافات صمدانیه سنه مظهر بیورسون

آمین اما وفاء عالی رسالتی حسن عهد نبوت پناهیلری صلهٔ رحم
 اکرمیلری مثالی اخلاق جمیللری شهرت کیر آفاقدر مرویدر که
 حبش حکمداری یعنی بعض صحابهٔ کرامک هجرت ایتدیکی دیار
 حبشک حکمداری اولان نجاشینک سفیری معیتله برابر سدهٔ سنیهٔ
 جناب رسالت پناهیلرینه ورود ایتدیکنده بالذات نفس نفیس پیغمبریاری
 خدمت ایدر لر ایدی اصحاب کزین یار رسول الله خدمت ایچون بزکافی یز
 دید کلرنده بوکلانلر بنم اصحابهٔ اکرام ایله محترمانه مقام خدمتده
 ایستاده اولمشلردر ذات عالی نبوت تم انلرک بومعاملهٔ مستحسنه لرینه
 مقابلهٔ مکافات ایتکی سورم دییه امت مرحومهٔ احمدیه سنهٔ طریق فیض
 رفیق مجاملهٔ فی تعلیم وتفہیم بیور مشلردر رضا عا پدر والا کهر
 سعادت اکتنا هیلری بارکاه معالپناه احمدیه سنهٔ ورودنده بعض
 لباس سعادت پناهیلرینی وضع بیوره رق مشار الیهی قعود ایتدر مشلردر
 صکره رضا والدۂ محترمه لری کلدیکنده قیام ایدر رک ثوب سعادتک
 طرفنده کی اولان یاریسنی وضع بیوروب جلوس ایتدر دیلر بعد رضا
 قرنداشتی کلدیکنده اکاده قیام بیوره رق حضور سعادتده اجلاس
 بیوردیلر صفت سامی منقبت رسالت پناهیلر نده وارد اولمشدر که او محبوب
 علام غیوب علیه صلوٰۃ الله المنزه من العیوب افندمز حضرتلری صلهٔ
 رحم ایدر غیر یلرک احوال واثقانی یوکلنیر مسافرینه اکرام انعام ایدر
 مسکینلری قزانیدریر طرف ذیشرف الوهیتدن عباد الاله کلان مصائب

و بلایا اوزرینه اعانه و یاردم ایدر اما علو منصب انخمیلری رفعت والا
منقبت اگر میلری ایله برابر تواضع سامی رسالتینا هیلری شویله ایدیکه
تواضعی يك بیولک درجه لرده کبری ایسه هیچ یوق مثابه سنده ایدی هر
دائم « بنیالکتر بر عبد خاص الخاص الہی یم عبد کی اکل عبد کی جلوس
ایدرم بیورر لر ایدی ہمارہ را کب اولور ارقہ سنہ بشقہ سنی تردیف ایدر
مسا کینک عیادہ سنہ کیدر فقرا ایله مجالسہ ایدر عبدک دعوتہ
اجابت ایدر اصحاب والا نصابی ایله مختلطہ اولہ رق او تورر مجلس نرودہ
نہایت بولورسہ اورایہ جلوس بیورر لر ایدی ارپہ اتمکندن عبارت
دعوتہ اجابت و خادمہ برابر اکل بیورر لر ایدی اوزرنده صوف بر
کسوه اولدینی حالده اسکی اکر لی دوه اوزرنده حج ایتیش و حج
مند کور دہ یوز دوه اهدا بیور مشلر ایدی خانہ سعادت آشیانہ
رسالتینا ہیلر نده اہل بیت نبوتناک خدمتارینی ایضا بیورر سوت
صاغار الی سہ سنی دیگر نعلیننی تعمیر ایدر خانہ سعادتنی سپورر دوه یہ
اوت ویرر بالذات خدمت ایدر او قدر خدمتکار و کولہ لرینک
کثرتیلہ برابر چار شودن اشترا بیور دینی شیلری یوکلنیر خانہ سعادتہ
کتیر ناس خدمت سنیه رسالتنی کمال شوق و شطارتلہ ایضا ایتیش
جانلرینہ منت بیلر لرسہ دہ تواضعاً و تشریعاً خدمات مند کورہ یی بالذات
نفس نفیس محمدیلری اجرا ایتسنی سور و اما عدل سامیاری وعفت
پیغمبریلری و صدق لہجہ سعادتینا ہیلری شویله در کہ اوروح الکل

أفندمن حضر تلمینک ناسک اک عادلی عقیفی لهجه صادقه صاحبی
اولدیغنی اعداسی بیه اعتراف ایتمشلر و قبل الاسلام زمان
جاهلیتمده ذات والاسمات احمدیلرینی حکم نصب ایتشلر در دست کریم
رسالتینا هیلری رقیتمه مالاک اولدیغنی بر خاتونک الله قطعاً تماس ایتما مشدر
اتم اولد قجه أهون امرینی اختیار بیورر لر اثم اولور سه اندن بعید
اولور لر ایدی روز سعاد تبروز نبویلرینی اوج جزئه تقسیم ایده رک بر
جزئی عبادت خالق أجل و اعلایه دیگرینی اهل بیت نبوتینا هیلرینک
مصالحنه او بر بنیده نفسی نفیس محمدیلرینه تخصیص بیور مشلر در او
جزئیده ذات سامی رسالتیه انسانلرمیا تمده تقسیم بیوره رق حاجتی
بکا ابلاغه استطاعتی اولمیان آدمک حاجتی بر کیمسه بکا ابلاغ ایدر سه
اونی جناب حق فزع اکبر روز و حشت بروزنده مکاره آفات و مصائب
اکدا ردن امین قیلار،

کلام درر بار قدسی آثار پیغمبریلرینی بالعز والشرف اصدار بیور
مشلر در ابتدای نشأت نبوتینا هیلر ندنبری صدق ایله معروف ایدی
بوسبیلله حتی ذات خجسته صفات پیغمبریلرینی ، محمد الامین . دییه
یاد و تذکار ایدر لر ایدی بعض مشرکین ضلالت قرین بعثت اقدس
مصطفویه دنصکره بزسنی تکذیب اتمه یز لکن کتیر دیکک شریعتی
تکذیب ایدر لر کلام باطنی - ویله دیکمنده ذات أجل و اقدس سبحانی
جل جلاله حضر تلمری قرآن حکم بیان الیهیسنده ، فانهم لایکذبونک

ولكن الظالمين بآيات الله يحدون . قول جليلی انزال بیور مشلردر
مال منیفی ، حبیب ذیشان قدسی عنوانم ذات کریم نبوتما بیکی او کفار
خاکسار لر تکذیب ایتمزلر لکن ظالم لر آیات الهی یی انکار ایدر لر ،
انتهی واما وقار و صمت و حسن سیرت انخمیلری مجلس ملائک انیس
محمدیلرینده کمال وقار و تمسکین ایله جلوس بیور لر حتی هیچ بریرده
خارجه حقیقمز ایدی چوق سکوت ایدر لر من غیر حاجه تکلم ایتمز
لر ایدی فحک سامیلری تبسمدن عبارت ایدی کلام حقائق اتسام
نبویلرینی آیری آیری ایراد بیور و اصلا فضله حرف و لاقردی سویله
مزلر ایدی حضور معالی نشور رسالتینا هیلرینده اصحاب کرامنک کولمه
لری ذات سعادت اکنتاه محمدیلرینه توقیر اواقعتاء تبسم ایدی مجلس
ملائک انیس پیغمبیلری حلم ، حیا ، خیر ، امانت ؛ مجلس ایدی تکلم
بیور دقلرینده جلیس سعادت انیس پیغمبیلری کانه باشلرینده قوشلر
وارکی کمال سکونت ایله دامنکیر خلقة انابت ایدیلر سیره سنیه
اکرمیلری احسن سیرت ایدی صمت و سکوت عالیلری حلم ، حذر ؛ تقدیر
تفکر اولمق اوزره درده منقسم ایدی اما زهد عالی نبوتینا هیلری سید
الکمل صلی الله علیه وسلم افندمز حضر تلرینک دنیادن زهدلرینی
ازه قناعتله زهره دنیویه دن اعراضلرینی ثبت و بیان ایلدک متاع
دنوی کلیمه صوب رسالتما بیلرینه سوق اولنوب غنائم اموال ارزاق
واسعه طیبه دن جناب حقک میسر قیلدینی فتوحات ترادف ایتمش

شود ر چه که مراد پیغمبری اولسه دنیاچه توسع بیوروب زهره دنیویه
اقتطاف ایدر لر ایدی فقط توسعه راضی اونز اقل قلیل ایله کتفا
- ایدر لر ایدی آره اتمکندن متوالیا ایکی کون بطن سعادتلری طيور
- مدیغنی تشریف عالم لاهوتی ایلدکارنده بر سلاح ؛ برا ستره برده اولجه
صدقه یه تخصیص ایتدیکی بر ارضدن بشقه دینار . اغنام . جل . کبی
امته دنیویه ترك ایتدیکنی فراش سعادتلری ایچی خرما لیفندن ملو
جلد مدبوغه ن عبارت ایتدیکنی سیر جلیل رسالتنا هیلرینی مبین کتب
شریفه دن اوکر نمش ایدک احیاناً خرما لیفندن یا بلش سریر اوزرنده
او یور حتی مبارک یانلرینه تأثیر ایدر ایدی آج اوله رق کیجه لر
بتون کیجه آجلغندن طولانیر طور ربونکله برابر نهارا صائم اولور
- ایدی مراد بیورسه خزائن زمینی و ثمار ارضی جمع ایدر کنیش
حالی اولور ایدی

زوجات مطهرات رسالتنا هیلرندن بریسی رضی الله تعالی عنها
دیشدرکه بن اوسلطان انیا علیه اصفی التحایا افندمز حضرتلرینی
کور دیکم حالندن طولای مر حمتدن بکا ایدرو آجلغندن مبارک بطنی
کریم سامیلرینی الارم ایله مسح ایلر ؛ و یارسول الله نفس قاصرانه م
ذات نبو تسماتک فدا اولسون قوت مقداری دنیا لقی ارزو بیورسه
- کز دیر ایدم بکا جوابا : دنیا یه مبالات والتفاتم یوقدر اولی العزم
پیغبر اولانه اخوانم بوندن دها فضله شدایده صبر و علی حالهم گذران

ایدرک رب متعالرینه واصل اولمشلردر جناب حق مآبلرینه اکرام
 ثوابلرینی اجزال بیور مشلردر اگر معیشتنده ترفه ایدرسه مبارین
 ثوابم نقصان اولور انلردن مادون قالیرم دییه جناب حقندن استجیا
 ایدرم بکاخوان واصلقامه لحوقدن سوکیلی برشی یوقدر بیور مشلردر
 صل الله علیه وسلم الحاصل جمیع اخلاق حمیده وعموم صفات مجیده
 - لرینی استیفاء بیان مراد ایتسهک شواختصاره مراعات اولنان کتابتز
 تحمل ایتز درجده تطویله محتاج اولورز

ذکر ایتدیکمزله عاقل : منصف : متدبر : اولان ذواته ظاهر
 اولورکه اوسید الکل صلی الله علیه وسلم أفندمز حضر تلرینک او
 محاسن عالییه یه اختصاص رسالتیناهیلری وشو مکارم سامیه ایله تحلیه
 نبوتیناهیلری قسوت، جور، خشونت طبیعت، عدم تهذیب کندیلرینه
 غلبه ایدن امت جاهلیه ارا سنده یتیم پرورده اولدیغی حالده دکل
 إلابانبل جلیل صمدانیدن محض عنایت ومنصب رفیع ومقام جایلده
 ذات معالی سمات محمدیلرینی اقامتدر اوصفات کامل و اخلاق فاضل
 وعقل ثاقب ورأی صائب کند یسنده بولنان ذات علوی آیات صفت
 کذب واحتیاله قطعیا ملابس اولمز زخارف محال ایله انسانلری
 اندامتز جناب حقه اقترا ایدرک رسول الله اولدیغی ادعا ایتزمولای
 سبحانه تزهت ذاته عن النقصان حضر تلری او پیغمبر والاشامتز رسالتیناه
 أفندمز حضر تلرینی غیر یلرندن اختیار واصطفای بیور مشلردر بویله

بر ذات معالی صفات اوزرینه بر کره جک اولسون یلان سویلمکی ضمائیر
 عقلا ابا ایدوب تجویز ایتمز لر نقدر اضطراب حالده طاریء اولسه
 نفس شریف محمدیلری کذب ارتکابدن استیناف بیور مشدر اشرف
 خصال ایله متصف و عقل سامیلری اعلائی درجات کالده اولان بر
 انسان قدسی عنوان جناب حق اوزرینه کذب هیج ارتکاب
 ایدرمی حاشا و ممر لیالی وایام اوزرینه صوره دائمیده دینه دعوتده
 اصرار ایدرمی حاشا و کلا بویله بر حالی اوسلطان والاشان انیما علیه
 ازکی التحایانک ارتکاب ایتسنی قطعیا عقول تجویز ایتمزیا ادنی عقی
 و اقل کمالی اولان بر کیمسه نک بیله ارتکاب ایتسنی تجویز ایتمز
 هر بر احوال سعد اشتغال پیغمبریلرینک غرابقی صدق عالی محمدیلرینه
 وذات عالی سمات احمدیلرینه اعانه علیه ربانی اولدیغنه دلیلدر نگاه
 حقیقتله نظر اولنسون او حیب بروردکار عالم علیه صلوات
 رب الامم افندمز حضرتلری طریق عبادت وعادات ده جهالت
 . ضلالت . دکزلرینه مستغرق اولان امت جاهلیه نک حالنی
 تقلیب و تحویل ایله حسیض رزائلدن اوج فضائله نصل ترفیع
 ایتمشدر جورلرینه انصافه . خشوتلرینی لینه جهالتلرینی علم و معرفته
 . عداوتلرینی محبت والفته . محاربات جوریهلرینی سلام و امانه .
 شقاوتلرینی سعادت . ضلالتلرینی صراط مستقیمه هدایت .
 عصیانلرینی اطاعت . تفرقه لرینی جماعت . ضعف لرینی قوته .

خیانت‌رینی امانته • فحشرینی عفت و صیانت. نصل تبدیل بیور مشلردر
 فی الواقع اقوام نجیب عرب میاننده او شمائل کریم حمیده دن
 بولنورسه ده لکن تبذیر • واسراف • وشجاعتله • مخلوطدر •
 جور واعتسافله معلولدر او نخر دوجهان علیه صلوٰۃ الرحمن افندمز
 حضر تلی أنلرک خصالی تعدیل اخلاق‌لرینی تهذیب بیور مشلربو
 سنبله انلرده امتلرک خیرلیسی جهانک اکرمی اولمشلر وبوخیریت
 دین مبین محمدیه یه تمسک ایدن سائر امتلره ده سرایت ایدرک انلرده
 سایه طوبا وایه احمدیسنده خیار صالحیندن اولمشلردر هب بوتناج
 حسنه رحمت ائیله منهج سعادت اولان شریعت غرای رسالتینا هیلری
 واسطه سیله محض حسن سیرت . صفای اخلاق • کمال سیاست •
 نبوتینا هیلری ایله یدین اسعدین اکر میلرنده حاصل اولمشلدرشک
 یوقدرکه بوبر امر خارق العاده اوله رق عند ذوی الانصاف أعظم
 معجزات سامیادن معدوددر دین مبین محمدی علیه صلوٰۃ الاحدی
 - یه اجنبی اولان بعض کسان بی اذعان شریعت اسلامیهد جهادک
 مشروعیتنی کوردمکارندن کندیلرینه اشتباه عارض اوله رق دین جلیل
 احمدینک انجق سیف وتهدید ایله تمام اولدیغنی ظن ایتشلردر بوايسه
 او عین الشهود علیه صلوٰۃ الرب الودود افندمز حضر تلرینک سیرت
 عایه لرینه وابتدای نشأت مصطفویه لرینه و دین معظم اسلام ایله قیام
 سامیلرینه مطلع اولمیان شخصک فکرنده معلق اولان باطل بر شبهه در

اما اومزایای جمیله یه عرفائی اولان ذوات معانی آیات اوشیمه لرك
 عین و اثرینی بیله کوره مزه توضیح . سیرت سامی محمدی وابتدای
 بعثت احمدیلرنده بقل صحیح ایله ثابت اولمشدرکه اوسالار انبیاءعلیه
 اصفی التحایا افندمز حضرت تلی مکة مکرمه شرفها الله الی به المقیامتده
 دعوای جلیل رسالته قیام بیوردقلرنده وحید . فرید . اولوب
 سلطنت و اعتقاد ایدیه جک عصبیت و عشیرت صاحبی دکل ایدی
 بلکه دعوای صدق انتمای رسالته بین جواهر الامم قیام بیوردقلرنده
 ایلک دفعه ذات نجاتسمات محمدیلرینی تکذیب ایدن کندی قوم و قبائلی
 ایدی نهایت درجه عداوت اشرار لرینی اذا و اضرا را یله تسلیط اید نلرده
 انلر ایدی اول قافله سالار انبیاء علیه افضل التحایا افندمز حضرت تلی
 ایسه طریق هدایت و ارشادی بالالتزام صدق دعوای محمدیلرینه
 براهین اقامه ایدر مواعظ حسنه ایراد ایدر امکان درجه
 سنده تألیف قلوب ایدر مورث خیر اولائی اوامر جلیل شریعت
 محمدیه لر یله امر و نواهی شرعییه ایله مورث ضر اولانی نهی ایدر
 مع هذا مکة مکرمه ده اون سنه یه بالغ اولان بر زمان ظرفنده
 دشمنلرینک بر قطره قانی اراقه ایله امر اتیماش بلکه « لا اکراه
 فی الدین قد تبین الرشد من الغی » « یاایها الذین آمنوا علیکم
 انفسکم لا یضرکم من ضل اذا اهتدیتم » « ومن کفر فعلیه کفره »
 کچی قول کریم سبحانی یی مشتمل اولان قرآن معجز عنو ان الہی یی

آنلره تلاوت بیوررلرایدی مکه مکرمه شرفها الله الی یوم القیامتدن .
 بلده طیبه منوره نورها الله الی قیام الساعه یه هجرت بیوردیلر او .
 بلده دلارای مقدسه ده اقامت بیوردقلری مدتجه شو طریقه حسنه یی .
 التزام ایتدیلر او حال سعد مال وطریق فیض رفیق مذکور ایله .
 برابر اهالی مکه و مدینه و طوائف عربدن جم غفیر ذات بهجت سمات .
 محمدیلرینه تابع اولدیلرنتکم حقیقت حال سیره سامی احمدیلرینی .
 مبین کتب سیردن تظاهر ایدر شرع شریف رسالتاً بیلرینی عقول .
 سلیحه قبول طبائع صحیحه استعسان ایتدی حالبوکه او وقت نه خوف .
 وار ایدی نه تریب وارایدی لکن وقتا که عقول سلیحه وانظار .
 قویمه رسالتاً اعظم علیه صلواة الله الاکرم افندمن حضر تلرینه .
 تبعیت ایتیمان کروه مخالفین ضالالتقرینه برهان تأثیر ایتدیکی وعظ .
 ونصیحت منفعت ویرمدیکی انلری ارشاد ثمره بخش اولمدینی بلکه .
 ضالالتلرندن و دین حق قبول سبیل استقامته سلوک ایتاملر یله نفسلرینه .
 خیانتلری اولدیغندن فضله اوزات والاسمات انخم علیه صلوات الله .
 الاکرم افندمن حضر تلرینه واتباع دولتلرینه اذا وجفا ایتدکن .
 کسمد کلری . فرصت دوشد کجه . نصب . سکاید . وسبیل دین قویمد .
 معاذر اقامت ایتدکلری . بدایع اضرار . اختراع . و معامله اشرار .
 کی معامله ایتدکلری و او خبیثای مخالفینه . رفق و ملاطفته معامله نک .
 دوامی طغیانلرینی تزید و امر دینی اتباع جلیل محمدی اوزرینه تشویش .

ایندکری ظاهر و باهر اولدی

جناب حقده او وقتلرده اشرار مئذ کوری ترغیبه بدل ترهیب
وازی وجفایی دفع و اساس عنادی قطع ایچون دین متین محمدینک
اعداسی واک شدید خصمسی واک بلید مغرورلری ایله جهاد و محاربه
ایتمک فرمان حکم عنوان الیهسنی شرف صدور بیوردیلر: زیر اسلامت
اخیار ایچون افنای اشرار ایله مسامحه اولنور و صاحبی هلاکدن
وقایه عضو مریض قطع اولنور لکن شرع ازهر محمدیده جناب حق
جهادی رفقه مجال باقی قالیر شفقت وعدله منال حاصل اولور درجه
سندده بر حدود اوزرینه تشریع بیور مشلدر حتی جهاد جناب
پیغمبری شریعت موسویه کبی شرائع متقدمه ده مشروع اولان جهاد
ایله مقابله اولنسه شرائع سائره ده اولیان تخفیفات شریعت محمدیه ده
البته بولنه جنی پدیدار و آشکار اولور بوا یسه شؤن شرائع اطلاعدن
معلوم اولور شو تقریر مزدن مستبان اولدیکه دین مبین احمدی صلی
الله علیه وسلم ک سیف ایله انتشار و قیامنی زعم ایدن شخصک شبهه سی
ظاهر البطلان مهیوم الارکاندر قبوله الیق بودرکه بزم و اسلافزک
اساس هدایت و سعادت محض نور شریعت جناب محمدی صلی الله علیه
وسلم و هدایت و ارشاد سامی رسالتینا هیلری ایله در جزاء الله عنا
خیر الجزاء و رفع درجته السامیه فی اعلی علین آمین یامعین یا معاشر
مسلمین ذاب سامی پیغمبری یه دائمی صورته محبت و ذات پاک احمدیسنه

تعظیم وارو احمزی فدایتک بزه لازمدر شریعت غرای محمدیسنه
تعظیم اوامر عالی اکرمیسنه اطاعت نواهی سامی انخمیسنندن اجتناب
او سلطان ملائک سپاه علیه صلوات الاله افندمز حضر تلرینه محبت
صحیحیه دن ایلری کلیرنتکم محب ، محبوبنه مطیع و منقاد اولاندیر ؛
دنیمشدر اما محبت سامی پیغمبرانه لرینی ادعا ایدوب ده شرع انور
محمدیسنه مخالف اولان شخصک حالی ادعاسنی تکذیب و خبیث طویته
علیهنه شهادت ایدر « نعوذ بالله تعالی » اهل بیت کرام نبویه یه
واولاد و احفاد معالی نثراد پیغمبرییه محبت و حمایه شریعت اولان
علمای خفایه تعظیم ؛ اکرام ؛ و احسان ایتک . او پادشاه انبیا خلاصه
اصفیا علیه اکمل التحایا افندمز حضر تلرینه محبتدن منبعشدر ،
یدر والا کهر و ام سامی علوی رهبر رسالتینا هیلری جهتمندن نسب
جلیل محمدیلرینی بیامکده ذات خجسته صفات جناب محمدی یه
کمال محبتدن متحصلدیر حتی بعض علماء نسب شریفقرینک بیانخه سنک
و جوبنه قائل اولمشلردر امامن جهة الاب الامجد الشریف نسل نسایل
علویتینا هیلری بروجہ آتی زیبایش افزای کتاب قیامشدر سیدنا
محمد . صلی الله علیه وسلم . بن عبد الله . بن عبد المطلب . بن هاشم .
ابن عبد مناف . بن قصی . بن حکیم . بن مرة . بن کعب . بن
لوئی . بن غالب . بن فهر . بن مالک . بن نضر . بن کنانہ . بن
خزیمہ . بن مدرکه . بن الیاس . بن مضر . بن نزار . بن معد . بن

عدنان • در حضرت آدم صلی الله افندمزه قدر ما بعدنی بیان حقنده
نقل صحیح وارد اولماشدر اما من جهة الام الاظهر الشریف بودرکه
سیدنا محمد • صلی الله علیه وسلم بن آمنة • بنت وهب • بن عبدمناف •
ابن زهرة • بن حکیم • درکه من جهة الاب نسب شریفلریله جـ
سامیلری جناب حکیم ده اجتماع ایدر اولاد عالی نثراد پیغمبریلرینک
اسامی شریفه سنی بیلیمک او صاحب سریر لولاک علیه صلواة رب
الافلاک افندمز حضرتلرینه کمال محبتدن نشأت ایدر اولاد کرام
احمدیلری قول صحیح اوزرینه یدی عدددر

سیدنا القاسم • سیدتنا زینب • سیدتنا رقیة • سیدتنا فاطمة •
سیدتنا ام کلثوم • سیدنا عبد الله • الملقب بالطیب والطاهر • وسیدنا
ابراهیم • رضی الله عنهم اجمعین حضرت ایدر کافه سی سیدتنا خدیجة
الکبری رضی الله عنها • والده مزدن زینتساز عالم شهود اولمشلردر
یالکز سیدنا جناب ابراهیم رضی الله عنه • جاریه مصر به دن •
پرتوانداز ظهور اولمشدر

ابوین سعادت پیغمبرینک نارجحیدن نجاتلرینی اعتقاد اتمیکده ذات
قدسی سمات محمدیلرینه قارشو ابراز اولنان بر حسن ادبدر : بعثت
جناب احمدی صلی الله علیه وسلمدن اول بو عالم کون وفسادده بولنان
اهل فترتک نجاتلرینه قائل اولان علمای کرامک اقوال شریفه لرینه
اعتماداً : زیرا ابوین أسعدین جناب پیغمبری اهل فترتده داخلدر

یا خود جناب حی لا یموت مشار الیهما حضراتی احیار بیوروب ذات
سامی محمدی به صلی الله علیه وسلم . ایمان ایتدکارینی مبین بعض آثارده
وارد اولان احادیث شریفه به اعتماداً مشار الیهما حضراتنک ناردن
نجاتلرینی اعتقاد ایتنک حسن ادبدندر اِحیاء اُبوین رسالتینا هی ایسه
زیرا تصرف قدرت سامی الیهده داخل امور جائزه دندر « ۵ »

معلوم اوله که نصوص شرعیه دلالت واجماع امت محمدیه انعقاد
ایتمشدر که پیغمبر والا شانز محمد مصطفی علیه اُکمل التحایا افندمن طرف
اُشرف الیهیدن کافئه انسانیا نه بلکه انس و جن جمیع ثقلینه خلاصه
کافئه عالمینه مبعوثدر خاصه عرب قوم نجیبینه مبعوثدکلدر نتم بعض
کفار بویله زعم ایتمشدر در اوبرهان الاصفیاء سند الاتقیاء علیه اُزکی
التحایا افندمن حضر تلمینک خاتم الانبیا والمرسلین اولوب ذات نبوت سمات
احمدیلرند نصکره پیغمبر بعث وارسال اولنیه جکی شرع شریفی آخر
زمانه قدر نسخ اولنیه جکی یعنی بشقه برشریعتله رفع اولنیه جکی آخر

« ۵ » بوبابده واجداد معالی نثراد حضرت رسالتینا هی وعم نبوی
جناب اُبو طالبک وموحدین اهل فترتک نجاتلری حقنده فتوحات
مکیه . تفسیر روح البیان . ومرآت الحرمین . نام کتب معتبرده مفصلاً
قناعتبخش ارباب دقائق مقالات حقیقت آیات واردر ارزو ایدن
مراجعت بیوره

زمانده سيدنا عيسى عليه السلام نزولنده شرع جديد ايله حكم ايتيويوب
 انجق شريعت غراي محمدنيز ايله حكم ايده جكي وحضرت عيسى نك
 جزيه بي قبول بيورما مسيده شريعت مصطفىويه مز جمله سندن اولديني
 اوزرينه اجماع امت محمديه منعقد اولمشدر زيرا شرع اظهر محمدى
 صلى الله عليه وسلمده قبول جزيه نك نهايتى نزول عيسى عليه السلامه
 قدردرينه اجماع منعقد اولمشدر كه نبينا المجتبى حضرت محمد مصطفى
 عليه صلوات الله الاوفى افندمرك شريعت ساميلري سائر شرائع
 متقدمه نك عقائد دن غيرى اكثر احكامنى ناسخدر اما جناب حقه
 ملائكة كرامه . كتب مقدسه يه . رسل نجاهمه . يوم آخرته . ايمان ايتك
 كبي اعتقادات حقه سائر شرايعدهده واردر بر شريعتك ديكر شريعتى
 ناسخ اولمشنك حكمنى بحسب الازمنة مصالحك اختلافنددر مثلام
 سالفه زماننده كي مصلحت شرايعاريله مكلفيتلرينى اقتضا ايتمش الى
 آخر الدهر زماننر ده كي مصلحت ايسه نبى انجمنر شارع مقدسمنر
 عليه صلوات الله افندمنر حضرتلرينك شريعت سامى رسالتپناهيارى
 ايله مكلفيتنر ايجاب ايله شدر نسخ ايله حكم اوزرينه مصلحتك
 ظهورى جناب حقه خفى اولمشى لازم كلير دييان بعض كفار خا كسارك
 شمله سى ساقط اولديني بويان شافى ايله ظاهر اولمشدر زيرا بونك
 ايچون دنيار كه مولاي متعال حضرتلرى ازلدن هر اومتك مصلحت
 وزمانته علمدر هر اومت ايچون قديمآ بر شريعت ترتيب ايتمش وهر

شریعتله بر پیغمبر والا کهر ارسال بیوروب شریعت متأخره نی
 مقدم اولان شریعتک ناسخی قیامشدر جناب حقه شو حالده خفانه دن
 لازمکیر لازمکمز بنابرین منکر مزبورک شبهه سی بدیهی البطلاندر
 سلطان ملائک سپاه علیه صلوات الاله افندمز حضرتلری کافه
 مخلوقاتک افضایدر هیچ بر مخلوق ذات والاسمات پیغمبریلرینه تفضیل
 اولنماشدر نبی مکرم علیه صلوات الله المعظم افندمز دن صکره افضل
 انبیاصره سیله سیدنا ابراهیم . سیدنا موسی . سیدنا عیسی . سیدنا نوح
 علیهم الصلاة والسلامدر مشار الیههم حضراتی سرد فتر انبیا محمد
 مصطفی علیه اصفی التحایا . افندمز حضرتلریله برابر پیغمبران کزین
 میانده اولی العزم اولاندر صکره بقیه رسل نغام حضراتی بعده
 رسالت غیری انبیاء کزین حضراتی افضلدربونلر کده عندالله ارالرنده
 تفاضل وارد . بعده افضل مخلوقات صره سیله سیدنا جبرائیل . سیدنا
 میکائیل . علیهما السلامدر . بعده بقیه رؤسای ملائکه افضلدربوند
 - نصکره عوام بشر افضلدربوام بشردن مقصود انبیاء کزینک غیری
 ابو بکر عمر رضی الله عنهما حضراتی کبی اولیای بشردر بوند نصکره
 عوام ملائکه افضلدربوحدیث نبویه ثابت اولمشدرکه عصر سعادت
 رسالتمآ بیلرنده بولنان اصحاب کرامی أعصار متقدمه ومتأخره بولنان انبیاء
 ورسلدن ماعدا سندن افضلدربو « صحابی » حضرت پیغمبر علیه صلوات
 الاکبر افندمز ایله مؤمن اوله رق اجتماع شرف عالمها سنده نائل اولوب

ینہ مؤمن اولدینی حالده تشریف عالم عقبا ایدن ذات والاسما تدر
 افضل اصحاب جناب پیغمبری ترتیب خلافت اورزه خلفای اربعه در
 — که حضرت ابو بکر • حضرت عمر • حضرت عثمان • حضرت علی •
 رضوان الله عنہم اجمعین افندیلار مزصره سیله افضلدر لر عصر سعادتد نصکره
 افضل عصر اجتماع متعارف ایله صحابه کزین حضراتیله اجتماع
 ایدن تابعین کرام عصری صکره اتباع تابعین عصریدر برمنوال مذکور
 جماع امت محمدیه منعقد اولمشدر منصب جلیل نبوت عبدک مکتسبی
 اولیوب طرف اقدس الہیدن احسان اولنه بر خصیصه اولدیغنه اجماع
 امت واقع اولمشدر • علمای کرام انار الله براہینہم حضراتی •
 نبوتی حکم شرعی تکلیفی ایله جناب حقدن وحمیی استماعه عبدک
 اختصاصیدر • دییه تفسیر بیورمشدر در او وحي او نبی مبعجک
 تبلیغ وعدم تبلیغی مساویدر منصب جلیل رسالتده بویله در فقط تبلیغ
 شرطدر • اما ولایت عند العلماء اظهر اولان ولایتده تفصیل مقال
 واردر ولایتک بعضیسی مکتسبدر اوه مأموراته امثال منہیاتدن
 اجتنابدر بوکا • ولایت عامه • دیرلر بعضیسی غیر مکتسبدر • علم
 لدنی • رؤیت لوحه محفوظ • ودهابونلر کی عطایای ربانیه بوقسمه مندر
 • مبحث معجزاتی بقیه خوارق عاداتی بیان ایله ختم ایدم معلومدر که
 بر امر خارق العاده من عند الله رسالت ویانبوت دعوا ی جایلنده بولنان
 بر ذاتک یدنده ظهور ایدرسه اکا • معجزه • دیرلر اما خلاصه

الوجود علیه صلوة الرب الودود افندمز حضرتلرینه قبل البعثة
 بلوطد کولکه اولسی کبی دعوی نبوت ورسالتدن اول بر پیغمبر
 عالی رهبرک ید سعادتند ظهور ایدرسه^۱ کا • ارهاص • دیرلر
 «تأسیس نبوت ورسالت» دیمک اما بر امر خارق عادة نبوت
 رسالت دعواسند بولنیمان صلاح وعد التی ظاهر برذاتک یدند
 ظهور ایدرسه کا کرامت دیرلر اهل سنت وجماعتدن اولان بزمعاشر
 مسلمین کرامات اولیایه ایمان ایدرز زیرا بوبابده نصوص شرعیه وارد
 وعباد صالحیندن چوقلری ایچون خارق عادة نک واقع اولدیغنه اخبار
 کثیره نقل اولمشدر او صالحای مؤمنینه بین الناس احترام اولنسون
 خود جانب جلیل الوهیتدن مشار الیههم حضراتی مقام ارشاده اقامه
 اولندیغنده ارشاد وموعظه لری قبول اولنسون ویاخود سائر عباد
 الالهک عندالاحتیاج تفریح کروبلری وقضاء منصالحاری حصوله کلسون
 ایچون فیاض اقدس حضرتلری اولیای عبادینه کرامت ایله اکرام
 میورر کرامت طرف اشرف سبحانیدن مشار الیههم حضراته احسان
 اولنه بر فضل الهیدر یوخسه کرامتی احسان جناب حقه واجب
 دکدر • اولیا • ولی نک جمعیدر ولی طاعت الیهیه مواظب معاصیدن
 مجتنب لذات وشهوات مباحه دن معرض اولان ذات والاسمائدر اما
 لذات مباحه نک اساس تناولنه لاسیا طاعة الله اوزرینه تقویت قصدیله
 اولورسه هیچ بر مانع یوقدر •

معاصیدن مجتنبك معناسى برولى معصيتى حسب البشرية ارتكابنده
توبه يه مسارعت ايدرديمكدر يوخسه ذات ولي دن معصيت واقع
اولزديمك دكلدر زيرا ولي كناهدن معصوم دكلدر اكر امر خارق
عادت صلاح و فسقى ميدانده اولميان مستورا حال بر ذاتك يدنده ظهور
ايدرسه اكا . معونت . تسميه اولنور يعنى او قوله جانب اقدس مناندين
براعانه غيبي الهى در اكر خارق عاده فسقى ظاهر آدمك يدندن
ظهور ايدرسه اكا استدراج ديرلر يعنى جناب حق او خارقه يي انك
يدنده اظهاريله اكا استدراج ويرر بونكله فسقى دوام ايدر صكره
العياذ بالله جناب حق غضب الهيسىيله او فاسقى وهلة اهلاك ايتديكمنده
سخط الله دن خلاص اوله مز خوارق عادتك شوبش قسمي يدنده
ظهوره كلان ذاتك مقصدينه مطابق اوله رق حصوله كليز التججى بر
قسم دهها واردركه اوده بر امر خارق عاده انسانك خلاف مطلبي
اوله رق ظهور ايتسيدرنتمك زمان سعد اقتران پيغمبرى صلى الله عليه
وسلمده ادعاى رسالت ايدن مسايمة الكذاب خبيث ضلالت انيسى
براى تشفى بر كيمسه نك كوزينه تو كورديكمنده او آدمك ديكر كوزيده
كور اولدينى موثوقامرويدر خوارق عادتك بوقسمنه خذلان يعنى
او كاذبى جانب الهيدن تكذيب و رسواى ايتمك ديرلر . شو اقسام
من كوره ايله معجزات ساميه بيننده براشتباه يوقدر زيرا معجزه
دعواى نبوة و رسالته مقروندر و مقصده موافق اولمى ده لازمدر

معجزه نك غيريسى بويله دكلدر كذلك بقيه اقسام ايله نبوت ورسالتى
ادعا ايتيان ظاهر الصلاح بر آدمك يدنده ظاهر اولان كرامت بيننده ده
اشتباه يوقدر والله تعالى اعلم

فصل رابع ملائكة كرام من عند الله منزل كتب مفخمه يه

(قضا و قدر سبحانى يه ايمان بيننده در)

معلوم اوله كه شرعاهر مكلف اوزرينه ملائكة كرامه ايمان ايتك
لازمدر شويله كه ملائكة كرام موجود اولوب جناب حقه مؤمن
نزد الوهيتده مكرم امر و فرمان الهى ايله عامل علويت و جلال رب
لم يزلين خائف امور مأموره لرينى فاعل اولدق لرينى جز ما اعتقا
دايتك لازمدر ملائكة كزينك بروجه سابق موجوديتلرنده نصوص
شرعيه وارد اولمشدرا كثر مسلمين عنندنه حقيقت ملائكة جناب حقا
اشكال مختلفه ايله تشكه قدرت احسان بيوردينى اجسام لطيفه در
مسكنلرى سمواندر نصوص شرعيه حضرات ملائكة نك اقسامى اولدينى
افاده ايدور (۱) حمله عرش عظيم (۲) پيرامنى عرشده طوافين (۳)
جبرائيل . ميكائيل . اسرافيل . عزرائيل . كى اكابر ملائكة (۴) ملائكة
جنت (۵) ملائكة نار (۶) بنى آدمه موكل اولان ملائكة (۷) كتبه
اعمال بنى آدم (۸) تدبير احوال عالمه موكل اولان ملائكة (۹) رسل
نظام انبياي عظام حضراته اجراى سفارت ايدن ملائكة كى اقسام
عديده سى واردر

بیکلرجه انسانلرک بامکه کافه آدمیانک عاجز قالدقلى بیوک بیوک
 اعمال شاقه یی اجرایه قادر اولملری والحاصل قرآن کریم وأحادیث
 شریفه ده حق عالیرنده وارد اولان سائر احوال فوق الطبیعه ایله
 حضرات ملائکه نکه متصف اولدقلرینه نصوص شرعیه دلالت ایدیور
 شفاء شریف نام کتاب منیفدن اُکلاشایدغنه کوره انبیاء بشر علیهم
 السلامک معصوم اولملری کبی مشار الیههم حضراتنه وحی ایله مرسل
 اولان ملائکه کرامک معصومیتلرینه ائمه مسامین حضراتی اتفاق
 ایتشلردر لیکن غیر مرسل ملائکه کرامک عصمتنده علمای اعلام
 اختلاف ایتشلردر اعلام مفسرینک سرفرازی امام نحر الدین رازی
 حضرتلری علمای دین مینندن جمهور اعظم ملائکه کزینک
 معصومیتلرینه قائلدرلر دییه خامه رام بیان اولمشلردر عصمت ملائکه ده
 مخالفت ایدنلر امور عیدیه ایله تمسک ایلمیشلردر برنجیسی ابلیس
 علیه مایستحق زمره مقدسه ملائکه دن ایدی بالآخره جناب حقه
 عصیان ایدوب کافر اولدی • بز دیرز که ابلیس طائفه جندندر
 ملائکه دن دکلدر تنکم امام نحر رازی وسائر علمای اعلام تحقیق
 ایتشلردر ایکنجیسی هاروت • ماروت • قصه سیدر بونلر حقنده
 شرفورود آیت جلیله بوجه آتی ثبت صحیفه قیامتشدراستعین بالله
 (واتبعوا ماتلوا الشیاطین علی ملک سلیمان وما کفر سلیمان ولیکن
 الشیاطین کفروا یعامون الناس السحر وما انزل علی الماکین یابل

هاروت وماروت وما يعلمان من أحد حتى يقولوا انما نحن فتنة فلا
تكفر فيتعلمون منهما ما يفرقون به بين المرء وزوجه ، صدق الله

العظيم

ما لا ترجمه آیت جلیله حضرت سلیمان علیه سلام الرحمن ک
پادشاهلنی وقتنده او طائفه یهود ضالالت مردود شیاطین ضالالت
آینک تلاوت ایتدکاری شیئه تابع اولدیلر حضرت سلیمان حاشا سحر
ایدوب کافر اولمدی لکن شیاطین ضالا لتقرین کافر اولدیلرکه ناسه
سحر تعلیم ایتدیلر شمدیکی موصل شهر شهرنک جوارنده عجائب
سبعه عالمدن معدود اولان قله سیله شهر تکیر آفاق اولان والان آثار
عمراندن هیچ برشی کنه دیسنده موجود اولمیان بابل شهرنده واقع
هاروت وماروت • اسمنده ایکی مالککه نازل اولانده کفره یهود
تابع اولدیلر اوایکی ملک برکیمسه یه سحر تعلیم ایتزلر ایدی مکرکه
قبل التعلیم بز خلقه جانب جلیل حقندن تجربه وابتلا یزن سحری
عمل اولوب کافر اولسه دیرلر ایدی انسانلر زوجین بینتی تفریق
ایدن سحری اوملکاردن تعلم ایدرلر ایدی مرویدرکه زمان جناب
سلیمان علیه صلوات الرحمن ده شیاطین بد آیین بر مکر وحیله اولان
شعبنده خبیثه لرینی کاهنلره بالتعلیم بو علم سلیمان علیه السلام مکدر
انککه انسی • جنی • ریخی • تسخیر ایدیور دییه بین اراذل الناس شایع
وجناب سلیمان علیه السلام حاله مطلع اولمغله أوراق کاهنیتی جلب

- ايله كرسى سامى سليمانينك زيرينه دفن ايلدى حضرت سايمان عليه
 سلام الدين بالاپرواز عالم لاهوت اولدقده مرده شياطين دوزخ قرين
 كتب مزبوره يي چيقاروب اياي بنى اسرائيله كچمكله طائفه خبيثه
 يهود حضرت سليمان عليه السلامه حاشا وكلا ساحر ايمش ديه طعنه زن
 افترا اولدقلرندن خلاصه الاكوان حضرت نبى آخر الزمان
 عليه صلوٰة الله الرحمن افندمرك بعثت سنيه محمديه لرى اوان سعد
 اقتراننده سليمان عليه السلامى افتراي مذكور دن تنزيه وتبرئه ايچون
 جناب حق جل وعلا بو آيت جليله يي انزال بيور مشلردر انتهى
 امام نحر الدين رازى عليه فيض السرمدى حضرت تليريك تفسير كبير
 تحريرانه سندن ملخص اولان بودركه سحره زمان مذكوره پك
 چوق ايدى سحر دن ابواب غريبه استنباط ايدرلر نبوت ادعا ايده
 مرك او اعمال سحرية يي كويا معجزات اتخاذا ايدرلر ايدى واجب تعالى
 حضرت تلى انواع سحرى ناسه تعليم ايچون او ايكي ملكى بعث وارسل
 بيورديلر تا كه كذبا ادعاى نبوة ايدن سحره مذكوره يه معارضه
 ايمكه او انسا نلر قدر تيباب اولسونلر شك يوقكه شونكتمه احسن
 مقاصدندرد مذكور ملكلر بذل نصيحت ايتدركه كيسه يه سحر
 سليم ايتزلر وديرلر ايديكه بز فتنه يز يعنى مطيعه وعاصى يي تميز ايده
 - جك بر محنتز اى آدميزاده بوسكا توصيف و تعليم ايده جكمز سحر دن
 مقصد هر نقدر بين السحر والمعجزه فرق حصوله كلك ايسه ده لكن

بونکله مفاسد و معاصی به وصلته قدرت بولورسک بوفنه و قوفکدن
 صکره صاقین بونی منهی عنه امورده و یا اغراض عاجله دن برشیه
 نوصلده استعمال ایتمه بویله جه اوایکی ملک تلقین ایدرلر صکره اقوام
 مذکوره انلردن سحری تعلم ایتدکارنده امور شریه ده و بین الزوجین
 ایقاع تفرقه ده استعمال ایدرلر ایدی بوند نصکره جناب رازی علیه
 فیض السرمدی بیوریورلرکه محققین عامای اعلام حضراتی فن سحری
 بیلک قبیح و محظور اولیوب چیرکن و ممنوع اولان انکله عمل
 ایتک اولدیغنه اتفاق ایتدیلر شو حالده بروجیه مذکور تقریر ایتده
 اشکال یوقدر اوایکی ملک معصیتی ارتکاب ایتدکارینه ده بو آیت
 جلیله دلالت اتمیز بلکه تعلیمده فرمان الهی به امثال ایتش اولیورلر
 منهی عنه اولان سحری جناب حق اوایکی ملک نصل ازال ایتدی
 دییه ده اشکال وارد اولمز زیرا حرام اولان سحرایله عمل ایتدیلر
 یوخسه مقصد حسن ایچون تعلیمی حرام دکلدر اما مذکور ملکلرک
 بشره بالتمثل و کندیلرنده شهوت ترکیب اولنه رق ، زهره ، دینلان
 بر خاتونه تعرض ایدوب مزبوره انلره شرک و معاصی فی ارتکاب
 ایتدیره رک انلردن او کرندیکی سحرایله سمایه چیقه مسی روایتک صحت
 نقلنده علما اختلاف ایتشلر درنخر رازی علیه تجلیات السرمدی مفاتیح
 الغیب عنوان جلیانی حائز اولان تفسیر کبیرنده بیوریورلرکه . شو
 روایت فاسد در مردود در غیر مقبولدر زیرا کتاب معالی نصاب

الهیمة بوکا دلالت ایدن برشی یوقدر بلکه روایت مذکوره فی وجوه
 عدیده ایله ابطال ایتیمکه دال اسرار و اشارات صحیحه واردر دییه
 اسرار و اشاراتی سر دو اتیانہ خامہ ران اولمشدر قاضی بیضاوی بیض
 الله وجهه العالی حضر تلیده روایت مذکوره نک قوم شریر یہوددن
 محکی اولدیغنی تصریح بیور مشلدر علامہ فحولین روم حضرت مولانا
 أبو السعود علیه تجلیات الودود حضر تلیده روایت مذکوره ادله
 عقلی و نقلی یہ مخالفتمله برابر استنادی روایت یہودہ و آبستہ اولمسلیہ
 معتمد دکلدر دین تحقیق مقام ایتمشدر قاضی عیاض علیہ رحمة الفیاض
 حضر تلی شفاء شریفده بیور مشلدر که هاروت ؛ ماروت ، قصه
 سندہ ذکر اولنان اخباردن صحیح سقیم بر هیچ حدیث شریف رسالتیناہ
 افندمن حضر تلرندن روایت اولنما مشدر بوقیاسا اخذ اولنه جق
 بر شیده دکلدر انتہی : بو تفصیلات بیلد کدن صکرہ بزم ایچون او
 ائمہ اعلام حضراتنک قوللرینی تلقی بالقبول ایدرک شو روایتک عدم
 محتمده ترجیح ایتدکلرینه اعتماد ایتک جائز در بوقصہ یہ اعتقاد ایتک
 واجب دکلدر بعض فحولین علما نک از جمله امام سیوطی روح الله
 روحه العالی کی فضلائک قائل اولدقلری کی روایت مذکوره نک
 حتی فرض اولنسه احتمالک کہ بوقصہ ضروب امثال ورموز نوعندن
 در بو احتمالی حضرت قاضی و جناب أبو السعود روح الله ورحمہما
 ذکر ایتمشلر و بیضاوی حاشیہ سندہ شیخزاده و سیالکوتی قدسنا الله

بسرهم اجمعین حضراتی کیفیت تشبیلی بیان ایامش در روای خود بوقصه دن
 نهایت طائفه یهودك مقالی واقاصی صلی جمله سندن زعم ایتدکرینی
 حکایه در ایدی حد ذاتنده بطلان قصه بزه حاکی اولان روایتك
 صحتنه منافی اولمز ایشه بو تفصیل ایله جناب سیالکوتی قاضینك قولی
 طائفه یهوددن محکی اولسنه حل ایتشددر هانکیسی اولورسه اولسون
 خلاصه شو قصه مذکورہ عصمت جمیع ملائکه یه معارض اوله من
 « واللہ تعالی اعلم »

نصوص شرعیہ وارد وایمان ایدلمسی واجب اولان امور دندرکه
 جمیع عباداللہ اوزرینه ملائکه کرامدن حفظه وکتابین وارد
 حسنات و سیئات کافه اعمال عبادی یازارلر بو کتابت ملائکه یی
 انکارایدن قرآن کریمی تکذیب ایتدیکی ایچون کافر قال الله تعالی
 ﴿ کراماً کاتبین یعلمون ما تفعلون ﴾ اعمال عبادی کتابت ، علم الله
 هر شیء محبط اولدیفیچون اقتضاییدن بر حاجتدن ایچون دکلدر کتابت
 اعمالک فائده سی بودرکه عبد سیئاتی بلیرسه استحیا ایدر معاصی یی
 ترک ایلر مستحیل اولما مغله برابر نصوص مذکورہ ظواهرینه حمل
 اولنه رق کتابت اعمال حقیقت آلت ، وقرطاس ؛ و مداد ؛ ایلدر
 کیفیتی ایسه علم اقدس سبحانی یه مفوضدر « واللہ اعلم »

وینه نصوص شرعیہ دندر ارواحی قبض ایدن یعنی مقرندن
 اخراج ایدن ملک مکرمک وجودینه ایمان واجبدر او ملکک اسم

شریفی عزرائیل اولوب وفات ایدنلر عددنجه اعوانی بواندینی مؤمنلره
 صورة مستحسنه ده کلوب رفق ایله سائر لرینه عکس ایله معامله
 ایتدیکی حدیث شریفلر ده شرفورود انشاء الله شان معالی نشان
 ملائکه ده وارد شبهه نك رفعی باب ثالته ذکر و بیان ایلر

شرعا هر مکلفه رسل نхам حضراتنه عند جلیل ربانیدن شرفوزول
 ایدن کتب مقدسه یه ایمان واجبدر ایمدی بز معاشر مؤمنین جناب
 حقک کتب جلیل صمدانین پیغمبران نхам علیهم صلوات الله اجمعین
 حضراتنه انزال ایله اوامر و نواهی یزدانین وعد و وعید ربانین
 کتب شریفه مقدسه ده بیان ایتدیکنه و کتب منزله شریفه نك
 افضلی قرآن حکم بیان سبحانی صکره صره سیله توراۃ شریف •
 انجیل شریف • زبور شریف • ایدیکنه و جمله سیده کلام الله
 اولدیفنه ایمان ایلر کلام الله ایکی معنایه اطلاق اولنور معنای اول
 کلام الہی ذات اقدس فرد قیوم ایله قائم حرف و صوت ایله دیدار
 ظهور اولیان بر صفت قدیمدر: تفصیلا بیانی صفات الله بحث جلیلنده
 کذران ایتشددر معنای ثانی رسل نхам حضراتنه منزل اولان کلام
 لفظیدر بوکلام لفظینک کلام الله اولدیفنک معنای مجرد اوله رق
 اصل ترکیب شریفنده کیمسه نك کسی اولماقددر بوکلام لفظی صفت
 کلام قدیمک دلالت ایتدیکنک بعضیسنه دلالت ایدر زیرا صفت
 جلیل کلام قدیم • واجبات • جائزات • مستحیلاتک کافه سنه دلالت

ایدر پیغمبران کزینہ انزال اولنان الفاظ ایسہ اوصفت قدیمہ نک
 دلالت ایتدیکمک بعضیسنہ دلالت ایدر بزدن حجاب بشریت منکشف
 اولسہ دہ مثلاً اقامہ صلاتک طلبی صفت قدیمہ دن فہم ایتسہک
 قرآن کریمہ « اُقیموا الصلاة » قول کریم سبحانیسندن بوسر جلیل
 غہم اولنور ایدی سیدتنا حضرت عائشہ صدیقہ رضی اللہ عنہا وعن
 أبویہا والدہ ماجدہ مزک « مصحف شریفک دفتینی اراسندہ بولنان
 کلام اللہ در » قول شریف سامیلری معنای ثانی یہ محمولدر برکیمسہ
 مصحف شریفک دفتینی اراسندہ بولنانک کلام اللہ اولدینغی انکار
 ایدرسہ محقق کافر اولورا کر بو سوزی ایلہ مرادی ذات اقدس الہی
 ایلہ قائم قدیم اولان بر صفت دکلدردیمک ایسہ کافر اولمز قرائت
 ایتدیکمز لفظ شریفک حادث ومخلوق اولمسیلہ برابر کلام اللہ ویاخود
 قرآن • حادثدر ویا مخلوقدر دیمک جائز دکلدردیمکہ مقام تعالیدہ
 اولہ زیرا معنای اول ایلہ صفت قدیم اوزرینہ اطلاقندن شو صفت
 جلیلک حادث ویا مخلوق اولمسی توہم اولنور ایشستہ بونک ایچوندرکہ
 ائمہ مجتہدیندن امام احمد بن حنبل « قدس اللہ سرہ » مخلوقیت قرآن
 کریمہ قائل اولدینغندن جبابرہ طرفندن ضرب شدید ایلہ ضرب
 اولنوب حبس اولنمشدر بعدذا معلوم اولہ کہ جمیع کتب منزله نک
 تلاوت وبعض احکامی • قرآن کریم ربانی • ایلہ نسخ اولنمشدر واللہ
 تعالیٰ أعلم • نصوص شرعیہ نک وارد اولدینغی کی قضا وقدر الہی بہ

ایمان هر مکلف اوزرینه شرعا واجبدر • قضا وقدر الہی بہ ایمان
 - ایلہ امر الدیغمز کی مباحثنه طالمقدندہ نہی اولنمشدر لکن قضا
 وقدرہ ایمان تفسیر لرینی بیامکہ وابستہ د. بوبایدہ علمای محققین
 ماترید یہ روح الله ارواحهم حضراتندن منقول اولان بودرکہ • قدر •
 ازلا هر بر مخلوق اوزرنده • حسن • قبح • منفعت • مضرت • وبونلر
 مثللی شیلردن بولنان حدو تعریف ایلہ جناب حقمک تحدید الہیسیدر
 یعنی ازلا صفات مخلوقاتی جناب حقمک بیامہ سیدرشو حالده قدر صفت
 جلیل علمہ راجعدر قضا اشیای علم اقدس الہیسنہ موافق اولہ رق
 ازلدہ جناب حقمک ایجاد و تقدیر ایتسیدر اکلا شلدیکہ قدر وقضا علم
 ازلی الہی نک وقدرة علیه ربانیک اشیایہ تعلق ایتسنہ راجعدر تفصیلی
 مبحث صفات الہدہ مرور ایتمشدر

وقتا کہ فن جلیل توحیدده خطر جهل عظیم اولدیسہ • قضا
 وقدرہ ایمانک وجوبی علمای اعلام حضراتی تصریح ایتمشلردر
 خصوصیلہ قضا وقدرہ ایمان ایدلسی احادیث صحیحہ پیغمبری صلی
 الله علیه وسلمده تصریح اولنمشدر هر نقدر قدرہ ایمان واجب
 ایسہ ده بر شیتک وقوعنه توصلاح قبل الوقوع قدر ایلہ احتیاج جائز
 اولمز مثلا بر شخص جناب الله ذو الجلال بنم اوزریمہ زنا بی تقدیر
 ایتمشدر دیر ایسہ اوآدمک غرضی زناده وقوعنه توصلده بونده ایسہ
 شرع شریف مطهرک اوآدم علیهنہ حجت بالغہ سی واردر زیر اجانب

شرع منیفدن اكا . دنیلر كه ای آدم سن جناب حقك ازلدن اوزنایی
 اوزریكن تقدیر ایتدیكنی نه بیلدككه حتی اوزنایه اقدام ایدرسك سنك
 كناهه اقدامك صرف هوای نفسكندندر وكنندی اختیار كله در
 ایشه بونكله سن مؤاخذه اولنورسك حدود شرعیه و أمثالندن
 خلاص اولق ایون بعد الوقوع قدرایله احتجاج ده جائز دكلدر
 مثلا برسی زنایی ارتكاب ایدرك جناب حق بونی تقدیر ایتشد
 دیسه اونك غرضی حد شرعیدن خلاص اولمقدر شرع الله الازهر
 مذکور مرتكب علیه نه ده صاحب حجتدر زیرا او مرتكب به دنیلر كه
 سن أي مرتكب ذنب و عصیانه اقدام ایتدك حالبو كه ازلا بوذنی
 اوزریكه جناب حقك تقدیر ایتدیكنی بیامیور ایدك سنك انی
 ارتكابك محض هوای نفسكه متابعتدن و نعوذ بالله جناب حقه قارشى
 جراً تكندندر ایشه بونكله سن مؤاخذه اولنورسك و اوزریكه
 حد شرعیده واجب اولور «والله تعالى أعلم»

(فصل خامس)

يوم آخرته . و مشتقلا تنه . بعث بعد الموت . احوال موت . و قبر
 كی بعثدن اول اولان موره و توابغه ، ایمان ایتك . و شوم مقامده
 وارد شبهه لك ردی بیاننده در . يوم آخره ایمان : شرعاً هر مكلفه
 واجب امور دندر يوم آخر يوم قیامته در ابتداى وقت حشر . انتهای
 اهل جنت جنته . اهل جهنم جهنمه . دخولري زمانیدر : نصوص

شرعیه ایلہ ثابت علامات متقدمہ یہ : قبض روح : واحوال و امثالہ ایمان واجب اولدیغی کی یوم آخرہ و مشتدلاتہ ایمان و اجیدر بونلر حقنہ نصوص شرعیہ صحیحہ و اردر « تفصیلاتی » آیات جلیلہ فرقانیه و احادیث صحیحہ نبویه شرف و اهل سنت و الجماعت متفقد لر که هر انسانک روحی وارد در عاده الله شویله جاری اولمشدر که روح جسده اولدیغی مدتیچه انسان حی اولور و روح جسدن مفارقت ایتدیکنده انسانه موت حلول ایدر هر انسانک عمری تخصیص جلیل الہی ایلہ مقدر در زیاده و نقصان اولمز حتی مقتول اجله میتدر اجل انسانی منقضی اولدیغنده روحنی قبض ارواحه موکل اکابر ملائکہ دن بر ملک قبض ایدر که اسم شریفنه . عزرائیل ، علیه السلام دیر لر بو ملک کریم روحی قبض یهنی مقرندن اخراج ایدر انسان قبره وضع اولندقدن صکره جناب حق روحی او انسانه • بالاعاده ، فهم خطاب : رد جواب ، حاصل اوله جق مقداری حواس و عقل انسانی کنديسنه رد ایدر او حالده ایکی ملک بالورود اکامه عقدندن سؤال ایدر لر بو سؤالده حکمت الہی ملائکہ کرام یاننده مؤمن مطیع و غیر یلری ظهور ایلہ قبرنده انسانک یاتنعمی و یاتہذیبی ترتب ایتیکدر کتب شریفه احادیثه مبسوط اولدیغنه نظرا انبیای نغام • و غیر یلری کی مستثنی اولان ذوات خجسته صفات حضراتی سؤال قبردن مستثنی در لر « میت » مؤمن مطیع اولور سه قبرنده ، منع : مؤمن عاصی اولور سه . معذب :

اولور لکن مشیة الله تعالیه مؤمن عاصینک عذابى منقطع اولور
اکر العیاذ بالله کفر حالنده میت آخرته کتدیسه یوم قیامتہ قدر عذابى
بردوام و هیچ بر وقتده عذاب ناردن خلاص اوله میه جقدر
احوال قبردن ضغطة قبر وارد ریعنی اطراف قبر میت اوزرینه
التقا ایدر بوندن مستثنی اولنلردن ما عدا هیچ بر کیمسه نجات بوله
من زمانک انقطاعیله یوم قیامت قریب اولدیفنده برطاقم علامات ظاهره
اولور که شو زمانلرده ظهور یافته اولان علامات صفرا انلردندر
علامات کبری اوندردر «برنجیسی» آل بیت نبوی صلی الله علیه
وسلمدن نام عالیلری واسم والد ماجدلری نام معالی اتسام ابوین
مکرمینی جناب پیغمبری موافق و مطابق اولان حضرت «مهدی»
رضی الله عنک ظهوری «۲» نجیسی دجال علیه مایستحقق خروجی
«۳» نجیسی سیدنا عیسی علیه السلامک جانب سمان نزولی «۴»
نجیسی «یا جوج مأجوجک ظهوری» «۵» نجیسی انسانیه تکلم ایدن
دابة الارضک خروجی «۶» نجیسی شمسک مغربدن طلوعی «۷»
نجیسی دخانک ظهوریکه یر یوزنده قرق کون بالاستیلا کفاره اصابت
ایدرسه سرخوش ایدر مؤمنینه اصابت ایدر سه ز کام مرضنه طوتلش
کبی اولور «۸» نجیسی حضرت عیسی علیه السلامک دار بقایه
انتقالدن صکره حبش طائفه سنک یدنده کعبه معظمه نک خراب
اولسی «۹» نجیسی قرآن کریم الهی نک مصاحف و صدوردن

رفعی « ۱۰ » نجیسی اہالی روی زمینک کافہ کفرہ رجو علری
 علامات کبری در بوند نصکرہ نفخ صور واقع اولہ جقدہ کہ نفخہ
 اولی ایلہ سموات وزمین اہالیسی جملہ مرارۂ موتی طادہ جقلردر
 « صور » غایت بیوک بوینوز کی برشیدر کبرای ملائکہ دن
 جناب اسرافیل علیہ السلام انک نفخنہ مأموردرد بوندن اوزون
 برمدت کذرانندن صکرہ بالجملہ خلائق کائنات موتی ایکن مرۂ آخری
 برصودہا نفخ اولنور حی لا یوت حضرتلری أمواتی قبرلرندن بعث
 بیوروب فصل قضاء ؛ اجرای حساب ؛ ایچون مخصص أولان موقفہ
 جملہ سنی جمع وحشر بیورر موقف محشرده طول وقوف ورؤس
 خلائقہ شمس بر میل مقداری یا قلاشوب جیفہ دن اتن درلرہ بالجملہ
 اہالی موقف مستغرق اولہ جنی ودرلرہ مستقر قیملری عمللری مقدارنجہ
 اولہ رق حق بعضیلرینک دَر بوغازلرینہ قدر چیقا جنی وملائکہ
 کزینک اعمال انسانیدن تفریطا سوءال ایتلری واعضا وجلود
 انسانینک وارض وحفظہ کرامک انسانلر علیہنہ شہادت ایتلری
 کی اہوالات موقفیہ وارددر انبیای کزین علیہم صلوٰۃ اللہ أجمعین
 حضراتنہ اولیای عظام قدس اللہ أسرارہم وسائر صلحای کرام حضراتنہ
 بواہوالات شدیدہ دن هیچ برشی اصابت ایتز

اشتداد اہوال موقف دن صکرہ سیدنا سلطان سریر لولاک علیہ
 صلوٰۃ رب الافلاک ائمہ من حضرتلری شفاعت عظمای محمدیہ لری

ایله شفاعت بیوره جقدر در شفاعت سنیّه مذ کوره اهالی موقوفک
 احوال اشتداد ایله وقوفلری اوزادیغنده بین جمیع الاخلاق فصل
 قضا حقننده بر شفاعت السامی جناب رسالتنا هیدر اهالی محشر جمیعا
 جانب جلیل پیغمبریدن استشفاع ایده جککرات بهجت سمات پیغمبری
 صلی الله علیه وسلم نزد عالی الوهیتده شفاعت ایده جککدر بوندن ما
 عداده شفاعت کثیره محمدیه لری شر فواقع اوله جقدر بر قومی
 بلا حساب جنتمه ادخالنده . ناره دخوله مستحق بر قومک عدم
 ادخالنده . عصات موحدینی ناردن اخراجنده . ترفیع درجات اهل
 جنت ودها بونلر مثالی شیلرده شفاعت سنیّه محمدیه لری شر فسوحوه
 اوله جقدر که احادیث شریفه ده منوال مذ کور اوزره شر قسطیر
 و بیان اولمشدر ذات سامی جناب محمدی دن بشقه انبیای عظام
 رسل نعام . ملائکه کرام . صحابه کزین . شهدای محترمین .
 علمای عاملین . اولیای صالحین . حضراتیده شفاعت ایده جککدر
 دار دنیا ایشلدکلری اعمالی ملائکه کزینک یازدکلری دفاتر
 و صحائف کافه عباد الله اُخذ و تلقی ایدرلر « میزان » ایله اعمال عباد
 وزن اولنور جمهور مفسرین کرام حضراتی روح الله ارواحهم
 حسنات کتاب ایله . سیات شیء آخر ایله تمیز اولندیغنه بناء میزانده
 وزن اولنه جق اعمال عبادی مشغل اولان کتبدر دیورلر بزه
 واجب اولان وزن . و میزانه ایمان . حقیقتی علام الغیوب حضر تدرینه

تفویض اتیکدر خلائق باجمعهم محاسبه اولنه چقدر یعنی جناب حق
ایادی خلائق من صحایف و دفاتر اعمالرینی بعد الاخذخیر، شر، قول، فعل
بالجمله اعماللری اوزرینه خلائقی توقیف ایده رک بروجه تفصیل
مؤمنین و کافرینی محاسبه به چکه جکدر لکن احادیث صحیحہ رسالتپناهی
ایله استثنا ایدی لان ذوات معالی آیات محاسبه کورمیه جکدر در
بونند نصکره خلائق صراط اوزرندن مرور ایده جکدر در «صراط»
متن جهنم اوزرینه محدود بر جسر در اولین و آخرین اوزرندن
کجه چکدر در «صراط» جنت اعلایه ناسک طریقیدر مؤمنین
طایعین و عفو و غفرانه نائل اولانلر صراط اوزرندن بلرور جنات
عالیاته واصل اوله جکدر در کفار خاکسار و برمدت جهنمه عذاب
ایله محکوم اولان بعض عصات مؤمنین نعوذ بالله صراطدن مرور
حائده ایکن نار جحیمه سقوط ایده جکدر در اهل نجات سعادت
آیاتک مرور لری سرعت و بطائتده بحسب المقامات مختلفدر «صراط»
اوزرنده مرور دن حکمت «ناردن ظهور نجات و مرورده اشتراکدن
— صکره فوز مؤمنینه «کفارک تحسریدر»

یوم قیامتک مشتمل اولدینی امور دندر که خلاصه الا کو ان علیه
صلواة الرحمن افند من حضر تلرینک بر حوض کبیر رسالتپناهی لری
وارددر مؤمنین عند العطش الا کبر حوض مذکور سامیلرندن
نوش ایدوب دفع عطش ایده جکدر در بعد ذا واجب تعالی و تقدس

ایکی دار عظیم خلق بیور مشلدر بریسی دار نعیم و خلد بریندر «
 جنت اعلا ایشه بودر او بهشت حور مسکنده جناب حق عباد
 مؤمنینی ایچون ابصارک رؤیت آذانک استماع قلوب بشرک تخطر
 ایتدیکی نعم عظمای مالا نهایه تهیه واعداد بیور مشلدر

ایکنجیسی دار عذاب ویل مآ پدر جهنم ایشه بودر بودار پر شرارده
 جناب حق کفار خاکسار و عصات طغات ایچون • همان ربمزه تعالی
 و تقدس بزلی محافظه بیورسون • قلوبی مضطرب • جلودی مقشعر
 قیلان عذاب عظیم نامتها اعداد و تهیه ایتشلرد.

ایشته بوا یکی دار عظیم و مقام جسم آل آن مخلوق و موجوددر «آیات
 حقیقت بینات سبحانی و احادیث صحیحہ جناب رسالتنا هی موجود
 یتلرینه دلیل قاطعدر» حساب خلایق بالا نقضاء صراطدن مرور لرندن
 صکره جنات عالیاته کافه امم مختلفه نک مطیع و منقاد اولان مؤمنین
 صالحینی؛ و سیاتلری مغفور و یامظهر شفاعت اولان عصاة مؤمنین داخل
 اوله جقلر دوزخ بر بر زخه ده کفار خاکسار و بر مدت عذاب ایله محکوم
 عصاة مؤمنین داخل اوله جقلر در کفار پر شرار اودار عذاب آثاردن
 قطعیا حقیقه میه جقلر اما عصاة مؤمنین مدة تعذیب لری بعد الا نقضاء
 یا خود شفاعته بعد النیل جهنمدن خروج جنته دخول ایده جکلر در
 بوند نصکره اهل بهشت فرشته سرشت او خلد برنیده و اهل نار دوزخ
 قرار کفار خاکسار پر شرار ابد الابدین دهر الداهرین اودار عذاب

ویل نصابده مخلد مؤبد قاله جقدر در بوا مور مینه آیات کریم فرقان
 وأحادیث صحیحه پیغمبر والا شان ایله نابتدر اهل سنت والجماعت
 منده بیده بودر هر مکانه بویه جه ایمان ایتک واجبدر والله تعالی
 أعلم « شو مقام معالی اتسامده » کدران ایدن امور اوزرینه وارد
 بعض شبهه لرك توضیحا اندفاعی شو مقامده مند کور بعض امور
 اوزرینه بعض شبهه لروارد اولور لکن وجود اقدس سبحانی وعظمت
 قدرة ربانی بی ، وسعه علم الہی بی وجناب حقك شوا کوانی عدمدن
 ایجاد ودقایق حکم مالانهایه بی مشتمل صور اوزرینه تصویر بیوردیغی
 معتقد اولان انسان والا عنوانه امور سالفه مند کوره یه ایمان وقاطع
 برهان واضح تبیان ایله عقیده صافیه سمندن او شبهه مردوده بی
 رد ایتک هیچ برکوج ایش دکلدرد اما اوله قادر مطلق حضر تیرینه
 ایمان ایتیمان کسان بی ادعانان حقلرنده صواب اولان کنیدیلرینه وجود
 الله دال أدله اقامه وسردواتیان اولنملی بعده بوکی شبهه لر حل وکشف
 اولنمیدر « توضیح رد شبهه »

انصوص شرعیه ده نابتدرکه انسانک جسدینه متعلق وحیاته
 سبب بر روحی واردر روحه قبض ملک ایله جسددن مفارقتده انسانه
 موت حلول ایدر بعض علمای اسلامیه من حقیقت روحندن بحثه
 طامشدر ایه ده برهان قاطع شرعی عقلی ایله بیان حقیقت اولنه
 بامشدر طریق اسامه سالک اولان علمای اعلام حضر اتی روحك حقیقتی

مبین طرف ذیشرف جناب پیغمبریدن بر دلیل قاطع وارد اولیوب
 بلکه حقیقتندن بجای ترك اولی اولدیغنه اشارت شرفواقع اولدیغندن
 بوباید سکوتی اختیار اتمشدر در عالمای مخام مذکور طریقۀ انیقہ
 — لرنہ سلوکا موجودیت روحده وارد نصوص شرعیہ یی تصدیقده
 هرا انسانك بر روحی بولنوب شیء موجود اولدیغنی مکلفینك اعتقاد
 ایتسی کافیدر «الله اعلم بحقیقته» «وجود روحه حکم عقله مخالف دکلد»
 «روح» ی عدم احساس بعض جهله ناسك عند الموت فم میتدن
 برشی حقیقتدیغنی کور میورز دیدکاری کبی عدم روحی اقتضا ایتز
 زیرا چوق کره عدم احساس هوا یا خود طبیعیون متأخرونك
 موجودیتلرنہ قائل اولدقلری اثر کبی لطافتندن یا خود میاهده
 موجودك کوچک حیوانات کبی رقیق اولمسندندر زیرا حیوانات
 صغیره نك چوغی مرئی یی بیوک کوسترن آلات مکبره ایله بیله کورنیز
 روحك او لطافت و او صغر حالدہ بولنوب منشأ حیات اولمه سنده
 غرابت یوقدر چوق برادویه و نباتات لطیفه و یا اشیای صغیره واردر که
 عقل ایرمیه جك حوادث عظیمه منشائیدر شراره صغیره یه باقکه
 قابل التهاب چوق بر اجسامه اصابت ایتدیکنده حرق و محوایدربراز
 سم جسده دخوانده العیاذ بالله انسانی عدم آباد محوه اغرام ایدر
 بونلر کبی لطیف یا صغیر اشیای کثیره دن حوادث عظیمه ظهور
 ایدر سه روحك جسد انسانیده سبب حیات اولمه سنده هر تقدیر

لطیف پاك كوچك برشى ايسه ده غرايت يوقدر لاسيما حيات
 بشريه بطبعه روحدن ناشى دكلدر بلـكه خلق الهى ايله در روح
 ايسه بر سبب عاديدر بنا برين بونده اصلا اشكال يوقدر بعد ذا روح
 نقدر لطيف نقدر صغير اولورسه اولسون واجب الوجود مفوض الخير
 والوجود حضرت تلرينك بر ملك كريمه قدرة اعطاسيله روحى قبض و اخراج
 ايتدر مسنه هيچ بر مانع يوقدر مقناطيسى كورميور ميسك او خالق
 متعال حضرت تلى جذب حديد خاصه سنى انده نصل تخليق بيور مشل در در
 مقناطيس كوز ايله وجسم كوستران آلات ايله كورنميان چوق اينجه
 ولطيف موادى ذراتى جذب ايدر خلاصه بونلر تحت تصرف قدرة
 الهيمه داخل اولوب اشتباهى موجب شيلر دكلدر حى لا يموت خالق
 ملكوت جل وعلا حضرت تلرينك امواتى يوم قيامه ده بالاعاده احيا
 بيوره جفته نصوص شرعيه وارد اولديغندن عصر سعادت پيغمبرى صلى
 الله عليه وسلم ده مشر كين بعث ايله حكم اوزرينه شبهه لرايراث ايدهر ك
 انساندن حيات مفارقتله إفناء واجزاي زمين مياننده اجزاسى بالنتفرق
 معدوم اولدقد نصـ كره الله تعالى امواتى نصل احيا ايدرد بين تفوهات
 منكرانده بولنديلر بناء عليه قرآن حكم بيان الهيمز آيات كثيره فرقانيه
 سنده او خبشاي مرقومه يه رد ابيانات حقيقت آياتده بولنمشدر بلـغنى
 خلاصه مؤدای جليلنى سويله يه لم جناب حـقـك قدرة بالغة صمدانىسى تام
 علم سامى الهيسى كاملدر برشى نقدر عظيم نقدر خفى دقيق اولسه ذات

معالی صفات ربوبیتی هیچ بوجهی اصلاً عاجز آیمز کائناتی بویله بر
 اتقان و احکام ایله تمهینای عدمدن فسحت آباد ایجادده اظهار ایدن
 اوخالق لم یزل بعد الفناء اعاده امواته و حساب و جزا ایچون احیایه
 قادر در عقول قاصره منکرینی تقریب ایچون ضروب امثال ده ایراد
 بیور یور لر فرمان عز و بیان سبحانیسی شودر که فیاض اقدس ربمز
 تعالی و تقدس حضر تلری زمینی انزال مطر ایله بعد الموت احیا بیور-
 یور لر زمین اولجه قوری ایکن و اثر حیانت کند یسنده نمایان دکل
 ایکن غایت کوزل طراوت و خضارت اکتساب ایدر که ازهار کونا کون
 و نباتات بو قلمون انبات اید یور خلاصه حق سبحانه و تعالی انلردن
 ازاله شبهه و رفع کمان ایچون دها بوکی ضروب امثال شرف اصدار
 بیور مشلدر بعد از علمای اعلام شریعت غر او قوع حشر و نشر
 ایله حکم اوزرینه فلاسفه منکرینک حصوانی زعم ایتدکری محالات
 عقلیه یی مورث ضعیف شبهه لر بولد قلرندن دیور لر که شرعاً هر
 مکلفه واجب اولان بعث و اعاده نک حصولنی اعتقاد ایتدکدر بعث
 و اعاده محالات عقلیه یی مستلزم اولمیان بوجه ایله حصوله کلیر
 کیفیتنی جناب علام الغیوب بیلیر امر بعثده جناب حق جریان
 ایتدردیکی کیفیتی بیان بزم بعثه صحت ایمانمز ایچون لازم کلممز بلکه
 علم الله تفویض ایلر لکن باب دینده افکار ضعیفه اربابی اضطرابدن
 محافظه ایچون بو خصوصده موضحاً دیرز که «بعث ایله مراد» معاد

جسمانیك انچق جميع اجزای اصلیه ایله یعنی ابتدای عمر انسانیدن
آخرینه قدر بولنان اجزا ایله اولسی ممکندر یوخسه جسمده اغدیه دن
متکون بعده متحامل صکره دیکرینی متخلف وهلم جرافضله اولان
أجزا ایچون معاد یوقدر بنا برین قدرتی عظیم علمی واسع خدای بی
انبازك أو اجزای اصلیه انسانیه بی بعدالموت تفرقه دن و صورتك
زوالندن و او اجزای اصلیه آدمیه نك انسان اکل ایدن حیوان آخرك
أجزای اصلیه سنده دخولدن هر نقدر حیوان آكلك اجزای فضلیه -
سنگ ترکیبنده اجزای اصلیه آدمیه داخل اولور سه ده مذکور حیوانك
موتیه عند الانحلال اجزای فضلیه حیوانیه دن منفصل اولور حفظ
ایدوب إعاده وبعث زماننده او انسانك اجزای اصلیه سنه روحی تعلق
ایتدیر مسنه و كرك قبل الموت و كركه بعد الموت اولان اجزایك عینی
اولسون موتدن اولکی هیکل و مقدار انسانی بی تکمیل ایدن اجزای
فضلیه یه اجزای اصلیه یه ضم و علاوه ایتسنه مانع نه در هیچ بر مانع
یوقدر تنعیم و تعذیب شو اجزای اصلیه ایله روحه مجتمعا در اعاده
اولسی ده کیفیت مزبوره بی مصد قدر زیرا بعد المفارقة حقیقت
انسانیه دیمك اولان اجزای اصلیه یه روحك تعلق و شو اجزای اصلیه یه
حیات و قبل الموت هیکل انسانیه بی تکمیل ایدن اجزای فضلیه باجمله
اعاده قیامتشددر بناء علیه منعم ویا معذب اولان موتدن اول موجود
انسانك غیر یدر دییه فلاسفه نك شبهه سی وارد اوله مز

كذلك بر انسان ديگر بر انسانی اكل ايتديکننده بالاغتذار لئمليله
ايکی روح بر جسده تعاق ايدر ديه ده ايراد شبهه اولمز كذلك ماده
واحد بر جوق انسانلر ايچون اوله بيلر زيرا ارضده کوريورز که
اسکيدن وفات ايدنلرک اجزاي شخصيه لری تراب ارضيه مياننده
بالاختلاط زمينه حرائث ويا اشجار غرس اولنديغنده انسانلر او تراب
مخلوطدن نشو ونما بولان نباتات وفوا که وثمار ايله اغتذاليدنلر کافه
بدنلرنده لحم ودمه منقلب اوليور ديه ده ايراد کلام اولمز

مع هذا بز ديرز که قبل الموت متعلق روح ايله برابر اولان
اجزاي اصليه يه مالک انسان بعينه عند البعث متعلق روح ايله برابر
اولان انساندر قدرة عظيم إلهی وعالم نامنتهای لازالی اصلا محالی
متضمن اولان شو کيفیتی اجرابه صالحدر بونی عدم ادرا کمز ايسه
عدمی مستلزم اوله مز زيرا احتمالدر که بز اجزای فضليه نك تفرقی
مشاهده ايديورزده يا غایت دقيق ولطيف ويا بشقه در لوبرشی اولديغندن
حقيقت انسانيه دنيلان او اجزای اصليه يی مشاهده ايدميورز
جوق بر عوالم واردر که دائماً حيز خفاده بولنسيميله حواس مزدن مستوردر
ايشته بو کيفيتکده بوقبيلدن اولسنه بر مانع يوقدر خلاصه بودر که
نصوص شريعت غرای محمدیه مز بعث واعاده نك واقع اوله جفنی
ناطقدر بز بوکا ايمان ايدر ومحالی مستلزم اولميان بوجه ايله پرتو
انداز ظهور اوله جفنی اعتقاد ايلرز وعلی وجه التفصيل بيان کيفيت

بزه لازم کلمز هر نقدر بو مقدار بیانہ محتاج اولدق سه ده بیلورز که
 تقریر ایتدی کمز او کیفیت کیلر إقناع عقول و دفع شبهه ده کافی و افیدر لر
 متأمل منصف لره خفی دکلدر شرح و بیان ایتدی کمز تفصیل مذکور ی
 اعتقاد ایتکله مکلف دکلز بلکہ محالی مستلزم اولیان وجه ایله بعثه
 ایمان ایتکله مکلفمز لکن مار الذکر اجزای اصلیه حقننده بیانات
 شافیه من ایله حقارنده نصوص شرعیه اولان نعیم ، و عذاب قبر .
 حقننده کی شبهه لر مندفع اولور

زیرا واجب الوجود مفیض الخیر و الجود حضر ت لرینک قبرده
 نعیم و یا عذاب حس ایده جک حیثیتده روح انسانی او اجزای بی
 اصلیه یه تعلق ایتدیر مسنه مانع نه در جسدک متفرق و متلاشی اوله رق
 حیاتی حائر اولد یغنی مشاهده ایدور ایسه کده اجزای اصلیه ده
 تنعیم و تعذیب جریان ایدر فقط رقت و یالطا فتدن ناشی ابصار مزدن
 کیفیت مخفی قالور بر شی مشاهده ایده میورز کذلک بعض مؤمنینک
 شهدای کرام حضراتی کبی عند اقدس الهیده مرز و قیتلرینه دائر شرفورود
 نصوص شرعیه یه وارد اولان شبهه لرده مندفع اولور نصوص
 شرعیه نک خبر و یردیکی نوع مخصوص ایله ترزیه و تنعیم قبول ایدن
 بر حیات میزه ایله حی اولور حیثیتده شهدای کرام و انواغ نک اجزای
 اصلیه لرینه ارواح لرینک طرف اقدس الوهیتدن هر نقدر کور میور
 ایسه کده تعلق ایتدیر مسنه مانع نه در بونلرک کلیسی محالی مستلزم

اولیان جائزات عقلیه دن و تحت تصرف قدرت الهیده داخل
امور دندر

مبصراتی جسم کوستان بیوک آلتلر ایله کوریله بیلان حیوانات
صغیره نك احوالنده کی « عامای متأخره طبیک » حیوانات صغیره
نك ادراك و حواسی و معاشلرینه سبعلری « حیاتلربی حفظ
و حراستلری » یکدیگریله مقاتله و تحصیل رزق ایون احتیال
ایملرینه دائر ایراد ایتدکلی کلامله مطلع اولان حقائق جویان
زمان اجزای اصلیه انسانیه نك « وأنك تغلق ارواحی قبولیله »
برشیه شعور من اولدینی حالده . نعیم . و عذابدن اراده ازل
الهیته شرفصادر اولدینی شی احساس اتیمی حقنده کی تقریر می
استبعاد اتمز (والله علی کل شیء قدير) « بعدذا » اعضا و جلود انسانیان
وزمین لک بنی آدمک علیهلرینه شهادت ایتلری تحت تصرف قدره
الله ده داخل جائزات عقلیه دندر بونک نظیری معجزات بحسنده
موضحا کیدی . نطق جمادات بوقبیلدندر انساننده صفت کلامی خلق -
ایدن جناب حقدر صفت کلامک خلق اولنمی حیات وامثالی کی
شیلره توقف اتمز بنابرین جناب خلاق کائناتک اشیا سالف الذکرده
کلامی خلق ایده رک عصات علیهنه شهادت ایتدر مسنه هیچ بر مانع
یوقدر « حکمتی » پیغمبران کزین علیهم صلوات الله اجمعین حضراتی
« انسانلره » اعضا و جلود بشریه لرینک واوزرنده عصیان ایتدکلی

زمینک عصات علیہنہ شہادت ایدہ جکارینی اخبار بیوردقلری زماندہ
ارتکاب معاصیدن عبادی تخویفدر کنداک اوروزدهشتبروزده عظمت
قدرت الہی بی اظهاردر وعباد اوزرینہ حجة الہک ظہور ایتہ۔
سیدرکہ اوخلاق قیومک حجة بالغہسی علم افراز مقام تیاندرد۔ مرور
و عبور ناس ایون متن جہم اوزرینہ مدود « صراط » دہ عقلک
استبعاد ایدہ جکی برشی یوقدر لکن وصف صراطدہ روایات متواترہ دن
اولیہرق صراطک قیلدن اینجہ قلنجدن کسکین اولمی حقندہ
بعض روایات مشہورہ وارد اولشدرد « بوکیفیتی » ہر تقدیرقادر مطلق
مولای متعال حضر تلرینک تحت تصرف قدرۃ الہیسنندہ داخل جائزات
عقلیہ دن ایسہدہ ۔ بعض ضعیف الدین اولان نادانلر استبعادایدرلر
مع هذا روایت مذکورہ نک سختندہ علامہ عز الدین بن عبد السلام ۔
وشیخ قرافی ۔ و علامہ بدرزکشی ۔ روح اللہ ارواحہم حضراتی کبی
بعض علمای اعلام افندیلر مزمک منازعہ ایتدکارینی علامہ باجوری
علیہ فیض اللہ الجاری ۔ جوہرۃ التوحید شرحندہ نقل و بیان ایتشدرد
روایت مذکورہ نک حتی فرض اولندیغندہ ظاہرینہ حمل اولنمیہ
۔ رق شدۃ مشقتدن کنایہ اولمق اوزرہ تأویل اولنور « شیخ قرافی »
قدس اللہ سرہ شوراسنیدہ علاوہ بسط و بیان یورہرق دیورکہ صراط
عریضدر یمین و یسار ایکی طریق اولوب اہل سعادت ۔ ظمی طریق
یمیندن و اہل شقاوت کبری طریق یساردن کیدہ جکدر انتہی ۔

بو تقریره نظر افکار ضعفا اوزرینه بیه اشکال مند فعدر . هر مکلفه
 ولو شو کیفیتله اولسون وجود صراطه ایمان کافیدر والله تعالی أعلم
 علامات کبری میاننده شمسک مغربدن طلوعی حقننده وارد
 حدیث شریف نبوی بودرکه قال رسول الله صلی الله علیه وسلم « انها
 تطلع من مغربها حتی تتوسط السماء ثم تعود فغرب فی جهة المغرب
 وتستقر بعد ذلك علی عادتھا الاصلیة » « مال شریفی » آفتاب درخشان
 مغربدن بالطلوع وسط سمایه قدر صعود ایده رک بعده عودت ایله
 مغرب جانبندن غروب ایده جکدر بوند نصکره عادة اصلیه سی اوزرینه
 مشرقدن طلوع ایتکه باشلایه جقدر . مغربدن شمسک طلوعی
 زیر تصرف قدره ربانیده داخل جائزات عقلیه دندر . وجود اقدس
 فرد قیوم لا یزاله وعظیم قدره سامی بی زواله ایمان ایدن انسان
 سعادت نشانه امر مذکور تصدیق وایمان ایتک صعب و دشوار دکلدر
 معجزات بختنه مراجعت « والله أعلم » یا جوج مأجوجک خروجنده
 علامات کبرادن ایدی بونلرایکی قبیلله عظیمه و جماعت کثیره در قرآن
 کریمه جناب حق اسکندر ذو القرنین حضر تلی لسانندن بونلری
 حکایه بیوربور « اسکندرک یا جوج مأجوجک بولندقلری یردن
 طشره یه حقیقه جقلری یولی بر سد آهنین ایله منسد قیلله رق » ربم
 تعالی و تقدس حضر تلرینک وعدی ظهورنده بوسدی مههم قیلوب
 بونلرک طریقنی کشاده ایدر . دیدیکنی جناب حق قرآن کریمه

خبر ویریور مفسرین کرام وعد الہی نک کلسنی قیامتک ورود
 وقریتیلہ تفسیر بیور مشلردر . آخر زماندہ یاجوج و ما جوجک
 خروجنی اُحادیث صحیحہ تفصیلا بیان ایتشدرد بونلرک خروجی
 علامات کبرای قیامتدن اولدیغنه ایمان هر مکلفه واجبدر . جغرافیا
 علماسنک ساحهٔ زمینی بالسیاحهٔ یاجوج و ما جوج محلنہ مطلع اوله
 منبشلی اقوام مزبورہ نک روی زمینده موجودیتلرینی مبین نصوص
 شرعیہ نک صدقنہ مانع دکلدر « توضیح » . اولاً جغرافیا علماسنک
 جمیع اراضی بی بالسیاحهٔ وارمدقلری یر قالدیغنی تسلیم ایتمه یزاونلرک
 سیاحتی مسکون یرلر ویاورالره قریب محللدر چوق اراضی . واودیه ،
 وجمال ؛ اطراف زمینده واردرکه اورالره وباخصوص صلب و مستحکم
 جبالک ارقہ سندہ کی اطراف شمالیہ ونہایت منطقهٔ منجمدہ شمالیہ یه
 ایاق بیلہ باصمامشلردر حقیقت کتب جغرافیا یه اطلاعدن نمایان
 اولور احتمالکہ او اهالی عظیم وجماعت جسم سیاحین جغرافیینک
 واصل اوله مدینہ اطراف زمینک بعض محللرندہ موجوددر . ثانیاً امام
 نضر الدین رازی حضر تلزی اظہر اولان موضع سد جانب شمالده در
 دیور آشنایان حدود زمینہ خفی دکلدرکه سبریدان صکرہ کی جہات
 شمالیہ ده جمیع فصولده قار . وبوز ، اوزرلرندن اکسک و منقطع
 اولیان برک و صلابت مستحکمہ بی حاوی جمال واردر شوعصرلرده
 اورالره کیمک کیسه لره ممکن دکلدرینہ معلومدرکہ انتہای ارضہ

قدر ممتد اولان یردن صکره بر مسافه واردر بناء علیه ماورای جبال
 مذ کوره ده زمینی الحیق اراضی بولنمسه سیله ؛ قار ؛ از اولدیغندن
 سکنای بشره صالح یرلر واردر یا جوج و ما جوجك ساکن اولدقلری محل
 ایشته او اراضی منخفضه اولمسنه مانع نه در جائز در که زمانزه قدر بیکلرجه
 سنه گذران ایدن زمان اسکندر ده اراضی مذ کوره به موصل بروادی
 منخفض وطریق منکشف بوانه ده ماورای جبال مذ کورده مجاور
 امک محللرینه بالتجاوز مقاتله ایتش اوله لر بنا برین حضرت «ذوالقرنینده»
 طریق وادی سید و ما ورا سنده انلری حصر و حبس ایتمکله
 خروجه قادر اوله میه لر و قار بولنمسه سیله جبال مذ کوره نك اوزرینه ده
 حقیقملری غیر ممکن اوله : حوادث جویه حدوث و نزول ثلوج
 تتابع ایتمه سیله اطرافده کی طاغله مساوی اوله درجه سنده اثری مخفی
 قله سی به قدر وادی مذ کوری سد ایدوب طولدیره بعده عند
 قرب الساعة اوقار لر اسباب جویه و زلزله کی اسباب ارضیه ایله
 ارییه رك هدم سد او جماعت عظیله به میسر . و نصوص شرعیه نك
 سرد اتیان ایتدیکنه مطابق اوله رق وادی مذ کوردن خروجلری
 واقع اوله بعض اماکنده یوزلرجه سنه قارلرک تراکمی موجب حوادث
 جویه نك وجودی ایسه عقلا و عادة مستحیل دکلدن تواریخی تفتیشمزده
 بوکاچوق شواهد ظاهره بوله بیلرلر قدرة الله أعمال مذ کوره نك
 اجر اسنه و تدبیر مذکور ایله اتمامه صالحدر تحت تصرف قدرة

الله ده داخل امور دن اولدینی جهلته آخر زمانده اوایی اُمت عظیمه
 -نك خروج ایده جکنه نص شرعی وارد اولمشدر بنی بوکا ایمان
 و تصدیق ایلر بو تقریر مز ایله سیاحین جغرافیینه مستند شبهه لر رفع
 اولدی اما بعض کتابلرده یا جوج مأجوجک محلی اقالیم قریبه
 معموره دن فلان یردر اموی و یاعباسیدن فلان ملک سده نظر
 و تفتیش ایچون بریسی اعزام ایله عینا بولمشدر کی اخبار تألیفات
 قصاصیا ننددر بعض مؤلفین خبر مذکوری نقل ایله وادی اغترارده
 بولنمش ایسه ده معتمد علیه بر روایت دکلدر اصل و اساسی یوقدر و الله اعلم
 علامات کبرای قیامتدن عیسی علیه السلام افندمز جانب سمان
 نزولی بر امر جائز عقاید یهودیلرک نبی مشار الیه حضرت تلیزینی شهید
 ایتک ایچون جستجولرنده سما جاننه صعود لری ده بر امر جائزدر
 بونک اوزرینه ادنی محال ترتب ایتمز واجب الوجود حضرت تلیزینک
 بین السماء و الارض صعود و هبوطه قدرت احسان ایتدیکی ملائکه
 کرام واسطه سیله عیسی علیه السلامی صعود و نزول ایتدیر مسنه
 کذلک او خلاق کریمک کره هوانک فوقه صاعد کیمسه جقنده
 متوهمینک توهمکرده لری اولان شیلردن حیات سامی حضرت عیسی یی
 محافظه بیور مسنه مانع نه در تنفس هوایه انسانک احتیاجی بر امر
 عادیدر جناب حق هواسز حفظ حیاته قادردر کذلک علامات کبرای
 قیامتدن انسانیه تکلم ایدن « دابة الارض » ک خروجی بر امر

جائز در جناب حق صفت کلامی دابه به اعطاسنه قادر در • زمینده
 دخانك قرق کون بولنمه سیده برأمر جائز در • بوامور مذ کوره زیر
 تصرف قدره الله ده داخل جائزات عقلیه دندر هیچ بریسی محالی
 مستلزم دکلددر جمله سنه ایمان وتصدیق ایدرز فرد قیوم بی زوالك
 احوال بعث سؤال • میزان • صراط • و بونلرکی مقدمات مذ کور اموره
 حکم مالا نهاییه صمدانیه سی واردر که اکثریسی علمای اعلام
 اسلامیة مزك کتب جلیله کلامیه لرنده مذ کور در والله یتولی
 هدانا أجمعین • شوبانی بعث و جزانك حصولنه دال ادله عقلیه ذکر یاه
 ختم ایده لم • ادله مذ کوره برهانیه قاطعه دکلسه ده قلوبك اذعان
 ایتدیکی مطمئن اولدینی بر ادله اقناعیه در که مجموعا فکره توار دنده
 بعث و جزانك وقوعی عقل انسانی جزم ایدر وصماخه آدمیانی شکه
 القا ایتز « بعث و جزانك دلیل جوازی عقلیه در » وبالفعل دلیل
 حصولی شرعی یعنی حصوله کله جکی نصوص شرعیه ایله ثابت اولدینی
 مشهور ایسه ده لکن تدقیق نظر اولندیغنده بعث و جزانك حصولاری
 قلوبی مطمئن ایدن دلائل عقلیه اقناعیه ایله اولدینی متبیین اولور که
 علمای اعلام حضراتك کلمات حکم آیات نحریرانه لرندن شوبسط و بیان
 ایده جکمز توضیحاتی کوش حقیقتله استماع سزاوار تذکار در
 إله عالم • پروردکار جمیع أمم حضرت تلرینك وارلقنه حکمت عدل
 بمخلوقلرینه رحمت کبی صفات جلیل کمالیه ایله او خالق بی انبازك

اتصافه دال براهین قاطعه اقامتد انصره بونلری معتقد ذاته ظاهر
اولور که خلاق خلق ایله حسن و قبیحی تمیز ایده جک عقل خیر
و شره قدر تلی اوله جق مقداری اقتدار؛ اعطا واحسان ایله کد
انصره سوء اعتقاد جهل . کذب . ایذاء صالحین . و بونلره مماثل
قبایحدن منع اعمال خیریه بالاجرا . انتظام معاشرینه بادی اخلاق
فاضله ایله متصف اولملرینی ترغیب ایتک جناب حقک ، حکمت
عالی الہی و عدل سامی ربانیندندر معلومدر که بوا یکی امرک حصولی
اعمال خیریه بی ثوابه اعمال شریه بی عقابه ربط ایله پذیرای تمام اولور
ثواب . عقاب . دار دنیاده حاصل اوله میه جکندن انلرک حاصل اوله جکی
پردار بقانک لزومی پدیدار در ترغیب ، ترهیبده عقوله ایداع اولنان
تحسین خیرات . تقبیح منکرات . کافیدر دنیله مز زیراهوی و نفس
انسانی شهوات جسمانی و لذات جسمانیه ده انهما که داعیدر هوی
و نفس ایله عقولک دلالت ایتدیکی امور میاننده تعارض حصولنده
بر مرجح قوی و معاضد کامل لازمدر بوا یسه فعل و ترک اوزرینه
وعد و عیدی . ثواب و عقابی . ترتیب ایله پیوسته حصول اولور
سلطان حکیم رحیم مطلق حضر تلرینک نفوس رعیه عبادنی فقرا
مقولارینه شفقت ، مرحمت ، ایتکله مفطور بیور رب مصالح معاش
فقرا اوزرینه مالارندن براز اعطا ایله ابراز فتوت و حمیت ایده رک
اعانه ایتدر مسیئده بر حکمت بالغه صمدانیه سیدر اغنیای کرامه لایق

اولان اعانه مذكوره نك رغبت وانشراح صدر ايله اعطا سیدن
 بونكله حال فقرا كسب صلاح وخرج و مشقت مندفع فقر و احتیاج
 باب مسكنت ما بیلندن مفارقت ایدر نفوس انسانیه حب مال اوزرینه
 مضطور اوله رق صرف ماله عوضنده دهائی برشی بولمه نیجه ابراز
 سماحت ایدمه مدیكندن جناب حقمك شوچرا كاه فانی نك غیری بردار
 - القرار خلق بیوروب انده فقراء مساكینه مال جزیل ايله متصدق
 اولان اصحاب سماحته خیر و ثواب كنیر ايله مكافات مانع صدقات
 و زكات اولان ارباب بخل و ضلالتله مستحق اولدقلری عقاب و عذاب
 كیر ايله مجازات بیورمه سیده حكم نامتههای ربانیدنر اغنیا دار
 بقانك موجودیتنی و اوراده بر صدقهیه اون قاتیله مكافات اولنه جفنی
 بیدكلرندن اجور جزیلهیه نائیلترینی رجاء كمال رغبت و انشراح صدرمه
 - ايله فقرا و مساكینی اتفاق ایدر لر بلكه لاینقطع صدقات جاریهده
 اظهار رغبت ایدمه رك بیوك بیوك و قفلر براغیرلر صلوات • اذكار •
 طعام طعام ایچون جوامع مساجد عظیمه زوایا و تكایا جسمیه تشید
 تعمیر ایدرلر بوندن تحت حصره داخل اولمیان خیرات حسنه كنیرمه
 عالم انسانیتیه یادكار ایدی اوله رق پرتوبخش جهان اولور بونلر نعمت
 دار آخرته رغبتدن • نعمت دوزخدن مجانبیدن ناشیدر نعمت نعمت
 و الماسه اوما اثر خیریه دن بك آزی ظهوره كلیر بعدذا سلطان عادلک
 رعیه پادشا هیلرندن بعضیلری ضعیف بعضیلری قوی اولسه مظلوم

ضعيفك حقى ظالم قويدن استرداد ايده و لك منصفانه اجراى حكومت
 ايتك حكمت . عدل . مرحمت حضرت حكمدار انخميدندر الله سبحانه
 و تعالى حضرت لك پادشا هلم پادشاهى بر سلطان عادل . حكيم رحيمدر
 حقوق مظلومينى ظالمردن اله رق منصفانه اجراى عدالت ايتك
 حكمت على سبحانهى و عدل الهى و رحمت لايزاليدندر بواجر اى عدالت
 الهى ايسه بو دار فئاده حاصل اولمز زيرا كور ييورز كه اكثر مظلومين
 غايت ذلتده حقير مسلوب المال مقهور ناموسلرى پايمال رسواى رزيدر لر
 ظالم غايت عزت نهايت قدرتده پاى انداز سوطوندر لر بناء عليه
 شو عدل و انتصافك پرتو پاش ظهور اوله جغنى بر جهان ديكر لاهوتى
 - نك وجودندن لازمدر . انسان ايون معاد اولماسه انسان منزلت
 و شرفده جميع حيوانان دن اخس اولور ايدى « توضيحى » بو چرا كاه
 فائده مضار انسانيه مضار جميع حيوانان دن اكثر در زيرا حيوانات
 سائر ه آلام و اسقامه ابتلا دن اول فكر و تأمل لرى اولمديغندن فارغ
 البال و طيب النفس اوله رق آسوده كزين فراغدر لر اما انسان عقلى
 سبيله الى الابد احوال ماضيه و مستقبليه فى تفكر ايدرا كثر احوال
 ماضيه سبيله كنديسنه انواع حزن و اسف و اكثر احوال آتیه
 سبيله انواع خوف حاصل اولور بنابرین انسانه عقلك حصولى بو عالمده
 مضار عظيمه و الآم جسميه شديد قويه نك حصوله سبب اولديغى
 ثابت اولدي املذات جسمانيه انسان ايله حيوانات سائر ه بينفنده مشتر كدر

زیرا سر قین «۱» جُعِلَ «۲» مذاقنده طمیدر انسان ایچون معاد
 حصوله کیوب سعادت و تکمیل حالی ظاهر اولماسه کمال عقل انسانی
 هموم غموم اکدارک زیاده اولمنسه جابر مجبری موجود دکل ایکن مسبب
 اولسی لازمکنیور بویله اولان هر شی خست و دنائتک منفعتدن خالی
 تعب و مشقتک زیاده اولمنسه سبیدر بناء علی ذلک ثابت اولدیکه سعادت
 آخرویه حاصل اولماسه انسان آخس حیوان بایک خنافس • دیداندن
 دهاسفل اولور ایدی بویله اولماسی قطعاً باطل اولدیغندن بیلدیکه
 بر دار آخرت البته لازمدر انسان اودار سعادت ایچون مخلوقدر دنیا
 ایچون دکلدر اوت شو جهان فاتیمز اختیار • اشرار بیننده میز کبیدر
 ناکه ابرار ثواب • اشرار عذاب • ایله مجازات اولسونسونلر زیرا
 هر شیرره نار اولی در و او شیریرک موجودیتدن نصیبی کندیسنه
 حاصل شو لذات فانیه سریعت الزوالدر ایشته بوسره مبنی درکه چوق
 اهل زیغ و اشراری دنیاده متعم و چوق اهل ایمان و اختیار یده
 منغص و مکدر کوریورز شو مقامدن اکلاشدیکه کفار دن معادی
 منکر لری مذهبی برشی عظیمدرکه دیگر شر لرا کائاتل اوله مزایر
 زیرا معادی انکار دن اصلاً حرام و حلال اولماسی لازم کلیر مع
 هذا عمران جهانده تمتع اولور منکرینک «نظام عالم» انسانک له
 وعلیهنده واجبات انسانیه دن حقوق بشریه بی پیامه سیله تکمیل
 ایدر بوايسه علم صحیح تام عام ایله تکمیل پذیر اولور دیمه لرینه جوابا

بزرگه بو منکر لر أهواء وشهوات نفسانیه وحب ذات شخصیه به
 علوم سیاسیه نك می-دانه چیقاردینی قوانین مجردة مقاومت ایدم
 -مدیکنی بیامکدن غافلدر لر بنا برین نفوس انسانیه بی مضرتلردن
 منع وطریق خیره تبعیت وسبیل شری ترك ایتدرمکی ترجیح ایدن
 بر مرجحدن لازمدر او مرجح ایسه معاده ایمان ایدمرك خیره خیر
 ایله شره شر ایله مکافات کورمکدر

والا عاقل • مرد کامل • بر کره تأمل ایتسون بر انسان نبات کبی
 ثابت اولوب صکره عودتی • ووجود انسانیدینی ایچون مدة حیاتنده
 نائل اولدینی لذات حیوانیه سندن بشقه بر خطی اولمیه رق عدم آباد
 زواله کیده جکنی اعتقاد ایدرسه « له وعلیهنی بیامک ایچون علم
 سیاسی نقدر قانون وضع ایدرسه ایتسون » معتقدند کوردیکرینک
 اطلاعی اولمه دن بشقه سنک قتل واتلافنه .مالی اخذینه • ویابر اشرف
 عرضی هتکه • ولذات حیوانیه سنی ایقاعه • قدرتیاب اولدقم
 علم سیاسی نك وضع وتأسيس ایتدیکی او قوانین منکرات مذکوریه بی
 اوتکابدن مرتکب مزبوری منع ایدرمی ظن اولنوربوکا مکابریندن
 بشقه سی حکم ویره مز معلومدرکه انسان حب ذاتی اوزرینه مضطوردن
 بو مضطوری حقيله اکلايان برشیده کندیسنه امین اوله مزیا لکزدین
 مبینده مرتبط اولدیغنی فهم ایدرسه او وقت حقانیتدن ایریله مز
 بزکور بیورزکه بعض امم معادی اعتقاد ایتدیکاری حالدۀ افراد میانندن

بعضي نډن فساد ظهوره كليور شو اعتقاد ديني نسخ اولنسه او فسادك
 حالي نصل اولور شكسز شبهه سز اونك فسادی پك بيوك اولور
 زيرا اوارلریده علوم دنيويه باخصوص شوزمانده علم سياسي نك منتشر
 اولديني « امني » دأما سيل شرورده طالعین بر حالده مشاهده ايدیورز
 حق علم مذکور نزايد ايتدكه شرور • فساد • لری اريور بينلر نده
 انساني ضایع عقدۀ تعاون ونصرتی اخلال ایدن زنا • قتل نفس •
 انتحار • مسكرات استعماليله ازاله عقل • ساب اموال • غش • خديعه
 اوزرينه فنون وصنایع علم مذکور ايله احتیال • ونظام هیئت اجتماعیه
 - بي مغل • بر چوق اخلاق فاسده فاشی اولیور « سبي » فائق اولدق لری
 علوم مذکور نك اعتقاد معادده بهره سی اولمديغند رظن ايدز كه
 امم مذکور میانده نبذة ما اعتقاد معاد اولسه لوح وجوددن او اخلاق
 فاسده محو • فناپذیر اولديغی کور رايدك چو چغنی غائب ایدن
 ختونلری بيله کولديره جك مواد دندركه بعث ومعادي انكار ايدنلر
 « علم سياسي نك » جميع افراد انسانيه ده تام وعام اولمسندن غیری
 ديكر طرز ايله نظام هیئت اجتماعیه بی كافل اوله مديغنی ملاحظه
 ايتدكلر نډن • تكفل مذکور ده تام • عام • قیدینی شرط قويمشیر
 بوند نصكره ده البته بر کون اوله جقمكه بو علم سياسي نك نظام هیئت
 اجتماعیه بی متكفل اوله جقدر ديورلر هیهات پك اوزاق تمنیات «
 شو حالده انك تكفلنه بيكرجه سنه لر لازم كليور امم مذکور

اعتقاد معادی ترك ايله شو امانی واهیه یی تمیلرنده احق بر طبیبه
بکزه یورلر قتال مهلك بر خسته لکه مبتلا بر مریضه طبیب مداویسی
بر هینری ترك ایت ایسته دیک کفی اکل ایت شو قدر سنه صکره بن سکا
شفالی علاجلر کتیره حکم دیر علاج کله سی یه قدر زوالی خسته
هلاک اولمش وکیمکاری بیله چوریمشدر ایشته منکرین طبقی بونک
کیدرلر زیرا معادی انکارلریله برابر اوکی مقولاتی بین العموم
تشهیر حتی مجرد علم سیاسینک حفظ نظام عالمی تماماً وعاما متکفل
اولدیغی تجویز ایتملری حسن تدبیره کیاست رأی و احتیاط ايله اخذ
دکلدن والا بونلر شو قول باطلی اظهار ایتملریله نعوذ بالله عالمه هلاک
قبوسنی اچمش اولیورلر شو فکر خامده بین الامم شیوعندن جناب
حقه استعاده ایلرز ذاتا عقول انسانیان بوکی خرافات واهیه یی قبول
و استماعدن ابا ایدوب طور رایکن شایعه اوله مز یا همان جناب رب
مستعان بزنی وانلری خیر الانام علیه الصلاة والسلام افندمن
حضر تلرینک مسلك قویم شریعتلرینه هدایت ایلسون آمین « منکرینه
نصیحت » حزم و احتیاطی اخذ . معادی تصدیق ایتدکلرنده و برای
معاد استحضارنده بولندکلرنده اگر معاد حق اولورسه نجات بواه
- جقلرینی اگر باطل اولورسه شو اعتقاد معاد کندیلرینه ضرر ویرمیه
- جکفی تصور ایتمه لرینی توصیه ایلرز غایه مافی الباب معادی اعتقاد
ارنده لذات جسمانیه یی ترك ایده جکلر دنیلور دکلی فقط شو لذاته

ایکی سبیدن مبالات ایتماک عاقله لازمدر بریسی لذات مذکوره نك
 غایت حساستی در حتی خنفساء . دیدان یله بونده مشترکدر ایکنجیسی
 بولذتلر منقطعدر . سریع الزوالدر بولره اتمهک عواقبندن خوف
 اولنان برامراهده حزم و احتیاطی ترك ایتمهک مساوی و معادل اوله مز
 « والله الموفق »

﴿ باب ثالث ﴾

اعتقادده معتقد نصوص شرعیه دن وارد شبهه لری ردویا خود
 انلرایله نصوص شرعیه نك معانی ظاهره سنه منافی دلیل عقلی
 قاطع ایله ثابت امور بیننده توفیق بیاتنده در بویا بده
 ذرت فصل وارد رشو مقامده اوج مقدمه یه محتاجز
 « برنجی مقدمه » احکام عبادات و معاملاتده معتقد اولدینی کی
 اعتقادده در معتقد اولان نصوص شرعیه یالکز قرآن حکم بیان الاهی
 و احادیث شریف رسالتینا هیدر وحدیث شریفلرک دانای سرائر
 کائنات علیه افضل التحیات افسدمن حضر تلرندن نقلی . روایتی
 یانبوت قطعی ایله ثابت اولور اکا حدیث متواتر دیرلریا خود طمأنینت
 قلبی موجب قطعی یه قریب ثبوت ایله ثابت اولور بوکا حدیث مشهور
 دیرلر . طمأنینت ظن یوقاریسی یقینک مادونیدر کافه نصوص مذکوره
 ده معنای ظاهره متبادره اعتماد بزه واجبدر معنای ظاهره مناقض دلیل
 عقلی قطعی قائم اولمده چه غیر متبادر معنایه صرف و تاویل بزم ایچون

جائز دكلدر زيرا دليل عقلی قطعینك قیامی نص مذكورك معنای
ظاهرسی شارع اعظم علیه صلوٰۃ الله الانعم افندمذك مراد رسالتنا
— هیلری اولدیغنه بلكه متبادر اولمیان معنای آخر مراد سامی پیغمبریلری
اولدیغنه دال بر علامتدر بنابرین نص مذكوری بالتأویل أو دلیل
عقلی قطعی به مناقض اولمیان و ظاهر متبادرك غیرى احتمالی قابل
معنای آخره صرف و تحویل ایدرز ایشه « بواهل سنتك والجماعتك
اعتماد ایتدیكى نصوص شرعیه ده بر قاعده کلیه در بر مقتضی اولمینیجه
نصك معنای ظاهر یسندن غیر یسنى مراد جائز دكلدر زيرا مخاطباتده
أصل اولان معنای ظاهر متبادردر من غیر داع وقرینته معنای غیر
ظاهری اراده افاده واستفاده ده نقصان و خلل اولورده ما لا یخفی
مفاسد عظیمه انتاج ایدر • معنای ظاهری تركه داعیی دلیل عقلی
قاطعك معارض اوله سنه المحصر • دلیل مذكوری ترك ذات سامی
رسالتنا هی افندمذك حضرتلرینك صدقنی اثبات ایدن اصلی اساس
یعنی عقلی ترك ایتك اولدیغندندر زيرا عقل اولماسه صدق عالی نبوتنا
— هی به دلائل معجزات باهرات ایله استدلالز ممکن اونز ایدی عقلی
ترك شرعی تركه موجبدر اما دلیل عقلی ظنینك معارضه سی معنای
ظاهری نصی تركه داعی اوله مز • ظن نفس الامر ده باطل اولمه
احتمالندن ناشی دلیل ظنی فی ترك عقلی ترك ایتكده ایجاب ایتزدلیل
ظنی ایچون ظاهر نصی ترك ایتسه ك ظن اوزرینه اعتماد اعتقاد مزى

معارض خطاده بولندرمش اولورز بناء عليه بونده برکوجلاک یوقدر
 زیرا دلیل عقلی قطعیده کی تعارض ظنیده یوقدر مع هذا دلیل ظنی به
 اتباع ایله ظواهر نصوص ترك حد سزنهايتسز اختباط واختلاط
 اعتقادیه بی موجبدر زیرا ظنون پک چوقدر اعتقاد شرایعده معتقد
 اولان یقیندر بنابرین طریق صواب نجاتماآب یقینا شر فورود ظواهر
 نصوص شرعیه به تمسک ایده رک مجردظنون ایله اندن تحول ایتماکدر
 بعد ذا احادیث شریفه ده بعض نصوص بولنورکه متواتر ویا مشهور
 درجه سنده اولمیدیغندن شرفورودی یقینا ثابت اوله میه رق ظنیدر
 بوکا حدیث آحاد دیرلر احکام عبادات معاملاتده احادیث آحاده
 اعتماد اولنورسه ده اعتقادده مستقلا اعتماد واجب دکلدر زیر احادیث
 مذ کوره ظنیدر ظنه اعتماد اعتقادده اوله مز لکن احادیث شریف
 مذ کوری عدول حفاظ کرام محدثین حضراتی نقل ایدوب احکام
 فقهیه ده فقههای عظامک معتقدی اولورسه بر معارض عقلی بولنمه
 نیجه انکاری العیاذ بالله کفر و تضلیلی موجب اولان متواتر و مشهوری
 انکاره منجر اولماق ایچون احادیث احادی انکار جائز دکلدر اوت
 احادیث مذ کوره تعاضد ایدوب ثبوتی یقین درجه سنه واردایسه
 او وقت باب اعتقادده معتقددر نتمک عذاب قبر حدیث شریفنده بو
 منوال اوزره تکلم اولتمشد «والله أعلم»

«ایکنجی مقدمه» بزه من جهة الاعتقاد شرعا واجب اولان نقیضی

بحقل اونیان دلیل عقلی قاطعک و یاخر عالم علیه صلوات الله الاعظم افندمن
 حضر تدرندن منقول آیات قرآنی و حدیث متواتر و مشهوردن بر دلیل
 شرعینک دلالت ایتدیکه مواد و اموره اعتقاد ایتدکدر یو خسه حضرت
 پیغمبردن غیری بر کیمسه به کند یسندن بر وجه قطعی ثابتده اولسه تقلید
 ایتدک بزه واجب دکلدر دلیل عقلی قاطع و یادلیل شرعی ثابت اظهار
 ایتدکسزین امت معظمه اسلامییه مزأ کبر عامای نغماندن بر مسئله
 اعتقادیه بزه نقل اولنسه اومسئله ده مشار الیهه تقلید بزه واجب دکلدر
 خصوصیه مسئله منقوله اعتقادده معتقد نصوص شرعیه مزک ظواهرینه
 مناقض اولورسه اوت بعض معتقد علیه عامای نغمانن نصوص شرعیه بی
 تفهیمده قواعد شرعیه و اصول عربیه به موافق و مناسب بر تأویل ایله
 نصوص مذکورده بی تأویل ایدرسه او تأویلی اخذ و تلقی بالقبول جائزدر
 عقیده مزه مضر دکلدر اما تأویله حمل و ظاهر معنا سندن نصی تحویل ایدن
 دلیل عقلی قاطع مثلی تأویلی ایچون بر داعی قوی ظاهر اولورسه
 او وقت اخذ و تلقی جائز اولوب صواب اولانده او اولمش اولیور باب
 اعتقادده عالم مشار الیهه تقلید ایتدک دنیا مزیرا بزم اعتقاد مزیا لکن
 انصه اعتماد ایدر مشار الیه بزدن عالم اولمسیمله فهم و تأویل نصدها کاتقلید
 ایتدک اولیورز یو خسه باب اعتقادده دکل ایشته شوا یضا حاتندن
 عصر مز اها لیسندن بعضیلرینک فلان فلاکی ؛ ویا فلان جغرافی ؛
 ویا فلان فیسو لیمیجی به ؛ شهر تکیر اولد قلیری فنونک اعتقادده معتقد

ظواهر نصوص شرعیه به مخالف اولان بعض مسائلندہ تقلید ائمہ
 - لرنده کی خطای عظیم تظاهر ایدر شو حال وخامت مال او مقلدینی
 اکثریا دین اسلامدن خروجہ ایقاع ایدر مع مافیه زوالیلر دینندن
 حقیقہقلربی بیاهز لر مسائل مذ کوره ده زمانز فلاسفہ سفہ تقلیدده
 مقلدین مذ کوره بی ایقاع ایدن شی ایسه زوالی مقلدلر مسائل حسابیه
 هندسیه وبعض تجربات طبیعیہ محسوسه ده کی ادله لری کی بعض
 مسائل فنونیہ لری ادله سنک یقینی وقطعی اولدیغنه باقیورلرده انلره
 الدانه رق فلاسفہ نك هر کلاملری صواب و یقینی الثبوت اولمسی وكافه
 فنونلرینك ادله سنده یقینه اعتماد ایتدکلری بی اعتقاد ایده رك بیچاره
 - لرك وهمه تابع اولمه لیدر حالبوکه او مقلدلر مذ کور مسائلك ادله
 - سیله مثلا چوق بر مسائل فلکیه ادله بی میاننده فرق موجود اولدیغنی
 بیاهمورلر مسائل حسابیه یقینیدر میان مسائل فلکیه ده ایسه ظنون،
 تخمینات ؛ ونفس الامر ده فاسد بر قیاس اولان . قیاس الغائب علی
 الشاهد ، چوق بولنور ارباب تقلیدك تقلید کرده سی او بعض مسائل
 فیلسوفان زمانك عندنده جمع علیه مسائل در دنیلر سه بزدر ز که
 بز معاشر مسلمین شریعت بیضای محمدیه مزده شوامت نجیبه محمدیه
 - نك یعنی مفخر عالم صلی الله علیه وسلم افندمز حضر تلرینك « ضلالت
 اوزرینه اجتماع ائیمه جکلرینه شهادت سامی حضرت رسالتناهیلری
 شرفو قوع بولان اهل اجتهاد ونصوص شریعتی فهم وادراك ایلان

عامای دین مبین حضراتک اجماعلرندن بشقه بر اجماعک تقلیدی ایله
 مأمور دکلر فیلسوفلرک بعض مسائله اجماعلری بعضا دلیل ظنی یه
 مبنی اولور بناء علیه اجماعلرینک خطادن معصومیتی « لا سیما مسائل
 فلیکیه وجویه کبی بعید الموضوعات مسأله » متحقق دکلدر زیرا
 مسائل مزبوره ده اک بیوک دلیللری حدس ، تخمین ، قیاس الغائب
 علی الشاهد ، ایتدیکی کتابلرینه اطلاعدن نمایان اولمشدر نه حاجت
 موجودیت افلاک وانک احکامنده متقدمین فلیکین مذهبی اوزرینه
 ظهور ابدن خطامدها مزی مثبت مواد دندر زیرا انلرک یوبابده
 اجماعلری اوله رق اصول وقواعد فلیکیه بی مبین کتب تدوین
 وتالیف وبر چوق صور افلاکی تصویر واوزون اوزادین احکام
 فلیکیه ذکر ایتدکاری حالده یوزلرجه پیلر کیمش ایکن
 متأخرین فلیکین کله رک استنباطات متقدمینی اساسنده بالابطال
 یینلرنده عاداتا و اصول وقواعد متقدمه خرافات بشردن عد اولنغه
 باشلادی شریعت اسلامییه مزک ظواهر نصوص شریفه سنه مخالف
 بعض مسائلده زمانمز فلاسفه سنه تقلید ایدنلره مسائل مذکورده نک
 ادله سنده بعد البحث والاطلاع ظنی اولدینی تحقق ایدرسه اکمیل
 التفات ایتیمه رک « خلاصه الاکوان بی آخر الزمان افندمز
 حضر تلمرندن » قطعی الثبوت او ظواهر نصوصی اعتقاد ایتدیکی ترک
 ایتامک الزمدر ادله مسائل مذکورده یقین اولدینی تحقق ایدرسه

یونیکله برابر ظواهر نصوص شریعتہ مناقض امورہ أدلہ مذکورہ
 - نك دلالتہدہ ریب و كان قلمنازایسہ او حالہ ظواهر نصوص تأویل
 و مسائل یقینیہ مذکورہ ایلہ یندرینی توفیق ایتک او ارباب تقلیدہ
 جائز در اکر مزبور مقلد لر تأویلہ اهل دکلرایسہ علمای اعلام دینیہ
 - مزہ بلر اجمعه قواعد شرعیہ و اصول لغت عربیہ اوزرینہ جاری و لازم
 تأویلی اکلامق و سبب سعادت دارین اولان ایمانده کسب اطمینان
 ایتک لازم و واجبدر : والله الموفق

« اوجنچی مقدمہ » شریعت غرای محمدیہ با کہ شرائع سالفہدن
 مقصد یکانہ صمدانیہ وجود اقدس الہی بی وصفات کمالیہ ایلہ ذات
 احدیتک متصف اولدیغنی اعتقاد ایتکله خالق معرفت الہیہ و ذات
 معالی صفات الوہیتنہ نصل عبادت اولنہ جفنه و شکر الہی نہ یولدہ
 ادا اولنہ جفنه و انتظام معاش و حسن معادلرینہ موصل احکامہ
 ارشاد انامدر اما انلرک کیفیت خلق عالم و آسمان و زمینده اولان
 نوامیس و دہابونلر مثالی اشیای بیامہ لری مقاصد شرائع مطہرہ
 - دن دکلدر با کہ مباحث مذکورہ یالکز عقول انسانیه لریلہ منافع
 بشریہ لرینی حصولہ کثیرہ جک وانلرہ نائیلتری مجرد اطلاعدن
 بشقہ بر فائده بی موجب اولیان بر طاقم علوم و معارفدر شرائع
 مقدسہ اولا وبالذات او مبحثلرہ التفات و تفاسیلنہ اعتنا ایتز اوت
 مقاصد اصلیہ شرائعده دخلی اولہ جق مقداری جملا مباحث

مذکورہ دن بر بحث ذکر ایدر مثلاً جناب حق وجودینہ . علم . قدرت . حکمت : و امثالی صفات کمالیہ ایلہ متصف اولدیفنہ دلیل عقلی اولمق ایچون آسمان زمینی : عدمدن ابراز اولندقلرینی . اختلاف انواع مخلوقات و کیفیت تدیر اکوانی و انتظام لایقلری فصل اعطا اولندیغنی علی سبیل الاجال ذکر و بیان ایلر بعضاده مباحث مزبورہ . بی مرجعی ینہ مقاصد شرعیہ اولمق اوزرہ بر مقتضی ینہ بی بروجه تفصیل سرد و اتیان ایدر شو مقدمات ثلاثہ تقرر ایتدکدن صکرہ بزدرز کہ برنجی فصل سموات و زمین حقندہ وارد نصوص شرعیہ دن شبہہ لری رد و یاظواهر نصوصه مناقض دلیل عقلی قاطع قائم اولان مسائل ایلہ بیلرینی توفیق بیانندہ در

باب اعتقاد ده معتقد نصوص شرعیہ مزده شرفوروردرکه « جناب حق » یدی عدد سموات : وانلرک فوقندہ کرسی دنیلان بر جسم کبیر . وانک فوقندہ عرش . دنیلان بر جسم عظیم آخر خلق بیور مشلردر و بو أجسام عظیمه میاننده مسافات اولدینی کی انلر ایلہ بزم ارامزده ده بیوک بیوک مسافه لر واردر « اوخدای بی زوال حضر تلی عالمده تگون ایدن شیلری اثبات ایچون لوح : قلم ، دنیلان ایکی جسم کبیر ده خلق بیور مشلردر ساحه ارای جهان اولان اشیایی تسطیر بر حاجتدن منبعث دکلدر بلکہ ذات فرد لاهوتیسنک بیلدیکی نهایتسر حکمتلردن ناشیدر خلاق لم یزل حضر تلی عالم

آسمان وزمینك خرابیتدن و بعد الموت ناسی بعددن صکره مطیع و منقاد
قوللارینك تعیمی ایچون اعداد و تهیئه بیوردینی «جنت اعلا دنیلان
بر مقام دلکشای ابدیت. وفاسق. وعاصی. و کافر. قوللارینی تعذیبی
ایچون استحضار بیوردینی بر ماواي تشکینای مخلدیت خلق بیورمشلردر
اوجناب فاطر قیوم کواکب خلق ایده رک بزه یقین آسمانك زینتی
قیامشدر بعض عامای اسلامز کواکب بالذات سماده مرکوزدر دیدیلر
جمهور مفسرین نغامك قوللاریده بودر» بعض عامای کرام بین السماء
والارض زیر سماده در دیورلر امام مکی وجناب وهیبدن ده منقول اولان
بودر جناب قره مانی مختصر هیئت سنیه نام کتابنده اعلام مفسرینك
چوقلرندن قول مز بوری نقل ایتمشدر شیخ مرعی حنبلی حضرتلریده
محجائب مخلوقاتنده قول مذکوره دال بر حدیث آحاد نقل وروایت
ایلمشدر حدیث شریف مذکور ای علامه امام محمد بن عبد الله
الکسائی حضرتلری کتاب ملکوتنده نقل وروایت ایلمشدر امام
نحر الدین رازی حضرتلری ایسه جناب کعب الاحباردن سوره قدر
تفسیرنده شمسك سماء دنیانك مادوتنده اولدیغنی صریحا بر اثر نقل
بیورمشلردر شوقوله نظرا کواکبك زینت آسمان اولمه سنك معناسی
کواکب هر نقدر آسمانك تحتنده ایسه ده ناظرینه کورینشده زینت
سمادر بوندن کواکبك بالذات آسمانده مرکوزیتی لازم گلز احتمال اصحاب
قول مذکور شو تاویل کی « وجعل القمر فیهن نورا » قول کریم

الهیسمندہ فی السموات ایله تاویل ایدیور لر کافه کوا کبک فاسکده ساج
 اولسی افاده ایدن نصوص شرعیه ده شرفورود در بعض علمای
 اسلامیه مز « فلك » کوا کی حامل بر جسمدر دیدیلر بعض علمای
 تخام فلك « مداری » یعنی فراغدن سیر ایتدیکی حیزدر دیدیلر
 تفسیر رازیده بیان اولندیکی کبی بوقول جناب ضحاک ککدر جمهور علمای
 اسلامیه مزك ذهابی • بعض ظواهر نصوصدن مستفاد اولدیغنه کوره
 سمانك بزه مرئی اولمیدر بعض علما سمانك مرئی دکلدر مرئی اولان
 هوادر دیدیلر بوقولی عجایب مخلوقانده قاضی أبو بکر بن العربی
 حضر تدرندن نقل ایتشددر شو حالده جناب قاضینك سمانك کورنمه سنه
 ظاهرأ دلیل اولان نص شرعی یی مناسب بر تاویل ایله تاویل
 ایتدیکی اکلا شیلیور زیرا بویله بر تاویل لازمدر جناب آفریننده کون
 ومكانك یدی عدد زمین خلق بیوردیغیده نصوص شرعیه ایله
 ثابتدر بعض اعلام علما سبع ارضین ایله مراد • یدی اقالیم ارضیه در
 دیدیلر بعض فحولین بنامده « مراد » بربری اوستنه متر کم طبقات
 ارضیه ده دیدی « سلطان المفسرین ابن عباس رضی عنهما رب الناس
 حضر تدرندن مروی بعض آثارده » هر ارض بزم ارضمز کی اولور
 انده علما مز کی علما موجود اولدیکی « نقل وروایت اید لمشدر »
 ارضك بسیط اولمسیله ظواهر نصوص شرفورود ایتشددر کما فی قوله
 تعالی « والارض بعد ذلك دحاها » مذهب جمهور علمای اسلامیه بودر

بعض خولین نخمام کرویت ارضه قائلدر « امام نحرالدین رازی »
 کرویت ارض قائل اولان علمای محققیندندر بو اعلام علما حضراتی
 « دحاها » قول کریم سبحانینینی ارض بسیط اولماغله برابر جناب
 حَقِّک انی سکنای حیواناته صالح قیلمسیله « تأویل ایتمشلردر » ظاهر
 بعض نصوص سیران شمسی مفیددر کما قال الله تعالی « والشمس
 تجری مستقر لها . وجدها تطلع . وجدها تغرب » اه

عصر سعادت پیغمبریده وبعده « طلعت الشمس وغربت الشمس »
 کلامرینی اهل شریعتک استعمال ایتدکاردن اکلا شلیدیغنه کوره
 « ظاهر اولان » هر تقدیر حرکت و سکونی صراحة وارد دکلسه ده
 « ارض ساکنندر بز معاشر مسلمینه » ظواهر نصوص وارده ایمان
 وفهم کرده لری اولان مسائله قول جمهور علمایی اخذ ایتدک واجبدر
 « و جمهور علمایه مخالف بعض خولینک تأویلی اُخذ وتلقی » تأویل
 مناسب اوزرینه جاری اولدیغی ایچون فساد دینی موجب مضرت
 دینییه یی جائز دکلسه ده « تأویلی بر داعی قوییه مستند اولمیدیغندن
 جمهور علمای قولانی اُخذ وتلقی ونصوص شرعیه دن فهم واستنباط
 ایتدکاری مسائله اعتماد ائمه مز دین مبین اسلامیه مزه ده موافقدر »
 اگر دنیلر سه که فلاسفه اهل هیئتندن علمای متأخرین احوال سماواته
 باقق ایچون اختراع ایتدکاری اُرداد و آلات واسطه سیله کونده
 کوا کدن بشقه برشی یولمیدیغنی « و اوزرنده بوانمیدیغمز اُرضک

جمله کواکبدن بر کره اولدیغی « وشمس منیرک و سـ طـ طـ واقف
 و محوری اوزرنده دوره بطیئه ایله دائر اولدیغی « واطراف شمسده
 أرض وجمع کواکبک « جاذبیت ناموسی « دنیلان برناموس واسطه
 سیله دوراتی « سائر کواکب کی أرضمز کده ایکی دوره سی اولوب
 بریمی حول شمسده سنه دوریه سیدرکه فصول اربعه اندن متولددر
 دیگر محوری اوزرنده دوره یومیه سیدرکه بعضاً مقابله نور شمس
 واسطه سیله بعضاً ده شمسده استتاریله اوقات لیل ونهار اندن متولد
 اولدیغی و بزم کوردیکمز لون کبودی « کوکک « ایسه « لون جو »
 اولوب لون سما اولدیغی زیرا عند لرندن سماوات یوقدر خلاصه
 بومند کور آتی منوال سابق اوزره اولدیغی ادعا ایدوب شو کوردیکمز
 أرضدن بشقه دیگر أرضک موجودیتنه حکم ویرمز لر ایشته اهل
 هیئتک شو أقوال مسروده لری شایع اولمش و بونلر ایله نصوص
 شرعیه مقدمه بیننده توفیق ه التفات و مبالات ایتـ کـ سـ زین بر چوق
 عوام مسامینده أخذ وتلقی ایتـ شـ لدر بنابرین أقوال مسروده فلاسفه
 ایله نصوص شرعیه بیننده توفیق نصل صورتیاب حصول اولور و بونده
 حکم نه در

جوابا بز دیرزکه « ظواهر نصوص شرعیه به اعتقاد و معانی
 شریفه لرینی فهم وادرا کده مستنبطات جمهور علمای اعلامه اعتماد »
 بزه واجب اولدیغی بیان ایتـ شـ ایدک کذلک ظواهر نصوصه مناقض

دلیل عقلی قاطع کیامی اولینجه نصوصی تأویل و ظاهرندن صرف
و تحویل بزم ایچون جائز دکلدر ذاتا بر دلیل عقلی و یا شرعی
اظهار ایتمکسزین

أمر اعتقاده علمای اعلام اسلامیة مزه تقلید یله جائز دکل
ایکن اعلام علما مزك غیر یسنه هیچ تقلید ایدرمی یز « بناء علیه »
ادعا کرده لری اولان مسائل مذکوره یی مثبت بر دلیل عقلی قاطع
اولمقسزین و یا یقینی منتج اولمیان بر دلیل ظنی یه مستند او أقوال علمای
هیئت جماعت معظمه اسلامیة مزدن بر یسنه وصولنده کلاملرینه
التفات ایتیمه رك ظواهر نصوص شرعیة یه اعتقاددن تحول . و جمهور
علمای اسلامیة مزك معلوماتلرینه اعتمادی اهل ایتماك اكا و اجبدر
و ایمانی اختلافدن محافظه ده بویله اولور اما او مسائلدن بر یسنه
دال دلیل عقلی قاطع اقامه ایتملریله برابر مقدما سرد و اتیان اولنان
کلاملری ظواهر نصوص شرعیة یه مناقض اولدیغی حالده بزلردن
بر یسنه واصل اولسه اكا لازم اولان سابقا مذکور قاعده کلیه یه
عراجعتدر یعنی نصوص مذکوره یی ادله عقلیه قطعیة یه مناسب
بر معنایه صرف و تحویل ایله تأویل ایتلیدر بنا برین ادله اهل
هیئتک حتی تحقق و شبهه بر اقیان یقین افاده ایتدکد نصرکه أقوال
مزبوره یی أخذ و تلقیده بر محذور یوقدر • بعدذا شو مقامده شبه
وارده نك ردی و تحقیقی مفروض ادله عقلیه یقینیة ایله نصوص

شرعیه بیننده توفیق حقنده بزیرزکه کواکب ناموس جاذبیت ایله
فضاده قائمدر سماءه مرکوز دکلدرد سوزلری شویله قابل توفیقدر
« کواکبک منوال مذکور اورزه اولسی زیر تصرف قدره
صمدانیه داخل عقلا جائز برأمر دز « ناموس مذکورده » اکوانده
جناب حقک وضع ایتدیکی اسباب عادیه جمله سندنده اهل هیئتک
دیدکلری کی فضاده کواکبک قیامنه دلیل عقلی قاطع قائم وثابت
اولدیغنده کواکبک سماءه مرکوزیتنی مبین ظاهر نصی تاویل ایدرز
اونص شریف « وزینا السماء الدنيا بمصایح » قول شریفدر . بوقول
جلیل الهی بی « احتمالکه » کواکبک زینت اولسیله مراد الهی
کواکب هر نقدر تحت السماء ایسه ده مرأی ناظرین حسبیله زینت
سمادر دیه تاویل ایدرز بوقولی عامدان بعضیلری قائل وامام مکی
وجناب وهب وبرچوق مفسرین عظام حضراتدن منقولدر بویله تاویل
ایدر وافلاک کواکبله مراد فضاده دوران ایتدکلری مدارلریدر حامل
بر اجسام دکلدرد دیان علمای اسلامیهمزک قولنی اخذ وتلقى ایدهرک
عندقیام الدلیل العقلی کمال سهولت ایله بعض علمای اسلامیهمزه
موافقتله برابر مسئله بی جریان ایتددرمش اولورز اما اهل
هیئتک « کور دیکمز کواکبک لون جودر » دیمه لری بوبابده
دلایلرینک غایتی نظارات مجسمه لری بیوک بیوک آلات وأدوات رصدیه
لری فضاده قائم کواکبدن بشقه بر جسمی کشف ایدمه مدیکندن

وجود سمایی انکار ایتشدردر • بزیر زک آسمان زمیندن بک اوزاق
 مسافه لرایله بعید اولدیغندن اونظارات مجسمه نك جسمیت سمایی
 کندیلرینه علی وجه التحقیق کو سترمه صالح بر آلت اولماسنه مانع
 نه در حقیقت جسمیه سمایی مخفی قیلان لونی اولق ممکندر • ایشته
 انلره ییلدیز لردن غیر بر جسمك موجود اولماسنی ایهام ایدن بودر
 مع هذا علمای اسلامیة مزدن قاضی أبو بکر بن العربی حضر تلی
 سمانك غیر مرئی اولدیغنه قائلدر و ظاهر نص شریفی تأویل ایتشدردلکن
 قاعده مسلمه در که عدم وجداندن عدم وجود لازمکلمدیکی کبی
 عدم رؤیتندنه عدم وجود سماوات لازمکلمز « واللہ تعالی اعلم »
 أمانعلمای هیئتک ارض کره در دیمه لری کرویت ارضه دال بر دلیل
 عقلی قاطع اقامه ایتدکلرند صکره کرویت ارض قائلیتمزه بر مانع یوقدر
 ظاهری بساطة ارضی اشعار ایدن نص شریفی تأویل ممکندر « والارض
 بعد ذلك دحاها » قول کریم سبحانیسنی ارض مبسوط اولیوب
 حد ذاتده کره اولمغله برابر جناب حق انی سکنایه قابل سطح قیامشدر
 دییه تأویل ایدرز نخر رازی و بعض اعلام علما بوک قائلدر لکن
 کرویت ارضه قائل علمای کرام نزدنده دلیل قاطعک ثبوتی محققدر
 (والله تعالی اعلم)

اما شمس حول ارضده سائر دکلدرد یالکز محوری اوزرنده
 غایت بطی بر دوری وارد در ارض ایکی کره دور ایدر بریسی حول شمسده

سنوی دوریدر که بوندن فصول اربعه تولد ایدر دیگری محوری اوزرنده
دوریدر که اوقات لیل ونهار اندن متولددر سوزلری بوزیر تصرف قدره
الله ده داخل جائزات عقایه دندر بوکا دلیل عقلی قاطع اقامه ایتدکلرنده
قائل اولمه مزه بر مانع یوقدر سیران شمس مشعر ظاهر نصوص شرعی
تاویل ایلرز قال الله تعالی « والشمس تجري لمستقر لها » بوقول کریم
ربانیسی جریان شمسدن محوری اوزرینه شمسک دورانیدر یوم قیامتک
ورود یله عالم سموات وارض خراب اوله جفی زمانه قدر بالاستقرار
شمس جریان و دوران ایدر بعده دورندن توقف ایدر شمسک فلکنده
سیاحتی ایسه حیزی دیمک اولان فلکنده کی محوری اوزرنده دور
ایتمسندن عبارتدر بعض عامانک فلکی حیزایله تفسیر ایتدیکیمده
تقدم ایتمش ایدی اما ارضک حرکت ویاسکوننی تصریح ایدن نصوص
شرعیه هر تقدیر شرفورود ایتماش ایسه ده لکن فلکک جریان
وسباحتمک شمسه نسبتی و شریعت غرای محمدیه و اهالی اعصار اسلامییه
مزنک ظواهر استعمالاتی صورته ظاهرده ارضک سکوتنه و کوردیکمز
حرکت یومییه ارضک اولمیوب شمس و کواکبک اولدیغنه دلالت ایدیور
اگر اواهل هیئت حرکت یومییه ارضک اولوب محوری اوزرنده
دوراته بر دلیل عقلی قاطع اقامه و اتیان ایدر لر سه شمسک ظاهرا سیرانی
مشعر ظاهر نص شرعی بی صرف و تاویل بزه ممکندر تسکیم دوره یومییه
شمس ایچون اولوب ارض ایچون اولماسنه دلالت ایدن نصوصده

استعمالات شرعیه و اُهای اعصار . اسلامیہ دہ بویولده استعمالارینی
جریان ایتدرمه لری عامہ یه مشاهد ظاهره ابتناء واستعمال ائمہ ونظر
لرنده الفت واستثناس ایتدکاری شیئہ مجاراة در بنا برین شو مسئله
عمومه شرح و بیان اولمق رسل نغام حضراته مأذونیقی ویرلیان مسائل
جمله سندن اولمش اولور زیرا مسئله مذکورہ نک کشف حقیقی مقاصد
شرائعدر

مقاصد شرائع توحید . عبادات : نظام معاش ، بیاندر کذلک
مسئله مذکورہ بیان اولنسه اکثر عوام ناس اکلامازلر بلکی بیان
حقیقت مسئله عامہ یه لاسیا مشاهدات مبصراترینه مخالف کوران
ضعفایه موجب اضطراب واختلال اولوب . معارف وعلوم سنبه
جناب نبویه علیه اکل التحیه واسطه سیله اعظم مسائل . وادق مباحثک
فهمنه اهلیتی حائز اولان عظمای صحابه کزین رضوان الله علیهم اجمعین
افندیلمزہ مسئله مذکورہ نک فهمی کوج اولور دیعه یورز بلکه عامه یه
باخصوص بادیه نشین اعرابه کوج اولور دیورز بر کره نظر اولونسون
دوران ارض وارض اوزرنده . عالمک بولنسیله برابر برشی ساقط
اولیوب میاه ابحارده ارضدن منفصل اولماسی وبونلره ممائل
مباحث اعراب جاهلیه یه سویله نیلسه انلر کوز لریله حول ارضده
دوران ایدن شمس وکواکب اولدیغنی کوررایکن عجبا حاللری نصل
اولوروشوقولی تصدیقندن امتناع ومخالفت ایده جکاری بداهتده

دکلیدر كذلك امریعت وامثالنی انکار واستبعاد لرینه باق لکن
 شرابع مقاصد لری اولدیغندن مسئله ارض کی مسائلی بیانندن مغنیدر لر
 اما بیان بعث کافه اناهی مصاح ترغیب وترهیبی حائز اولمسایله مقاصد
 عالیة شرایعدن اولدیغنی ایچون هر نقدر عوام ناسه فهمی عسیرایسه
 ده ترک اولنیه رق بادوتذکار ودلائل اقامه واتیان اولنمشدر «ملخص
 مقال» بودر که شرع شریف مطهر استعمال مباحث ومسائلی ظاهر
 حال اوزرینه جریان ایتدیرر بوکا اصطلاح اغتمده مجاز دیر لر مقدا
 بیان اولنان شعبات نکاتدن ناشی اظهار حقیقت ایلمز بالآن کوریور
 زکه دوران ارضی اعتقاد ایدن لر استعمالرینی علی ما هو الظاهر جریان
 ایتدیر یور لر خورشید جهانتاب طلوع ایتدی آفتاب عالم آرا غروب
 ایتدی دیور لر بر یسندن ده کونش بزه مقابل کلدی ویا خود کونشدن
 مستوردن قالدق دنیلدیکنی ایشتمک ایشته بونلر بالمشاهده صوره
 ظاهریه قائم اولدیغندن استعمالات لغویه ده جائز در شوراسنیده
 بیانسی لازم اهم مسائلدندر که بومقامده تقریر ایتدی کمزک کافه سی بزه
 جائز اولوب مضرتی حائز دیگلسده لکن او اهل هیئتک صحت
 مقالرینه دلیل عقلی قاطع قائم اولمدیجه اقوال مسروده یه قائل
 اوله میز بعد اقامه الدلیل قائل اوله بیلرز والاظواهره تمسک ایدم رک
 مؤدای نصوص شریفه دن بالمفارقة اقوال واجماع لرینه التفات ایتمکه
 معذور زیرا انلر سلف لری اغلاط شبهاتدن مصون قاله مدقلری کی

غلطاندن معصوم و وارسته‌ده کلردر « والله تعالی أعلم »

واما عامای هیئتک سہاوات سبعہ • عرش • کرسی • لوح • قلم • جنت • نارک • وجود لرینی انکارلری بانبندہ بردلیللری یوقدر یالکز اشیای مذکورہ فی نظارات مجسمہ لری ایلہ بولوب کورہ مدکارینی دلیل ایراد ایدیورلر بزدرزکہ بولہ مامق نفس الامر دہ بولنامغی مستلزم اولہ مزبوقاعدہ جمیع عقلانزدندہ مسامدر انکار لرینہ اعتبار یوقدر بعدذا بزوانلر لایتناہی بر فضانک موجودیتندہ متفقز • جناب خلاق کائناتک فضا دہ قیام کوا کی بعدالتسلیم عالم کوا کبک ماوراسندہ او اجسام عظیمی خلق و ایجاد بیورمسنہ نہ مانع واردر اجسام مذکورہ مسافات شاسعہ ایلہ بزدن بعید اولور دہ نظاراتلری انلری ادراک ایدہ مزیاخود نظارات ایلہ اجسام مذکورہ نک برنجی سی اولان سماء دنیا ادراک اولنیور دہ آلات مذکورہ ایلہ جسمیتلرینک عدم تحقیقی موجب بر لون ایلہ اوسمانک ملون اولمسیلہ نظاراتلریلہ جسمیت کوا کبدن بشقہ برشی کوروب تحقیق ایتدیرہ میورلر بناء علیہ اوفضای واسع نامنتہای شاسعہ موجود اولدقلری حال دہ اجسام مذکورہ فی انکار ایدرلر اجسام مذکورہ فی خلق بیوروب کوا کب کی فضای نامنتہا دہ اقامہ ایتک زیر تصرف قدرت ربانیدہ داخل امور جائزہ دن اولدینی وموجودیتلرینی • صادق شارع اعظمز علیہ صلوٰۃ اللہ افندمز حضر تلری إخبار بیوردینی ایچون

أشیای مذکوره نك موجودیتلرینه ایمان ایدرز حقلرنده شرفوارد
اولان نصوص تأویل ایتك بزه جائز اوله مز زیرا وجود لرینه مناقض
دلیل عقلی قاطع ثابت اولمديغندن تأویلی داعی برشی یوقدر انلرك مجرد
انكارلری دلیل یقینی اولمق شویله طورسون دلیل بیله ظنی اولماز
« واللہ تعالی اعلم »

امازمینك یدی عدد اوله سنی انكارلری بونك ایچوننده دلیلاری
یوقدر نهایت مقالاری بزی کواکب و أرضمزدن بشقه برشی کوره
میورز دیمه لری دکلی ، اولا بز دیرزکه نصوص شرعیه بی فهملرینه
اعتماد اولنان جمیع علمای اسلامیه مز یدی عدد أرضك موجودیتنه
دلالت ایدن نص شریفی أرضك منفصل ومستقل اوله رق یدی عدد
اولسیله ظاهری اوزره جمله اتفاق ایتماشلردر بعضیلری سبع أرضین
ایله مراد اقدس إلهی زمینزك اقالیم سبعه سیدر دیدیلر دیگرلری
مراد إلهی طبقات أرضیه مزدر دیدیلر ثانیاً یدی عدد أرضدن هر بر
لری أرضمز کی منفصل مستقل اوله رق کافه سند مز عالمز کی بر عالم
بولندیفی ابن عباس رضی عنهما رب الناس افندمز دن منقول اثر
اوزرینه مسئله بی جریان ایتدیرر ایسه ك جسمتمده أرضمزدن
یوزبیک درجه لرنده بیوك اولان شو کواکب عظیمه بی ایجاد بیوران
خلاق کون و مکان حضرتلرینك أمر مذکوره زیر تصرف و قدرت
صمدانیسنده داخل جائزات عقلیه دن برشیدر و خدای بی انباز جهان

أفرینك أرضمزدن بشقه التي عدد أرض دها خلق بیور مسنه وارضمن
 حقنه قائل اولدقلى كبی او التي أرضكده فضاده قائم اوله سنه مانع
 نه در نظاراتلریله عدم رؤیتلری قر عند الحاق یعنی نهایت کونلرنده
 رؤیت اولندیغی کبی اراضی سنه مذ کوره مظالمه سطح اولدیغندن در
 یاخود بین السکوا کب انلری کور بیور لر جمله کوا کبدن ظن
 ایدیور لر اصوللرینه ابتناء بونده برغر ابته یوقدر چوقلری کوا کبده
 سکانك موجودیتنی زعم وادله ظنیة ایله استدلال ایدر لر که کتابلرینه
 اطلاعن معلوم اولوریدی عدد أرضك موجودیتنه بر مانع اولدیغی
 تبین ایدوب مخبر صادق علیه السلام افندمزدده وجودلرینی خبر
 ویردیکی ایچون یدی عدد أرضك موجودیتنه ایمان ایدرز انکار
 لرنده سندلری اولمیان او اهل هیئتك کلاملرینه التفات اتمه یز وبونی
 تفاسیر متقدمه ایله حتی ابن عباس حضر تلرینك قولیله توجیهات متقدمه
 ایله برابر تفسیر ایتك بزه جائزدر « والله تعالی أعلم »

قرآن کریم الهیده بر نص وارد که ظاهرینه متقدمین ومتأخرین
 اهل هیئتك رأیلرینه کوره شبهه وارد اولور اونص شریف قصه ذی
 القرنینده «حق اذا بلغ مغرب الشمس وجدها تغرب فی عین حمئة» قول
 شریف صمدانیدر ظاهر نص شریف مذکور عیون ارضدن بر عینده
 کونشك غروبنی مشعر در معنای ظاهر یسیله بوکا ایمان ایتك بزه
 واجب ایدی لکن شمسك ارضدن چوق بیوک اولدیغنه وجسم

کبیرک جسم صغیر ده مقدار لریله باقی اولمه لریله دخولی محال
اولدیغنه کذلک شمسک نفس ارخده غروبی اوله میه جکنه وائلدن بری
دلیل عقلی قطعی اولدیغندن عامای اسلامیه من نص شریف ظاهر ندن
معنای غیر متبادره صرف تحویل ایله دیدیلر که والله اعلم براده الشریف
الصمدانی - واجب تعالی حضرت تلرینک بو قول الیه سیله مراد اقدس
سبحانیسی شواول یورکه ذو القرنین حضرت تلری بلاد مغربدن او مکانه
واردیغنده بحسب رؤیه الرائی شمس صیجاق سیاه چامورلی بریکار
دروتمه غروب ایدر بولدی زیر اسواحل بلاد غربیه ده شمسه ناظر
کیمسه بحر محیط غربیده شمسک غروبنی تخیل ایدر بحر محیط
مذکور غایت صیجاق و مظالمدر بالفعل عین مذکورده شمسک غروبنی
مراد الاهی دکلدر ایشته بونک ایچون «وجدتها تغرب» بیوروب منلا
حکایه امر واقعی افاده ایدن عبارتدن «فاذا هی تغرب» دییه نصاً افاده
بیورمدیلر بزاردن بر آدم بویله جه بز فلان یردن کونشی دکزده
ویا خود طاغ ارقه سنیده غروب ایدیور کوردن دیر حالبو که بویله
دیبان هیچ بریسنیده غروب شمس اعتقاد ایتزیا لکز صورة رؤیتی
حکایه ایلر شوتأویل تفسیر رازی - جلالین - کواشی - دن مأخوذدر
عجایب مخلوقاتنده منقوله در نحر الدین رازی حضرت تلری بیوربورلر که
«اهل اخبارک» شمس حقیقتا عینیده غروب ادر دیمه لری
خلاف یقین بر کلامدر کلام الله شوتهمندن بریدر بنا برین تأویله صیوروتدن

بشقہ برشی قلمز (واللہ اعلم)

فصل ثانی • شؤن ملائکہ و جن حقنہ و واردنصوص شرعیہ دن
 شبہہ لک ردی بیاتندہ در باب ثانیہ ملائکہ یہ ایمان اولنسی واجب
 ایدیکی بیان اولندی ایدی شمعی دیرزکہ احادیث متواتر • ومشهور •
 و کثرت و تعدد طرقدن تواتر درجہ سہنہ واران احادیث آحاددن
 شرفورودنصوص شرعیہ نک جملہ سی واجب تعالی و تقدس حضرت تیرینک
 بر طاقم اجسام لطیفہ نورانیہ خلق بیوردیغنه دلالت ایدیورکہ او
 مخلوقات مقدسہ یہ ملائکہ دنیلور ملائکہ کزین حضراتی
 ایستہ دکاری شکل ایله تشکله قادر لردر بین السماوات والارض
 اومسافات شاسعہ پی یک ازبر زماندہ قطع ایدرلر کوزہ کورنمزلر
 قوای بشریہ نک عاجز قالدیغی أفعال عظیمہ پی پیار لر نزول
 أمطار ؛ تدبیر عالم حیوانات ؛ و نباتات ، وامشالی کی شوحوادث
 کونیہ یہ موکلدرلر أفعال عظیمہ یہ اقتدار ابصاردن احتجاب ،
 تشکله اقتدار کی بعض خاصہ لردہ ملائکہ کرامہ مشابہ «جن»
 تسمیہ اولنان اجسام آخریدہ جناب حقک خلق وایجاد بیوردیغنه
 نصوص شرعیہ شرفوارددن لکن ملک کی نورانی دکاردن
 بنی بشر کی مکلف لردر مؤمن طاعلری • عاصی • کافر لری واردن
 اجسام لطیفہ اولہ لریلہ برابر أشكال مختلفہ ایله تشکله واعمال
 شاقہ یہ اقتدار کی احوالات وموجودیت ملائکہ وجنہ متأخرین

و بعض فلاسفه متقدمین طرفلرنده شبهه لر ایراد اولمشدره اوشبهه
 - لر ک ردی بیاننده و او شوئن و احوالده ملائکه و جنک ایجادینه قدرت
 جلیله الیه نك عظمتنه ایمان نزدنده بقا پذیر اوله میان شبهه مذکوره
 - نك بر طاقم او هام و خیالات اولدیغنی اظهار حقننده بسط مقال ایده
 - رك بز دیر زکه عقلا جائز ممکن مواردنر که قدرتی عالمی واسع اولان
 او واحد قیوم ذو الجلال حضرتلری ملائکه کزینی ماده هوا و اثر
 کبی بر ماده لطیفه دن خلق بیور مشلردر متأخرین اثر کائناتی
 طولدیران کور نیان جدا لطیف بر ماده در دیور لرایشته جناب
 حقده ماده مذکوره دن ملائکه بی باله کون ذکرا و لنان او خواص
 و شوئه صالح بر کیفیتله اجزا لرینی جمع بیور مشلردر تنکم جناب حق
 قبول حیاتی اکتساب کیفیتله عناصر جمادیه دن حیواناتی باله کون
 عناصر ایچون قوت و ادراک اولدیغنی حالده ادراک و حرکت و بونلره
 مماثل بر طاقم قوت حیوانده اجتماع ایتدر مشدر بناء علی ذلک
 ملائکه بی عدم رؤیتمز هوا و اثر کبی شفافیت لطافتلرندن در عند
 مؤمنانه مزده رؤیتک محض تخلیق الیه ثابت اولدیغنه مبنی مذکور
 جد اظاهر برشیدر ممکندر که واجب تعالی حضرتلری تصرف
 قدره الله ده داخل عقلا جائز اموردن اولمسیله برابر تشکله
 اقتدار لری شویله توجیهی و عقوله تقریبا بالا مکان بیان کیفیت
 ممکندر که واجب الوجود حضرتلرک « هوا ویا اثر و یا بشقه

برشیلردن برکیتته « نائلیت اوزرینه مقتدر اولدقلری بر کیفیت ایله
 اجسام لطیفه مذکوره یی تشکیل بیورمشلردر - تکشف و تکنونلری
 مراد ایتدکلری صوره اوزرینه خصوصیا فته اوله رق البسه اکتسا
 ایدرکی صوره مذکوره یی اکتسا ایده رک ابصاره او صورتده
 ظاهر اولور لر کشفی لطیفه لطیفی کشفه تحویل کی تحویلات اجسامیه
 جناب حقه اقتدار و یردیکی بنی بشرک اجراتی اولان اعمال
 کیمایه ده شو تقریر ایتزک عقوله فهمی تقریب ایدن موادواردر
 اجسام مذکوره نک تشکی نصل اولورسه اولسون حیوان و نباته
 اعطا ایتدیکی خاصه لرده افکار بشریمزه دهشت ویران اعمال نامنتهای
 صمدانی اولان الله ذو الجلاله قدره عظمت الوهیتنه مستند اولدیغندن
 هیچ بر غرابتی حائر دکلدیر او فرد قیوم اولان خدای یی انبازه
 و قدره عظیم وسعه علم الهیسنه مؤمن ذات والاسمات « ملئکه یه »
 خواص مذکوره نک حصولی استبعاد ایتزما اجسام لطیف اولملربله
 برابر قوای بشریه نک عاجز اولدینی اعمال عظیمه یی ملائکه کزینک
 اجرالری اشجار عظیمه یی قلع . ابنیه . جسمه یی هدم ایدن اعمال
 ریاحه و بیکارجه آدملرک عاجز قالدینی « اعمال قوه کهربائییه »
 نظردن صکره اجسام لطیفه اولملربله برابر اعمال مذکوره نک ملائکه
 گرامه نسبتنده بر غرابت بوله مزسک باخصوص ملئکه یه و اقتداری

احسان ایدن جناب ذات أجل مطلقدر که عظیم قدره لا یزالینه
نسبتله امر مذکور کور کوج برشیلردن معدود بیله اوله مز بعض انسانلرک
قوه بازوایله دمیری قیردقلری کورلیور بوقوت فلاسفه قولی اوزرینه
مبدأ حرکت اعضا اولان لطیف، نحیف، برنجه یعنی «ایلیکه» اخیراً
منتهی عضلات ایله اعصابک عملیدر منح لطافتیدن ایچون اجنبی بر-
جسمک اذای مصادمه سنه تحمل ایده مز بایکه قدر لازم اوزرینه زائد
جزئی دمک صعودی اوغنی بالافساد صاحبندن حیات مفارقت ایدر
بناءً علیه تظاهر ایتدیکه واجب الوجود حضرتلری صلب و کشیفده
بولنمیان برقوتی لطیف بر ماده یه اعطایه قادردر «سبحانه من قادر علیم»
واما ملائکه کزینک اجسام سموات اراسنده کذلک بین الارضین
اولان مسافات شاسعه یی پک از بر زمانده قطع ایتلری، بوبابده دیرز که
عقلا بوکا مانع یوقدر زیر سرعت حرکت حدیسیر ایله محصور دکلددر
فلاسفه نک ارضه ساقط بر جسمک سقوطندن ایلمک ثانیه ده سرعتی
اون التی قدمدر ا کر جسم مذکور شمسه طوغری سقوط ایتسه سرعتی
او ثانیه ده درتیوز الی قدم اولور دییه ایرادات کلامیه لرینه باقهلم
اوجسم توانیدن هانکی ثانیه اولورسه اولورسه ثانیه اولی دنصکره
توانیدن اوعددک مربعمده مضروباً برنجی ثانیه ده ساقط اولان
مقداره مساوی اوله رق سقوط ایدر شو ناموسده کبی سرعتی تأمل ایله
فکر لره حیرت ویرن اجسام عظیمه نک عظمت و سرعت حرکتلری

زده لره بالغ اوله جنی یکنظرده اکلایشیایر کذلک علم هیئتده نزد فلاسفه
 ده ثابتدر که «مشتري ییلدیزی» ساعتده اوتوز بیک میل جریان ایدر
 یعنی بر طوب کله سنک رمیندن سکسان کره اسرعدر بنا برین نجم
 مند کور انسانک هر تنفسنده طقوز میل سیرایدیور هر دقیقه ده محوری
 اوزرینه دوراتنده کی اجزای استوائیه سنک سرعتی ایسه در تیوز التمش
 یدی میلدر شو حالده ساعتده هر بر اجزای یکر می یدی بیک طقوز
 یکر می دفعه قطع ایدیور دیمکدر «نجم مشتري» ارضمزدن اهل هیئت
 قولنه کوره بیک در تیوز دفعه بیو کدر شو جسم کثیف عظیمه و هر
 بر اجزاء استوائیه سنه اومسافات شاسعه پی مده جزئییه ظرفنده قطع
 ایتدیران مولای متعال حضر تلرینک قدره سامی فردایتنه بین السموات
 والارض کذا ما بین السموات اولان مسافات عظیمه پی پک ازیر
 زمانده مخلوق مقدسلی اولان ملائکه کزینه قطع وسیر ایتدیرمی
 هر قدر اومسافات شاسعه مشتري و اجزای مشتريک قطع ایتدیکی
 مسافتدن پک زیاده ایسه ده بعید دکدر نظر صحیح عقلي اقناع ایدر که
 اوییلدیزلی سیر مند کور ایله سیران ایتدیران جناب حَقْ قدرتی
 عمل مند کور جنسندن اولان امورك اعظمه صالحدر با خصوص
 اجسام ساقطه ناموسی سرعت حرکت اجسامیه نک عظمتی بیان
 ایتشد (سؤال) اهل هیئتک کتابلرنده مفصلاً بیان اولدیغنه نظراً نجم
 مشتريک واجسام ساقطه نک سرعتی واسطه جاذبیتله در ملائکه

و جنده بو واسطه یوقدر او اعمال عظیمه یی نسبت ایتدکری کائناده
 او جاذبیت نه در انلر حقیقت جاذبیتی و اجسامده موجب موجودیتنی
 کشف و اظهار دن عاجز لر در غایه ما فی الباب شمسی و سائر نک
 اطرافنده دوران کواکب دیمک اولان نظام شمسی مثالی عقلرینه
 حیرت ویرن حوادث کائناتک شوءات عالمک ظهورینه تعلیلا جاذبیه
 حکم ویرور لر دکی ثبوت جاذبیتی تسامیدن صکره دیرز که او جاذبیتی
 ایجاد وانی خاصه اجسام قیلان و کائناتده برتویاس ظهور اولان او
 حوادث عظیمه یی مذکور جاذبیتدن نشئت ایتدیران کیمدر عدمدن
 خلاقیتی ابداع و اتم نظام و اسمی یی حکم اوزرینه وضع بیوران او
 خالق لایزالک غیر یسیندر حاشا غیر یسی دکل انحق ذات قیوم احدیتدر
 ائمدی شو جاذبیت مثالی یی ایجاد و اندن حرکات سریعه یی إحداثه
 قادر جناب مولای متعال مده و جیزه ده او مسافات شاسعه یی یا وضع
 بیوردیغی خاصه ایله و یا بغیر خاصه ملائکه کزینه قطع و سیر ایتدر مکن
 عاجز دکلدر کافه سی عقلا جائز و قدرة الهیسی هرایکی امره ده صالحدر
 ملائکه کرام حقنده کی تقریر اتمزک کافه سی تشکله و اعمال
 عظیمه یه اقتدار و مده قلیله ده مسافات طویلله یی قطع و کورنمماک
 کی احوالده طائفه جن حقنده ده جاریدر استدلال بر در ارباب
 فطانت و ذکاوته مسئله خفی دکلدر (والله أعلم)

بز دیرز که ذات معالیهات پیغمبری صلی الله علیه و سلم افندمزک

معراج شریف لری اوزرینه کذلک مجلس سلیمان علیه سلام الرحمن
 بلادیندن عرش باقیسک طرفه العینده انتقال واتیانی اوزرینه ایراد
 اولنان واهی شبهه لرك اندفاعی شویانادن تبیین ایتدی قرآن کریمده
 شرفورودر که جناب خلاق جهان سلطان انبیا حضرت محمد مصطفی
 علیه اصفی التحایا افندمز حضرت تلرینی لیلۀ واحدهده مکۀ مکرمه ده کی
 مسجد الحرام الیهیدن قدس شریفده کی مسجد اقصیٰ بی سبجانی یه اسراء
 بیور مشلردر ثبوتی درجه قطعیه یه واصل بر جوق احادیث صحیحۀ
 جناب پیغمبری صلی الله علیه وسلمده شرفورود ایتشدیر که ذات
 أجل أعلا حضرت لری اوپاد شاه هر دوسریر اصطفی نعلیه ازکی التحایا
 افندمز حضرت تلرینی لیلۀ اسراده سموات علی یه اصعداد بیور مشلر
 بعده ینه او لیلۀ مبارکه ده مکۀ مکرمه یه طلوع فجر دن مقدم اعاده
 بیور مشلردر اسراء ومعراج سلطان انبیایه ایمان ایتک بزه واجبدیر
 حتی اکثر علمای اسلامیہ مز قدس الله ارواحهم حضراتی اسراء
 ومعراج شریف احمدیه بی ایمان واجب اولان جمله عقائد میاتسده
 ذکر ایلمشلردر معراج شریف بحثی بورایه قدر تأخیر مزایسه ایراد
 اولنان شبهه لرك دفعی بیان شومقامده مناسب اولدیغندیر بزرگ
 سرعت حرکت اجسامیه نقدر عظیم اولسه ینه زیر تصرف قدرة
 الله ده داخل جائزات عقلیه دن ایدیکی معلومدر دکلّی واجب الوجود
 مفیض الخیر والعجود حضرت تلرینک ذات معالی نعات پیغمبری بی لیلۀ

واحدہ دہ حرم کعبۃ اللہ دن حرم قدس شریفہ بعدہ سموات علیٰ یہ
نقل بیوروب صکرہ دہ ینہ لیلہ مبارکہ مذبورہ دہ اعادہ ایتسنہ مانع
نہ در وجود اقدس حضرت الہی یہ ایمان وشوا کواندہ کی اعمال
جلیل سبحانی یہ تبصر ایلہ نکران وحضرت خلاق جہانک رسول
محترم دیشانی حضرت محمد صلی اللہ علیہ وسلم افندمزک قبل جلیل
مناندن مبعوث بالحق بر پیغمبر دیشان اولدیغنی تصدیق وایقان ایدن
ہر اہل ایمان کذب دن معصوم صادق محقق اولان او پیغمبر عالی رہبر
افندمز حضرتلری مسافات مذکورہ دہ او انتقال سریعک حصولی بزہ
اخبار بیوردینی جہتہ قصہ معراج واسری نک تصدیقندہ توقف ایتیز
بلا تردد تصدیق وایمان وجناب حقک زیر تصرف قادرانہ سندہ داخل
امور جائزہ دن عدایلرز «واللہ الموفق»

أما مجلس جناب سلیمانی یہ بلاد یمندن عرش بلقیسک استیرلمسی
بو قصہ قرآن حکم بیان الہمیزدہ شرفورود در علم لدیندہ کتاب
جلیل صمدانیدہ بہرہ در کمال بر ذات خجستہ آیاتک یدندہ ظہوری
سردواتیان اولمشدر بعض مفسرین کرام افندیلرمز او ذات شریف
سلیمان علیہ السلامک وزیر آصف بن برخیا حضرتلری ایدی
دیور لر شو حالہ اتیان عرش بلقیس ید عالی جناب آصفدہ اللہ
ذو الجلالک اظہار واحسان بیوردینی بر کرامت اولمش اولور زیرا
حضرت آصف بن برخیا اولیاء اللہ دندو بعض مفسرین کرام عرش

بلیس اتیان ایدن بالذات نفس نفیس جناب سلیمان علیه السلام ایدی
 بیورلر شو حالدہ بو ید مؤید حضرت سلیمانیدہ جناب واجب المتعالم
 اظهار واحسان بیوردینی بر معجزه سنیه اولیور شو مقامده تأمل
 ایدن سرعت حرکت اجسام نقدر عظمتہ واصل اولورسه اولسون
 زیر تصرف قدرۃ اللہ ده داخل جائزات عقلیہ دن اولدینی نزدندہ
 ظاهر اولان انسان ذی عرفانہ شو قصہ یه ایمان واذعان صعب ورشوار
 کلز «اللہ علی کل شیء قدير»

(فصل ثالث) مطر و امثالی کی امور جو یہ حقندہ شرفورود
 بعض نصوص شرعیہ دن شبہہ لری رد بیانندہ در قرآن حکم بیان
 الہیمزده مطر حقندہ شرفورود آیات بینات ایکی قسمدر؛ قسم اولدن
 ظاهر اولان مطرک سہادن نزولیدر . قسم ثانیدن ظاهر اولان مطرک
 سہابدن نزولیدر سماء شریعت اسلامیہ مزک شرفوارد اولدینی لغت
 جلیلہ عربیہ دم معانی عدیدہ یه اطلاق اولتیور ۱ سماء مسکن ملائکہ
 کزین اولان کوکلردر ۲ ہرشی و ہر خانہ نک سقفنہ سماء دیر لر
 ۳ ہر شیئک عالینہ سماء اطلاق اولنور ۴ سحابہ سماء دیر لر ۵
 مطرہ سہا دیر لر خلافتہ دلیل قاطع ثابت اولد قیچہ نصدن متبادر معنای
 ظاہرہ اعتماد ایتہ مز لازم اولدیغنہ مبنی انزال لفظ سہا دن متبادر معنای
 ظاہریسی اولان مسکن ملائکہ اولدیغنی اعتقاد ایتک بزہ لازمدر
 اکثر استعمالات شرعیہ ده مراد بودر ظاہری سہادن نزول مطری

مشعر نص شریف ایله سحابدن نزول مطری منبی نص شریف یمنی
 تفریق ایلرز جناب حق جوده مجتمع سحاب تسمیه اولنان بخارات
 اوزرینه مطری سمان انزال بیوررلر بعده سحابدن ارضه انزال
 بیوررلر یاخود نصوص شریفه بعضا محل نزول اولی بعضا ده محل
 نزول ثانی بی یاد و تذکار ایدیور «والله اصدق القائلین» قطب العارفین
 غوث الواصلین سیدنا السید احمد الرفاعی قدس سره العزیز حضرت تلمذندن
 شو توفیقی بیانده نقل اولمشدر که مطر ایکی قسمدر بر قسمی سمان
 نازل در سبب خروج نبات بو مطر در دیگر قسمی بخارات ارض
 و ابحار دن تکیون و جو هوا یه تصاعد نصکره هبوط ایدن مطر در که
 حکم و منافعی و ارایسه ده الله اعلم بوندن انبات حاصل اولمز بعد ذل
 مطر بخارات ارضین و ابحاردن بالتکون سبب حرار تله
 جو هوا یه تصاعدندن صکره سبب بردایله سحاب اوله رق بالتحلل
 مطر اولور دییان متقدمین و متأخرین فلاسفه نک اتیان کرده
 ایتدکاری مقولات دلیل عقلی قاطع ایله ثابت و بلا شک تحقیق ایدرسه
 او حالده بر موجب قاعده متقدمه . مسکن ملائکه اولان سمان
 نزول مطر متبادر نصوص شرعیه بی تأویل بزه جائز اولور بیان
 تأویل نصوص مذکوره ده سما یله مراد بزم اوستقزده سقف اولان
 شیدر که معانی لغویه نک بریسی اولان سحاب ایشته او سماندر بو
 تأویلی امام فخر رازی سوره بقره تفسیرنده ذکر ایتمش و مراقی الفلاح

شرحنده شرنبلالی مرحومده بوکا اشارت ایتمشدر . یاخود دنیلرکه
 نزول مطر اسباب سماویه دندر جهة سمان اشعه ضیائییه سی ارسال
 اولنان حرارت شمس ایسه او جمله دن دربناءعلیه خورشیدجهانتابمز
 اعماق ارض و بحار وانهار دن جو هوایه تصاعد ایدن اجزای مائییه پی
 اناره ایده رک سجابه بالانتقال مطر نازل اولور کانه حقیقه سجابدن
 سمیت اعتبار یله مجازاً سمان اولیور « والله مسبب الاسباب » بو تاویلی
 شیخ اسماعیل حتی قدس الله سره العزیز حضرتلری سوره نبأ
 تفسیرنده ذکر ایتمشدر در فعلی کل حال ومقال شبهه او هام وخیال
 مندفع اولدی نصوص شرعیه حکم عقله له الحمد والمنة توافق ایتدی
 « والله تعالی اعلم » سؤال — رعد ، برق . صاعقه . نك حقیقتلری
 نه در فلاسفه متأخرین سجابه متکون قوه کهربائییه عملندن منبعشدر
 دیورلر و قیاس الغائب علی الشاهد قبیلندن دلیده اقامه ایدیورلر .
 جواب — علمای متقدمین اسلامیه من قدس الله اسرارهم حضرتاتی
 بوبابده اختلاف ایتمشدر در بعضیلری رعد سجابه موکل بر ملکدر
 حیث شاء الله سبحانی سوق ایدر ایشیدیلان صدای مهیب انک
 صداسیدر اکار عدده دیرلر النده آتشدن حربه لرواردر انکله سبحانی
 سوق ایدر « برق » ایشه او حربه لردن چیقار « ملک غضبلندیغنده
 اغزندن بر آتش چیقار که • صاعقه • ایشه اودر دیدیلر » اصحاب
 قول مذکور بوبابده منقول بر حدیث آحاده استنادده ایدرلر بعض

خولین علما ایسه شویولده بسط مقال و بیان حال ایدیورلر که «رعد»
 مخلوق الله دن بر مخلوقدر ملک دکلدر » بو قول حسن بصری قدس
 الله سره العزیزدن منقولدر بعضیلری رعد • برق • صاعقه •
 اجرام سحابک اضطراب واصط-کا کندن متولددر • رعد • دنیلان
 صوت هائل اندن منبعث • برق • دنیلان شیء لامعه اندن منقد حدر
 «صاعقه» آتشله برابر بولنوب او غرادیفی شیء هلاک ایدن رعد
 هائلک حرق واهلاک ایتسیدر دیدیلر • بیضاوی بیض الله وجهه
 العالی بو قولی مشهور دییه تعبیر بیورمشلرایسه ده احتمال مفسر
 مشار الیه حضرت تلرینک مراد عالی لری میان علماء معقوله مشهوردر
 دیمک اوله بو مسئله تقرر ایتدیکنده معلوم اوله که اشیای مذکورده
 علمای اعلامک اختلافی قول اول اصحابک استناد کرده لری اولان
 حدیث شریفک مخالفین عندنده صحیح اولدیغنه دلیلدر والا مضمون
 حدیث شریفک غیر یسیله حکم ایده میه جکرایدی بنابرین مضمون
 قول اولی اعتقاد بقیه عقاید اسلامیه مزکی بزه واجب دکلدرزیرا
 مستندی اولان نص متواتر و مشهور کبی حضرت رسول کبریا علیه
 اکمل التحایا افندمزدن ورودی ثابت انصوص شرعیه دن دکلدرلکن
 صواب اولان ثبوت خلافنه دلیل عقلی قطعی قائم اولدوچه احادیث
 آحادده اولسه ده حدیثه مخالفت ایتما میلددر بونلرک کافه سی تحت
 تصرف قدرة الله ده داخل امور جائزه دندر عظیم القدرة بر الله

نو الجلالك او ملكي تخليق و تدبير امور سحاب و امطاره تو كیل ایدمه رك
 حوادث مذ كوره یی یعنی صوة هائل رعد و برق و صاعقه یی اندن
 اظهار و نشئت ایتدر مسنه نه مانع وارد و اما دلیل عقلی قاطع ایله او
 حوادث ثلاثه نك افعال كه ربائییه دن اولدیغی ثابت اولورسه او حالده
 حدیث آحاد مذ كوری تأویل ایدمه بیلمرز و دیرز كه هیچ بر مانع
 یوقدر كه جناب حق بر ملك خلق بیوروب انی تدبیر شؤن امطاره
 تو كیل ایتشاردر حكم باهره صمدانیدن خالی اولمسی تصور اولنه میان
 او قوه كه ربائییه دن منبعث حوادثك مبدئی ملكك تدبیری و سبحانه
 تصرفیدر حدیث شریفده او حوادث عظیمه نك واحوال و شؤن
 و امطارك مرجعی او ملك اولدیغی تمثیل و تصویر عظمتی ایله برابر
 افاده مراد اولنمشدر ده « رعددن » صوت « ایله برق » دن
 لمعان مخاریق . ایله صاعقه دن : شراره فم . ایله تعبیر بیورلمشدر
 بونلردن مراد ایسه تمثیل و تصویر در اسلوب مذ كور لغت عربیه ده
 مستعملدر ایراد دن مقصده نه اولدیغی اربابی بیلیر بونك نظیری
 شرع شریف مطهر مزده شرفوروددر لغت عربیه ده و رودی قول
 آتیدن مستبان اولور كه شاعر ممدوحی حقنده . سماحت مروت عطا
 و احسان . ابن حشر جی دنیلان ذات والا سماتك اوزرینه مضروب
 برقبه دروننده در . ماآئنده اولان شویتنی سویله مشدر
 ان الساحة والمروة والندی * فی قبة ضربت علی ابن الحشرج

معلومدر که سماحت • مروت • عطا ممدوخ ایله برابر قبه دروننه
 وضعی ممکن اولیان معانیدندر مراد یالکنز او ممدوحه اوصفات کریمه نك
 ملازمته تمثیل و تصویر در • استعین بالله « والارض جميعا قبضته يوم
 القيمة • والسموات مطويات بيمينه » قول شریف سبحانیسی استعمال شرع
 شریفده وارد اولان نصوص شرعیه دندر مراد قدره و سلطنت و عظمت
 إلهی یی تمثیل و تصویر در دییه بو نص شریفی تأویل ایلر یو خسه
 جناب حق حوادثه مشابه دکلدر ارضی قبض ایله سماواتی یمین ایله
 بالاخذ التصاق إلهی محالدر ایشته بو تأویلمزله بادلیل قاطع ثبوتی
 مفروض او فلاسفه متأخرینك کلامی بینیه حدیث شریف مذکور
 یننده توفیق مقام ایضاحده جلوه کر بروز اولور (والله تعالى أعلم)
 سؤال - قرآن حکم بیان إلهیده جناب حقك کواکبی زینت سماء
 دنیا قیلد یعنی كذلك سمای شیاطیندن محافظه ایچون کواکی رجوم
 اوله رق خلق بیور دیغنی افاده ایدن نصوص شریفه لر واردر زیرا
 شیاطین ملائکه کزیندن استراق سمع ایچون قرب سمایه قدر صعود
 ایدر لر معلومدر که علمای هیئت اکثر کواکبک جسامتنه حتی بعضیلر
 -ینك ارضمزدن مرات ایله جسم اولدیغنه قائلدر ینه بعض آثارده
 بعض کواکبک اکبریتنه دال نصوص وارد اولمشدر بناء علی هذا
 شیاطین شو کواکب جسمیه ایله رجم اولندقلرنده انلرك ارضه
 بالسقوط ارضمزی دوچار کزند و خسار ایلمسی و طول زماندن بری

مرئی اولان او کوا کیده نقصانیت ظاهر اومسی لازم کلیرایدی • جواب -
قرآن کریمدن بالذات کوا کب کیره نك بالذات رجوم اوله سی مراد
دکدر که محذور مذکور لازمکله بلکه مراد اقدس سبحانی أعلم
بودر که نحر الدین رازی حضرتلری سورة صافات • وملك • تفسیرنده
بیوردینی کبی کوا کبدن بر طاقم شعله لر منفصل اولور انکله شیاطین
رجم اولور جهت سمان سقوطی مشاهده ایتدیکمز «شهاب» ایشته
انلردر یاخود کوا کب ایکی قسمدر بر قسمی کبیر ثابتدر تغیر و سقوط ایتمز
دیگری صغیر در سقوط ایدر شیاطینه رجم اولور سقوطی کوردیکمز
شهب ایشته بونلردر • سؤال - متأخرین اهل هیئت دیورلر که •
شهب • فضاده سابج اجسام صغیره در احیانا عند الاقتراب ارضه
منجذب اوله رق سرعت حرکتدن بالاتهاب سقوط ایدرلر • جواب -
نص قرآنی رجم شیاطیندر دیمه یور بلکه مفاد جلیلی کوا کب فی
الجملة رجوم شیاطین اولسیدر جناب حَقِّك أجسام مذکوره فی خلق
وفضاده اقامه بیورمه سنه مانع نه در بونلر جمله کوا کبدن اولدینی
حالده صغر لری حسبیله واسطه جذب ارض ایله ارضه قریتلرنده
بعضاً سقوط ایدرلر بعضاً ده جناب حق او نجوم صغیره پی استراق
سمع ایدن شیاطین اوزرینه شهاب اوله رق ارسال بیورلر بناء علیه
نص شریف قرآنیک مصداقی ظاهر اولور که جناب حق نجومی
زینت و رجوم قیامشدر زینت • نجومك کباریله « رجوم بعض

صغاری ایله در « ایمدی اهل هیئت ارسادات و آلات فلکیه لرینک
دلالت ایتدیکنک غیرینسی بیلمیورلر بزایسه له الحمد والمثنه سایه طوبا
وایه جناب رسالتنا هیده کوا کبدن رجم شیاطین اولان قسمنه واقف
اولدقکه اجسام صغیره مذ کوره نك بعضی سیدر بو حقیقت نزد مزده
اخبار صادقہ قرآنیہ منزله ثابت اولدیغندن اشکال یوقدر (والله أعلم)
سؤال - فلکیونك ارض فضاده قائم بر کره در برشی اوزرینه
مرکوز دکلدر کلاملری ثابت اولدیغنده بعض صحابه کزیندن مروی
أثر حقه نه دنیلر که سیدنا عیسی علیه السلامه ارضدن سؤال
اولمش او پیغمبر والاشان ارض . ثور . اوزرنده ثور . صخره .
صخره . ده ظهر حوت . حوت . ده بحر . بحر . ده ریخ اوزرنده
در ریحک تحتنده ده ظلمت واردردیه جواب ویرمش . جواب - شواثرک
حدیث شریف اوله رق نقلی فرض اولنسه بیلہ آیت قرآنیہ ویا حدیث
متواتر و مشهور دکلدر که بوکا ایمان بقیه عقائد اسلامیه منکی واجب
اولسون زیرا ثبوتنه یقین یوقدر سیدنا حضرت عیسی دن ثبوتی فرض
اولدیغنه کوره ضروب امثالدن اولسنیلہ تأویلی ممکندر ذاتابی مشارالیه
افندمن حضرت تلرینك کلاملرنده رموز . ضروب امثال چوق وارد
اولور ارباب تتبعه کیفیت معلومدر (والله أعلم)

﴿ فصل رابع ﴾ نصوص شرعیه دن متفرق صورته وارد شبهه لرك
ردی بیاتنده در قرآن حکم بیان الهمزده « واجب تعالی حضرت تلرینك

ابونا و ابو البشر آدم علیه السلامی ابتدا پدر و مادر وی اولمقسزین چاموردن
وَأَمَّا الْبَشَرُ زَوْجُهُ مَكْرَمُهُ لَرَى «حوا» علیها السلامیده نفس نفیس
جناب آدمدن خلق بیوردیغنی مفید « نص شرعی واردر بعض
مفسرین کرام » معنی واجب تعالی حضرت تبری جناب حوا رضی الله
عنہا بی جنس و نوع آدمیدن خلق ایتدی دیمکدر دیورلر کا قال
تعالی « وَخَلَقَ لَكُمْ مِنْ أَنْفُسِكُمْ أَزْوَاجًا » اکثر مفسرین عظام افندیلر من
« جناب حق حضرت حوایی ضلع ایسر جناب آدمدن خلق ایتدی
دییه رک بر حدیث آحاده ده استناد ایدیورلر کنلاک جناب حق
سیدنا عیسی علیه السلامی بلا اب حضرت مریم رضی الله عنہا دن
خلق بیوردیغنی قرآن کریم الہیده شرف واردر اعلام عالمای اسلامیه
قدس الله اسرارهم العلیه دیورلر که • بقیه بشرطریق معتاد اوزرینه
خلق اولنمه سیله برابر مشار الیهم حضراتک شو طریق ایله خلقتده
هانکی کیفیت ایله مراد ایدرسه انسانی او کیفیت اوزرینه خلق
ایتمکه تمام قدرتی اولدیغنی عبادینه اعلام ایچون • طرف اشرف
ربانیدن بر اشارت واردر بنابرین حضرت آدمی پدر و والده سز
و جناب حوایی مادر سز و حضرت عیسی علیه السلامی پدر سز اوله رق
بقیه بشریده ذکورا و آناتا پدر • و مادر دن خلق و ایجاد بیوردی
« وجود اقدس حضرت رب رحیمه و کمال قدره صمدانیسنه ایمان
و حیوانات و نباتاتی تر ایدن ابداع و تخلیق بیوردیغنی تصور ایدن مؤمن

ذی عرفانه آدم حوی عیسی علیهم السلام حضرت اتمك کیفیات مذکورہ ایلہ
 خلق اولئمہ لرینہ ایمان ایتك صعب و دشوار كلز زیر ابونلرك محالیتنه دلیل
 یوقدر بو کیفیت اوزره مخبر صادق علمیه افضل التحیه بزہ خبر ویر مشدر
 انسان وبقیه حیوانات عناصر ارضیه دن بالتولد صکره تفصیل مستطیبه
 ایلہ یکدیگرندن مشتق اولورلر دیمه «حق انسان و حیوانده بعض
 متأخرین فلاسفه نك سویله دکلری سوزظنون و اوهام اوزرینہ مبنی بر
 قول باطلدر» باب یقینده استنادی یوقدر

مذکور لر بو قول باطل لرینہ مذهب نشو دیورلر موضعا بیانی دیگر
 اثرمزده مسطور در ایمدی سالف البیان قاعده مقررہ مزدن یعنی
 بر نصدن متبادر معنایه مناقض دلیل قاطع اولمینجه نص شرعیمزی
 تاویل جائز اوله مدیغندن حضرت آدمك ترابدن خلق اولئمہ سی
 حقهده شرفوارد نص شریفی تاویله بر داعی یوقدر فلاسفه نك دیدیکی
 کبی دلیل قاطعك قیاسی مفروض اولسه بوبابده کی نصوص شرعیه
 مزى تاویلات مناسبه ایلہ تاویل ممکن در دیگر اثرمزده مراجعت «والله
 تعالی اعلم»

کذلک قرآن حکم بیان الهمیزده اصحاب کهفك مغاره ده
 اوجیوز طقوز سنه مکث ایتدکلری منصوصا شرفوارد در احادیث
 شریفه ده قصه لری شویله بیان اولمشدرکه اصحاب کهف دین صحیح
 عیسی علیه السلام ایلہ متدین بر طاقم ذوات اندی کفر و عبادات

اوثانه ملكرندن اجبارندن خوفًا بر مغاره يه اختفايتديلر جناب حق
 بونلره اويقوارسال ايدوب ٣٠٩ سنه حال نيامده بولنديلر سه ده
 حياتلريني ذات أجل اعلا محافظه بيور مشلرايدي اويانديقلر ندنصكره
 بنه نومه طالديلر بو حاله مطلع اولانلر باب كهفي سدوبند ايتديلر
 تفصيلنه اطلاع ارزوايدن تفاسير شريفه يه مراجعت ايتسور
 شو حال جائزات عقليه دندن زيراسنين عديده حيات نأمي جناب
 حقهك حفظ ايمه سنه بر مانع يوقدر غذا حفظ حياتده بر سبب عايدير
 اولله ذوالجلال غذا سر حفظ حياتده قادر در حيوانانده با خصوص
 نوع حياتده مده شتاده بلا اكل ولا شرب تحت التراب نأتم حيوان
 بولنور جناب حق او مدته انك حياتني محافظه ايدر كذلك طبقات
 ارضيه دن بحث ايدن بعض ذوات ديورلر كه • تحت التراب بيكلر جه
 سنه محفوظ الحيات تخمد ايدن بعض حيوانات صغيره واردر بو كاه بعض
 كشفيا تليله استشهدده ايتمشلر شمدى اصحاب كهفهك موجوديتندن
 آثار قديمه دن باحث اولانلر ك مشار اليهمه مطاع اولسه لري لازم
 كلز چوق برلر واردر كه انلر اورايه واصل دكل اياقلر يله ييله باصمامشدر .
 اصحاب كهفهك مكانلريني تعيين ايدن بر حديث شريف صحيح شرفوارد
 حكلمدر (والله تعالى اعلم)

كذلك نصوص قرآنيه وأحاديث شريفه ده شرفواردر كه رؤيای
 مناميه يا صريحاً ويا • تأويله محتاج نوع اشارتله يقظه ده حادث اموره

دلالات ایدر علمای نخبام بیوربورلرکه رؤیای منامیه ذهن نأتمده حادث
تصورات فکریه در بر قاج انواعی وارد در برنجی نوع رؤیای منامیه نك
سببی بخارات طعامیه در . ایکنجی نوع . حالت یقظه ده انسانك حق
اشیاده تفکر ایدر انسان او اشیای متفکره نی و یا مناسبتی حالت منامیه ده
کورر . اوجنجی نوع . شیطانی در ابلیس ضلالت انیس انسانلری
محزون مغرور ایتك و یا سائر مقاصد خبیثه سنی اجرا ایچون القا ایدر در
رنجی . نوع طرف اشرف حضرت خلاقدن یا صراحة و یا اشاره عباد
اللهی تبشیر و یا تحذیر در شو ایکی قسمك و حیدن جزء اولد یغنی شریعت
غرامزده نصوص شریفه بیان ایتقشدر اقسام مذکور نك کافه سی جائز
در محال عقلی بی مستلزم در کلدی قسم اخیر ایچون زمانمزده قدر توارخ قدیمه ده
شواهد کثیره منقولدر ظن ایدر که مده عمرنده آثار رؤیادن خالی
اولان يك آذر لکن فلاسفه عصر میاننده رؤیا نك قسم اخیرینی
انکار ایدنلر بوانیور محالیه وعدم وجودینه دلیلی اولمقسنین رؤیا نك
یقظه ده بر شیه دلاتنی انکار ایدبور شو نوعدن حادث اولان شواهد
بعضیلزینه نقل اولد یغنده تأویلات واهیة سخیفه ایله انی تأویل
ایدبور بزم اعتقاد مز شو نوع رؤیا یقظه ده حادث اموره دلاتنی عقلا
جائز و قوعنیده نصوص شرعیه خبر و یرد یکنندن بزا کا ایمان و تصدیق
ایلرز کذلک بعض نصوص قرآنییه و احادیث نبویه ده شرفوادردر که
سحرک حقیقتی و خارجده آثاری وارد نخبام علمایور بورلرکه

بعض صور حیوانیه یی صورتہ اخرایہ قلب ، قتل حیوان ، اضرار
 اجساد ، کبی خارجہ آثاری و حقیقتی بولنان سحر ، وارد بر
 نفس ساحر دہ جناب حقک تخصیص یوردینی خاصیتدن و یا ساحرک
 بعض رقی و عزائم استعمالدن ناشئدر و لکن خارجہ کی آثار کافہ
 خلق الہی ایلہ در ساحر دہ خاصیت مذکورہ و بعض رقی و عزائم
 استعمالی اسباب عادیه دندر عادتہ اللہ بویلہ جاریدر ساحر مذکور
 اثر لردن بر شیئک خالق اولہ مز بر قسم سحر دہا وارد رکہ حقیقہ
 خارجہ اثری یوقدر یالکیز نظر رائیدہ حادثدر ساحرک فکری
 و ہم و خیال اولہ رق تصویریدر کوران کیمسہ خارجہ وجودی
 وارظن ایدر حالبوکہ ایش اولہ دکلمدرا و صور خیالیہ یا اعمال کیمویہ
 ایلہ و یا نوامیس نور کبی نوامیس طبیعیہ استعمالیلہ حادث اولیور دہ انسان
 خارجہ بر اثر کورر لکن حقیقتی یوقدر یا خود سرعت عمل و بونلرہ
 مماثل شیلر و ساطتیلہ حادث اولور اهل سنت و الجماعت دیورلرکہ
 بعض نفوس انسانیه دہ اجسامہ تأثیر خاصہ سنی « جناب حقک »
 ایجاد ، و صور اجسامی تقلیب و اصرار ، و بونلرہ مماثل شیلری و یا بعض
 رقی و عزائم استعمالندہ اشیای سالف الذکری احداث ایتہ سنہ
 مانع یوقدر لکن کافہ سی تخلیق الہی ایلہ و اورقی و عزائم و خواصی
 اسباب عادیه قیامہ سی ایلہ درکہ اسبابک موجودیتندہ او آثار
 حادث اولور نتکم اسباب مذکورہ نک منشائی اولان بعض نوامیس

استعمالنده خارجده حقیقی اولیان اوصور متوهمه خیالیه بی جناب
حقك حق بیور مسنه بر مانع یوقدر . سؤال - اكر سحر ك
وقوعنی تجویز ایدرسه ك معجزه ابراز ایدن پیغمبرانه ذیشانه اشتباه
ساحر لازم كلیر . جواب - پیغمبران كزین من عند الله ادعای رسالت
- ایدر جناب انلك یدعالیلرنده معجزه اظهار یله انلری تصدیق ایدر
ساحر رسالت ادعا ایده مزأ كرادعای رسالت مراد ایدرسه جناب
حقك حكمت بالغه سندن دركه ساحرك یدنده أمر خارق عاده بی
اظهار اتمز ویاخود ادعای رسالت ایدرسه حقیقت أعمال سحریه بی
اوزرینه جناب حق بر كیمسه بی مطلع قیلارده سحر مذکور معجزه به
ملتبس اولمقده حكمت إلهیه دندرنتمك نحر رازی حضرتلری بابلده
مدلكرك نسه سحری تعلیم اتمه لرنده كی حكمتی بویله جه سردواتیان
بیور دیلرایدی ایشته معجزه ؛ سحریننده فارق اولان بودر . سؤال -
فلاسفه متأخرین نوع اولدن اولان سحری انكار ایتدیله یعنی نفسنده بر
خاصه واسطه سیله یا بعض رقی و عزائم استعمالیله قلب صور وغیری
اضرار كبی بعض حقایقك یدساحرده ظهورینی انكار ایتدیله .
واحتجاج ایدیلر كه اوو سائطار اسنده عقلا ارتباط و خارجده حقایق
مزبورده نك ظهوری یوقدر زمانزده حقیقت حال سحردن كشفیا
- تمزك كافه سی ایدی ساحر انده ظاهر امور غریبه نك جمیعی خارجده
حقیقی اولیان صور وخیالات اولدیغی وحدوث امور مذکور .

استعمال بعض نوامیس ایله ویاخفت ید و سرعت عمل ایله اولدیغنی
افهام ایدیور و اکثر ساحرلرده عیانا اظهار ایتدکاری حقیقی اولیان
برطاقم صور خیالیله اولدیغنی اقرار ایدیورلر . جواب - بز معاشر اهل
سنت دیرز که وسائط مند کوره یعنی خاصیت نفس ؛ استعمال رقی
وعزائم بینیه خارجه حقائق مند کوره نك ظهوری یتنده ارتباطك
عدم ظهور ندن نفس الامرده سحر ك بولنامسی لازمکمز ارتباط
اکثریا موجود اولورده انلر مطلع اوله منزلر باخصوص سحر أمر
خفیدر وجود سحره قلیدر مقناطیسکه بلاشك حدیدی جذب
ایتدیکی ازمنه متباعده زبری معلوم مع هذا اوفیل سوفلر جذب حدید
خاصه سنك حقیقته الآن مطلع اوله میورلر مقناطیس نه ایچون
حدیدی جذب ایدیورده بشقه سنی جذب ایتمه یور غایه مقالیری بوکه
اجزاء مقناطیسیه نك ترکیبی جذب حدیدی اقتضا ایدیور ایش ایشته
بوعقلی اقناع ایتیمان غیر واضح بر سبب محملی ادعادر بز دیرز که ید
ساحرده او حقائقك ظهوری محض تخلیق الهی ایله در بوکامانع یوقدر
سبب موجب اولسون اولسون مساویدر اما زمانزده حقیقت حال سحر دن
کشفیا تمزك جمیعندن ایادی سحرده ظاهر امورك کافه سی صور
خیالیله اولوب خارجه حقیقی اولدیغنی نزد مزده وضوحا تبین ایتدی
سوزلری اولادیرز که انلر ك هر ساحر ك احوالنه کسب اطلاع
ایتدکاری تبلیم ایتمه زانیا سحر دن نوع اولك عالم دن مفقود یتنه مانع

یوقدر نتکم علوم عدیده زمانزده مفقود در شو حالده یالکر اطلاع
 پیدا ایتدکاری نوع ثانی قالمش اولیور بز نوع اولک دائمی صورته
 وجودینه قائل اوله یورز زمانزده دکل بلکه نفس الامرده عزیز
 الوجوددر صاحبی انجق ازمئه متطاوله ده بولنه بیلر «ملخص مقال»
 بز معاشر اهل سنت لاسیما ازمئه غایر ده سحرک وجودینه قائلز نصوص
 شرعیه مز وجودسحری اثبات ایدیور. آثار محض تخلیق الله در هر نقدر
 شوزمانده وجودینه مطلق اوله میورسه قده «والله أعلم»

کدک بعض احادیث آحادیه شرفوارددر که اسقام و اضرار
 بعض اجسامده بعض اعین آدمینک تأثیری واردر بعض آیات کریمه یی
 بعض مفسرین اعلام اونک اوزرینه حملا تفسیر ایتشلردر . اصابت
 عینی متقدمین متأخریندن بعض فلاسفه انکار ایده رک دیورلر که
 بعید دن عین عمل ایدوب اجسامده اسقام و اضرار ایله تأثیری فصل
 تعقل اولور بز دیرز که اصابت عین جائزات عقلیه دندر حقیقت
 تأثیر خلق الهی ایله در . عین . سبب عادیدر تأثیر مذکورک عقلا
 بیانی اصناف حیوانات اراسنده اختلاف اولدینی کی انسانلرده خواص
 بشریه لرنده مختلفدر لر بناء علیه نفسنده سملی و ضرر طبیعتی حائز
 کیمسه لرك انسانلر ارا سنده بولنمه سنه مانع نه در اويله بر طبیعتی
 حائز انسان بر شیء متعجبا نکران و بنفسه اکا متوجه اولسه شخص
 مذکورک کوزندن هواده بر ماده سامه منفصل اولور مرئی یه

وصولنده مضرت ایراث ایدر عند الانفعالات النفسیه کوزدن بر ماده نك
 انفصاله هانکی مانع وارد در نتم عند الانفعال دموع انفصال ایدر
 خواص حیواناتده صاحب اختصاص بر ذات دیور که بر ییلان
 وارد در انك نظری اصابت ایدن اوآنده هلاك اولور صوتی استماع
 ایدنده هكذا هلاك اولور اکر بو مسئله صحیح ایه افعی ی مذکورك
 قتالیتی کند یسندن ایریله رق مصابه واصلی اولان سمی واسطه سیله
 پیوسنه حصول اولور دیمك مقناطیسه وانك حدیده تأثیرینه نظر ایدن
 کیمسه بعیددن اجسامده تأثیر عینی استغراب ایتمز سقم اجسام و اضرا ده
 تأثیر عینندن ذکر ایتدی کمز احادیث شریفه ده ثابت اولاندر اما
 عینك مبانی عظیمه یی هدم : جبال جسمیه یی شق، ایتسی ودها
 بونلره مماثل شیلرک ظهوری قصص و بین الناس شائع اخبارك منقول ایتدر
 بنابرین نصوص صحیحه شرعیه مزده وارد اولمدیغندن معتقد علیه
 دکلدر « ملخص مقال » اسقام و اضرا ر اجسامده تأثیر عینه قائلز
 انك وجودی تخلیق الہی ایلہ در زیر نص شرعیمز بویله وارد در
 عقلا بوکا مانع اولمدیغنی کی محالیده مستلزم دکلدر « واللہ اعلم »
 کذلک بعض احادیث آحادیه ده وارد اولدیکه « طاعون جن
 طائفه سنك اورمه سندن حصوله کلیر » اطباء دیورلر که مرض طاعون
 فساد هوادن ناشی فسادمدن ظاهر اولور بز دیرز که اقوال اطبا
 تحقیقنده شویله دیمك ممکندر که طاعونده سبب اصلی جفی بنی آدمه

«وهو يدملر بنى افسد ايله» جناب حتمك تسليط ايمه سيدربناء عليه
اندن نمود بالله عدد طاعونيه تولد ايدر ايمدي نص شرعى سبب اصلى في
بالا خبر اراندن «وخز جن» ايله كناية بيور مشدر اطبا ايسه
سبب اخيره مطلع اولوب اطلاعلى مقدارى سويله يه بيا مشلر شو
— حال ده براشك قالمور، والله اعلم —

سؤال — حديث آحادده شرفوار ددر كه داناي سائر كائات عليه
اكل التحيات افندمز حضر نلرى «عاهت وبلايه كرفتار مر بضرى»
صاغلام صحیحلك ياته كتمر مه يك «وارسلانندن فرار ايدر كي مجنوم
اولان خسته دنده فرار ايت زدينه يا قلاشمه» بيور مشلر، ديكر
حديث شريفنده امراضك آخره تجاوز وسرايتى يوقدر . بيور مشلر
ينلر نده توفيق نصل اولور . جواب — معلومدر كه اعتقاد اهل اسلام
يرشئك بطبعه تاثيرى اولميوب هر اثر تخليق الهى ايله پيوسته ظهوردر
جناب حق آثار ايجون اسباب عاديه ايجاد ايدر ذات صمدانىسى
اسبابندن او آثارك تخلفنه قادردر . عمر انسانى محتومدر زياده و نقصان
اوله مز انسانه مقدردن بشقه سى اسابت ايتمز بنابر ين مرض فلانينك
بطبعه تاثيرينى صاحبينك غريبه تجاوزنى وانسانه سرايت مرض ايله
تقدير الهى اولان اجلندن اول موتى اعتقاد ايمك انسان ايجون
جائز اوله مز بوراى مقرر اولديغنده بزديرز كه الله اعلم بمرادرسوله
المحترم ممكندر كه جناب رسالتآب اكرم عليه صلواة الله المفخم افندمزك

« لاعدوی » قول شریفندن مراد سامیسی شودر که بطبعه تأثیر امراضی و قبل الاجل اماته ایله اعتقاد « عدوی » جائز دکدر لکن جدري . جذام . سل . و بونلر مثلی بعض امراضه بر رایحه کریمه و ماده سامه بولور که صاحبندن بالانفصال اکثریا مغالط و مقارب اولارده مرض حدوثه سبب عادی اولور بنابرین ذات حقایق آیات حضرت نبوتنا هینک او بر حدیث شریفلریله اشارت بیوردینی ایشه سالف العرض بیانکرده مزاولان مؤدا اوله شده برد . تخمه . حرارت . و امثالی مرضه سبب اولدینی کی کذلک مریضدن منفصل او رائحه خبیثه و ماده سامه صحیح مغالط خسته لکنه سبب عادی اولور فعلی هذا بر انسان امراضک بطبعه مؤثر اولدینی اعتقاد ایله برابر اسباب عادیه دن تحاشیا امراض مذکوره اصحابندن اجتناب ایدر و تحاشیسی تقدیر الهی به مانع اوله میه جفنی و عمرینی اوزون ایده میه جکنیده بیلر سه صحت اعتقاد ایچون شروط مذکوره به مراعات ایله برابر اونک تحاشیسنه بر مانع شرعی یوقدر « دانای سرائر جبروت علیه افضل التحیات افندمز حضر نلری طاعون حتمده » اولدیفکرز بلده ده طاعون ظهور ایدر سه خارجه چیقما بیک ظهور ایتدیکی بلده به داخل اوله بیک « بیوردیلر بعض علما دیورلر که علیه الصلاة والسلام افندمز ، او بلده دن چیقمه بک بیورملریله کانه سزلری تقدیر الهیدن فرار قورتارر ظن ایدیور سکز دیکی مراد پیوررلر

کذلك دیگر حدیث شریفند مراد سعادت لری «طاعون اولیان بلده»
 اقامت کنز انفس کنز ایچون اسکن عیش واستراحت کنز ایچون اطمینان
 دیمکندر مع هذا متوکلا علی الله وثقة بالله انسان ایچون اصحاب امراض
 ایله مخالطه یه بر مانع یوقدر زیرا مخالطتله حصول ضرر غیر مقطوع
 بهدر «سلطان المتوکلین رسول الثقلین . علیه وعلى آله صلوٰۃ رب
 العالمین افندمز حضرت لربنک» بر صحنه مجذوم ایله برابر ثقة بالله
 تعالی اکل طعام بیوردینی روایت کرده ارباب یقیندر شو مقامده
 گذران ایدن تحقیقات موشکافانه مزی تأمل ایله بین الاحادیث
 الشریفه توفیق ظاهر ومسئله عدوی حقنه اعتقاد مسلمین اولور
 «والله اعلم»

سؤال - حدیث آحادده شرفوارددر که جناب حق بر ملک
 خالق بیوروب عروق ارضه موکل قیامشدر جناب رب العزة یردن
 بر جهته زلزله مراد ایتدیکنده او ملکه امر وفرمان بیورر لملک
 مذکور او جهته طهارینی تحریک ایدر اوراده زلزله حصوله کلیر
 فلاسفه دیورر لکه زلزله جوف ارضه انخره ویا میاهک احتباسندن
 حادث وحرارتله منضغط اولور روی زمینیه منفذده بولنه -
 مدیغندن زلزله دنیلان او حرکه شدیداندن حاصل اولور بزدر زکه
 حدیث شریفده شرفوارد امره عقلا بر مانع یوقدر لکن اقوال فلاسفه
 دلیل قاطع ایله ثابت اولور سه حدیث شریفی تاویل ممکندر جناب

حق جوف ارضه کی انجره ومیاهک تدبیرینه او ملکی موکل قیامشدرده
 حدیث شریفده بوندن جناب حق عروق ارضه بر ملک موکل
 قیامشدر دییه کنایه بیورمشلردر بناء علیه جناب حق بر جهته
 زلزله ظهورینی مراد بیوردیغنده او ملکه امر وفرمان بیورر ملک
 انجره . ومیاهی . تسلیط واوجهت دروننده حرارتله انلری تضییق
 ایدرده زلزله حصوله کلیر حدیث شریفده بوندن اوجهتک طمرینی
 تحریک ایدر دییه تعبیر بیورمشلدر انجره نک ارضی عظیمی تحریک
 ایتمه سنک عامه نک فهم ایتمه لری صعب اولمقدن ناشی کنایه ایرادینه
 بر مانع یوقدر « واللہ تعالیٰ اعلم »

سؤال - بعض کتابلرده عقل استبعاد ایده حک مبالغه فی حاوی
 اجسام متقدمینک جسامتی حقنده اثرلر بولنیور بونلر هر تقدیر عقلا
 محال دکلسه ده لکن درتیک سنه لک تاریخنن اعتبارا اجسام محنطه
 اوزرینه آثار ارضیه دن باحث اولانلر اجسام مذکوره فی کشف
 ایله اجسام زمانیه من کی اجسام اولدیغنی سویله یورلر بوبابده نه
 دیرسکیز . جواب - بزدرزکه بوبابده ثابت اولان « جناب حق اُمم
 ماضیه لی ذکر بیورمشلردر فقال تعالیٰ وکان اصدق القائلین « کانوا
 اشد منکم قوة » طالوت حقنده ده « وزاده بسطة فی العلم والجسم »
 بیورمشلردر وبعض متقدمینه تقریعا « وایذا بطشتم بطشتم جبارین »
 بیورمشلردر بونصوص شریفده اشکال اولدیغنی کی اکتشاف وغیری

معارضه ایتمز اما عوج بن عنق قصه سنده شایع اولان او جسامت بدنیه
سی کذلک حضرت آدم علیه السلامک سر سعادت سیما به بالوصول او زون
اوله رق صکره قیصالمه سی کی منقولات حقنده امام ابن قتیبه قدس الله سره
احادیث مشکله شر حنده بیور یورلر که بو منقولات کتاب وموثوق
ذوانک اتیان کرده سی دکادر اسنادی یوقدر امام ابن فورک قدس الله
سره احادیث متشابهه شر حنده حضرت آدم علیه السلامک طول
قامتی حقنده کی روایات موثوق دکادر زیرا بونده بز خبر صحیح
یوقدر حد زائد دن خارج میان ناسده متعارف معهود خلقتک خلافه
خلقت جناب آدم ثابت اولماشدر دیور بز دیرز که ابن فورکک
کلام صحیح بخاری ده کی حدیث صحیحه معارضدر که آدم علیه
السلامک طولی التمش زراع ایدی انسانلر حتی شمدی یه قدر
قیصالمقدن زائل اولدی بیور لمشدر تحقیق بودر که اجسام متقدمینک
جسامتی حقنده احادیث شریفه نک نبوتی فرض اولندیغنده واحدیث
شریفلری تاویل نمکندر متقدمین زمانمزها لیسندن مبالغه دن خالی
جسما کبرایدیلر حضرت آدم علیه السلامک التمش زراع اوله سی کی
بوده محقدر که اسباب عادیه دن ایچون ازمنه متطاوله ده اجسام
کو جلمکه باشلادی حتی الان معروف شو اجسام مقدارینه بالغ اولدی
آثار ارضیه دن باحتلرک کشفیاتی ایسه اجسام کو چکلکده شو مقداره
وصولد نصکره در صحی مفروض احادیته مراد ایسه ازمنه قدیمه

اهالينك اجساميدر طول اعمار متقدمينده شوقدر سويله نيليوركه
قرآن حكيمده حضرت نوحك قومي اراسنده بيك دن اللي سنه نقصان
اوله رق مكث بيوردنغي بيان اولمشدر احاديث شريفه ده حضرت
آدمك بيك سنه معيشت بيوردنغي سردواتيان قياغشدر بو عقلا
برأمر نمكندر محال دكلدر جائز دركه مقدا اعمار بشر اوزون ايدي
صكره اجساملري تناقصه باشلا دي حتى شوحد معلومه بالغ اولدي
« والله تعالى أعلم »

﴿ خاتمه ﴾

﴿ نسأل الله حسن الخاتمة ﴾


اقامه حدود ، سد ثغور ، تجهيز جيوش ، اخذ صدقات ، قهر متغلبه
ومتلصصه ، وقهر قطاع طريق ، ووليلري اوليان صفري تزويج ،
وبين العباد واقع منازعاتي قطع وحقوقه اولان شهادتي قبول ،
وجمععه ، وبيرام ، نماز لريني اقامه . ايله برامام همام ك نصبي شرعا
مسلمينه واجيدر . بونلر بين المسلمين امام اولمقزين تمام اولمز مسلمانلر
امور لرنده او امام مقدسه مراجعت ايدرلر دات قدسي سما امامانه لر
دره مفاسد . حفظ مصالح . بيورز طباعك مسارعت اطعامك
منازعه ايتديكي شيلردن منع بيورر ناس هر امور لرنده او جاب امام
المسلمينه اعتماد امر و فرمان قدسي عنوان خلافلري نهى جلالت آيت

خسروانه لری مقتضایله عمل ایدر لر صحابه کز بن رضوان الله
 علیهم اجمعین افندیلمز پادشاه انبیاء علیه اصفی النجایا افندمز حضرت تلی
 بالا پرواز عالم جبروت اولدقد نصکره نصب امام اوزره اجماع ایتدیلمز
 حضرت ابو بکر الصدیق رضی عنه الله الشفیق افندمز شوامرامامت ايله
 قائم بریسی لازمدر باقیکز آراء مستحسنه وافکار مستصوبه لریکزی
 بالاتیان اجماع ایدیکز بیور دقلرنده هر جانبدن حضرت صدیق اعظمی
 تصدیق ایتدیلمز بریسیده بزم امامه احتیاجمز یوقدر دیمدی شرع
 شریف احمدیه یه مخالف اولمیان و امر ظاهریه و باطنیه ده جمیع
 آحاد ملت اوزرینه امام المسلمین افندمز حضرت تلیینه اطاعت و اجبدر
 زیرا واجب تعالی حضرت تلی استعین بالله « اطیعوا الله و اطیعوا
 الرسول و اولی الامر منکم » بیور مشدر اولی الامر دن مراد • علمای
 اعلام • وولات امور • در ذات رسالتناه علیه صلواة الله افندمز
 حضرت تلی « حدیث شریفلرنده » امیرمه اطاعت ایدن بکا اطاعت
 و امیرمه عصیان ایدن بکا عصیان ایتمش اولور « ۲ بکا اطاعت ایدن
 جناب حقه اطاعت و بکا عصیان ایدن جناب حقه عصیان ایدر و امیرمه
 اطاعت ایدن بکا اطاعت ایتمش اولور « بیور مشدر در « امام و الاهام
 بر جئنه ذی اهتمدر ورأی سعادتده اعدایه قارشو مجاهدین مجاهده
 محاربه ایدر و حضرت امام ايله مضرت اعدادن انسان کنیدیسنی محفظه ایدر
 أعداء دین و ملت و مفسدین اوزرینه خلیفه ذیشان حضرت تلیینه

نصرت واعانة ايتك واجب لايق اهم اموردر امير المؤمنين «خليفة»
 رسول رب العالمين افندمز حضر تلرينه صدق صميمته محبت «صلاح»
 توفيق . رشاد . نصر . سداد ايله حق احق خلافتينا هيلرنده دعا
 ايتك جمله مزه فرض عيندر زيرا صلاح امام المسلمينده صلاح ملت
 واردر بعض سلف شو معنای مؤيد بويله بيور مشلردر که طرف
 اشرف حضرت مناندين بکا بر دعای صالح احسان وعطا اولنسه انی
 خليفة رسول کبریا بريا اوله رق کویا اولور ایدم انتهى

(دعا)

نسألك اللهم وتوسل اليك بعظمة ذاتك العلية وصفاتك السمية
 وباسمائك السنية وبروحانية سيدنا محمد صلى الله عليه وسلم خير البرية
 ان تحفظ وتنصر وتؤيد وتوفق حضرت مولانا امير المؤمنين وخليفة
 رسول رب العالمين . مولانا السلطان الاعظم ؛ والخالقان الانخم .
 سلطان سلاطين العرب والعجم ، وظل الله على صنوف الامم . السلطان
 ابن السلطان « محمد رشاد خان » خامس ابن السلطان الغازي « عبد المجيد
 خان » بن السلطان الغازي « محمود خان » ايد الله خلافته الى آخر
 الدوران . اللهم اجعل هذا الكتاب خالصا لوجهك الكريم
 ووسيلة للفوز بجنات النعيم اللهم امين وصلى الله على سيدنا « محمد » وعلى
 آله واصحابه الطيبين الطاهرين والحمد لله رب العالمين





3 1761 07294854 0